

## **Pexanialivaisi Jesucristo pelivaisi, San Mateo peyaquinaelivaisi**

*Jesucristo pijasalinaivimi yabara pelivaisi  
(Lc 3.23-38)*

<sup>1</sup> Mapalivaisije Jesucristo pijasalinaivimi pelivaisi. Jesucristo rabaja Davidpijinë pemomoxiyajuvënë. Davidpijinë pijinia Abrahampijinë pemomoxiyajuvënë.

<sup>2</sup> Copiaya Abrahampijinëmi xaina pexënato. Pevënë Isaac. Isaacpijinë juya pexënato xaina. Pevënë Jacob. Jacobpijinë juya pexi xaina. Pexiyajuvënë pevënë Judá. Judápijinë pematapijinëbeje, pejuyapijivi ata, xaina.

<sup>3</sup> Judápijinë juya pexënatobeje xaina. Itsanë pevënë Fares. Itsanë Zara. Bajaraponëmibeje penapijiva pevënë Tamar. Farespijinë juya pexënato xaina. Pevënë Esrom. Esrompijinë juya pexënato xaina. Pevënë Aram.

<sup>4</sup> Arampijinë juya pexënato xaina. Pevënë Aminadab. Aminadabpijinë juya pexënato xaina. Pevënë Naasón. Naasónpijinë juya pexënato xaina. Pevënë Salmón.

<sup>5</sup> Salmónpijinë juya pexënato xaina. Pevënë Booz. Boozpijinë penapijiva pevënë Rahab. Boozpijinë juya pexënato xaina. Pevënë Obed. Obedpijinë penapijiva pevënë Rut. Obedpijinë juya pexënato xaina. Pevënë Isaí.

<sup>6</sup> Isaípijinë juya pexënato xaina. Pevënë David. Bajaraponëmi nacuaevecsiniëmi. Davidpijinë yacajërëta Uriáspijinë pijavami. Nexata bajarapajivibeje juya pexënato xainabeje. Pevënë Salomón.

<sup>7</sup> Salomónpijinë juya pexënato xaina. Pevënë Roboam. Roboampijinë juya pexënato xaina. Pevënë Abías. Abíaspijinë juya pexënato xaina. Pevënë Asa.

<sup>8</sup> Asapijinë juya pexënato xaina. Pevënë Josafat. Josafatpijinë juya pexënato xaina. Pevënë Joram. Jorampijinë juya pexënato xaina. Pevënë Uzías.

<sup>9</sup> Uzíaspijinë juya pexënato xaina. Pevënë Jotam. Jotampijinë juya pexënato xaina. Pevënë Acáz. Acázpijinë juya pexënato xaina. Pevënë Ezequías.

<sup>10</sup> Ezequíaspijinë juya pexënato xaina. Pevënë Manasés. Manaséspijinë juya pexënato xaina. Pevënë Amón. Amónpijinë juya pexënato xaina. Pevënë Josías.

<sup>11</sup> Josíaspijinë juya pexi xaina. Pexiyajuvënënevënë Jeconías. Jeconías pematapijinë, pejuyapijivi ata, xaina. Pamatacabi Israel nacuapijivi cobecëbiaya caponatsi Babilonia nacuyabelia, bajarapamatacabi naexana Jeconíaspijinë.

<sup>12</sup> Bajaraxuacujinae Jeconíaspijinë juya pexënato xaina. Pevënë Salatiel. Salatielpijinë juya pexënato xaina. Pevënë Zorobabel.

<sup>13</sup> Zorobabelpijinë juya pexënato xaina. Pevënë Abiud. Abiudpijinë juya pexënato xaina. Pevënë Eliaquim. Eliaquimpijinë juya pexënato xaina. Pevënë Azor.

<sup>14</sup> Azorpijinë juya pexënato xaina. Pevënë Sadoc. Sadocpijinë juya pexënato xaina. Pevënë Aquim. Aquimpijinë juya pexënato xaina. Pevënë

Eliud.

<sup>15</sup> Eliudpijinë juya pexënato xaina. Pevënë Eleazar. Eleazarpijinë juya pexënato xaina. Pevënë Matán. Matánpijinë juya pexënato xaina. Pevënë Jacob.

<sup>16</sup> Jacobpijinë juya pexënato xaina. Pevënë José. Bajaraponëmi María pamona. Bajarapovami Jesús pena, ponë yabara: “Cristo, ponë Dioso athëbëvetsica itorobatsi jivi pecapanepaenexa,” jaitsi.

<sup>17</sup> Nexata Abrahampijinëmita petaxuxuabicujinae jivi penaexanaponaejava, trecenëta naexana Davidpijinë. Bajaraxuacujinae icatsia Davidpijinëmita petaxuxuabicujinae jivi penaexanaponaejava, trecenëta icatsia naexana Jeconíaspijinë. Pamatacabi Israel nacuapijivi cobecëbiaya caponatsi Babilonia nacuyabelia, naexana Jeconíaspijinë. Bajaraxuacujinae icatsia Jeconíaspijinëmita petaxuxuabicujinae jivi penaexanaponaejava, trecenë pijavata naexana Jesucristo jane baja, ponë Dioso athëbëvetsica itoroba jivi pecapanepaenexa.

*Pacuenia Jesús naexana yabara pelivaisi  
(Lc 2.1-7)*

<sup>18</sup> Jesucristo itsa naexana mapanacuataje, naexana mapacueniaje. Copiata Josébeje Maríabeje najumejaitabeje penapitsinexabeje. Nexata baja María jejai Josébeje penapitsinexabeje. Bajaraxuacujinae penapitsivajënaeyabeje, María nayapëtane penacoxitsijava Espiritu Santo pejamatabëcueneta.

19 José, María jane baja pamonanexa, bitso penajamatabëcueneriviabinë. Bajaraxuata José apo jitsipae daxitajivi pitabarata pevajunupaebijava María penacoxitsijava. Nexata picani José bēpēnēa jamatabējumai tsaponaponae:

—Itsanējavabelia María nacoxita. Nexata ajumējibia copatsianajē. Apo pitsinē baja tsane María tajavanexa, jamatabējai picani bēpēnēa tsaponaponae José.

20 Pamatacabi abaxē José bajarapacuenia namatabēxainaponapona, majitsinaebota José tsitanaitajētatsi Dioso pitorobinētsica, ángel. Nexata ángel jumaitsi Joséjavabelia:

—José, xamē raja Davidpijinē pemomomē. Pētsa cujunavame nepitsijava María nijavanexa. Tsipaji raja panacueto María yacotaponapona, Espiritu Santo saya pejamatabëcueneta nacoxita.

21 Bajarapova exanaena penacuetonēyo. Vēnērubianame bajarapanacuetonēyo Jesús. Tsipaji raja bajaraponē capanepaena daxita pijajivi pibisiacuene pexanaeneconimivecua.

22 Bajarapacuenia María penacuetonēyo exanaena pecopiapatsinexa pacuenia baja cajena bajayata Diosojumepaebinēmi profetanēmi Dioso pejamatabëcueneta tajēvelia vajunupaeba. Profetanēmi bajayata tajēvelia bajarapanacuetonēyo yabara jumaitsi mapacueniaje:

23 Petiriva apo naperabëquenatsinejeva pebijavabelia, nacoxitsiana. Exanaena penacuetonēyo. Vēnērubianatsi Emanuel. “Emanuel,” pejaijume: “Dioso nacayajava,” pejaijume,

jai bajayata tajëvelia profetanëmi Dioso pejamatabëcueneta, jai ángel majitsinaebota Joséjavabelia.

<sup>24</sup> Nexata José piamajitsinaecujinae naëcota. José jumecovënëta pacuenia itorobatsi ángel. Nexata baja José pijaboyaberena María barëpata pijavanexa.

<sup>25</sup> Itsiata abaxë José apo imoxoyobi pijava penamataxainaenacuetonëyo pevecuanaexanaevajënaeyatsi. Bajarapanacuetonëyo jane baja José vënëruba JESUS.

## 2

*Pacuenia tulupu perubenaejava pecanaëcobivi najetarubena petaenexa Jesúsñëyo yabara pelivaisi*

<sup>1</sup> Jesús naexana Belén tomarata, Judea nacuata peecaetomarata. Bajarapamatacabi nacuaeavetsinë Herodes Judeanacua eveta. Nexata Jesús penaexanaecujinae, pebijivi, tulupu perubenaejava pecanaëcobivi, pata tajënacuajavavetsina. Pata Jerusalén tomarajavabetsina.

<sup>2</sup> Tulupu perubenaejava pecanaëcobivi yanijobapona jivijavabelia:

—¿Detsa jota barëcatsi panacuetonëyo naexana judíovi pepo pevetsinënexa? Payapëtaniji bajaraponëyo penaexanaejava. Tsipaji baja cajena pataniji bajaraponëyo penaexanaejavata penaitajëtsituluputo. Bajarapatuluputo pataniji patajanacuatareca. Bajaraxuata paponainajë mabetsinaje patataenexa bajaraponëyo, bajaraponëyo pitabarata yaiyataeya patamatabacabëta

patatonubenaenexa, jai tsaponae jivijavabelia tulupu perubenaejala pecanaëcobivi.

<sup>3</sup> Nexata Herodes, Judeanacua pevetsinë, vënëlivaisitane tulupu perubenaejala pecanaëcobivi bajarapacuenia pejumaitsaponaejala jivijavabelia Jesúsnyo yabara. Nexata Herodes bitso najamatabëxaina. Daxita Jerusalén tomarata pejinavanapaevi ata bitso najamatabëxaina.

<sup>4</sup> Nexata Herodes junata daxita sacerdotevi penamatacaitorobivi, judíovi pecujarubivi yajava, penacaetuatsinexa Herodes pijabota. Nexata Herodes jumaitsi penacaetuatsivijavabelia:

—Bajayata profetanë tajëvelia itsa vajunupaeba Cristo penaexanaejavanexa, ¿detsa jota yabara: “Bajarajota Cristo naexanaena,” jai? jai Herodes.

<sup>5</sup> Nexata penacaetuatsivi jumaitsi Herodesjavabelia:

—Belén tomarata raja naexanaeyapaeba, Judea nacuata peecaetomarata. Bajayata baja cajena Diosojumepaebinëmi profetanëmi tajëvelia vajunupaeba bajaraponë penaexanaejavanexa Belén tomarata. Bajayata Diosojumepaebinëmi profetanëmi peyaquinaelivaisita bajaraponë penaexanaejavanexa yabara tajëvelia jumaitsi mapacueniaje:

<sup>6</sup> Belén tomarata naexanaena jivi pepo pevetsinënexa. Bajaraponë jane baja evetsiana Dioso pijajivi, Israel nacuapijivi. Bajaraxuata Judea nacuata penaetomaraxi, daxita tomaraxivecua, Be léntomara cajena bitso peyaiyataetomaratsi tsane,

jai baja cajena mapacueniaje bajayata tajëvelia Diosojumepaebinëmi profetanëmi peyaquinaelivaisita, jai penacaetuatsivi Herodesjavabelia.

<sup>7</sup> Bjaraxuacujinae Herodes muetsia junata tajënacuvetsina pepatsivi, tulupu perubenaejava pecanaëcobivi. Nexata Herodes jumaitsi tulupu perubenaejava pecanaëcobivijavabelia:

—¿Detsa baja pajuametobeje xaina bajarapatuluputo penaitajëtsicujinae? jai.

<sup>8</sup> Nexata petsipaebicujinaetsi Herodes itorobalia bajarapamonae Belén tomarabelia. Herodes jumaitsi tulupu perubenaejava pecanaëcobivijavabelia:

—Paponaremelia Belén tomarabelia. Xaniavaetsia pajaitsianame bajaraponëyo. Itsa pacaxitarabianame, panevajunucaponaeremena. Nexata xanë ata nalianë tsane. Yaiyataeya tamatabacabëta tonanucaejitsianë bajaraponëyo pitabarata, jai Herodes tulupu perubenaejava pecanaëcobivijavabelia.

<sup>9</sup> Nexata jane baja tulupu perubenaejava pecanaëcobivi ponalia Belén tomarabelia. Nexata bajarapamonae namutualia penajetarubenaejavata, jemata icatsia napebeta tuluputo, patuluputo bajarapamonae tane pijanacuatareca. Nexata bajarapatuluputo bajarapamonae matabanajetarucatsi. Matapania itsajota Jesúsñëyo pena barëecatsi pematatsënëatsia, bajarapatuluputo rucojopa.

<sup>10</sup> Tulupu perubenaejava pecanaëcobivi itsa tane bajarapatuluputo, bitso barëya.

<sup>11</sup> Nexata bajarapamonae boyalia itsa joneya, tane Jesúsñëyo, pena yajava. Nexata tulupu

perubenaejava pecanaëcobivi yaiyataeya  
 pematabacabëta tonubenajunua Jesúsnyo  
 pitabarata. Bajaraxuacujinae pecapatsicajonixi  
 matapana, penamatamotsijavanë pejebicajonixi.  
 Nexata Jesúsnyo rajuta orojavanë. Rajutanua  
 petuxujuvijavabeje. Itsajava inciensovënëjava.  
 Itsajava mirravënëjava.

<sup>12</sup> Bajaraxuacujinae tulupu perubenaejava  
 pecanaëcobivi meravi majitsinaebota Dioso  
 itavetatsi penaviabiyanima nacuaevetsinë  
 Herodesjavabelia. Nexata tulupu perubenaejava  
 pecanaëcobivi saicaya namutua baja naviaba  
 pijanacuayabereca.

*Pacuenia José barënajetabajirava Jesúsnyo Egipto  
 nacuyabelia yabara pelivaisi*

<sup>13</sup> Tulupu perubenaejava pecanaëcobivi penavi-  
 abicujinae, Dioso pijaángel meravi José majitsi-  
 naebota tsitanaitajëtatsi. Nexata ángel jumaitsi  
 Joséjavabelia:

—José, nonotapunare baja. Barëponare baja  
 penacuetonëyo, pena yajava. Barënajetabajiravare  
 Egipto nacuyabelia. Bajarajotalia  
 barëponaponaename. Matapania icatsia itsa  
 catsipaebianatsi, barënaviatsiaremena. Tsipaji  
 raja nacuaevetsinë Herodes tsiquirinëyo  
 tsimaxërenajitsiatsi pebeyaxuabinexatsi, jai ángel  
 Joséjavabelia.

<sup>14</sup> Nexata José nonotapuna. Piamajitsinaemer-  
 avi baja José barëpona Jesúsnyo, pena yajava.  
 Barënajetabajirava Egipto nacuyabelia.

<sup>15</sup> Bajarajotalia José barëponapona bajayajebi.  
 Matapania baja Herodes itsa tëpa, José



barëpatsijitsiarena Israel nacuayaberena. Bajarapacuenia tocopiapatatsi tsipaji baja cajena bajayata Diosojumepaebinëmi profetanëmi Dioso pejamatabëcueneta tajëvelia jumaitsi Jesús yabara mapacueniaje: “Taxënato icatsia junatsiarenajë penaviatsinexa Egipto nacuaverena,” jai ra Dioso, jai baja cajena bajayata tajëvelia profetanëmi Jesús yabara.

*Pacuenia nacuaevecsine Herodes pijajivi itoroba pebinacuetoxi pebeponaenexa yabara pelivaisi*

<sup>16</sup> Nacuaevecsine Herodes picani jumaitsi tulupu perubenaejala pecanaëcobivijavabelia: “Itsa pacaxitajarabianame bajarapanacuetonëyo, panevajunucaponaeremena,” jai picani Herodes Jesúsneyo yabara. Itsiata tulupu perubenaejala pecanaëcobivi caxitajarabi ata Jesúsneyo, apo vajunucapona Herodesjavabelia. Nexata Herodes ita yapëtane tulupu perubenaejala pecanaëcobivi apo pevajunucaponaejavatsirena, caxitajarabi ata Jesúsneyo, Herodes bitso anaepana. Nexata Herodes pijajivi itoroba. Jumaitsi:

—Pabeponaename daxita pebinacuetoxi Belén tomarata, Belén tomarajumavelia penaebonëjava ata. Daxita papebinacuetoxi abaxë apo xinae acueyabi pavaibeje, pabeponaename. Pejananaexanaenacuetoxi ata pabeponaenane, jai Herodes pijajivijavabelia.

Bajarapacuenia Herodes pijajivi itoroba pebinacuetoxi pebeponaenexa, Jesúsneyo picani peyavabeyaxuabinexatsi. Tsipaji tulupu perube-

naejava pecanaëcobivi Herodesjavabelia tsipaeba paepatota taxuxuaba petaejava tuluputo.

17 Itsa bajarapacuenia pebinacuetoxi beponatsi Belén tomarata, copiapata jane baja pacuenia baja cajena Diosojumepaebinëmi profeta Jeramíaspijinë bajayata tajëvelia yaquina pebinacuetoxi pebejavanexatsi yabara. Bajayata baja cajena profeta Jeramíaspijinë peyaquinaelivaisita tajëvelia jumaitsi mapacueniaje:

18 Belén tomarajumaverena, Ramá tomarata, ayaicuenia matanueyabiana. Raquelpijiva pemomoxi pexi matanueyabiana. Itavetsi atatsi tsane, itsiata apo copatsi tsane bitso penajamatabëxainaejava. Tsipaji pexi totëpaenatsi,

jai bajayata tajëvelia profeta Jeramíaspijinë peyaquinaelivaisita pecoxibeponaejavanexatsi yabara bajarapatomarata.

19 Nacuaevetsinë baja Herodes peputëpae, Dioso icatsia pijaángel itoroba Joséjavabelia. Nexata ángel meravi majitsinaebota José tsitanaitajëtatsi Egipto nacuata.

20 Nexata ángel jumaitsi Joséjavabelia:

—José, nonotapunare. Barëponaename baja tsiquirinëyo, pena yajava. Barënaviaremelia baja icatsia Israel nacuyabelia. Tëpa rabaja ponë picani jamatabëbeyaxuabatsi tsiquirinëyo, jai ángel majitsinaebota Joséjavabelia.

21 Nexata baja José nonotapuna. Barëpona tsiquirinëyo, pena yajava. José icatsia barënaviata Israel nacuyabelia.

22 Nacuaevetsinēmi Herodespijinē pexēnato pevēnē Arquelao. Nexata Arquelao eveta Judeanacua paxa pevēnamuto. Nexata José ita vënëlivaisitane nacuaevetsinēmi Herodespijinē pexēnato pevetsijava Judeanacua, José cujunava Jesúsnyo pebarēponaējava Judea nacuyabelia. Majitsinaebota José Dioso itavetatsi Jesúsnyo pebarēponaeyaniva Judea nacuyabelia. Nexata José barēpona Jesúsnyo Galilea nacuyabelia.

23 José ita barēpata Jesúsnyo Galilea nacuyabelia, Nazaret tomarata barēpatajopa pebarēecaenexa Nazaret tomarata. Bajarapacuenia José Nazaret tomarata ita barēeca Jesúsnyo, copiapata jane baja pacuenia baja cajena bajayata Diosojumepaebivimi profetavi tajēvelia jumaitsi. Diosojumepaebivimi profetavi bajayata baja cajena tajēvelia jumaitsi Jesús yabara mapacueniaje: “Ponē Dioso itorobijitsiatsica jivi pecapanepaenexa, bajaraponē yabara jivi jumai tsane: ‘Mara ponēje Nazaret tomarapijinēje,’ jai tsane,” jai baja cajena bajayata tajēvelia profetavimi Jesús yabara.

### 3

*Pacuenia Juan jivibautisabinē Dioso pitorobilivaisi jivi tsipaeba petusato nacuata yabara pelivaisi*

*(Mr 1.1-8; Lc 3.1-9, 15-17; Jn 1.19-28)*

<sup>1</sup> Jesús ita baja xaina bejamatabēcuene treinta pavaibeje, Juan jivibautisabinē najetaruca Judea nacuatusatōjava.

<sup>2</sup> Juan jivibautisabinë Dioso pitorobilivaisi jivi tsipaebanajetaruca. Jumai tsanajetaruca ma-pacueniaje:

—Dioso rabaja pijajivi pevetsimatacabinexa, imoxoyo baja pevajënae pecopiapatsinexa. Nexta baja pacopabare pibisiacuene paneexanabi-abijava. Panajamatabëcuenepënëyorore Diosojavabelia, jai tsanajetaruca Juan jivijavabelia.

<sup>3</sup> Bajarapacuenia Juan Dioso pitorobilivaisi jivi itsa tsipaebanajetaruca, copiapata jane baja pacuenia Diosojumepaebinëmi profeta, Isaíaspijinë, bajayata tajëvelia yaquina Juan pelivaisi. Juan jivibautisabinë Dioso pitorobilivaisi jivi petsipaebanajetarucaejavanexa yabara, yaquina. Profeta Isaíaspijinë peyaquinaelivaisita tajëvelia jumaitsi mapacueniaje:

Tanejumelivaisipaebinë vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetarucaejitsia petuxanenë. Batoroviaexananua namuto. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeyarena,” jai tsane tanejumelivaisipaebinë,

jai profeta Isaíaspijinë bajayata peyaquinaelivaisita Dioso pitorobilivaisi Juan jivi petsipaebanajetarucaejavanexa yabara.

<sup>4</sup> Juan naxatata camellonata pexanaejava. Naepacëta cuerobocoto. Pexaejava ëbosese, jabëra yajava.

<sup>5</sup> Juan petsipaebilivaisi pejumetaenexatsi, muxunapatabiabatsi Jerusalén tomarapijivi,

Judea nacuapijivi ata, Jordánmene imoxoyopijivi ata.

<sup>6</sup> Nexata bajarapamonae pibisiacuene pexanaejavami, roviaia Diosojavabelia navecuapaebapona. Nexata bajarapamonae Juan bautisabapona Jordán meneta.

<sup>7</sup> Jivibitsaëtoxaneto pata Juanjavaberena pebautisabinexa picani Juan. Bajarapamonae apo jumecovënëtsi ata Dioso pitorobilivaisi, jamatabëcuenenavëxaniabiaya jamatabëjumaitsi:

—Juan itsa nacabautisabiana, Dioso nacapanepaena, jamatabëjai.

Nexata Juan itsa tane ayaibitsaëtoxaneto fariseovi, saduceovi ata, pepatsijavarena Juan picani pebautisabinexa, nexata Juan jumaitsi bajarapamonaejavabelia:

—¡Panejamatatabëcuenenavëxaniabivi! Pacuenia jomo rëcëpa itsa tane isoto petajuenajetarucaejava, bajara saya paitsimë. Dioso rabaja papecananeconitsia exanaematacabinexa, pacaimoxoyotapona. Itsiata acuenebi tsane pan-vecuapanepaenexa Dioso papecananeconitsia exanaematacabinexa.

<sup>8</sup> Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovënëtavanapare. Nexata daxitajivi pacayapëtaena pepacuene baja panecopabijava pibisiacuene paneexanabiabijavami. Pacayapëtaenanua panenajamatatabëcuene pënëyorotsijava Diosojavabelia.

<sup>9</sup> Jamatabëcuenenavëxaniabiaya pëtsa panajumaitsimë: “Vaxaitsi cajena Abrahampijinë pemomoxitsi. Nexata Dioso nacapanepaena,”

panajamë pëtsa. Abrahampijinë picani papemomoxi atamë, itsiata pibisiacuene itsa paexanavanapame, nexata bajarapacuene apo pacatonamatamotsi tsipae Diosojavabelia papecacapanepaenexa. Dioso baja cajena caëjêpatsi jivi pexanaenexa mapaibotonëmi ataje, Abrahampijinë bepemomoxi Dioso petaenexa. Nexata bajarapamonae ata Dioso itsa apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijava papecacapanepaenexa Dioso.

<sup>10</sup> Peubinaenë pexainaenë itsa apo tonacuaitsitsi pexaniacuai, nicata sipalita daxita ponaenë apo tonacuaitsitsi pexaniacuai. Nexata baja penicatsicujinae itsa niona bajaraponaenë, caetuata. Xuaba isotojavabelia. Nexata bajaraponaenëmi tajuatsi. Bajara pijinia pacuenia paxamë ata Dioso pacaxuabiana infiernojavabelia papecatajuenexa, Dioso apo panejumecovënëtsivi.

<sup>11</sup> Xanë raja saya jivi bautisabaponajë merata. Tsipaji baja bajarapamonae copaba pibisiacuene pexanabiabijava. Najamatabëcuenepënëyorotanua Diosojavabelia. Itsiata baitsi jane ponë tacovëverena najetarucaena, tabautisabivi Espíritu Santo tsijamatabëjoneyaexanaenatsi, pitarunutsicotia yajava. Xanë raja saya beveliajamatabëcuenenënë bajaraponëvecua. Nexata bajaraponë vecuaauranë pijazapato ata tatocaponaenexa bepijajivitonëcuenianë.

<sup>12</sup> Arrozxainaenë baja itsa vereta arroz pesiricaejava, jëaba arroz pejëabijavata pepitsinexa ëpexu. Nexata pijaarroz pejëabijavata, saicaya

tsatapona ëpexu pesivecua. Nexata ëpexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamë ata Dioso pejumecovënëtsivivecua Dioso pacatsatsiana papecaxuabinexa infiernojavabelia panenaxuabinexa baja daxitamatacabijavabelianexa. Pamonaë pijinia Dioso pejumecovënëtsivi, Dioso capanepaenatsi pijanacuayabetsia. Pamonaë pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo pevereverecaesotojavabelia, jai Juan daxita bajarapamonaëjavabelia.

*Pacuenia Juan bautisaba Jesús yabara pelivaisi  
(Mr 1.9-11; Lc 3.21-22)*

<sup>13</sup> Jesús naropota Galilea nacujavaverena. Nexata pata Jordán menejavaberena. Jordán menejavata Juan ponapona. Nexata Jesús pata Juanjavaberena pebautisabinexatsi Juan.

<sup>14</sup> Juan picani apo jitsipae pebautisabijava Jesús. Juan nexata jumaitsi Jesúsjavabelia:

—¿Detsa xuajitsia patame tacabautisabinexa? Xamë rajane biji xanë benebautisabame, jai Juan Jesúsjavabelia.

<sup>15</sup> Itsiata Jesús jumaitsi Juanjavabelia:

—Aeconoxae itsiata pacuenia baja cavajëtatsi, netoexanaename. Xanepana vajaexanaenexa daxita Dioso vajanacaitorobicuenia, jai Jesús Juanjavabelia.

Nexata baja Juan jejai pebautisabinexa Jesús.

<sup>16</sup> Nexata jane baja Juan bautisaba Jesús. Jesús pebautisabicujinaetsi nonotajuna menevetsina.

Bajarapaepatota Jesús tane athëbëtatsia itaboxo penapatsijava. Nexata Jesús tane Espíritu Santo perunaejavatsica beucucuto. Tsimatarunaicatsi.

<sup>17</sup> Nexata Juan jumetane athëbëvetsica Dioso pejumaitsijava: “Mara ponë taxënató tasivanëje. Sivajamatabëcuenebarëyanë bitso,” pejajjava.

## 4

*Pacuenia Jesús jamatabëcueneëjëbatsi dovathi yabara pelivaisi*

*(Mr 1.12-13; Lc 4.1-13)*

<sup>1</sup> Jesús pebautisabicujinaetsi, Espíritu Santo ponaeyaexanatsi petusato nacuayabelia. Bajarabelia ponaeyaexanatsi pejamatabëcueneëjëbinexatsi dovathi.

<sup>2</sup> Nexata petusato nacuata Jesús ponapona cuarenta pamatacabibeje, cuarenta pameravibeje yajava. Bajara pijinia pamatacabibeje Jesús apo xae pexaejava. Nexata Jesús bitso piajani.

<sup>3</sup> Nexata dovathi Jesús imoxoyotatsi pejamatabëcueneëjëbinexatsi Jesús picani pibisiacuene pexanaenexa. Dovathi jumaitsi Jesúsjavabelia:

—Itsa pepacue Dioso pexënatómë, itorobare mapaibotonëje penaexanaenexa pan, jai dovathi.

<sup>4</sup> Jesús nexata jumaitsi dovathijavabelia:

—Jume raja. Dioso raja pejumelivaisibaxutota jumaitsi mapacueniaje: “Jivi raja apo namatavenonae ëpexaejava pexaenexa. Jivi raja namatavenona daxita Dioso pejumelivaisi ata pejumecovënëtsinexa pexainaenexa matababi apo



peverevereceajava,” jai raja Dioso pejumelivaisibaxutota, jai Jesús dovathijavabelia.

<sup>5</sup> Bajaraxuacujinae icatsia Jesús barëliatsi dovathi Jerusalén tomarabelia. Barëjunayatsi templobo matatuyabetsia.

<sup>6</sup> Nexata templobo matatutatsia dovathi icatsia jumaitsi Jesúsjavabelia:

—Itsa pepacuene Dioso pexënatomë, jirevaremece irabereca. Bajarapacuenia jirevaremece irabereca tsipaji xamë nitsacueneyaniva pecaevecsinea Dioso pejumelivaisibaxutota jumaitsi mapacueniaje:

Dioso itorobianica pijaánglevi pecaevecsinea. Nexata ánglevi pecobeta cayotsiana pecataxutsaquitsiyaniva ibotonëjavabelia, jai Dioso pejumelivaisibaxutota xamë pecaevecsinea ánglevi, jai dovathi Jesúsjavabelia.

<sup>7</sup> Jesús nexata icatsia jumaitsi dovathijavabelia:

—Jume raja. Dioso raja pijinia pejumelivaisibaxutota jumaitsi mapacueniaje: “Itsajivi ata jamatabëcuenenavëxaniabiaya pijacuata apo bejamatabëjumaitsi: ‘Xanë Dioso jamatabëcuenejëtsianajë. Nexata exanaenajë pacuene bitso netsiayai tatëpaenexa. Itsiata Dioso neyavenonaena tavecuapanepaenexa bajaraxua. Nexata bajarapacuenia yapëtaenajë Dioso taneyavenonaejava,’ apo bejamatabëjai,” jai Dioso pejumelivaisibaxutota, jai Jesús dovathijavabelia.

<sup>8</sup> Jesús icatsia barëliatsi dovathi pinijitsutoxanetojavabelia. Barëjunayatsi bajarapatsutojumabetsia. Nexata bajarapatsutojumavetsica dovathi

Jesús tsitajētatsi daxitanacuanē. Daxita bajara-panacuanēta daxitacuene pexainaejava yajavat-sitajētatsi.

<sup>9</sup> Nexata icatsia dovathi jumaitsi Jesúsjavabelia:

—Ayaijamatabēcuenenēnē netaeya taitabarata nematabacabēta itsa netonucajunuame, nexata daxita mapanacuanētaje, daxitacuene xua xaina, cayajavarajutsianatsi, jai dovathi Jesúsjavabelia.

<sup>10</sup> Nexata Jesús jumaitsi dovathijavabelia:

—Dovathi, nevecuanatixire. Dioso raja pejumelivaisibaxutota jumaitsi mapacueniaje: “Daxitajivi vajēcae pematabacabēta caenē pepo petuxanenē Diosojavabelia. Tonacuenebinua bajaraēponēnexa,” jai raja Dioso pejumelivaisibaxutota, jai Jesús dovathijavabelia.

<sup>11</sup> Nexata baja dovathi Jesús vecuaponatsi. Bajaraxuacujinae ángelevi patsica Jesús peyavenon-aenexatsi.

*Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi*

*(Mr 1.14-15; Lc 4.14-15)*

<sup>12</sup> Jesús vënëlivaisitane Juan peetsijavatsi penaneconitsivi pejebabiabibota. Nexata Jesús pona Galilea nacuayabelia.

<sup>13</sup> Itsiata Jesús apo ponaponae Nazaret tomarata. Ponapona Capernaum tomarata. Capernaum tomara eca Zabolónvënë nacuabeje Neftalivënë nacuabejejavata. Capernaumtomara eca pucaxanetoitapata.

<sup>14</sup> Bajarapacuenia Jesús itsa patajopa Capernaum tomarata Dioso pitorobilivaisi

jivi petsipaebinexa, copiapata jane baja pacuenia bajayata Diosojumepaebinë profeta, Isaíaspijinë, tajëvelia yaquina Jesús pelivaisi. Dioso pitorobilivaisi Jesús Capernaum tomarata jivi petsipaebijavanexa yabara, Isaíaspijinë peyaquinaelivaisita tajëvelia jumaitsi mapacueniaje:

15-16 Zabulón nacuapijivi, Neftali nacuapijivi ata, Jordánmene itsapanaverenapijivi ata, bitso apo yapëtae Dioso pitorobilivaisi. Galilea nacuata pejinavanapaevi ata, itsaxuayo jinavanapa ayaibitsaëtoxanetonë apo judíovi, bitso apo yapëtae Dioso pitorobilivaisi. Daxita bajarapanacuanëpijivi pexaniajailivaisi, Dioso pitorobilivaisi, apo peyapëtaexae, bepitaquirinacuanëjava jinavanapa. Nexata pacuenia pinijicotiaxaneto itayotsipatsi petaenexa xaniavaetsia, bajara pijinia pacuenia bajarapamonae jamatabëcueneitayotsianatsi itsa tsipaebianatsi Diosojavabelia pecapanepaelivaisinexatsi,

jai tajëvelia Isaíaspijinë peyaquinaelivaisita Dioso pitorobilivaisi Jesús petsipaebijavanexa yabara bajarapanacuanëpijivijavabelia.

17 Nexata Capernaum tomarata Jesús taxuxu-aba Dioso pitorobilivaisi jivi petsipaebijava. Dioso pitorobilivaisi Jesús itsa tsipaeba, jivijavabelia jumai tsaponae mapacueniaje:

—Dioso rabaja papecaevetsimatacabinexa, imoxoyo baja pevajënae pecopiapatsinexa. Nexata baja pacopabare pibisiacuene pane-

exanabiabijava. Panajamatabëcuenepënëyorore Diosojavabelia, jai tsaponae Jesús jivijavabelia.

*Pacuenia Jesús junata cuatro ponëbeje dujuai peyamatajucabiabivi yabara pelivaisi*

*(Mr 1.16-20; Lc 5.1-11)*

<sup>18</sup> Jesús najetaruca Galilea pucaxaneto itapaya. Nexata Galilea pucaitapata Jesús taenuta anijanëbeje nacaebananëbeje, Simónbeje Andrésbeje. Simón itsavënë Pedro. Bajaraponëbeje daxitamatacabi canacujitsia dujuai yamatajucabiababeje. Dujuai peyamatajucabiabijavatabeje, yamatajucaponaponabeje.

<sup>19</sup> Nexata Jesús jumaitsi Simónbeje Andrésbejjavabelia:

—Naxanitsia. Panepënaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaename Dioso pijajivinexa, jai Jesús.

<sup>20</sup> Nexata Simónbeje Andrésbeje dujuai peyamatajucabiabijavamíbeje, bajarajota puenetatabeje. Nexata baja naponabeje Jesús pepëta.

<sup>21</sup> Bajaraxuacujinae icatsia bebeliayo pevajënaeyabelia Jesús barëpona. Icatsia taenuta anijanëbeje nacaebananëbeje, Zebedeo pexënatobeje. Bajaraponëbeje Santiagobeje Juanbeje. Pijajeraënëta paxa yajava xanebaponaponabeje dujuai peyamatajucaejavanexabeje. Nexata icatsia Jesús junata Santiagobeje Juanbeje.

<sup>22</sup> Nexata bajarajota paxa puenetanutabeje jera yajava. Santiagobeje Juanbeje naponabeje baja Jesús pepëta.

*Pacuenia Jesús livaisi tsipaeba jivi  
ayaibitsaëtoxanetojavabelia yabara pelivaisi  
(Lc 6.17-19)*

<sup>23</sup> Jesús jane baja najetaruca daxita Galilea nacuajava. Dioso pitorobilivaisi tsipaebapona judíovi penacaetuatabibonëjava. Jesús tsipaebapona jivijavabelia pexanialivaisi. Tsipaebapona Dioso pijajivi pevetsijavanexa. Jamatejemayaexanaponanua daxitaviriavitane pexainaevimi.

<sup>24</sup> Nexata daxita Siria nacuajava pejinavanapaevi ata vënëlivaisitanetsi Jesús. Jesús tocapatatsi daxitaviriavitane pexainaevi. Tocapatatsinua dovathi peyajavajinavanapaevi. Tocapatatsinua pedevacaibivitsi. Tocapatatsinua petabusipacuenabivitsi. Jesús nexata jamatejemayaexanapona daxita bajarapamonae.

<sup>25</sup> Nexata Jesús pënaponatsi jivi ayaibitsaëtoxaneto Galilea nacuapijivi, Decápolis nacuapijivi ata, Jerusalén tomarapijivi ata, Judea nacuapijivi ata, Jordánmene itsapanaverenapijivi ata.

## 5

*Pacuenia Jesús jivi livaisi tsipaeba  
petsutoyenepanajavata yabara pelivaisi  
(Lc 6.20-23)*

<sup>1</sup> Jesús itsa tane jivibitsaëtoxaneto, nexata junaya petsutotsia. Bajarapatsutoyenepanata epatota ecaya. Nexata bajarajota Jesús pijajivi matatoyorotsia nacaetuatsi. <sup>2</sup> Nexata Jesús taxuxuba livaisi petsipaebijava.

<sup>3</sup> Jesús jumaitsi pijajivijavabelia mapacueniaje:

—Jamatabëcuenebarëya tsavanapae tsane pamonaepicani mapanacuata yajamatabëcuenebëjai tsavanapae pibisiacuene pexanabiabijava. Bajarapamonaepicani Dioso pijanacuayabetsia.

<sup>4</sup> 'Jamatabëcuenebarëya tsavanapae tsane pamonaepicani mapanacuata bejamatabëjiobi tsavanapae itsamonaepibisiacuene petoexanaexaetsi. Bajarapamonaepicani Dioso jamatabëcuene yavenonaenatsi.

<sup>5</sup> 'Jamatabëcuenebarëya tsavanapae tsane pamonaepicani mapanacuata tsabiabi mapanacuata, itsacueniababiabi atatsi itsamonaepicani. Apo cuenecanaviatabiabinua. Bajarapamonaepicani jinavanapaena Dioso pijanacuata tsia pacuenia Dioso najumecapanepaeya jumaitsi bajarapamonaepicani yabara.

<sup>6</sup> 'Jamatabëcuenebarëya tsavanapae tsane pamonaepicani mapanacuata bitso daxitacuene matatoxenetsia jitsipabiaba pexanaenexa Dioso pitorobicueniatsi. Dioso baja cajena yavenonabiabianatsi pexanaenexa bajarapacuene.

<sup>7</sup> 'Jamatabëcuenebarëya tsavanapae tsane pamonaepicani mapanacuata itsamonaepicani ata itaxutotsoniataeyabiaba. Dioso nexata juya itaxutotsoniataeyabiabianatsi bajarapamonaepicani.

<sup>8</sup> 'Jamatabëcuenebarëya tsavanapae tsane pamonaepicani mapanacuata ëpexaniacuene pexanaenexa najamatabëxainabiaba. Bajarapamonaepicani taena Dioso.

<sup>9</sup> 'Jamatabëcuenebarëya tsavanapae tsane pamonaepicani mapanacuata penaitoyavimi ata, nabaramonaepicani xanepanaeyaexanapona. Bajarapamonaepicani yabara: "Taxi," jai tsane Dioso.

10 'Jamatabëcuenebarëya tsavanapae tsane pamonae mapanacuata bejiobiaexanabiabatsi Dioso pitorobicueniatsi pexanabiabijava yabara. Bajarapamonae jonena Dioso pijanacuayabetsia.

11 'Patajajivixaemë, itsamonae pibisiacuenia itsa pacabaracuaicuaijai, itsiata pajamatabëcuenebarëyamë tsavanapae tsane. Bajarapamonae pacabejiobiaexanae ata tsane, najumetsënëtsiaya pacabaracuaicuaijai atanua tsane, itsiata pajamatabëcuenebarëyamë tsavanapae tsane.

12 Bajara tsipaji pacuenia panevajënaeyapijivimi ata, Diosojumepaebivimi profetavi, bajayata bejiobiaexanatsi. Nexata pasivajamatabëcuenebarëyamë tsavanapae tsane paxamë ata bajarapacuenia itsa pacaexanaena. Tsipaji raja athëbëtatsia itsamatacabi Dioso pacarajutsiana bitso pexaniacuene, jai Jesús pijajivijavabelia.

*Pacuenia Dioso pejumecovënëtsivi mapanacuata pejamatabëcuene beyajo, bepecotianua, yabara pelivaisi*

*(Mr 9.50; Lc 14.34-35)*

13 Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Yajobeno xanepana vajaexabinexa pevi piabejeyaniva. Paxamë rabaja pijinia bepajajomë tsavanapae mapanacuapijivijavabeliaje, mapanacuapijivi bitso piabejeyaniva pibisiacuene pexanaeneconi yabara. Paxamë xaniavaetsia panetsipaebavanapaexae Dioso pejumelivaisi, bajarapamonae bitso

pibisiacuene apo exanae. Itsiata yajo pexaicaejavami itsa ajibi tsipae, ¿detsa nexata pacuena icatsia naxaicaeyaexanaejitsipa? Acuenebi. Itsacuenejavayonexa ata baja apo xanepanae tsipae. Saya pexuabinexa, jivi petaxunanonobinexa, xanepanaejitsipa. Bajara pijinia paxamë ata paitsimë tsipae itsa pacopatsipame Dioso panejumecovënëtsijava. Pajamatabëcuenesaëjibimë tsipae. Nexata itsacuenejavayonexa ata, apo paxanepanaemë tsipae.

<sup>14</sup> 'Pacuenia piaitayotsicotia itayota piaitaquirijavata, bajara pijinia pacuenia paxamë ata Dioso panejumecovënëtsivi pajamatabëcuenitayotsianame pija-matabëcuenitaquirivimi. Bajarapacuenia pajamatabëcuenitayotsianame itsa patsitajinavanapaename xaniavaetsia daxitajivi pitabarata. Petsutojumata peecaetomara acuenebi penacaranatecaejava tsipae.

<sup>15</sup> Itsajivi ata lámparabë pitanojotsicujinae, apo etsi cajoniënëalia. Biji rajane athëbëyo etsia daxitaboënë pitayotecaenexa.

<sup>16</sup> Bajara pijinia pacuenia paxamë ata paitsimëre. Xaniavaetsia patsitajinavanapare daxitajivi pitabarata. Nexata bajarapamonae pacacuenetaena pexaniacuene paneexavanapaejava. Nexata bajarapamonae itsa pacacuenetaena pexaniacuene paneexavanapaejava, jumai tsane paxamë yabara paneaxa Diosojavabelia: “Diosomë, bitso ayaijamatabëcuenenëmë. Yavenonabiabame nijajivi,” jai tsane bajarapamonae paneaxa,



athëbëtatsia peecaenëjavabelia, jai Jesús pijajivijavabelia.

*Pacuenia Jesús tsipaeba pijajivi bajayata Dioso Moiséspijinëta penajumecopatsilivaisi yabara pelivaisi*

<sup>17</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pëtsa panesivajamatabëjumaitsimë: “Maponë patajopaje piajibiaexanaenexa Dioso Moiséspijinëta penajumecopatsilivaisi. Palivaisi ata Diosojumepaebivimi profetavi bajayata tsipaebapona piajibiaexanaenexa,” panesivajamatabëjamë pëtsa. Apo patajopaenë tajibiaexanaenexa bajarapalivaisibeje. Biji rajane patajopajë taexanaenexa jane baja daxita pacuenia tajëvelia nevajunupaeba bajarapalivaisitabeje.

<sup>18</sup> Xaniajanë pacuenia pacatsipaebijitsiatsi. Dioso Moiséspijinëta penajumecopatsilivaisi epatua itsalivaisicuenia, caeitanetoyo ata, Dioso apo itothianae tsane. Pacuenia baja Dioso najumecapanepaeya jumaitsi, bajarapacuenia tsitecaena. Nexata copiapatsiana daxita xua Dioso tajëvelia najumecapanepaeya jumaitsi bajarapalivaisitabeje.

<sup>19</sup> Nexata pajivi jumecovënëtsi ata Dioso Moiséspijinëta penajumecopatsilivaisi, itsiata itsa apo jumecovënëtsi caelivaisiyo bajarapaya-juvënëlivaisiyo, naneconitsiana Diosojavabelia. Bajarapajivi itsa itavetsiananua itsamonae ata pejumecovënëtsiyaniva bajarapalivaisiyo, nexata bajarapaneconi yabara bajarapajivi

beveliajamatabëcuenejivi taenatsi daxitajivivecua Dioso pijanacuatatsia. Pajivi jumecovënëta daxita bajarapalivaisi, itsa tsipaebanua itsamonae ata pejumecovënëtsinexa bajarapalivaisi, nexata bajarapajivi ayaijamatabëcuenejivi taenatsi Dioso pijanacuatatsia.

<sup>20</sup> Xaniajanë pacuenia pacatsipaebijitsiatsi. Paxamë xaniavaetsia Dioso pajumecovënëre. Xaniavaetsia Dioso pajumecovënëre judíovi pecujarubivi Dioso pejumecovënëtsijava mata-toxenetsia. Xaniavaetsia Dioso pajumecovënëre fariseovi ata Dioso pejumecovënëtsijava matatoxenetsia. Paxamë xaniavaetsia Dioso itsa apo pajumecovënëtsimë tsane, nexata pacuenia bajarapamonae apo jone tsane Dioso pijanacuayabetsia, bajara paxamë ata paitsimë tsane. Apo panajonemë tsane Dioso pijanacuayabetsia, jai Jesús pijajivijavabelia.

*Pacuenia Jesús muxujioba pijajivi peco-patsinexa penabaraanaepanabiabijava yabara pelivaisi*

*(Lc 12.57-59)*

<sup>21</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia. Moiséspijinë bajayata panijasalinaivimijavabelia jumaitsi mapacueniaje: “Pëtsa pabeyaxuabame jivitonë. Pajivi beyaxuaba jivitonë, bajarapajivi pananeconitsiaexanaename,” jai Moiséspijinë panijasalinaivimijavabelia.

22 Itsiata baitsi jane xanë pacatsipaebatsi mapacueniaje. Pajivi baraanaepana itsajivijavabelia, bajarapajivi naneconita Diosojavabelia. Nutsianatsi Dioso pitabarata penaneconitsiayaexanaenexatsi. Pajivi itsajivi bijatane pibisiacuenia, bajarapajivi naneconita Diosojavabelia. Bajarapaneconi yabara nutsianatsi itsajota nacaetuatabiaba tomara pevetsivi. Nexata naneconitsiayaexanaenatsi. Pajivi itsajivi pitoyaxae, anaeya jumaitsi: “Xamë saya bitso pecamatajemabinë,” jai, bitso tsiayaitsi. Bajarapaneconi yabara bajarapajivi Dioso naneconitsiayaexanaenatsi infierno isotojavabelia.

23 Itsa paponame altarvënëjavajavabelia panerajutsinexa ofrenda Diosojavabelia, nexata bajarapaepatota itsa panajamatabënapitame itsajivijavabelia itsacueni paneexanaejava, nexata mapacuenia paexanaenameje.

24 Altarvënëjava pitabarata abaxë papueneri ofrenda panerajutsijavanexa Diosojavabelia. Paponare caecuenia pajivijavabelia pananeconitame panenabarajamatabëcuene xanepanaenexabeje icatsia. Bajaraxuacujinae icatsia panaviatsiaremena altarvënëjavajavaberena panerajutsinexa jane baja ofrenda Diosojavabelia.

25 'Itsa pananeconitame itsajivijavabelia, nexata itsa pacacapona bajarapajivi jueznëjavabelia papecaniconitsinexa, namutua xaniavaetsia panabarëcuaicuaijamërebeje panenasivajamatabë xanepanaenexabeje xua yabara picani pacaneconitsijitsia. Bajarapacue-

nia xaniavaetsia panabarëcuaicuaijamërebeje papecanutsiyaniva jueznë pitabarata. Tsipaji raja jueznë itorobijitsipa policíavi panijaneconi yabara papecacaponaenexa penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi pejebabiabibota.

<sup>26</sup> Xaniajanë pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepíjia apo papitsapaemë tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús pijajivijavabelia.

*Pacuenia Jesús pijajivi muxujioba penacojiobinë itsava pejajitsiyaniva pijavavecua yabara pelivaisi*

<sup>27</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi. Dioso Moiséspijinëta penajumecopatsilivaisi jumaitsi mapacueniaje: “Pëtsa jaitame itsava nijavavecua,” jai.

<sup>28</sup> Itsiata baitsi jane xanë mapacuenia pacatsipaebatsije. Ponë petiriva itsa taenuta, nexata itsa jamatabëjumaitsi: “Jema xania tavitota pibisiacuene apo caexanaetsi mapovajavabeliaje,” itsa jamatabëjai, bajaraponë naneconita Diosojavabelia. Nexata najëpaeya naneconitabeje Diosojavabelia ponëbeje pepacuene itsavajavabelia pibisiacuene pevitota exana pijavavecua.

29 'Panecujuaitaxutota panetaejava yabara pibisiacuene itsa paexaname, panaitaxutocajure. Tajë baja paxuare. Xanepana panenavecuaxu-abinexa bajarapaitaxuto, padaxitaperabëtojivimë Dioso papecaxuabiyaniwa infiernojavabelia.

30 Panecujuacobeta pibisiacuene itsa paexaname, panacobecaucure. Tajë baja paxuare. Xanepana panenavecuaxuabinexa, bajarapacobe padaxitaperabëtojivimë Dioso papecaxuabiyaniwa infiernojavabelia, jai Jesús pijajivijavabelia.

*Pacuenia Jesús pijajivi muxujioba penacojobinë pijava pexuabiyaniwa yabara pelivaisi (Mt 19.9; Mr 10.11-12; Lc 16.18)*

31 Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Bajayata Dioso Moiséspijinëta penajumecopatsilivaisi jumaitsi mapacueniaje: “Ponë jamatabëxuaba pijava, copiaya toyaquinae cuyalatobaxuto pijavajavabelia. Toyaquinae pijava pitavetsilivaisi. Nexata xuacujinae xuabi pijava,” jai bajayata Dioso Moiséspijinëta penajumecopatsilivaisi.

32 Itsiata baitsi jane xanë mapacuenia pacatsi-paebatsije. Ponë pijava xuaba, itsanëjavabelia bajarapova pevitota pibisiacuene apo vecuaexanae atatsi, bajaraponë naneconita Diosojavabelia pijava pexuabixae. Petiriva pamona pexuabixaetsi, nacojobijitsipa itsanëjavabelia. Nexata jane baja bajaraponë pijava pibisiacuene vecuaexanaejitsipatsi itsanëjavabelia. Tsipaji abaxë bajaraponë pijavacuenia Dioso totanetsi. Nexata pijinia ponë

pita bajaraponë pexuabicovëvami, bajaraponë ata pibisiacuene exana pevitota. Tsipaji abaxë bajaraponë pijavacuenia Dioso totanetsi, jai Jesús pijajivijavabelia.

*Pacuenia Jesús pijajivi muxujioba, Jesús pijajivi itsa navajunupaeba xua exanaejitsia, itsajumeyo ata yajava pejumaitsiyaniva jivi pejumexaniataenexatsi yabara pelivaisi*

<sup>33</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia. Panijasalinaivimi penajumetsënëtsiyaniva, bajayata Moiséspijinë panijasalinaivimijavabelia jumaitsi mapacueniaje: “Itsa baja pepacuenenajumecapanepaeya panavajunupaebame xua paexanaejitsiamë, itsamonae papecajumexaniataenexa itsa pajumaitsimë: ‘Xaniajanë raja. Cajumaitsi mapacueniaje Dioso pitabarata,’ itsa pajamë, pëtsa epatua panajamatabëcopatame bajaraxua paexanaenejevamë,” jai bajayata Moiséspijinë panijasalinaivimijavabelia.

<sup>34</sup> Itsiata baitsi jane xanë mapacuenia pacaitorobatsije. Najumecapanepaeya itsa panavajunupaebame xua paexanaejitsiamë, roviaia panavajunupaebare. Pëtsa pematatsënëa itsajumeyo ata yajava pajumaitsimë jivi papecajumexaniataenexa. Papecajumexaniataenexa itsajivi pëtsa pajumaitsimë mapacueniaje: “Xaniajanë raja. Cajumaitsi mapacueniaje Dioso pitabarata,” pajamë pëtsa. Pëtsa pajumaitsimënuu: “Xaniajanë

raja. Cajumaitsitsi mapacueniaje athëbënacua pevënëta,” pajamë pëtsa. Tsipaji bajarajotatsia Dioso eca pijatronovënëjavata, itsajota ecabiaba pitorobinexa pijajivi.

<sup>35</sup> Pëtsa pajumaitsimënuu: “Xaniajanë raja. Cajumaitsitsi mapacueniaje mapairaje pevënëta,” pajamë pëtsa. Tsipaji raja Dioso pijaira. Pëtsa bajarapacuenia pajumaitsimë Jerusaléntomara ata pevënëta. Tsipaji Jerusaléntomara Dioso pepo nacuaeavetsinë pijatomara.

<sup>36</sup> Pëtsa pajumaitsimënuu: “Xaniajanë cajena. Itsa apo xaniajanë tsane, nexata nacaevetsianajë tanematathinaxuabinexamë tatëpaenexa,” pajamë pëtsa. Tsipaji panematabocoto ata Dioso eveta. Nexata paxamë apo pacacaëjëpae caematanatoyo ata panenamatananiojaiyaexanaenexa, panenamatanatsaejaiyaexanaenexa ata.

<sup>37</sup> Itsa pepacueni paexanaejitsiamë, “Jājā, exanaenajë,” pajamëre roviaia. Itsa apo pajamatabëexanaemë, “Jume, apo exanaenë tsane,” pajamëre roviaia. Pematatsënëa pëtsa pajumaitsimë itsajumeyo ata jivi papecajumexaniataenexa. Tsipaji bajarapajume dovathi pejamatabëcueneta pajumaitsimë tsipae, jai Jesús pijajivijavabelia.

*Pacuenia Jesús pijajivi muxujioba  
pecuenecanaviatsiyaniva itsajivi itsacueniabi  
atatsi yabara pelivaisi  
(Lc 6.29-30)*

<sup>38</sup> Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi

jumaitsi. Bajayata Dioso Moiséspijinëta penajumecopatsilivaisi jumaitsi mapacueniaje: “Pajivi itsanë itaxutobijianatsi, juya bajarapajivi namatamoitaxutobijiana. Pajivi ata itsanë vonotanabiabatsi, juya bajarapajivi namatamovonotanabiabi,” jai bajayata Dioso Moiséspijinëta penajumecopatsilivaisi.

<sup>39</sup> Itsiata baitsi jane xanë mapacuenia pacaitorobatsije. Itsanë itsa jamatabëpacabia, pëtsa panayajivibiame. Itsanë itsa pacaitabarapacabiauxuaba anaeya, nexata icatsia itsanenia ata papecaitarapacataxuabinexa, panaitabaracaevere.

<sup>40</sup> Itsajivi itsa pacaneconitsijitsia jueznëjavabelia paneamoneyabijamatabëcuene papecavecuapitsinexa panijacamisa, nexata patocopare panijacamisajumavelia panenaxatatsijava ata papecavecuapitsinexa.

<sup>41</sup> Vajabitsaë itsa pacacaponaeayaexana pijajava anijakilómetrobejecuenia, nexata patocaponare pematatsënëa ata. Cuatro pakilómetrobejecuenia ata patocaponare.

<sup>42</sup> Bitso bepejiobijivi itsa pacavajëta itsacuenejavayo, parajure. Itsa pacacovaeta, patsicopare. “Jume,” pajamë pëtsa, jai Jesús pijajivijavabelia.

*Pacuenia Jesús pijajivi muxujioba piasivanexa pitoyavi atatsi yabara pelivaisi*

*(Lc 6.27-28, 32-36)*

<sup>43</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopat-



silivaisi jumaitsi mapacueniaje: “Pasivamëre papecayapëtaenë bitso. Paitoyamëre papecaitoiyavi,” jai bajayata Dioso Moiséspijinëta penajumecopatsilivaisi.

<sup>44</sup> Itsiata baitsi jane xanë mapacuenia pacaitorobatsije. Pasivamëre papecaitoiyavi ata. Pamonaë ata pibisiacuenia pacabaracuaicuajai, bajarapamonae paxamë xaniavaetsia pabaracuaicuajamëre. Pamonaë ata pacaitoia, bajarapamonae pexaniacuene patoexanare. Pamonaë ata pibisiacuenia pacabijatane, pibisiacuene pacaexanaë ata, patovajëre Diosojavabelia peyavenonaenexatsi.

<sup>45</sup> Bajarapacuenia nexata paneaxa, athëbëtatsia peecaenë, papeximëcuenia patsitajinavanapaename. Bajaraponë, paneaxa, yavenonabiaba daxitajivi. Nexata pexaniajamatabëcuenevi, pibisiajamatabëcuenevi ata, najëpaeya pijapabianë petonaxaniabinexatsi icotia copata. Bajarapacuenia pijinia ema ata copata.

<sup>46</sup> Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Pataneme rabaja. Gobierno pejamatabëcueneta impuestomatamo peyanijobabiabivi bitso pibisiacuene exana. Itsiata bajarapamonae ata asiva piasivavitsi.

<sup>47</sup> Xaniavaetsia itsa pacopiapitsipame ëpaneyapëtaevi, nexata pexaniacuene apo paexanaemë tsipae pamonaë Dioso apo pejumecovënëtsivivecua. Tsipaji Dioso apo pejumecovënëtsivi ata xaniavaetsia copiapitabiaba peyapëtaevitsi.

48 Pacuenia jamatabëcueneitsi pejamatabëcuenexanepanaenë, paneaxa, athëbëtatsia peecaenë, bajara paxamë ata pajamatabëcueneitsimëre, jai Jesús pijajivijavabelia.

## 6

*Pacuenia Jesús pijajivi muxujioba pexaniacuene pexanaenexa yabara pelivaisi*

<sup>1</sup> Icatsia Jesús jumaitsi petsutoyenepanajavata pijajivi ayaibitsaëttoxanetojavabelia:

—¡Xania baja tsane! Pëtsa pexaniacuene paexaname saya jivi papecacuenetaenexa, “Maponë bitso pexaniajamatabëcuenenëje,” papecasivajamatabëjainexa saya paneexanaejava yabara. Bajarapacuenia itsa paexanaejitsipame, nexata paneaxa, athëbëtatsia peecaenëjavabelia, apo paxainaemë tsipae itsacuenejavayo ata, pexaniacuenejavayo, papecarajutsinexa athëbëtatsia.

<sup>2</sup> Bajaraxuata itsa payavenoname bepejiobivi, pëtsa panavajunupaebame daxitajivijavabelia paneyavenonaejava bepejiobivi. Itsamonae xua exana, navajunupaebabiaba daxitajivi pitabarata judíovi penacaetuatabiabibonëjava, callejava ata. Bajarapamonae navajunupaebabiaba bepejiobivi peyavenonaejava, bepexaniajamatabëcuenevi saya petaenexatsi jivi. Xaniajanë pacuenia pacatsipaebijitsiatsi. Pamonaе bajarapacuenia navajunupaebabiaba, bajarapacuenia penavajunupaebabiabixae, Diosojavabelia apo xinae tsane athëbëtatsia perajutsijavanexatsi.

<sup>3</sup> Itsa payavenoname bepejiobivi, pëtsa panavajunupaebame itsajivijavabelia ata, bitso papecayapëtaejivijavabelia ata.

<sup>4</sup> Muetsia payavenonare bepejiobivi. Nexata paneaxa, papecataenë muetsia paneexanaejava ata, pacarajutsiana bepejiobivi muetsia paneyavenonaematamo, jai Jesús pijajivijavabelia.

*Pacuenia Jesús pijajivi tsipaeba pacuenia Dioso-  
javabelia vajëcaejitsia yabara pelivaisi  
(Lc 11.2-4)*

<sup>5</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Itsa pavajëcame Diosojavabelia, pëtsa pavajëcame pacuenia itsamonae vajëcabiaba. Bajarapamonae saya jema vajëcabiaba Diosojavabelia jivi petaenexatsi Dioso bepejumecovënëtsivi. Bajarapamonae jitsipabiaba nucaeya pevajëtsinexa Diosojavabelia daxitajivi pitabarata judíovi penacaetuatabi-abibonëjava, calle penaepacaxitajarabijava ata. Bajarapacuenia vajëcabiaba Diosojavabelia Dioso bepejumecovënëtsivi petaenexatsi jivi. Xaniajanë pacuenia pacatsipaebijitsiatsi. Pamonaë bajarapacuenia exanabiaba, bajarapacuenia pexanaexae, Diosojavabelia apo xainae tsane athëbëtatsia perajutsijavanexatsi.

<sup>6</sup> Nexata paxamë Diosojavabelia itsa pavajëcame, pacanenëmë canacujitsia, pajonemeya panijaboyalía. Pabaupaxatare. Bajaraxuacujinae pavajëcare paneaxajavabelia. Nexata paneaxa pacayajava tsane bajarajota. Nexata paneaxa,

papacataenē muetsia paneexanaejava ata, pacarajutsiana bajaraxua paneexanaematamo.

<sup>7</sup> Itsa pavajēcame Diosojavabelia, pētsa napēna pavajēcame saya piapianexa panevajēcaejava pacuenia Dioso apo peyapētaevi vajēcabiaba. Dioso apo peyapētaevi jamatabēcuenenavēxaniabiaya jamatabējumai tsabiabi: “Itsa bitso apia vajavajēcaejava Diosojavabelia, nexata matapania Dioso nacajumetaena vajavajēcaejava,” jamatabējai tsabiabi Dioso apo peyapētaevi.

<sup>8</sup> Pētsa bajarapacuenia paxamē pajamatabēcuenetsimē. Panevajēcaevajēnaeya ata raja paneaxa, Dioso, yapētane xua panamatavenoname.

<sup>9</sup> Bajaraxuata itsa pavajēcame Diosojavabelia, pavajēre mapacueniaje: Taxamē, athēbētatsia neecaenē, jitsipajē pecayaiy-ataejava daxitajivi.

<sup>10</sup> Jitsipajē naxanitsiayo pecopiapatsijava daxita nijajivi nevetsijava mapanacuataje. Jitsipajē daxitajivi mapanacuata nejitsipaecuenia pecatoexanabinexa, pacuenia baja athēbētatsia nijajivi nejitsipaecuenia catoexanabiaba, bajarapacuenia pecatoexanapanapenexa mapanacuapijivi ataje.

<sup>11</sup> Ajena, pamatacabinexa, panerajure pataxaejavanaxa pacuenia panamatavenonajē.

<sup>12</sup> Panevecuaajibiaexanare pibisiacuene pataexanaeconimi. Pacuenia paxanē pajamatabēcuenecaevajē, pabarajamatabēcuenexanapananua, itsamonae paxanējavaberena pibisiacuene patanexanaejava, bajara pijinia pacuenia xamē ata

nitabarata pibisiacuene pataexanaejava jamatabëcuenecaevare. Panebarajamatabëcuene xanepanarena.

<sup>13</sup> Panevecuatsare dovathi patanejamatabëcuenejëbiyaniva. Panecapanepare jane pibisiacuenevecua. Pamatacabi xamë taxuxuabianame daxita nijajivi nevetsijava mapanacuataje, nejamatabëcuenesaëta evetsianame. Nexata nijajivi jumai tsane xamë yabara: “Dioso cajena bitso ayaijamatabëcuenenë,” jai tsane. Bajarapacuenia nijajivi evetsianame daxitamatacabijavabelianexa, pajamë tsane mapacueniaje itsa pavajëcame Diosojavabelia, jai Jesús pijajivijavabelia.

<sup>14</sup> Jesús icatsia jumaitsi pijajivijavabelia:

—Nexata paxamë itsamonae pibisiacuene pacaexanae ata, pajamatabëcuenecaevare. Pabarajamatabëcuenexanepanarena. Nexata paxamë itsamonae pibisiacuene papecaexanaejava, itsa pajamatabëcuenecaevianame, itsa pabarajamatabëcuenexanepanaenamenua, nexata paneaxa, athëbëtatsia peecaenë, pitabarata pibisiacuene paneexanaejava jamatabëcuenecaeviana. Pacabarajamatabëcuenexanepanaenanua.

<sup>15</sup> Paxamë itsa apo pajamatabëcuenecaevimë tsane itsamonae pibisiacuene papecaexanaejava, itsa apo pabarajamatabëcuenexanepanaemënu tsane, nexata paneaxa ata apo jamatabëcuenecaevi tsane. Apo pacabarajamatabëcuenexanepanaenua tsane, pitabarata pibisiacuene paneexanaejava, jai Jesús pijajivijavabelia.

*Pacuenia Jesús pijajivi tsipaeba pacuenia*

*Jesús pijajivi exanaejitsia pamatacabibeje  
Diosojavabelia vajëtaþona pexaejava xaenejeva  
yabara pelivaisi*

<sup>16</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Itsa apo paxaemë panexaejava pamatacabibeje pavajëcame Diosojavabelia, pëtsa pajinavanapame panaitabaraquiatsinejevamë, panamatatiatsinejevamënuua. Itsamonae Diosojavabelia itsa vajëcabiaba pexaejava xaenejeva, pamatacabibeje vajëcabiaba Diosojavabelia, apo naitabaraquiatabiabi, apo namatatiatabiabinua. Bajarapacuenia jinavanapabiaba pamatacabibeje vajëcabiaba Diosojavabelia tsipaji saya bajarapamonae jitsipa petaevitsi pesivajamatabëjumaitsinexatsi: “Mapamonaeje Dioso bitso pejumecovënëtsivi. Diosojavabelia bitso pevajëcaevi pexaejava xaenejeva. Nayapëtane Diosojavabelia bitso pevajëcaejava. Tsipaji naitabaraquiatsinejeva, namatatiatsinejevanua, jinavanapa,” pesivajamatabëjainexatsi petaevitsi. Xaniajanë pacuenia pacatsipaebijitsiatsi. Bajarapamonae pexaejava xaenejeva vajëcabiabi ata Diosojavabelia, itsiata bajaraxua apo tonamatamotsitsi Diosojavabelia. Tsipaji saya jivi petaenexatsi Dioso bepejumecovënëtsivi, bajarapacuenia vajëcabiaba.

<sup>17</sup> Paxamë itsa apo paxaemë panexaejava pamatacabibeje pavajëcame Diosojavabelia, itsiata panaitabaraquiare. Panamatatiarenua xaniavaetsia.

18 Bajarapacuenia paexanaename  
 jivi peyapëtaeyaniva Diosojavabelia  
 panevajëcaponaejava panexaejava paxaene-  
 jevamë. Caenë paneaxa, papecayajavanë,  
 yapëtaena. Nexata bajaraponë itsamatacabi  
 pacarajutsiana panijamatamo, jai Jesús  
 pijajivijavabelia.

*Pacuenia Jesús pijajivi tsipaeba xaniavaetsia  
 Dioso petonacuenëbavanapaenexa itsamatacabi  
 ayajava pexainaenexa athëbëtatsia yabara pelivaisi  
 (Lc 12.33-34)*

19 Icatsia Jesús jumaitsi petsutoyenepanajavata  
 pijajivi ayaibitsaëttoxanetojavabelia:

—Pëtsa pacaetuataponame ayajava  
 panexainaejavanexa mapanacuataje. Tsipaji  
 pacatobijianaejitsipa piucubaxaevi. Pacatot-  
 sibijitsipatsinua. Pacatonacobetoxotsipanua  
 penacobetoxotsivi.

20 Dioso jane xaniavaetsia patonacuenëbavana-  
 pare. Nexata Diosojavabelia ayajava pexani-  
 acuenë paxainaename athëbëtatsia. Nexata ba-  
 jarajotatsia apo pacatobijianaë tsane piucubax-  
 aevi. Apo pacototatsibitsinua tsane. Penacobetox-  
 otsivi ata apo pacatonacobetoxotsi tsane.

21 Panacuataatsia pacatoxaniavaeta  
 panexainaejavanexa, bajarapanacua  
 panejamatabëëthëtovecsina paja-  
 matabëñajinavanapaename, jai Jesús pijajivijav-  
 abelia.

*Pacuenia vajaitaxuto belámparabë yabara peliv-  
 aisi  
 (Lc 11.34-36)*

22-23 Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Lámparabë bo ënëtuatuajëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava ëpaxamënexa, nexata bitso pajamatabëcueneitaquirimë tsipae, jai Jesús pijajivijavabelia.

*Pacuenia Jesús pijajivi muxujioba bitso pejitsipaeyaniva palata yabara pelivaisi  
(Lc 16.13)*

24 Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Itsajivi ata acuenebi caecuenia petonacuenebijava anijanëbeje pijatuxanenëbejejavabelia. Caenëjavabelia, ponë jitsipa petonacuenebinexa, tonacuenebijitsipa. Ponëjavabelia apo jitsipae petonacuenebijava, apo tonacuenebi tsipae. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavabelia.



*Pacuenia Dioso pijajivi eveta mapanacuataje  
yabara pelivaisi  
(Lc 12.22-31)*

<sup>25</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava, ëpaneapaejava ata, panevënajinavanapaenexa. Pëtsa pasivanajamatabëxainamenua ëpanenaxatabijavanexa ata. Apo jinavanapaetsi cajena ëvajaxaejavanexa. Apo jinavanapaetsinua ëvajanaperabëxatabinexa.

<sup>26</sup> Pataema baratsuimonae pepunaevi. Apo ubi pexaejavanexa. Apo notsinua penaveretaponaejava peetsinexa bota. Itsiata Dioso, paneaxa, athëbëtatsia peecaenë, rajutabiaba pexaejavanexa. ¡Paxamë rabiji bitsoyo Dioso pacaasiva baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa bitso pasivanajamatabëxainame ëpanexaejavanexa.

<sup>27</sup> ¿Detsa jane ponë paxamëyajuvënënë caëjëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta.

<sup>28</sup> 'Bajaraxuata pëtsa bitso pasivanajamatabëxainame ëpanenaxatabijavanexa. Pacanaëjère pacuenia vitsabapona pematono vayaføjava. Bajarapamatono apo natsijumanacuenebi. Penaxatatsijavanexa ata apo natsijumaexanae.

<sup>29</sup> Bajayata nacuaevetsinëmi Salomónpijinë, bitso pexainaenëmi. Naitabëtsiaya naxatababiaba

bitso pexaniavirijavanë. Itsiata baitsi jane Salomónpijinë penaitabëtsijava matatoxenetsia bitso aitabë mapamatonotoxije.

<sup>30</sup> Paxamë bevelia panejumecovënëtsivi Dioso, asaëya bepajumecovënëtime Dioso papecaevetsijava. Ajena pitsijavata vayafota tanetsi pexaniaponamatonotoxi. Bajaraxuacujinae, caematacabibejecujinae, tajuatsi baja bajarapaponamatonotoximi. Pacuenia Dioso aitabëyaexana ponamatonotoxi, bajara pijinia pacuenia paxamë ata Dioso pacaxatabiana piaitabëjava itsa pajumecovënëtime Dioso.

<sup>31</sup> Bajaraxuata pëtsa jamatabëbëjaiya pajamatabëjumaitsimë: “¿De tsaeta xua xaenatsi? ¿De tsaeta xua matavëjëa apaenatsi? ¿De tsaeta xua naxatabianatsi?” pajamatabëjamë pëtsa.

<sup>32</sup> Pamonaë Dioso apo pejumecovënëtsivi, bajarapacuenia bitso sivanajamatabëxainabiaba ëpexaejavanexa, ëpenaxabijavanexa ata. Itsiata baitsi jane paneaxa paxainame, athëbëtatsia peecaenë. Bajaraponë yapëtane daxita xua panamatavenoname.

<sup>33</sup> Bajaraxuata, daxita xua panamatavenoname, matatoxenetsia, Dioso pijacuene bitso pasivanajamatabëxainabiabianame panetoexanavana-paenexa pacuenia Dioso pacaitoroba. Nexata Dioso pacarajutsiana daxita xua panamatavenoname.

<sup>34</sup> Itsa baja pajamatabëcuenebëjamë ajena pitsijavata itsacuenejavayo yabara, pëtsa caecuenia payajavajamatabëcuenebëjamë xua yabara meravia pitsijavata pacatocopiapatsijitsia. Tsipaji xua caematacabi canacujitsia nacato-

copiapatabiaba vajajamatabëcuenebëjainexa, ayaijava baja tsabiabi. Bajaraxuata ajena pitsijavata apo besivajamatabëcuenebëjaitsi xua meravia pitsijavata nacatocopiapatsijitsia, jai Jesús pijajivijavabelia.

## 7

*Pacuenia Jesús pijajivi muxujioba pitaxutotsoni-  
ataenexa itsamonae ata, pacuenia bajarapamonae  
ata Dioso itaxutotsoniatanetsi, yabara pelivaisi  
(Lc 6.37-38, 41-42)*

<sup>1</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pëtsa panataneme pepacuene bepaneaneconijibivi. Nexata itsamonae pibisiacuene pexanaejava xaniavaetsia payapëtaenejevamë, pëtsa pabaracuaicuaijamë mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamë pëtsa. Tsipaji paxamë ata pijinia bajarapitsineconi itsa paxainame, Dioso bitso ayaicuenia pacananeconitsiaexanaejitsipa.

<sup>2</sup> Itsamonae pexanaejava xaniavaetsia payapëtaenejevamë, pëtsa pabaracuaicuaijamë mapacueniaje: “Bajarapitsicuene pexanaevi Dioso naneconitsiaexanaenatsi,” pajamë pëtsa. Tsipaji paxamë ata bajarapitsicuene itsa paexaname, itsamonae pijinia bajarapacuenia pacabaracuaicuaijai tsipae.

<sup>3</sup> Bajaraxuata paxamë pepacuene bepaneaneconijibivi nataeya pëtsa pamuxujiobame itsajivi pijaneconi yabara. Tsipaji

raja apo payapëtaemë paxamë ata pijinia paneconivajëto paxainame.

<sup>4</sup>Nexata paxamë ata ayaineconixaneto itsa paxainame, nexata itsajivijavabelia apo bepajumaitsimë: “Papibisiacuene exaname, copare baja,” apo bepajamë.

<sup>5</sup>Yamaxëitojorobiaya saya bepexaniajamatabëcuenevi nataeya pacuaicuaijamë tsabiabi. Itsamonae pijaneconi yabara pabaracuaicuaijamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava pecopabinexa, jai Jesús pijajivijavabelia.

<sup>6</sup>Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pëtsa matavëjëa patsipaebaponame Dioso pejumelivaisi, pamonaepatsipaebi atamë, apo yaiyatae bajarapalivaisi. Tsipaji saya capocaponabiaba bajarapalivaisi. Vaxaitsi itsanë pijaaviri pexaejavanexa rajutsi atatsi tsipae, saya nacaitoya tsipae. Nacasinijitsipanua. Bajara pijinia jamatabëcueneitsi pamonaepo yaiyatae Dioso pejumelivaisi, patsipaebi atamë. Pacuenia marrano ata itsa rajutsipatsi perlavënëjava, bitso penamatamotsijava, saya taxunanonobijitsipa, bajara saya jamatabëcueneitsi bajarapamonaepo, jai Jesús pijajivijavabelia.

*Pacuenia Jesús pijajivi tsipaeba pacuenia Diosojavabelia vajëta pona ejitsia yabara pelivaisi  
(Lc 11.9-13; 6.31)*

<sup>7</sup> Icatsia Jesús jumaitsi petsutoyenepanajavata pijajivi ayaibitsaët oxanetojavabelia:

—Pavajëta pona re Diosojavabelia bajayajebi ata pacuenia bajayajebi ata pajaitsipame panecaxitajarabinexa itsa pacatonaxuaba itsacuenejavayo. Pavajëta pona re Diosojavabelia asaëyata pacuenia asaëyata padocodocotsipame baupa papecatobau-patsinexa itsa baupa xatatanuta.

<sup>8</sup> Bajarapacuenia asaëyata pavajëta pona re Diosojavabelia tsipaji pajivi vajëtabiaba, rajutabiabatsi. Pajivi ata jaitabiaba, caxitajarababiaba. Pajivi ata baupa docodocotabiaba, tobaupatabiabatsi.

<sup>9</sup> 'Paxamë papebijivimë panexi panexinaevi. Panexënatonëyo itsa pacavajëta panbë, apo panacoxirajutsimë tsipae iboto.

<sup>10</sup> Itsa pacavajëta dujuainëyo, apo panacoxirajutsimë tsipae jomo.

<sup>11</sup> Paxamë paneajamatabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peecaenë, bitso biji cajena pexaniajamatabëcuenenë paxamë matatoxenetsia. Bajaraponë pacarajutsiana pexaniacuene itsa pavajëtame.

<sup>12</sup> 'Xua pexaniacuene, paxamë pajitsipame itsamonae papecatoexanaenexa, copiaya paxamë bajarapapexaniacuene patoexanare bajarapamonaejavabelia. Bajarapajamatabëcuene jëpa Dioso Moiséspijinëta penajumecopatsilivaisi.

Diosojumepaebivimi profetavi peyaquinaeliv-  
aisianë ata jëpa bajarapajamatabëcuene, jai Jesús  
pijajivijavabelia.

*Tsiquiribaupayo epatajërëtsialia yabara pelivaisi  
(Lc 13.24)*

<sup>13</sup> Icatsia Jesús jumaitsi petsutoyenepanajavata  
pijajivi ayaibitsaëtoxanetojavabelia:

—Pajonemeya tsiquiribaupayojavalia  
panepatsinexa Dioso pijanacuayabelia. Tsipaji  
pinijibaupa, pinijinamutonua, pata infierno-  
javabelia. Nexata jivi ayaibitsaëtoxanetonë  
bajaraxuayo jonepona.

<sup>14</sup> Pabaupa tsiquiribaupayo, tsiquirinamu-  
toyonua, bajarapanamuto pata matacabi apo  
peverevereceaeva pexainaevi pijanacuayabelia.  
Nexata saya caejiviyobeje bajaraxuayo jonepona,  
jai Jesús pijajivijavabelia petsutoyenepanajavata.

*Pacuenia peubinaënë itsa nacuaita, nayapëtane  
pavirianaecuene yabara pelivaisi  
(Lc 6.43-44)*

<sup>15</sup> Icatsia Jesús jumaitsi petsutoyenepanajavata  
pijajivi ayaibitsaëtoxanetojavabelia:

—Xania panayajivitaema. Pamona  
saicayacuenia Dioso pejumelivaisivecua jivi  
tsipaebapona, bajarapamonaenajumetsënëtsiaya  
pacajumai tsabiabi: “Paxanë raja Dioso  
patanitorobicuenia livaisi jivi patsipaebaponajë,”  
pacajai tsabiabi. Bajarapamonaenajumetsënëtsiaya  
pejumecovënëtsivi cuenecataeya najonena  
paxamëjavaberena. Itsiata baitsi jane pacuenia  
nevëthë pianaepanaevi jamatabëcueneitsi, bajara

jamatabëcueneitsi. Jamatabëpacacopatsiaexana Dioso panejumecovënëtsijavami.

<sup>16</sup> Vaxaitsi rabaja yapëtanetsi mapacueneje. Peubinaenë itsa nacuaitya, yapëtanetsi ponaecuai xanepana vajaxaenexa. Nexata bajaraponae cuaixanetsi. Ponaepijinia pibisiacuai nacuaitya, yapëtanetsi piabejecuene. Nexata bajaraponae apo cuaixaetsi. Nexata pacuenia peubinaenë itsa nacuaitya, nayapëtane ponaecuai xanepana vajacuaixaenexa, bajara pijinia pacuenia paxamë payapëtaename pacuenia jamatabëcueneitsi bajarapamonae itsa pacuenetaename xua exanavanapa. Uvaru apo paucutsimë cucunanaeta. Higovënëcuaito ata apo paucutsimë jomovaënaeta.

<sup>17</sup> Nexata ponaepexanianaepexaniacuai pijinia nacuaitya vajaxaenexa. Ponaepijinia pibisianaepiabejecuai nacuaitya.

<sup>18</sup> Pexanianaepexaniacuai nacuaitya. Apo nacuaitya piabejecuai. Pibisianaepijinia apo nacuaitya pexaniacuai.

<sup>19</sup> Daxita ponaenë nacuaitya pibisiacuai, apo vajaxaecuai, yapëtanetsi. Nexata daxita bajarapon-aenëmi nicatatsi. Nexata tajuitatsi isotota.

<sup>20</sup> Bajara pijinia pacuenia paxamë ata payapëtaename itsa pacuenetaename xua exanavanapa pamonae saicayacuenia Dioso pejumelivaisivecua jivi tsipaebapona, jai Jesús pijajivijavabelia.

*Pacuenia daxitajivi apo jone tsane Dioso pijanacuayabetsia yabara pelivaisi  
(Lc 13.25-27)*

<sup>21</sup> Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Daxita pamonaë: “Tajatuxanenë,” tanejaivi ata, itsa apo jumecovënëtsi tsane taxa Dioso, athëbëtatsia peecaenë, nexata apo jone tsane taxa Dioso pijanacuayabetsia. Itsiata pamonaë exanavanapa taxa, athëbëtatsia peecaenë, pejitsipaecuenia, ëbajarapamonaë jonena taxa pijanacuayabetsia.

<sup>22</sup> Pamatacabi copiapatsiana pijaneconi pexainaevi Dioso penaneconitsiaexanaematacabinexa, bajarapamatacabi jivi ayaibitsaëtoxanetonë nejumaitsi tsane: “Patajatuxanenë, xamë baja cajena nejamatabëcueneta jivi patsipaebabiabajë Dioso pejumelivaisi. Nevënëtanua dovathi jivivecua pacapitsapaponajë. Nevënëtanua pinijicuene pataexanaejavanë, Dioso pesaëta paexanaponajë,” nejai tsane jivi ayaibitsaëtoxanetonë.

<sup>23</sup> Itsiata baitsi jane xanë jumaitsinë tsane bajarapamonaëjavabelia: “Apo pacayapëtaetsi cajena paxamë. Panevecuaponare pibisiacuene paneexanabiabivi,” janë tsane bajarapamonaëjavabelia, jai Jesús pijajivijavabelia.

*Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi*

*(Mr 1.22; Lc 6.47-49)*

<sup>24</sup> Jesús icatsia jumaitsi petsutoyenepanajavata pijajivi ayaibitsaëtoxanetojavabelia:

—Pajivi nejumecovënëtsiana patacatsipaebilivaisi, nexata itsa exanaena taitorobicuenia, apo nacueratsi tsane. Bajarapajivi piatajairata pijabo bepexanetsinë tsane. Tsipaji ponë



pijabo exanaejitsia, peyapëtaexae itsajota pijabo exanetsijitsia pebubutsijavanexa, nexata baja bajarajota apo exanetsi pijabo. Nexata pijabo exaneta bitso piatajairata. Nexata bajaraponë bo pexanaejava apo nacueratsi.

<sup>25</sup> Bo peveretetsicujinae ayaiemaxaneto jopa. Menianë avajubua tsaponae. Ira bubuta. Ayaijovibo bitso bubujai pijabojavaberena. Itsiata pijabo apo toxuabitsitsia. Tsipaji pijabo exaneta piatajairata.

<sup>26</sup> Pajivi nejumetae ata patacatsipaebilivaisi, apo nejumecovënëtsi tsane, nexata itsa apo exanae tsane taitorobicuenia, bajarapajivi nacueratsiana. Pacuenia tajetabota bo pexanetsinë nacuerata bo pexanaejava, bajara itsi tsane. Ponë tajetabota pijabo exaneta, yapëtae ata emarapae pecopiapatsijavanexa, bajaraponë nacuerata bo pexanaejava.

<sup>27</sup> Tsipaji bo peveretetsicujinae ayaiemaxaneto jopa. Menianë avajubua tsaponae. Ira bubuta. Ayaijovibo bitso bubujai pijabojavaberena. Pijabo nexata toxuabayatsi. Pepacuene baja nexata bomi abeje, jai Jesús mapacueniaje pijajivijavabelia.

<sup>28</sup> Itsa baja Jesús najumevereta petsu-toyenepanajavata bajarapalivaisi petsipaebijava, pejumetaevitsi bitso jamatabëcuenenabenajaca.

<sup>29</sup> Jesús pejumetaevitsi bitso jamatabëcuenenabenajaca tsipaji Jesús livaisi tsipaeba pinijijamatabëcuene pexainaenëcuenia. Apo tsipaebi pacuenia judíovi pecujarubivi tsipaebabiaba.

## 8

*Pacuenia Jesús jamatejemayaexana bajayajebi bitso peperabëtsabanaenë yabara pelivaisi (Mr 1.40-45; Lc 5.12-16)*

<sup>1</sup>Itsa baja Jesús runaica petsutojumavetsica, jivi ayaibitsaëtoxfaneto pënaponatsi.

<sup>2</sup>Nexata imoxoyotatsi bajayajebi bitso peperabëtsabanaenë. Pitabarata pematatabacabëta tonucatsi. Bitso peperabëtsabanaenë jumaitsi Jesúsjavabelia:

—Jesús, cacaëjëpa raja tanejamatejemayaexanaenexamë. Itsa jitsipame, nejamatejemayaexanare mapavitanevecuaje, jai bitso peperabëtsabanaenë.

<sup>3</sup>Nexata Jesús pecobeta perabëjayalia bitso peperabëtsabanaenë. Jesús jumaitsi bajaraponëjavabelia:

—Jājā, jitsipajë cajena. Jamatejemamë rabaja, jai Jesús bajayajebi bitso peperabëtsabanaenëjavabelia.

Bajarapacuenia Jesús pejumaitsijavata peperabëtsabanaenëmi baja perabëxanepananajereca.

<sup>4</sup>Nexata icatsia Jesús jumaitsi bajaraponëjavabelia:

—Nejumetaema. Pëtsa tsipaebame itsajivijavabelia ata tacajamatejemayaexanaejava. Naitajëtsiaremelia jane sacerdotenëjavabelia, templobota penacuenebinëjavabelia. Nexata jivi yapëtaena pepacuene baja pecavecuaajibijava niavitanejavami. Diosonexa rajuremelia ofrenda sacerdotenëjavabelia pecavecuaajibiaexanaexae niavitanejavami. Bajara tsipaji pacuenia bajayata

vajasalinainēmi Moiséspijinē nacaitoroba. Nexata sacerdotenē cataena pecavecuaajibijava baja niavitanejavami, jai Jesús bajaraponējavabelia.

*Pacuenia vajabitsaē pijacapitán pijabota petonacuenebaponaponaenētsi, Jesús tojamatejemayaexana yabara pelivaisi*

*(Lc 7.1-10)*

<sup>5</sup> Itsa baja Jesús pata Capernaum tomarabelia, Romano nacuapijivajabitsaēvi pijacapitán Jesús imoxoyorenatsi pevajētsinexatsi. <sup>6</sup> Vajabitsaēvi pijacapitán bitso ayaicuenia vajēta Jesúsjavabelia. Jumaitsi:

—Petuxanenē, tajajivitonē raja tajabota camata boboca. Bitso cuenabatsi. Pinijicuenia navixae-taeyabiaba, jai.

<sup>7</sup> Nexata Jesús jumaitsi capitánjavabelia:

—Xanē ponaenajē nijaboyabelia. Nexata catojamatejemayaexanaenatsi nijajivitonē, jai Jesús.

<sup>8</sup> Nexata capitán jumaitsi Jesúsjavabelia:

—Petuxanenē, xanē raja bitso beveliajamatabēcuenenēnē xamēvecua. Nexata apo xanepanae tsipae nejonejava tajaboyabelia. Nexata saya maveliaje ėnijume itorobare. Nexata tajajivitonē netojamatejema tsane.

<sup>9</sup> Xanē ata xainajē taneitorobabiabivi taneitorobicuenia tajumecovēnētabiabinexa. Xanē ata juya xainajē vajabitsaēvi tajajivi taitorobicuenia tanetoexanabiabinexa. Nexata itsa itorobajē caenē vajabitsaēnē peponaenexa, bajaraponē ponabiaba. Itsa junarenajē itsanē vajabitsaēnē pepatsinexa xanējavabereña, bajaraponē patabiabarēña. Itsa itorobajē tajajivitonē tanetoexanaenexa itsacuenejavayo,

nexata netoexanabiaba. Bajara pijinia pacuenia xamë ata nexanaenexa cacaëjêpa. Nexata saya maveliaje ënijume itorobare saya ënijumeta tajajivitonë tanetojamatejemayaexanaenexamë, jai capitán Jesúsjavabelia.

<sup>10</sup> Jesús itsa jumetane bajarapacuenia capitán pejumaitsijavatsi, nexata Jesús jamatabëcuenenabenajaca. Nexata Jesús jumaitsi pepënaponaevitsijavabelia:

—Xaniajanë pacuenia pacatsipaebijitsiatsi. Israel nacuapijivi nejumecovënëtsi ata, itsiata caeto ata apo caxitajarabaxuabinë xanëjavaberena bitso tanesivanajamatabëcuenecopatsinë pacuenia mapacapitán nesivajamatabëcuenecopatsiaya jumait-sije.

<sup>11</sup> Nexata pacatsipaebatsi paneyapëtaenexa. Apo judíovi ata raja, ayaibitsaëttoxanetonë daxitanacuanëpijivi, Dioso jumecovënëtsiana. Nexata apo judíovi ata capanepaenatsi Dioso pijanacuayabetsia. Nexata bajarapamonae Dioso pijanacuatatsia, Abrahampijinë yajava, nabaniana. Isaacpjinë ata, Jacobpjinë ata yajava, nabaniana.

<sup>12</sup> Itsiata bailsi jane judíovi, pamonaë picani Dioso athëbëtatsia toxaniavaetatsi peyjavajinavanapaenexatsi, bajarapamonae caranata apo jumecovënëtsi Dioso. Nexata bajarapamonae infiernojavabelia Dioso xuabianatsi. Bajarajota nuna. Navonosiniana bitso penavixaetaexae, jai Jesús mapacueniaje pepënaponaevitsijavabelia.

<sup>13</sup> Nexata icatsia Jesús jumaitsi capitánjavabelia:

—Ponare baja nijaboyabelia. Catoexanatsi rabaja pacuenia xanëjavaberena nesivanaja-

matabëcopatsiaya jumaitsimë tacatoexanaenexa, jai Jesús capitánjavabelia.

Nexata bajarapaepatota capitán pijabotalia pijajivitonë baja tojamatejematsi.

*Pacuenia Simón Pedro pijava pena Jesús tojamatejemayaexana yabara pelivaisi*  
(Mr 1.29-31; Lc 4.38-39)

<sup>14</sup> Jesús pona Pedro pijaboyabelia. Nexata Pedro pijabota Jesús taeyabuata Pedro pijava pena peromaebanucaejavatsi camata.

<sup>15</sup> Nexata Jesús cobejayata peromaebanucaevatsi. Jesús pecobejayatsijavata, bajarapova vecuaajibitsireca baja domae. Nexata baja bajarapova jamatejema. Jesús bana pexaejava bajarapova toexanatsi.

*Pacuenia ayaibitsaëto jivi, piavitanevi, Jesús jamatejemayaexana yabara pelivaisi*  
(Mr 1.32-34; Lc 4.40-41)

<sup>16</sup> Itsa baja ajena meravitsia, Jesúsjavaberena tocapatatsi ayaibitsaëto dovathi peyajavajinavana-paevi. Caejumeta saya Jesús caecuenia dovathi vecuacapitsapa bajarapamonae. Bajarajota jamatejemayaexananua daxita piavitanevi.

<sup>17</sup> Bajarapacuenia Jesús itsa exana, copiapata jane baja pacuenia Jesús yabara bajayata Diosojumepaebinëmi profeta Isaíaspijinë tajëvelia vajunupaeba. Profeta Isaíaspijinë bajayata tajëvelia jumaitsi mapacueniaje: “Bajaraponë nacavecuajibiaexanaena vajaavitanejavami,” jai bajayata tajëvelia Isaíaspijinë Jesús yabara.

*Pacuenia picani Jesús jamatabëpënaponatsi itsa-  
monae yabara pelivaisi  
(Lc 9.57-62)*

<sup>18</sup> Nexata Jesús itsa tane jivi ayaibitsaëto pematatoyoronaejavatsi, pijajivi junata pepëanaxuabinexatsi pucaxaneto itsapanabelia.

<sup>19</sup> Nexata bajarapaepatota judíovi pecujarubinë Jesús imoxoyorenatsi. Judíovi pecujarubinë jumaitsi Jesúsjavabelia:

—Petuxanenë, itsabelia poname, capënaponaenatsi cajena, jai.

<sup>20</sup> Nexata Jesús jumaitsi judíovi pecujarubinëjavabelia:

—Itsa nepënaponaejitsipame, apo napatabiabimë tsipae tajabota nenacueraevetabiabinexa. Tsipaji tajabo apo xainaenë. Namo pijamëthëanë xaina pepatabiabinexa pemajitabiabinexa. Baratsui ata pematapenanë xaina. Itsiata baitsi jane xanë, Daxitajivi Pematapijinënë, itsajavabelia ata apo xainaenë itsajota nacueraevetabiabijitsianë, jai Jesús judíovi pecujarubinëjavabelia.

<sup>21</sup> Nexata Jesús pijajiviyajuvënëne jumaitsi Jesúsjavabelia:

—Tajatuxanenë, caepatoyo abaxë necopare tamëthëtsinexa taxa petëpaenë, jai.

<sup>22</sup> Jesús nexata jumaitsi pijajivitonëjavabelia:

—Naxanitsia. Nepënaponare. Copare matacabi apo pevereverecaejava apo pexainaevinexa pemëthëcaenexatsi nijamonaemi itsa tëpa, jai Jesús pijajivitonëjavabelia.

*Pacuenia Jesús itaveta joviboxaneto, malataca yajava, piyajavami yabara pelivaisi*

*(Mr 4.35-41; Lc 8.22-25)*

<sup>23</sup> Jesús, pijajivi yajava, runa jera ënëabereca. Nexata Jesús pijajivi jerata yajavanajetaruca pucajava.

<sup>24</sup> Nexata jemata pinijijoviboxaneto najetaruca. Malatacaxanetonë bitso ayai. Nexata malataca jera ënëaberena mera epabajarabapona. Itsiata Jesús jamatejema majitanuca.

<sup>25</sup> Nexata Jesús pijajivi yaitavabatsi pemajitanucaenë. Jesús pijajivi jumaitsi:

—¡Patajatuxanenë, panecapanepare! ¡Vaxaitsimi rabaja yaothopaenatsi! jai Jesús pijajivi.

<sup>26</sup> Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavabelia.

Nexata Jesús namatacotapuna. Pinijijumeta itavetaxuaba jovibo, malataca yajava. Nexata baja daxita puca vainae ecaxuaba.

<sup>27</sup> Nexata Jesús pijajivi itsa tane bajaraxua, jatabäcuenenabenajaca. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

*Pacuenia Gadara tomarapijinëbeje, dovathivi peyajavaponaponaenëbeje, Jesús vecuacapitsapa Gerasa nacuata yabara pelivaisi*

*(Mr 5.1-20; Lc 8.26-39)*

28 Jesús pijajivi barëpata pucaxaneto itsapanabelia, Gerasa nacuayabelia. Jesús itsa pata Gerasa nacuata, Gadara tomarapijinëmibeje pitsaparenabeje jivimëthëanëjavaverena. Imoxoyorenatsibeje Jesús. Bajaraponëbeje dovathivi peyajavaponaponaenëbeje. Bitso anaepanabiababeje. Nexata itsajivi ata apo ponabiabi bajaraxuayo perucaenamutojava.

29 Nexata dovathivi peyajavaponaponaenëbeje vavajaiibeje.

—Jesús, Dioso pexënatomë, ¿detsa xua namatavenoname paxanëbejejavaberena? ¿Dioso tsaja daxitajivi penaneconitsia exanaematacab-inexavajënaeya patame patanenaneconitsiaex-anaenexamëbeje? jaibeje Jesúsjavabelia dovathivi peyajavaponaponaenëbeje.

30 Nexata bajarajota, imoxoyo petsutojavata, marranobitsaëtoxaneto xaevanapa.

31 Nexata dovathivi bitso vajëca Jesúsjavabelia. Jumaitsi:

—Itsa panexuabijitsiamë maponëbejevecuaje, panetocopare patajonenexa marranobit-saëtoxanetojavabelia, jai.

32 Nexata Jesús jumaitsi dovathivijavabelia:

—Paponare baja panejonenexa marranobit-saëtoxanetojavabelia, jai.

Nexata bajaraponëbeje dovathivi vecuapitsapatsibeje. Nexata baja marranobit-saëtoxanetojavabelia junua dovathivi. Nexata daxita bajara pamarranobitsaëtoxanetomi kujinaeyeca. Pucaxaneto itapajanituareca othopareca. Bajarajota daxita marranobit-saëtoxanetomi meneta bubuna.



<sup>33</sup> Bajara pamarranobitsaëtoxanetomi peveta-vanapaevi, rëcëpeca. Itsa bajarapamonae Gadara tomarabelia pata, tsipaeba pacuenia tane. Tsipaebanua pacuenia Jesús dovathivi vecuacapsapa dovathivi peyajavaponaponaeñeje.

<sup>34</sup> Nexata daxita bajarapatomarapijivi ponarena Jesúsjavabereña. Nexata ita tanetsi Jesús, daxita bajarapamonae jumaiti Jesúsjavabelia:

—Pexaniacuene pacavajëtatsi. Ponare baja patajanacuavecua, jai bajarapamonae Jesúsjavabelia tsipaji cjunavatsi.

## 9

*Pacuenia Jesús jamatejemayaexana petabusi-pacuenabinëtsi yabara pelivaisi  
(Mr 2.1-12; Lc 5.17-26)*

<sup>1</sup> Jesús runareca jera ënëabereca. Nicabilia puca itsapanabelia. Pata nexata pijatomarabelia.

<sup>2</sup> Bajarajota Jesús tocapatatsi petabusi-pacuenabinëtsi. Pacamayota bocabiaba, yavëtarapatatsi. Jesús jamatabëcueneyapëtane pacuenia sivanajamatabëxainatsi petocapsivitsi. “Nacatojamatejemayaexanaenatsi cajena,” pesivajamatabëjaijavatsi Jesús jamatabëcueneyapëtane. Bajaraxuata petabusipacuenebinëtsijavabelia Jesús jumaiti mapacueniaje:

—Tajabanänë, jamatabëcuenenarëyamëre. Pibisiacuene rabaja nexanaeneconimi cavecuaajibiaexanatsi, jai Jesús petabusipacuenabinëtsijavabelia.

<sup>3</sup> Nexata judíovi pecujarubivi itsa jumetaeyena bajarapacuenia Jesús pejumaitsijava, najamatabëxainena.

—Maponë Jesúsje Dioso apo pejitsipaecuenia cuaicuaijai, jamatabëjai tsenae judíovi pecujarubivi Jesús yabara.

<sup>4</sup> Jesús jamatabëcueneyapëtane judíovi pecujarubivi bajarapacuenia pesivanajamatabëxainaejavatsi. Nexata Jesús jumaitsi judíovi pecujarubivijavabelia:

—Panesivanajamatabëxainame xanëjavaberena pibisiajamatabëcuene.

<sup>5</sup> Paxamë apo pacacaëjêpae ata itsajivi pibisiacuene pexanaeneconi panevecuaajibiaexanaenexa, pacacaëjêpa picani saya jema panejumaitsinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsipaji itsajivi ata apo yapëtae tsipae saya jema panejumaitsijava. Itsiata baitsi jane itsa apo pacacaëjêpae panejamatejemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjêpae cuene panejamatejemayaexanaenexa, jai nexata Jesús judíovi pecujarubivijavabelia.

<sup>6</sup> Icatsia Jesús jumaitsi judíovi pecujarubivijavabelia:

—Xanë Daxitajivi Pematapijinënë, ma-panacuata necaējēpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajē maponējavabeliaje. Nexata patanecueneyapētaenexamē tanecaējēpaecuene tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianē maponēje, jai Jesús judíovi pecujarubivijavabelia.

Nexata icatsia Jesús jumaitsi petabusipacuenabinētsijavabelia:

—Nonotapunare baja. Nijacamayo pire. Nijaboyabelia baja ponare, jai Jesús.

<sup>7</sup> Nexata bajarapacuenia Jesús pejumaitsijavata, petabusipacuenabinēmitsi nonotapuna. Pijaboyabelia baja pona.

<sup>8</sup> Nexata jivi itsa tane bajaraxua, junava cajena bitso. Nexata bajarapamonae jumaitsi Diosojavabelia:

—Diosomē, bitso ayaijamatabēcuenenēmē. Tsipaji jivi caējēpaeyaexaname pinijicuene pexanaenexa, jai.

*Pacuenia Jesús pijajivitonēnexa junata Mateo yabara pelivaisi*

*(Mr 2.13-17; Lc 5.27-32)*

<sup>9</sup> Jesús baja vecuapona itsajota jamatejemayaexana petabusipacuenabinētsi. Nexata Jesús penajetaruciejavata taeyeta Mateo. Mateo gobierno pejamatabēcuenē impuestomatamo pematamoyanijobabiabinē. Pabota jivijavabelia Mateo impuestomatamo matamoyanijobabiaba,

bajarapabota eca Mateo. Nexata Jesús jumaitsi Mateojavabelia:

—Mateo, nepënaponare, jai.

Jejai Mateo. Nexata nonotapuna. Mateo baja napona Jesús pepëta.

<sup>10</sup> Nexata Mateo junata Jesús pebarënananinexa pijabota. Nexata Mateo pijabota Jesús pexaejava naxane. Mateo pijabota naena ayaibitsaëto gobierno pejamatabëcuene jivijavabelia impuestomatamo petomatamoyanijobivi. Itsamonae ata nanabane, piamatabëcuenebejevi. Jesús pijajivi nayajavaeca bajarapamesajavata.

<sup>11</sup> Nexata fariseovi itsa tane bajarapacuene, jamatabëcuenenavëxaniabiaya jumaitsi Jesús pijajivijavabelia:

—Papecacujarubinë rabaja Jesús naneconita Diosojavabelia. Tsipaji gobierno pejamatabëcueneta impuestomatamo pematamoyanijobabiabivijavata, piamatabëcuenebejevijavatanua, naxaeyeca pexaejava, jai fariseovi Jesús pijajivijavabelia.

<sup>12</sup> Jesús nexata jumetaeyeca bajarapacuenia fariseovi pejumaitsijava. Nexata Jesús jumaitsi fariseovijavabelia:

—Pevaëbinë raja apo vaëbi pejamatabëjemavi. Pevaëbinë raja piavitanevi vaëba. Bajara pijinia xanë ata itsinë. Sivapatajopajë tajunatsinexa pibisiajamatabëcuenevi pecapanepaenexatsi Diosojavabelia.

<sup>13</sup> Paponare. Palebianame Dioso pejumelivaisibaxuto. Nexata payapëtaename pajamatabëcuene yabara jumaitsi Dioso pejumelivaisibaxutota mapacueniaje: “Jitsipajë

paneitaxutotsoniataejava itsamonae. Apo jitsipaenë saya patanetobeyabiabijavamë dajubicuene ofrendacuenia patanerajutabi-abinexamë,” jai Dioso pejumelivaisibaxutota. Xanë raja apo sivapatajopaenë tajunatsinexa pamonaë baja aneconijibi tsavanapae. Biji rajane sivapatajopajë tajunatsinexa pijaneconi pexainaevi. Junataponajë bajarapamonaë pecopabinexa pibisiacuenë pexanaejava penajamatabëcuenepënëyorotsinexa Diosojavabelia, jai Jesús fariseovijavabelia.

*Pacuenia Jesús yanijobatsi pamatacabibeje jivi vajëtapona Diosojavabelia pexaejava apo pexaeyabiabixae yabara pelivaisi*

*(Mr 2.18-22; Lc 5.33-39)*

<sup>14</sup> Juan pijajivi Jesús imoxoyorenatsi. Nexata Juan pijajivi jumaitsi Jesúsjavabelia mapacueniaje: —Petuxanenë, paxanë pataxaejava apo paxaeyabiabinë pamatacabibeje pavajëtaponajë Diosojavabelia. Bajara pijinia itsi fariseovi ata pamatacabibeje vajëtapona Diosojavabelia. Pexaejava apo xaeyabiabi. ¿Detsa xuajitsia xamë nijajivi pamatacabibeje vajëtapona Diosojavabelia pexaejava xaeyabiaba? jai Juan pijajivi Jesúsjavabelia.

<sup>15</sup> Nexata Jesús jumaitsi Juan pijajivijavabelia:

—Pamonaë junatatsi penacasabifiestajavabelia penanabaninexa, apo atsohi pexaejava itsa abaxë yajavaecatsi pejananacasabinë. Itsiata baitsi jane pejananacasabinë itsa tsimaxëpatsipatsi peve-cuacaponanexatsi itsajavabelia, nexata bajara-pamonaë pexaejava apo xae tsipae. Tsipaji

bitso najamatabëxainaejitsipa pevecuacaponaeaxetsi. Bajara pijinia itsi tajajivi ata. Tayajavaponaponaeepto abaxë apo atsobabiabi pexaejava pamatacabibeje Diosojavabelia vajëtaþona. Itsiata pamatacabi xanë necaponaena bajarapamonaevecua, nexata jane baja bajarapamatacabi pexaejava apo xae tsane bitso tanesivanajamatabëxainaeaxae, jai Jesús Juan pijajivijavabelia.

<sup>16</sup> Nexata Juan pijajivi perujumatabëcuene baja penavecuacopatsinexa, Jesús livaisi tsipaeba comparacióncuenia, Juan pijajivi pejumecovënëtsinexa ëpejanalivaisi, Jesús petsipae bilivaisi. Juan pijajivi anijajumatabëcuenebeje pexainaeyaniva, perujumatabëcuene baja pecopabinexa, Jesús livaisi tsipaeba comparacióncuenia. Perujumatabëcuene yabara Jesús jumaitsi Juan pijajivijavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa.

<sup>17</sup> Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi. Bajaraxuata bepaca

pejanavinoranë pejanabocodoruanëjavabelia. Nexata vinoranë peyaxanepanaenexa bajayajebi ata pejanabocodoronëta, jai Jesús Juan pijajivijavabelia.

Bajarapacuenia Jesús jumaitsi Juan pijajivi pejumecovënëtsinexa ëpejanalivaisi, Jesús petsipaebilivaisi, perujujamatabëcuene baja pecopabinexa.

*Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi*  
(Mr 5.21-43; Lc 8.40-56)

<sup>18</sup> Jesús livaisi petsipaebanucaejavata Juan pijajivijavabelia, judíovi penacaetuatabiabibo pevetsinë parena Jesúsjavaberena. Nexata bajaraponë Jesús pitabarata yaiyataeya pematatabacabëta nucajunua. Jumaitsi Jesúsjavabelia:

—Taxënatovayo rabaja aeconoxae netotëpa. Itsi-ata baitsi jane itsa poname tajaboyabelia, nexata itsa netoperabëjayatsianame necobeta, icatsia netoasaë tsane, jai bajaraponë Jesúsjavabelia.

<sup>19</sup> Nexata Jesús nonotapuna. Judíovi penacaetuatabiabibo pevetsinë pepëta Jesús, pijajivi yajava, napona.

<sup>20</sup> Nexata Jesús namutua penajetarucaejavata, pepënëverena imoxoyotatsi petiriva, piavitaneva. Bajarapova pijanacuene pecapunaecujinaetsi doce baja pavaibeje xaina. Nexata bajarapova Jesús pepënëvelia ponataba, jivibitsaëttoxaneto tuatuajëjavalialia. Nexata bajarapova tojayataba Jesús penaxatatsijavacopia.

21 Bajarapacuenia tojayataba Jesús penaxatatsijavacopia tsipaji bajarapova jamatabëjumaitsi macuenuiaje:

—Itsa tojayatabianajë Jesús penaxatatsijavacopia, nexata tavitanejavami nevecuaajibi tsane, jamatabëjai bajarapova.

22 Nexata Jesús napënëyorotaxuaba. Taenuta bajarapova. Nexata Jesús jumaitsi bajarapovajavabelia:

—Jamatabëcuenebarëyamëre. Xamë nesivajamatabëjumaitsimë: “Itsa tojayatabianajë Jesús penaxatatsijava, nexata tavitanejavami nevecuaajibi tsane,” nesivajamatabëjamë. Bajaraxuata jamatejemamë baja, jai Jesús bajarapovajavabelia.

Bajarapacuenia Jesús pejumaitzijavata bajarapova jamatejema baja.

23 Bajaraxuacujinae Jesús jane baja pata judíovi penacaetuatabiabibo pevetsinë pijaboyabelia. Nexata Jesús itsa pata, tane pevajënae pepatsivi, flauta piobivinexa itsabelia caponaejitsia petëpaevayo pemëthëtsinexa piobinexa. Tanenua jivi bitso pinijicuenia pemataneuyabavanapaejava petëpaevayo.

24 Nexata Jesús jumaitsi bajarapamonaejavabelia:

—Papitsapare mapabovecuaje. Pejanava raja apo tëpae. Saya raja majita, jai Jesús tsipaji yapëtane Jesús piasaëyaexanaejavanexa bajarapovayo.

Nexata saya bajarapamonae Jesús jumecapocaponatsi bajarapacuenia pejumaitzijava.

25 Jesús nexata bajarapamonae bovecua pitsapaeyaexana. Nexata itsaxuayolia petëpaevayo



boca, Jesús joneya. Cobepita petëpaevayo. Bajara-povayo baja namatacota.

<sup>26</sup> Nexata daxita bajarapanacuapijivi Jesús vënëlivaisitanetsi piasaëyaexanaejava petëpaevayomi.

*Pacuenia Jesús itaxutoxaniavaeta bitso pitaxutotsëcënaenëmibeje yabara pelivaisi*

<sup>27</sup> Itsa baja Jesús pona judíovi penacaetu-atabiabibo pevetsinë pijabovecua, anijanëbeje bitso pitaxutotsëcënaenëbeje Jesús pënaponatsi. Bajaraponëbeje vavajaiya jumai tsaponaebeje Jesúsjavabelia:

—¡Jesús, Davidpijinë pemomo, paneitaxutotsoniataemabeje! jaibeje tsaponae Jesúsjavabelia.

<sup>28</sup> Itsa baja Jesús joneya pabojavabelia pona, nexata bajaraponëbeje pënajoneyatsibeje. Nexata Jesús bajarajota jumaitsi bajaraponëbejejavabelia:

—¿Payapëtanemebeje tsaja tanecaëjëpaecuene patacaitaxutoxanepanaeya exanaejavanexabeje? jai Jesús bitso pitaxutotsëcënaenëbejejavabelia.

Nexata bitso pitaxutotsëcënaenëbeje jumaitsi-beje Jesúsjavabelia:

—Jājā, payapëtanijibeje cajena, jaibeje.

<sup>29</sup> Nexata Jesús itaxutojayata bitso pitaxutotsëcënaenëbeje. Jesús jumaitsi bitso pitaxutotsëcënaenëbejejavabelia:

—Pacuenia baja xanëjavaberena nesi-vanajamatabëcuencopatsiaya panesivanajamatabëxainamebeje patacaitaxutoxaniavaetsinexabeje, bajarapacuenia pacatoexanatsibeje, jai Jesús.

30 Nexata bitso pitaxutotsēcēnaenēmibeje itaxutoxanepanabeje baja. Bajaraxuacujinae Jesús asaēya jumeitaveta bajaraponēbeje. Jumaitsi:

—Pētsa panavajunupaebamebeje itsamonaejavabelia patacaitaxutoxaniavaetsijavabeje, jai Jesús.

31 Itsiata saya ajena bajarapabovecua pitsapaliabeje, navajunupaebaponabeje. Pacuenia Jesús itaxutoxaniavaetatsibeje, nava-junupaebaponabeje daxita bajarapanacuajava.

*Pacuenia Jesús natsipaebiaexana apo pecuaicuaijainēmi yabara pelivaisi*

32 Itsa baja bovecua pitsapabeje ponēbeje Jesús itaxutoxanepanaeyaexana, bitso pitaxutotsēcēnaenēmibeje, nexata icatsia itsamonae Jesús tocaparenatsi apo pecuaicuaijainē. Bajaraponē dovathi peyajavaponaponae.

33 Nexata apo pecuaicuaijainē Jesús dovathi itsa vecuacapitsapa, cuaicuaijai baja xaniavaetsia. Nexata petaevitsi bitso jamatabēcuenenabenajaca. Najumaitsi bajarapamonae:

—Caeto ata cajena Israel nacuata itsajivi ata apo tae mapitsicueneje, najai bajarapamonae.

34 Itsiata baitsi jane fariseovi jamatabēcuenenavēxaniabiaya jumaitsi Jesús yabara:

—Mara ponēje dovathi jivivecua capitsapabiaba dovathivi pepo penamatacaitorobinē pesaēta, jai fariseovi Jesús yabara.

*Pacuenia Jesús itaxutotsoniatane jivi yabara pelivaisi*

35 Jesús najetaruca daxita tomaranējava, tsiquiritomaraxijava ata. Nexata bajarapatomaranējava

judíovi penacaetuatabiabibonëjava pexanialivaisi Jesús jivi tsipaebanajetaruca. Tsipaebanajetaruca daxita Dioso pijajivi pevetsijavanexa. Piavitanevi ata Jesús jamatejemayaexanapona, daxitaviriavitanane pexainaevimi.

<sup>36</sup> Jesús jivi itsa tane, itaxutobejobiatane. Tsipaji jivi bitso baja cajena cuerana. Apo caëjëpaetsinua jivi penatoexanaenexa itsacuenejavayo ata. Jesús jivi sivajamatabëjumaitsi mapacueniaje:

—Pacuenia itsi ovejabitsaëtoxaneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

<sup>37</sup> Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pabita peubijava penaveretsijava abaxë bitso ayaijava sajina penotsinexa. Tsipaji saya caejiviyobeje penotsivi. Bajara pijinia itsi jivi ata Diosojavabelia penajamatabëcopabivinexa. Abaxë sajina ayaibitsaëtoxaneto. Itsiata baitsi jane Dioso panetonacuenebivi paejiviyomëbeje saya.

<sup>38</sup> Bajaraxuata Diosojavabelia pavajëcabiabare icatsia itsamonae Dioso pijajivi pitorobinexa papecayavenonaenexa, jai Jesús pijajivijavabelia.

## 10

*Pacuenia Jesús pijajivi ayaibitsaëtoxanetoyajuvënëvi itapeta saya doce ponëbeje apóstolevinexa yabara pelivaisi*

*(Mr 3.13-19; Lc 6.12-16)*

<sup>1</sup> Jesús pijajivi ayaibitsaëtoxanetoyajuvënëvi junata saya doce ponëbeje Jesús

pebarēnacaetuatsinexa. Jesús pija-  
 jivi pecaējēpaejamatabēcuenetsi ja-  
 matabēcuenecaējēpaeyaexana dovathi peyajava-  
 jinavanapaevi pevecuacapitsapaponaenexa,  
 pejamatejemayaexanaponaenexanua  
 daxitaviriavitane pecapunaevitsi.

<sup>2</sup> Mara doce ponēbeje Jesús pijajivi, apóstolevi,  
 pevēnēanēje. Itsanē pevēnē Simón. Itsavēnē  
 bajaraponē Pedro. Itsanē pevēnē Andrés, Simón  
 pejuyapijinē. Itsanēbeje pijinia Santiagobeje  
 Juanbeje nacaebananēbeje, Zebedeo pexēnatobeje.

<sup>3</sup> Itsanē pevēnē Felipe. Itsanē Bartolomé.  
 Itsanē Tomás. Itsanē Mateo, impuestomatamo  
 gobierno pejamatabēcue jivijavabelia  
 petomatamoyanijobinēmi. Itsanē pevēnē  
 Santiago, Alfeo pexēnato. Itsanē pevēnē Lebeo.  
 Bajaraponē itsavēnē Tadeo.

<sup>4</sup> Itsanē Simón, celotenē. Itsanē pevēnē Judas  
 Iscariote. Bajaraponē bexējajavabelia canajetsijitsi-  
 atsi Jesús pijavajabitsaē pecobeyabelia pebeyaxu-  
 abinexatsi.

*Pacuenia Jesús pijajivi itoroba Dioso pitorobili-  
 vaisi jivi petsipaebanajetarubenaenexa yabara pe-  
 livaisi*

*(Mr 6.7-13; Lc 9.1-6)*

<sup>5</sup> Jesús pijajivi pitorobivajēnaeya jumaitsi pija-  
 jivijavabelia mapacueniaje:

—Pētsa paponame apo judíovi pijanacuayabelia.  
 Pētsa paponame Samaria nacuata penaetomaranējavabelia ata.

6 Paponare jane Israel nacuapijivijavabelia. Pacuenia ovejabitsaëtoخانeto pevetsinëtsi vecuanaxuabavanapa, bajara pijinia pacuenia Israel nacuapijivi Diosovecua naxuabavanapa.

7 Patsipaebanajetarubenaename bajarapamonae imoxoyo baja pevajënae pecopiapatsijavanexa Dioso pijajivi pevetsimatacabinexa.

8 Pajamatejemayaexanaponaename piavitanevi. Pasaëyaexanaponaenamenua petëpaevimi ata. Pajamatejemayaexanaponaenamenua bajayajebi bitso peperabëtsabanaevi. Pavecuacapitsapaponaenamenua dovathi peyajavajinavanapaevi. Amoneya raja pacacaëjëpaeyaexanatsi bajarapacuenia paneexanaponaenexa. Bajaraxuata amoneya jivi pajamatejemayaexanaponaename. Pëtsa pamatamoyanijobame panejamatejemaya exanaejamatabëcuene, jai Jesús pijajivijavabelia pitorobivajënaeya.

9 Jesús icatsia jumaitsi pijajivijavabelia pitorobivajënaeya:

—Panijanamutonexa pëtsa pacaponame palata.

10 Pëtsa pacaponame panijadoro ata. Saya pajumaponaename caenaxatatsi. Panenataxuxatatsijava ata, pataxunaponaename caejava. Naeboyo ata pëtsa pacaponame. Pamonaejavabelia livaisi patsipaebianame, pacarajutsiana panexaejava. Bajarapacuenia pacarajutsiana tsipaji pajivi xaniavaetsia itsanëjavabelia tonacueneba, bajarapajivi juya pexaejava barajutatsi.

11 'Itsa papatabiabianame pinijitomarata, tsiquiritomarayojavata ata, bajarajota pajaitabiabianame ponë peyaiyataenëtsi. Nexata

bajaraponë pijabota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajarapabovecua papitsapaename.

<sup>12</sup> Itsa pabota papatsijitsiamë, ajena pajonejitsiamëlia, pajumaitsimë tsabiabi tsane: “Diosojavabelia raja pacatovajëtsijitsiatsi xaniavaetsia panejinavanapaenexa,” pajamë tsabiabi tsane.

<sup>13</sup> Itsa bajarapabopijivi pacacopiapitsiana xaniavaetsia, nexata pacuenia Diosojavabelia patovajëtame, yavenonaenatsi Dioso. Itsiata baitsi jane itsa apo pacacopiapitsi tsane xaniavaetsia, nexata pëtsa patovajëtame Diosojavabelia peyavenonaenexatsi.

<sup>14</sup> Itsa apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, bajarapabo pavecuaponaename. Bajarapatomara ata baja pavecuaponaename. Nexata baja itsa paponaejitsiamë bajarapatomaravecua, paneponaevajënae, bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, bajarapatomarapijivi yapëtaena Diosojavabelia penaneconitsicuene apo papecacopiapitsixae papecanamuxunaevetsinexa panetsipaebilivaisi.

<sup>15</sup> Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi Dioso ayaicuenia naneconitsiaexanaenatsi patomara-pijivi apo pacacopiapitsi tsane. Paneconivajëtota bajayata Dioso naneconitsiaexana Sodoma

tomarapijivimi, Gomorra tomarapijivimi  
 ata, bajarapaneconivajëto matatoxenetsia  
 itsamatacabi Dioso naneconitsiaexanaena  
 patomarapijivi apo pacacopiapitsi tsane, jai Jesús  
 pijajivijavabelia pitorobivajënaeya.

*Pacuenia Jesús pijajivi bejiobiaexanaejitsiatsi  
 yabara pelivaisi*

<sup>16</sup> Icatsia Jesús jumaitsi pijajivijavabelia:

—¡Xania panayajivitaename! Pacaitorobianatsi  
 raja bitso pibisiacuene pexanabiabivijavabelia.  
 Pacuenia ovejasi tsiayaitsi itsa jinavanapa pi-  
 anaepanaevi nevëthë tuatujëata, bajarapaitsimë  
 tsane. Nexata pacuenia unupijivi nayajivitaeya-  
 jinavanapa pitsacueniabiyativatsi, bajara pait-  
 simë tsane. Pacuenia ata ucucu aneconijibia jina-  
 vanapa, bajara paitsimë tsavanapae tsane.

<sup>17</sup> Xania baja tsane. Patajajivixaemë raja  
 jivi pacaneconitsiana papecananeconitsiaex-  
 anaenexa. Nexata itsajota nacaetuatabiaba  
 tomara pevetsivi, bajarabelia pacacapon-  
 aena. Judíovi penacaetuatabiabibonëjava  
 pacajumatitibabeyabiabiana penaneconitsivi  
 pejumaconitabiabimacata.

<sup>18</sup> Patajajivixaemë pacanubiananua  
 nacuaevetsivi pitabarata, presidentevi  
 pitabarata ata. Bajarajota nexata xanë talivaisi  
 patsipaebianame bajarapamonaejavabelia, apo  
 judíovi ata pitabarata.

<sup>19</sup> Itsiata baitsi jane itsa pacanubiana  
 nacuaevetsivi pitabarata, pëtsa paja-  
 matabëbëjamë panenayajivicuaicuaijainexa  
 bajarapamonaejavabelia. Tsipaji raja

paepatota panayajivicuaicuaijamëjitsia,  
bajarapaepatota Dioso pejamatabëcueneta  
pacacuaicuaijiaexanaena.

20 Itsa panayajivicuaicuaijamë tsane, paxamë  
panijacuata apo pacuaicuaijamë tsane. Espíritu  
Santo raja pacacuaicuaijiaexanaena.

21 'Itsamonae pematapijivi, pejuyapijivi ata,  
canajetsiana nacuaevetsivijavabelia pebeyaxu-  
abinexatsi. Itsamonae nacoxicanajetsiana  
nacuaevetsivijavabelia pebeyaxuabinexatsi.  
Itsamonae canajetsiana paxa, pena ata,  
nacuaevetsivijavabelia pebeyaxuabinexatsi.

22 Daxita nacuapijivi pacaitoya tsane pataja-  
jivixaemë. Pajivi bejiobiaexanae atatsi tsane,  
itsiata itsa casaë tsaponaponae tsane tanejume-  
covënëtsijava, bajarapajivi capanepaenatsi Dioso  
pijanacuayabetsia.

23 Itsa patomarata pacabejiobiaexanaena, ba-  
jarapatomaravecua parëcëpecaename itsatomara-  
belia. Xaniajanë pacuenia pacatsipaebijitsiatsi.  
Daxita Israel nacuata penaetomaranëjava abaxë  
patsipaebiveretsinejevamë pexanialivaisi, xanë,  
Daxitajivi Pematapijinënë, itacarajeta icatsia pat-  
sianicajë.

24 'Itsajivi ata apo jamatabëcuenematatoxenetsi  
pecujarubinëtsi. Itsajivi ata pijinia itsanë itsa pija-  
jivitonë, apo jamatabëcuenematatoxenetsi pijatuxa-  
nenë.

25 Pacuenia pecujarubinë itsamonae copiaya  
bejiobiaexanatsi, bajarapacuenia icatsia ba-  
jaraponë pecujarubivi ata bejiobiaexanaenatsi.  
Pacuenia petuxanenë copiaya bejiobiaexanatsi,  
bajarapacuenia icatsia pijajivitonë ata cotocaevi



bejiobiaexanaenatsi. Xanë panijatuxanenënë: “Beelzebú, daxita dovathivi pijatuxanenë,” nejai tsabiabi itsamonae. Nexata pijinia patajajivixaemë bitso pibisiavënëta paxamë ata cotocaevi pacajunatabiabiana, jai Jesús pijajivijavabelia.

*Pacuenia Jesús pijajivi tsipaeba pecujunaviyaniva pebeyaxuabijavatsi yabara pelivaisi (Lc 12.2-7)*

<sup>26</sup> Icatsia Jesús jumaitsi pijajivijavabelia:

—Pëtsa pacujunavame jivi, pacaatiobi ata. Daxita xua jivi muetsia pibisiacuene exana, bexëajavabelia cueneyapëtaeponaenatsi daxitajivi.

<sup>27</sup> Palivaisianë muetsia vajaepatojavata pacat-sipaebaponatsi, bajarapalivaisianë paxamë pini-jijumeta patsipaebaponaename jivi penacaetuatabiabijavata.

<sup>28</sup> Pëtsa pacujunavame jivivevi ata. Bajaramonae pacabeyaxuabi ata tsipae, acuenebi matavëjëa papecaitsacueniabinxaxa pepo panejamatavëcuenejavabelia. Biji rajane pacujunavare Dioso, ponë caëjëpatsi papecaxuabinexa infiernojavabelia papecabeyaxuabicujinae.

<sup>29</sup> Anijanëbeje baratsuitobeje namatamota saya caepalatanëyo. Itsiata baitsi jane caenë ata barsuito Dioso pepëya jemata muetsia apo jopaetsica petëpaenë. Tsipaji paneaxa, Dioso, asiva barsuiti ata.

<sup>30</sup> Dioso cajena bitso pacaasiva barsuiti mata-toxenetsia. Nexata panematanatoxi ata, caematanatoyo canacujitsia, Dioso namataëjëta.

<sup>31</sup> Bajaraxuata pëtsa pacujunavame itsacuenejavayo ata. Tsipaji paxamë Dioso bitso pacaasiva

baratsuitoxti matatoxenetsia, jai Jesús pijajivijavabelia.

*Pacuenia Jesús pijajivi apo benayavajunuax-  
ainae Jesús pijajivicuene yabara pelivaisi  
(Lc 12.8-9)*

<sup>32</sup> Icatsia Jesús jumaitsi pijajivijavabelia:

—Daxita pamonaе tajajivi, jivi pitabarata itsa navajunupaebiana tajajivicuene, xanë ata vajunupaebianajë bajarapamonaе tajajivicuene taxa, athëbëtatsia peecaenëjavabelia.

<sup>33</sup> Pamonaе jumai tsane itsamonaеjavabelia: “Xanë cajena Jesús apo pijajivitonënë,” jai tsane, nexata pijinia bajarapamonaе yabara xanë jumaitsinë tsane taxa Diosojavabelia: “Mara pamonaе apo tajajivije,” janë tsane, jai Jesús pijajivijavabelia.

*Pacuenia Jesús apo penajuajumecovënëtsixae,  
nacaemonaе ata apo najamatabëcuenejëpae tsane  
yabara pelivaisi  
(Lc 12.51-53; 14.26-27)*

<sup>34</sup> Icatsia Jesús jumaitsi pijajivijavabelia:

—Pëtsa panesivajamatabëjumaitsimë mapacueniaje: “Jesús rabaja patsica mapanacuayabetsicaje daxitajivi mapanacuataje najamatabëcuenejëpaeya pejinavanapaeyaex-anaenexa,” panesivajamatabëjamë pëtsa. Bajaraxuanexa apo patsinëtsica. Biji rajane xanë tapatsixaetsica mapanacuayabetsicaje, jivi itsa nejumecovënëtsiana, apo najamatabëcuenejëpae tsane pamonaеjavabelia apo nejumecovënëtsi, nacaemonaе ata. Napijavajabitsaë tsane namataenetsia.

<sup>35</sup> Xanë apo tanenajuajumecovënëtsixaebeje, pebibeje paxabeje apo najamatabëcuenejêpaebeje tsane. Petirivabeje ata, pexënatoyobeje xanë apo tanenajuajumecovënëtsixae penabeje apo najamatabëcuenejêpaebeje tsane. Pamebeje ata pecopenabeje apo najamatabëcuenejêpaebeje tsanë.

<sup>36</sup> Nexata xanë apo tanenajuajumecovënëtsixae, caejivi canacujitsia beprijavajabitsaëjivi taenatsi pijamonaejivi ata.

<sup>37</sup> Pajivi nejumecovënëtsi ata, apo niasiva tsane paxa, pena ata, piasivajava matatoxenetsia, bajarapajivi apo tajajivi tsane. Pajivi nejumecovënëtsi ata, apo niasiva tsane pexë nato, pexë natoyo ata, piasivajava matatoxenetsia, bajarapajivi apo tajajivi tsane.

<sup>38</sup> Pajivi nejumecovënëtsi ata, pecajunavi apo nepënaponae tsane pebeyaxuabixaejitsiatsi xanë tajumelivaisi yabara, bajarapajivi apo tajajivi tsane.

<sup>39</sup> Pajivi nayavajunuaxaina tajajivicuene pebejiobiaexanaeyanivatsi, pebeyaxu-abianivatsinua, bajarapajivi naxuabiana daxitamatacabijavabelianexa. Itsiata baitsi jane pajivi beyaxuabatsi tajajivixae, bajarapajivi daxitamatacabijavabelianexa Dioso capanepaenatsi, jai Jesús pijajivijavabelia.

*Pacuenia Dioso matamotsijitsiatsi pamonaexaniavaetsia copiapita Jesús pijajivi yabara pelivaisi (Mr 9.41)*

<sup>40</sup> Icatsia Jesús jumaitsi pijajivijavabelia:

—Pajivi pacacopiapitsiana patajajivixaemë, bajaraxua xanë taniji tanecopiapitsijava. Pajivi

necopiapitsiana, bajaraxua taxa Dioso tane pecopiapitsijavatsi.

<sup>41</sup> Diosojumepaebinë Dioso matamotsianatsi petonacuenebimatamo. Nexata pajivi xaniavaetsia copiapita Diosojumepaebinë, bajarapajivi ata Dioso matamotsianatsi. Nexata xuavajëto Diosojumepaebinë Dioso matamotsianatsi, bajara pijinia xuavajëto Dioso matamotsianatsi pajivi copiapita Diosojumepaebinë. Pajivi ata exanabiaba Dioso pitorobicueniatsi, bajarapajivi ata Dioso matamotsianatsi. Nexata pajivi xaniavaetsia copiapita pajivi exanaponapona Dioso pitorobicueniatsi, bajarapajivi ata Dioso matamotsianatsi. Nexata xuavajëto Dioso matamotsianatsi pajivi exanaponapona Dioso pitorobicueniatsi, bajara pijinia xuavajëto bajarapajivi Dioso matamotsianatsi.

<sup>42</sup> Pajivi yavenonaena tajajivi, tsiquirijavayo ata mera rajutsiana piapaenexa, bajarapajivi pepacune matamotsianatsi Dioso, jai Jesús pijajivijavabelia.

## 11

*Pacuenia Juan jivibautisabinë itoroba pijajiviyajuvënëvi Jesúsjavabelia yabara pelivaisi (Lc 7.18-35)*

<sup>1</sup> Jesús baja najumevereta pijajivi doce ponëbejejavabelia livaisi petsipaebijava. Nexata baja Jesús pona livaisi petsipaebinexa bajarapanacuata penaetomaranëjava.

<sup>2</sup> Bajarapamatacabi Juan jivibautisabinë naneconitsiaponapona penaneconitsivi pejebabiabibota. Nexata Juan vënëlivaisitane

Dioso pesaëta Jesús pinijicuene pexanaponaejava. Bajaraxuata Juan itoroba pijajiviyajuvënëvi Jesúsjavabelia.

<sup>3</sup> Juan itoroba pijajivi peyanijobinexa Jesúsjavabelia. Nexata Juan pijajivi jumaitsi Jesúsjavabelia:

—¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë pepatsinexatsica? jai Juan pijajivi Jesúsjavabelia.

<sup>4</sup> Nexata Jesús jumaitsi Juan pijajivijavabelia:

—Paponare baja. Patsipaebianame Juan pacuenia baja pataneme taexanaponaejava. Patsipaebianamenua pacuenia baja pajumetaneme tatsipaebilivaisi jivijavabelia.

<sup>5</sup> Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaexanaponajë. Bajayajebi bitso peperabëtsabanaevinua vecuaajibiaexanaponajë. Bitso pemuxusipanaevinua jumetaeyaexanaponajë baja xaniavaetsia pejumetaenexa. Petëpaevimi ata icatsia asaëyaexanaponajë. Pexanialivaisinua pecapanepaelivaisinexatsi pibisiacuene pexanaeneconimivecua tsipaebaponajë bepejiobivijavabelia. Daxita bajaraxua taexanaponaejava patanetaejavamë, patsipaebianame Juanjavabelia.

<sup>6</sup> Pajumaitsimënua tsane Juanjavabelia: “Jesús raja jumaitsi: ‘Jamatabëcuenebarëya pajivi tsiteca jumecovënëta xanë Dioso pexënatocuenenë,’ jai

raja Jesús,” pajamë tsane Juanjavabelia, jai Jesús Juan pijajivijavabelia.

<sup>7</sup> Itsa baja Juan pijajivi naviabalia, nexata bajarapamonae pecovëta Jesús taxuxuaba jivijavabelia petsipaebijava Juan pelivaisi. Jesús jumaitsi jivijavabelia mapacueniaje:

—Itsa paponame petusato nacuyabelia, pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëabijava jovibota?

<sup>8</sup> Itsa apo paponamëlia panetaenexa musuli penajëabijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacuenije. Pamonae naitabëtsiaya pexaniajava naxatababiaba, bajarapamonae jinavanapa nacuanë pevetsivi pijabonëjava.

<sup>9</sup> ¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacuenë jane baja pepo profetanë, Diosojumepaebinë, pataneme. Nexata saya bevelia profetanë apo pataemë.

<sup>10</sup> Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitsijava ata xanëjavaberena Juan yabara, Dioso pejumelivaisibaxutota jumaitsi mapacueniaje:

Itorobianajë nevjënaeyabelia tanejumeliv-  
 aisipaebinënexa, jivi pecatsivajënae  
 najamatabëcuenexaniavaetsinexa,  
 jai bajayata Dioso pejumelivaisibaxutota tapat-  
 sivajënaeya Juan tanelivaisi paebanajetarucaej-  
 vanexa yabara.

<sup>11</sup> Xaniajanë pacuenia pacatsipaebijitsiatsi.  
 Juan ayaijamatabëcuenenë mapanacuataje.  
 Nexata bajayata Juan pevajënaeya papro-  
 fetavi jinavanapa, itsanë ata Juan apo  
 jamatabëcuenematatoxenetsitsi. Itsiata baitsi  
 jane pajivi beveliajamatabëcuenejivi ata,  
 itsa nejumecovënëta tacapanepaejavanexa,  
 bajarapajivi ayaijamatabëcuenejivi Dioso  
 exanaenatsi Juan matatoxenetsia.

<sup>12</sup> Juan jivibautisabinë petaxuxuabijavaveli-  
 acujinae, Dioso pitorobilivaisi jivi petsipae-  
 banajetarucaejava mapamatacabijavaberena  
 ataje, ayaibitsaëtoxaneto picani jivi jitsipa Dioso  
 pitorobilivaisi pejumecovënëtsinexa. Itsiata  
 itsamonae pesaëta caranatapona bajarapamonae  
 pejumecovënëtsiyaniva Dioso pitorobilivaisi.

<sup>13</sup> Juan penaexanaevajënaeya, daxita  
 Diosojumepaebivimi profetavi tajëvelia  
 vajunupaebapona itsamatacabi Dioso pijajivi  
 pevetsijavanexa. Dioso Moiséspijinëta  
 penajumecopatsilivaisi ata, tajëvelia vajunupaeba  
 Dioso pijajivi pevetsijavanexa.

<sup>14</sup> Itsa baja jamatabëpajumecovënëtame, pajume-  
 covënëre xua aeconoxae pacatsipaebijitsiatsi.  
 Dioso pejumelivaisibaxutota tajëvelia jumaitsi  
 mapacueniaje: “Elíaspijinë icatsia patsiana,”  
 jai. Bajarapacuenia tajëvelia itsa jumaitsi,

Juan jivibautisabinë yabara jumaitsi. Tsipaji pacuenia jamatabëcueneitsi profeta Elíaspijinë, bajara jamatabëcueneitsi Juan ata. Nexata Juan pepatsivajënaeya, tajëvelia yapëtanetsi pacuenia Juan exanaejitsia.

<sup>15</sup> Pajivi jamatabënejumeyapëtane patacatsipae-bilivaisi, nenamuxunaevetsi xaniavaetsia, jai Jesús jivijavabelia.

<sup>16</sup> Jesús icatsia jumaitsi jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonae xaniavaetsia papecayapëtaenexa pacuenia paxamë pajamatabëcueneitsimë tsavanapae? Jumaitsinë meta tsane paxamë yabara mapacueniaje: “Bजारapamonae abaxë saya bepejevaxijivixi, pajivixi tomara tuatuajëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia.

<sup>17</sup> Pevavajaijavata bajumaitsi: ‘Pacatoobecatsi picani flauta. Itsiata apo payavajibimë. Pacaton-axëanecatsi picani penemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevijavabelia. Bajara saya jamatabëcueneitsi pamonaе aeconoxae jinavanapa mapanacuataje,” janë meta tsane paxamë yabara.

<sup>18</sup> Juan jivibautisabinë Dioso pitorobilivaisi jivi tsipaebanajetaruca. Pexaejava itsajavata apo xaeyabiabi, pamatacabibeje Diosojavabelia vajëtapona. Vinora ata apo apaeyabiabi. Nexata bajaraponë yabara jamatabëcuenenavëxaniabiaya pajumaitsimë tsabiabi: “¡Juan raja dovathi



yajavaponapona!” pajamë tsabiabi  
jamatabëcuenenavëxaniabiaya.

19 Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajënu. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maponëje! Ayaijava xaeyabiaba. Ayaira matavëjëa apaeyabiabanua piatajibinexa. Barënajamatabëcuenejëpanua gobierno pejamatabëcuene impuestomatamo pematamoyanijobabiabivi. Pamonaë ata piagamatabëcuenebejevi, barënajamatabëcuenejëpa,” pajamë tsabiabi xanë yabara. Itsiata baitsi jane xuanë paxanëbeje Juanbeje paexanaponajëbeje, bajaraxuanë Dioso pejamatabëcueneta pataexanaejavabeje itsamonae xaniavaetsia yapëtaena. Nexata daxita bajarapamonae yapëtaena pacuenia Dioso paneyapëtaeyaexanabeje pepacuenepo pexaniajajamatabëcuene, jai Jesús mapacueniaje jivijavabelia.

*Pacuenia Jesús jumaitsi patomarapijivijavabelia apo jumecovënëtsitsi yabara pelivaisi  
(Lc 10.13-15)*

20 Itsatomaranëjava Dioso pesaëta Jesús pinijicuene pexanaejavanë navitsia exanapona. Itsiata bajarapatomaranëpijivi apo copabi pibisiacuene pexanabiabijava. Apo najamatabëcuenepënëyorotsi Diosojavabelia. Nexata Jesús ajumesaëya jumaitsi bajara patomaranëpijivijavabelia:

21 ¡Bitso bepajibimë tsane paCorazín tomarapijivimë! ¡Bitso bepajibimë tsane

paBetsaida tomarapijivimë ata! Piniijicuene Dioso pesaëta taexanaejavanë patae atamë, itsiata apo panejumecovënëtsimë. Apo pacopabimë pibisiacuene paneexanabiabijava. Apo panajamatabëcuene pënëyorotsimë Diosojavabelia. Bajayata Tiro tomarapijivimi, Sidón tomarapijivimi ata, petuatuajëta bajara-pitsipiniijicuene itsa tsitaexanaejitsipajë, nexata bajarapamonaemi copabijitsipa pibisiacuene pexanaejava. Najamatabëcuene pënëyorotsipa Diosojavabelia. Bajarapamonaemi nexata pibisiacuene pexanabiabineconi bitso yajamatabëcuene bëjai tsipae. Nexata Diosojavabelia petsitanajamatabëcuene itajëtsinexa peyajamatabëcuene bëjaijava pibisiacuene pexanabiabineconi, naxatabijitsipa pi-ayopapaëbërëjavanë. Enaejitsipa irata. Ipumana ata natsimataothocaejitsipa bitso peyajamatabëcuene bëjaixae pibisiacuene pexanabiabineconi.

<sup>22</sup> Xaniajanë pacuenia pacatsipaebijitsiatsi. PaCorazín tomarapijivimë, paBetsaida tomarapijivimë ata, patae atamë piniijicuene Dioso pesaëta taexanaejavanë, apo panejumecovënëtsimë. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso pacananeconitsiaexanaena. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajëto matatoxenetsia Dioso bitso ayaicuenia pacananeconitsiaexanaena.

<sup>23</sup> Paxamë paCapernaum tomarapijivimë, ja-

matabëcuenenavëxaniabiaya pajamatabëjumaitsimë tsabiabi: “Vaxaitsi cajena ayaijamatabëcuenevitsi. Nexata Dioso nacacapanepaena athëbëabetsia,” pajamatabëjamë tsabiabi. Itsiata baitsi jane athëbëabetsia Dioso apo pacacapanepae tsane. Dioso raja pacaxuabiana infernojavabelia apo patanejumecovënëtsixaemë. Bajayata Sodoma tomarapijivimijavata itsa exanaejitsipajë Dioso pesaëta pinijicuene taexanaejava, pacuenia paxamëjavata exanaponajë, nexata Sodoma tomarapijivimi copabijitsipa pibisiacuene pexanaejava. Najamatabëcuenepënëyorotsipa Diosojavabelia. Nexata bajarapamonae Dioso apo verebiabi tsipaetsi pibisiacuene pexanaeneconi yabara. Nexata abaxë mapamatacabi ataje jivi jinavanapaejitsipa bajarapatomarata.

<sup>24</sup> Xaniajanë pacuenia pacatsipaebijitsiatsi. Pamatacabi Dioso naneconitsiaexanaena pijaneconi pexainaevi, ayaicuenia Dioso pacananeconitsiaexanaena. Tsipaji Dioso pesaëta navitsia pinijicuene taexanaponaejava patae atamë, apo panejumecovënëtsimë. Nexata Sodoma tomarapijivimi matatoxenetsia Dioso bitso ayaicuenia pacananeconitsiaexanaena, jai Jesús patomarapijivijavabelia apo jumecovënëtsitsi.

*Pacuenia Jesús pijajivi junata pe-  
jamatabëcueneasaëyaexanaenexa peja-  
matabëcuenecueranaejavavecua yabara pelivaisi  
(Lc 10.21-22)*

<sup>25</sup> Jesús pevajëtsijavata paxa Diosojavabelia jumaitsi:

—Axa, nevetsinë athëbëtatsia. Nevetsinë mapanacuajava ataje. “Ayaijamatabëcuenenëmë bitso,” cajiatsi. Tsipaji pamonae bitso apo penacujarubivi ata, yapëtaeyaexanaename nevetsijavanexa daxita nijajivi mapanacuataje. Bajarapamonae yapëtaeyaexanaename pexanialivaisi, xanë talivaisi, palivaisi vecuamatayatame bitso peyapëtaevi mapanacuapijilivaisije. Bajarapalivaisi vecuamatayatame bitso penacujarubivi ata mapanacuapijicue ne yabaraje.

<sup>26</sup> Bajarapacuenia exaname tsipaji baja exaname nejitsipaecuenia, jai Jesús paxa Diosojavabelia pevajëtsijavata.

<sup>27</sup> Icatsia Jesús jumaitsi pijajivijavabelia:

—Taxa Dioso baja cajena netocopata tayapëtaenexa daxitacuene. Itsajivi ata apo nejamatabëcueneyapëtae pacuenia xanë jamatabëcuenesinë, Dioso pexënatonë. Caenë taxa Dioso nejamatabëcueneyapëtane. Itsajivi ata apo jamatabëcueneyapëtae pacuenia taxa Dioso jamatabëcuenesitsi. Caenënë xanë, pexënatonë, jamatabëcueneyapëtaniji. Pamonae tojitsipajë tayapëtaeyaexanaenexa pacuenia taxa Dioso jamatabëcuenesitsi, bajarapamonae ata yapëtaeyaexanaponanajë.

<sup>28</sup> Pabita penacuenebabiabinë, piarevejava pejotabiabinë, bitso bavemaxëcuerana. Bajara pijinia pacuenia paxamë ata bitso itsa pajamatabëcuenecueraname pibisiacue paneexanabiabijava yabara, xanëjavaberena paponare paneajamatabëcuenesaënexa icatsia.

29 Bueyubeje banavēsijumacaevetabeje petsivēsijumabuatsinexatsibeje yugovēnējava penacuenebinexabeje. Bajara pijinia pacuenia paxamē ata panajamatabēcuenecaevere patacatsijamatabēcuenebuatsinexa patacatsipaebilivaisi. Panejumecovēnētsianame pacuenia pacaitorobatsi patanetonacuenebinexamē. Nexata panevajēnaeyabelia panejamatabēcueneyapētaeponaename. Tsipaji xanē xaniavaetsia pacatsipaebaponaenatsi. Xanē beayaijamatabēcuenenē apo nataenē. Nexata bajarajota panajamatabēcueneevetsianame paneajamatabēcuenesaēnexa icatsia. 30 Pacuenia bueyu tsivēsijumabuatatsi yugovēnējava petoyapēxanepanaenexatsi penacuenebijava, bajara pijinia pacuenia paxamē ata pacatoyapēxanepanaeyaexanaenatsi paneexanaenexa xua pacaitorobijitsiatsi, jai Jesús pijajivijavabelia.

## 12

*Pacuenia Jesús pijajivi trigoxu namutua siricanajetarubena penacueraevetsimatacabita yabara pelivaisi*

*(Mr 2.23-28; Lc 6.1-5)*

<sup>1</sup> Judíovi penacueraevetsimatacabita Jesús, pijajivi yajava, najetaruca trigo pabianējava. Jesús pijajivi bitso pajani. Nexata trigoxu siricanajetarubena. Xuxaeyabuatapona.

<sup>2</sup> Nexata fariseovi tane Jesús pijajivi pesiricana-jetarubenaejava trigoxu. Nexata fariseovi jumaitsi Jesúsjavabelia:

—Taema mapamonaaje. Dioso Moiséspijinëta penajumecopatsilivaisi vajanacaitavetsicue ne nijajivi exana. Apo nacaitavetsi ata trigoxu vajaxaejava, itsiata ajena penacueraevetsimatacabixae, nijajivi apo bexanae mapacue neje, jai fariseovi Jesúsjavabelia.

<sup>3</sup> Nexata Jesús jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacue ne. Tsipaji bitso pijajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainë Davidpijinë, pebarëponaevi yajava, exana pamatacabi bitso pijajani?

<sup>4</sup> Davidpijinë joneya Dioso pijatemploboyalia. Nexata Dioso pijatemplobëne, mesajumata, bobena Diosonexa ofrendacuenia petojebipanbëanë. Bajarapapanbëanë apo tocopatsitsi picani Davidpijinë, pijajivi ata, pexaenexa penaneconitsiyani Diosojavabelia. Èsacerdotevi picani tocopatatsi pexaenexa. Davidpijinë apo sacerdotenë ata, pijajivi barëxae ata bajarapapanbëanë, itsiata apo vënananeconitsi Diosojavabelia.

<sup>5</sup> ¿Apo palebimë tsipaji Dioso Moiséspijinëta penajumecopatsilivaisi paneyapëtaenexa pacuenia jumaitsi sacerdotevi yabara? Sacerdotevi templobota penacue nebivi, penacueraevetsimatacabita ata apo nacuer-aevetabiabi. Penacueraevetsimatacabita sacerdotevi nacue nebabiabi ata templobota, itsiata apo naneconitsi Diosojavabelia.

<sup>6</sup> Xanë cajena ayaijamatabëcuenenënë. Nexata Dioso netojitsipa jivi taneyaiyataenexa templobo matatoxenetsia.

<sup>7</sup> Dioso pejumelivaisibaxutota jumaitsi mapacueniaje: “Jitsipajë paneitaxutotsoni-ataenexa itsamonae ata. Apo jitsipaenë cajena saya patanetobeyabiabinexamë dajubicuene ofrendacuenia patanerajutabiabinexamë,” jai Dioso pejumelivaisibaxutota. Xua yabara jumaitsi bajarapacuenia, apo pajumeyapëtaemë baja cajena. Tsipaji itsa pajumeyapëtaejitsipame xua yabara jumaitsi, nexata tajajivi ata paitax-utotsoniataejitsipame. Nexata tajajivi trigoxu pexaejava yabara apo panejumaitsimë tsipae: “Dioso Moiséspijinëta penajumecopatsilivaisi vajanacaitavetsicuene nijajivi exanapona,” apo panejamë tsipae. Tsipaji tajajivi apo naneconitsi Diosojavabelia. Tsipaji tajajivi bitso piajanixae, trigoxu xane.

<sup>8</sup> Nexata xanë, Daxitajivi Pematapijinënë, nextoxanepana cajena tatsipaebinexa xua xanepana jivi pexanaenexa penacueraevetsimatacabita ata, jai Jesús mapacueniaje fariseovijavabelia trigo pabianëjavata.

*Pacuenia Jesús jamatejemayaexana pebi peco-  
betsaquenaenë yabara pelivaisi*

*(Mr 3.1-6; Lc 6.6-11)*

<sup>9</sup> Trigo pabianëjavata Jesús livaisi petsipaebicu-jinae fariseovijavabelia, Jesús baja vecuapona pabianë. Nexata Jesús joneya judíovi penacaetu-atabiabiiboyalialia.

10 Nexata bajarajota pebi naeca, pecobet-saquenaenë. Itsamonae fariseovi bajarajota jamatabëneconitatsi Jesús. Nexata Jesús naitaxutocaevetatsi xua yabara neconitsijitsiatsi. Nexata fariseovi Jesús jamatabëcueneëjÿbiaya yanijobatsi mapacueniaje.

—¿Vajanacueraevetsimatacabita ata tsaja xanepana piavitanevi vajajamatejemayaexanaenexa? jai fariseovi Jesúsjavabelia.

11 Jesús nexata jumaitsi fariseovijavabelia:

—Paxamÿyajuvënëvi pijaoveja itsa tojopaejitsi-parecatsi meramëthëareca, penacueraevetsimat-acabita ata ponaejitsipa. Nexata jutsipaina pi-jaoveja. ¿Baja tsabaitsi jane?

12 ¡Biji ra jivitonë bitso namatamota oveja mata-toxenentsia! Bajaraxuata itsiata nacatoxanepana vajaexanaenexa pexaniacuene vajanacueraevet-simatacabita ata, jai Jesús fariseovijavabelia.

13 Nexata Jesús jumaitsi pecobetsaque-naenëjavabelia:

—Namaxërovire, jai Jesús.

Itsa bajaraponë namaxërovita, pacuenia itsane-nia cobeitsi, bajara cobeitsi. Cobexanepanareca baja. Pecobetsaquenaejavami baja ajibi.

14 Nexata fariseovi itsa tane Jesús pecobex-anepanaeyaexanaejava pecobetsaquenaenë, fariseovi anaepana. Nexata pitsaparena judíovi penacaetuatabibibovecua. Nexata jane baja fariseovi najumejaita Jesús pebeyaxuabinexatsi.

*Pacuenia Diosojumepaebinë profetanë bajay-atami tajëvelia vajunupaebatsi Jesús yabara peliv-aisi*



15 Jesús jamatabëcueneyapëtane pacuenia fariseovi sivanajamatabëxainatsi. Jesús picani fariseovi jamatabëbeyaxuabatsi. Nexata baja Jesús bajarapamonae vecuapona itsajavabelia. Jivi ayaibitsaëttoxaneto Jesús pënaponatsi. Jesús nexata jamatejemayaexana daxita piavitanevi.

16 Jesús jumeitaveta bajarapamonae petsipaebiyani va itsamonaejavabelia Jesús Dioso pexënatocuene.

17 Bajarapacuenia Jesús pejamatejemayaexanaevi itsa jumeitaveta petsipaebiyani va itsamonaejavabelia, copiapata jane baja pacuenia bajayata Diosojumepaebinëmi profeta Isaíaspijinë tajëvelia jumaitsi. Dioso pejumaitsijava Jesús yabara profeta Isaíaspijinë bajayata tajëvelia jumaitsi mapacueniaje:

18 Maponë taitapetsinë, taitorobicuenia exanabiaba. Bajaraponë tasivanë. Sivajamatabëcuenebarëyanë. Espiritu Santo runaeyaexanaenicajë bajaraponë pematatsënëatsica. Bajaraponë apo judíovijavabelia tsipaebiana tananeconitsiaexanaejavanexa daxita pibisiacuene pexanaevi.

19 Bajaraponë itsajivijavabelia ata apo jumeanaenotsi tsane. Livaisi itsa tsipaebapona, pinijijumeta apo vavajai tsane.

20 Pamonaexanë tajumelivaisi pejume-covënëtsijava abaxë apo ajamatabëcuenesaë ata, itsiata bajaraponë bajarapamonae apo xuabi tsane. Capanepaena. Pamatacabi tocopiapatsianatsi bajaraponë pijajivi pevetsimatacabinexa, xaniavaetsia bajaraponë

evetsiana daxita pijajivi.

<sup>21</sup> Nexata daxitajivi, apo judíovi ata, sivanajamatabëcuenecopatsianatsi bajaraponë pecapanepaenexa, jai bajayata tajëvelia profeta Isaíaspijinë Dioso pejumaitsijava Jesús yabara. Bajarapacuenia bajayata tajëvelia jumaiti Isaíaspijinë peyaquinaebaxutota.

*Pacuenia itsamonae Jesús yabara jamatabëcuenenavëxaniabiaya jumaiti: “Beelzebú raja pesaëta Jesús dovathi jivivecua capitsapapona,” jai yabara pelivaisi*

*(Mr 3.20-30; Lc 11.14-23; 12.10)*

<sup>22</sup> Jesús tocapatatsi bitso pitaxutotsëcënaenë, apo penatsipaebinë. Bajaraponë dovathi yajavaponapona. Bajaraponë Jesús jamatejemayaexana. Xaniavaetsia baja nexata tane. Natsipaebanua baja.

<sup>23</sup> Jivi itsa tane Jesús pejamatejemayaexanaejava bajaraponë, jamatabëcuenenabenajaca. Nexata jivi najumaiti Jesús yabara:

—¿Matsaeta ponë Davidpijinë pemomoje, Dioso pitorobinësicaje? najai bajarapamonae Jesús yabara.

<sup>24</sup> Nexata fariseovi itsa jumetane bajarapacuenia jivi pejumaitsijava, fariseovi jumaiti jivijavabelia:

—Mara ponë Jesúsje, dovathi jivivecua capitsapabiaba Beelzebú pesaëta. Beelzebú raja daxita dovathivi pitorobinë, jai fariseovi jivijavabelia jamatabëcuenenavëxaniabiaya Jesús yabara.

<sup>25</sup> Jesús jamatabëcueneyapëtane pacuenia fariseovi sivanajamatabëxainatsi. Nexata Jesús jumaitsi fariseovijavabelia:

—Nacaenacuapijivi ata itsa navecuanat-sanaejitsipa penasivanavajabitsaëtsinexa, namataenetsia naverebiabijitsipa nacaenacuapijivi ata. Bajara pijinia itsipae nacaetomarapijivi ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaetomarapijivi ata. Bajara pijinia itsipae nacaemonae ata. Itsa navecuanat-sanaejitsipa penasivanavajabitsaëtsinexa, nexata namataenetsia naverebiabijitsipa nacaemonae ata.

<sup>26</sup> Bajara pijinia itsipae dovathi ata. Dovathi jivivecua itsa capitsapaponaejitsipa pijajivi, dovathivi, nexata bepijavajabitsaënë taejitsipatsitsi pijajivi. Itsajamatabëcuene vecuaxinaejitsipa pijajivi. Pesaë ata apo xainaponae tsipae.

<sup>27</sup> Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua itsa capitsapabiabajë, ¿detsa nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumaitsijava xanë yabara.

<sup>28</sup> Espíritu Santo raja pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxuabijava pijajivi pevetsijava paxamë tuatujëta, jai Jesús fariseovijavabelia.

29 Fariseovi pecanaējētsinexa Jesús bitso piasaēnēcūene dovathi matatoxenetsia, Jesús icatsia jumaitsi fariseovijavabelia mapacueniaje:

—Itsajivi ata apo caējēpaetsi pejonenexa bitso piasaēnē pijaboyalā peyacajērētsinexa xua xaina pijabota. Itsiata itsa patsipa bajaraponē matatoxenetsia bitso piasaēnē, nexata cobecētabuatsipatsi. Taxucētabuatsipatsi yajava. Matapania bajarapacuenia yacajērētsipatsi daxita xua xaina pijabota.

30 'Pajivi apo neyavenonaeyacaetuatsi jivi Diosojavabelia, bajarapajivi betajavajabitsaējivi. Tsi paji apo taneyavenonaeyacaetuatsixae, jivi nevecuanacayajata Dioso picani pejumecovēnētsiviminexa.

31 'Bajaraxuata pacatsipaebijitsiatsi, Dioso caējēpatsi daxitajivi pibisiacūene pexanae neconimi pevecuaajibiaexanaenexa. Pibisiacūenia jivi Dioso baracuaicuajai ata, bajarapaneconi ata Dioso caējēpatsi pevecuaajibiaexanaenexa. Itsiata baitsi jane pajivi pibisiacūenia baracuaicuajai Espiritu Santo, pacūenia paxamē pajumaitsimē, Dioso apo vecuaajibiaexanae tsane bajarapaneconi.

32 Pajivi pibisiacūenia nebaracuaicuajai ata, xanē, Daxitajivi Pematapijinēnē, bajarapaneconi ata itsiata Dioso vecuaajibiaexanaenatsi itsa vajēta Diosojavabelia. Itsiata baitsi jane pajivi pibisiacūenia baracuaicuajai Espiritu Santo, bajarapaneconi Dioso apo vecuaajibiaexanae tsanetsi. Daxitamatacabijavabelianexa apo vecuaajibiaexanae tsanetsi bajarapaneconi, jai Jesús fariseovijavabelia.

*Pacuenia peubinaenë itsa nacuaita, nayapëtanane  
pavirianaecuene yabara pelivaisi*

*(Lc 6.43-45)*

<sup>33</sup> Icatsia Jesús jumaitsi fariseovijavabelia:

—Pexaniavirianaenë itsa ubatsi, nacuaita pijinia pexaniacuai. Ponae pijinia pibisiana, nacuaita pibisiacuai. Caeviriana canacujitsia yapëtanetsi itsa nacuaita.

<sup>34</sup> Bajara pijinia pacuenia paxamë ata dovathi papijajivimë, panayapëtaneme panejamatabëcuenebejjava. Nexata apo pacacajëpae panecuaicuajainexa pexaniacuene yabara. Pajamatabëcuene bëpënëa panejamatabëëthëtota panajamatabëxainame, panecuibojojotuatsina pitsapa panecuaicuajainexa.

<sup>35</sup> Itsamonae pijinia majamatabëcueneitsije. Pacuenia vajaubinae, pexaniana, pexaniacuai pijinia nacuaita, bajara pijinia jamatabëcueneitsi itsamonae. Ponë pexaniajamatabëcuenenë, pexaniacuene yabara cuaicuajai. Tsipaji pexaniajamatabëcuene xaina pejamatabëëthëtota. Ponë pijinia pibisiajamatabëcuenenë pibisiacuene yabara cuaicuajai. Tsipaji pibisiajamatabëcuene najamatabëxaina pejamatabëëthëtota.

<sup>36</sup> Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexinaevi, caejivi canacujitsia, naneconitsiaexanaponaena caejumeyo canacujitsia pibisiacuenia pecuaicuajaijava yabara.

<sup>37</sup> Pibisiacuenia panecuaicuajaijava yabara Dioso pacananeconitsiaexanaena. Pexanialivaisi itsa pacuaicuajamë tsabiabi tsane, nexata

paneconijibimë tsane Diosojavabelia, jai Jesús fariseovijavabelia.

*Pacuenia pibisiajamatabëcuenevi Jesús picani itorobatsi Dioso pesaëta pinijicuene pexanaejava petsitaexanaenexa yabara pelivaisi*

*(Mr 8.12; Lc 11.29-32)*

<sup>38</sup> Fariseovi, judíovi pecujarubivi ata, jumaitsi Jesúsjavabelia:

—Jesús, pajitsipajë patataenexa Dioso pesaëta pinijicuene nexanaejava, patacayapëtaenexa pepacuene Dioso athëbëvetsica pecaitorobinëcuenetsica, jai bajarapamonae.

<sup>39</sup> Jesús nexata jumaitsi bajarapamonaejavabelia:

—Bitso pibisiacuene paneexanaevi, Dioso panejumecovënëtsijavami panecopabivi. Paneitorobame picani Dioso pesaëta pinijicuene taexanaejava patacatsitaexanaenexa pataneyapëtaexamë Dioso pepacuene athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava apo pacatsitaexanae tsanetsi. Bajayata pacuenia Diosojumepaebinëmi profeta Jonáspijinë exanatsi, bajara ëpitsicuene taneexanaejava pacatsitajëtsianatsi.

<sup>40</sup> Bajayata Jonáspijinë boca ayainë dujuainë pënëta acueyabi pamatacabibeje, acueyabi pameravibeje yajava. Bajara pijinia pacuenia xanë ata, Daxitajivi Pematapijinënë, bocaenajë mëthëta acueyabi pamatacabibeje, acueyabi pameravibeje yajava.

41 Bajayata Nínive tomarapijivimi itsa jumetane Dioso pitorobilivaisi, Jonáspijinē petsipae-bilivaisi, copaba pibisiacuene pexanaejava. Najamatabēcuenepēñeyorota Diosojavabelia. Copiapatsiana rabaja Dioso papecananeconitsia exanaematacabinexa daxita panijaneconi panexainaevi. Panijaneconi panexainaevi pacanubiana Dioso pitabarata. Nexata bajarapamatacabi Nínive tomarapijivimi nonobapunaena Diosojavabelia papecaneconitsinexa Dioso apo panejumecovēñetsivi. Xanē majotaje ponaponajē, bitso ayaijamatabēcuenenēñē Jonáspijinēmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovēñetsimē. Apo panajamatabēcuene pēñeyorotsimēnua pibisiacuene paneexanaejavavecua. Bajaraxuata ayaineconi paxainame Diosojavabelia.

42 Pamatacabi Dioso naneconitsiaexanaena pijaneconi pexainaevi, bajayata peponaponaevami, Saba nacuapijivi pevetsivami, nonotapunaena Diosojavabelia papecaconitsinexa Dioso apo panejumecovēñetsivi. Bajarapova pacaneconitsiana. Tsipaji bajayata bajarapovami tajē nacuatabuverena ata muxunarena pejumetaenexa Salomónpijinē, bitso daxitalivaisi peyapētaenēmi, petsipaebilivaisi. Xanē majotaje ponaponajē, bitso ayaijamatabēcuenenēñē Salomónpijinēmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovēñetsimē. Apo panenamuxunaevetsimēnua. Bajaraxuata Dioso pacananeconitsiaexanaena, jai Jesús tajēvelia fariseovijavabelia, judíovi pecujarubivijavabelia

ata.

*Pacuenia dovathi jivitonë peveja-  
matabëpitsapaecujinaetsi, icatsia naviarena  
pecovëyaberena petsijamatabëcaenexatsi icatsia  
yabara pelivaisi*

*(Lc 11.24-26)*

<sup>43</sup> Jesús jumaitsi fariseovijavabelia, judíovi pecujarubivijavabelia ata:

—Dovathi itsa vejamatabëpitsapa jivitonë, nexata dovathi jinaruta petseviiranëjava. Jaitapona itsanëjavabelia petsijamatabëjonexa penacueraevetsinexa bajaraponëjavata. Itsa apo caxitajarabi ponëjavabelia tsijamatabëjonejitsia, nexata dovathi jamatabëjumaitsi:

<sup>44</sup> “Naviatsianajë meta icatsia tajabomijavabelia, paboverena pitsapajë,” jamatabëjai dovathi, ponëjavaverena pitsapa icatsia petsijamatabëjonexatsi. Dovathi baja caevëa itsa naviarena, caxitajaraba peyjavaponapon-aenëmitsi. Nexata peyjavaponaponaenëmitsi pejamatabëëthëto, dovathi tane bepënësajinecaebo, bepënëxaniavaetetsibo, bepiracajuetetsibo.

<sup>45</sup> Nexata dovathi icatsia sivapona peyjavapatsinexarena itsadovathivi, siete ponëbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabëjunuatsi peyjavaponaponaenexa. Belia jane baja pebi dovathivi bitso bejiobiaexanatsi. Copiaya abaxë caenë itsa tsijamatabëecatzi pacuenia bejiobiaexanabiabatsi, matatoxenetsia bejiobiaexanatsi. Bajara pijinia pacuenia



tocopiapatsianatsi pamonae aeconoxae  
jinavanapa, piacujirubejevi, jai Jesús  
fariseovijavabelia, judíovi pecujarubivijavabelia  
ata.

*Pacuenia Jesús pejuyapijivi, pena yajava,  
nubena bojumavelia yabara pelivaisi  
(Mr 3.31-35; Lc 8.19-21)*

<sup>46</sup> Jesús abaxë jivi livaisi itsa tsipaeba  
bo ënëtuatuajëalia, pata Jesús pejuyapijivi,  
pena yajava. Nexata bojumavelia nubena  
bajarapamonae. Jamatabëbarëcuaicuaijaitsi picani  
Jesús.

<sup>47</sup> Nexata itsajivi Jesús tsipaebatsi.

—Patajatuxanenë, ena raja, nejuyapijivi yajava,  
nuca bojumaverena. Bajarapamonae pina jitsipa  
pecabarëcuaicuaijajava, jaitsi Jesús.

<sup>48</sup> Nexata Jesús jumaitsi petsipaebijivitsijav-  
abelia:

—¿Detsa pitsijamatabëcuenevi taena, tajuyapijiv-  
inua? jai Jesús.

<sup>49</sup> Nexata Jesús pecobeta itaropita pijajivi. Ju-  
maitsi petsipaebijivitsijavabelia:

—Mara jane pamonae taenajivije, tajuyapijiv-  
inua.

<sup>50</sup> Tsipaji raja pajivi exana taxa, athëbëtatsia  
peecaenë, pitorobicueniatsi, bajarapajivi cajena  
tajuyapijinë, tajuyapijiva, taenanua, jai Jesús pet-  
sipaebijivitsijavabelia.

## 13

*Pacuenia Jesús jivi livaisi tsipaeba pabi peubinë  
pelivaisicuenia yabara pelivaisi  
(Mr 4.1-9; Lc 8.4-8)*

<sup>1</sup> Jesús baja itsa najumevereta jivijavabelia livaisi petsipaebijava, pitsapa baja bajarapabovecua. Pona baja itsajavabelia. Nexata Jesús ecojopa pucaxaneto itapata.

<sup>2</sup> Nexata pucaitapata jivi ayaibitsaëtoxaneto Jesús itaxutuanacaetuatatsi. Nexata Jesús runareca jera ënëabereca. Ecareca jera ënëtareca. Daxita jivibitsaëtoxaneto nubena tajetabovelialia.

<sup>3</sup> Nexata Jesús daxitacuene livaisianë tsipaeba jivijavabelialia. Jesús jumai tsaponae bajarapamonaejavabelialia mapacueniaje:

—Peubinë pona pabiabelialia peubinexa.

<sup>4</sup> Nexata itsa pata pabita, peubixu pexucayajabajarabicuenialia ubanajetaruca. Pexucayajabajarabijavatalia itsaxu othopa pabi tuatuajëjava penajetarucaenamutojumatalia. Nexata bajarajotalia pata baratsui. Xane bajarapaxumi juvinejeva.

<sup>5</sup> Itsaxu pijinia othopa ibopananëjumatalia, itsajotalia bitso ira apo aitayaë. Nexata bajarapaxu bepiglia juva. Tsipajialia bitso ira apo aitayaë.

<sup>6</sup> Nexata icotialia bitso itsa ataju, nexata bajarapaxu juvi ata, tsaquenapona. Tsipajialia irabereca bitso apo atabunepepiareca.

<sup>7</sup> Itsaxu pijinia othopa xanëebacabomijavatalia. Nexata peubixu xanëebotonë caecuenialia itsa yajavajuva, bitso xanëebotonë matakënënatalia peubijavamialia.

<sup>8</sup> Itsaxu pijinia othopa pexaniairatalia. Bajarapaxu itsa juva, vitsaba. Xaniavaetsialia nacuaialia. Itsabotonë capitsapalialia cien paxutoyobeje tsaponae. Itsabotonë capitsapalialia sesentalia paxutoyobeje tsaponae. Itsabotonë capitsapalialia treinta paxutoyobeje tsaponae.

<sup>9</sup> Pajivi jamatabënejumeyapëtane patacatsipae-bilivaisi, nenamuxunaevetsi xaniavaetsia, jai Jesús bajarapalivaisi petsipaebivijavabelia.

*Pacuene yabara Jesús jivijavabelia livaisi tsi-paeba ëcomparacióncuenia yabara pelivaisi  
(Mr 4.10-12; Lc 8.9-10)*

<sup>10</sup> Jesús pijajivi imoxoyotatsi. Nexata Jesús pija-jivi jumaitsi Jesúsjavabelia:

—Patajatuxanenë, jivijavabelia livaisi itsa tsipaebame, ¿detsa xuajitsia tsipaebame ëcomparacióncuenia? jai Jesús pijajivi.

<sup>11</sup> Nexata Jesús jumaitsi pijajivijavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Itsiata itsamonae apo yapëtae bajarapacuene.

<sup>12</sup> Pajivi xaniavaetsia nejumeyapëtane tatsipaebilivaisi, bajarapajivi icatsia itsalivaisi pematatsënëa Dioso yapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa tatsipaebilivaisi, bajarapajivi xuayovajëto jumeyapëtane picani, nacofënëtsiana.

<sup>13</sup> Bajaraxuata livaisi itsa tsipaebajë bajara-pamonae, ëcomparacióncuenia tsipaebajë. Nexata bajarapamonae tae ata Dioso pesaëta pini-jicuene taexanaejava, itsiata apo yapëtae pajamatabëcuene yabara exanajë pinijicuene taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi.

14 Bajarapacuenia apo jumeyapëtae tsipaji jane baja tocopiapatatsi pacuenia bajayata tajëvelia Diosojumepaebinëmi profeta Isaíaspijinë yaquina. Dioso pejumaitsijava apo tanejumeyapëtaevinexa yabara, bajayata profeta Isaíaspijinë peyaquinaelivaisita jumaitsi mapacueniaje:

Bajarapamonae picani jumetaena. Itsiata apo jumeyapëtae tsane xua yabara tsipaebianatsi. Bajarapamonae taena picani. Itsiata apo yapëtae tsane pajamatabëcuene xaina petaejava.

15 Bajarapamonae ajamatabëcuenetaja tsane. Bajaraxuata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuene xaina xua taena. Jumeyapëtaejitsipanua palivaisi jumetaena. Pejamatabëëthëtojavavetsina jumeyapëtaejitsipa. Nexata xanëjavaberena najamatabëcuenepënëyorotsipa perujujamatatabëcuenevecua. Nexata xanë jamatabëcuene xanepanaeyaexanaejitsipajë, jai bajayata tajëvelia Isaíaspijinë peyaquinaelivaisita xua yabara tsipaebajë bajarapamonae apo tanejumeyapëtaejavanexa yabara.

16 Itsiata baitsi jane paxamë baja pajamatabëcuenebarëyamë. Tsipaji payapëtaneme pajamatabëcuene xaina xua pataneme. Pajumeyapëtanemenua pajamatabëcuene xaina palivaisi pajumetaneme.

17 Xaniajanë pacuenia pacatsipaebijitsiatsi. Bajayatami ayaibitsaëto profetavimi necopiaeveltavanapa tanetaenexa picani tapatsijavatsica.

Itsamonae ata aneconijibia pejinavanapaevi Dioso pitabarata, necopiaevetavanapa picani tanetaenexa tapatsijavatsica. Itsiata apo netaenejeva, daxita bajarapamonaemi tēpa baja. Jamatabējumetaeyabiabanua picani palivaisianē baja aeconoxae paxamē pacatsipaebaponatsi. Itsiata apo jumetaenejeva bajarapalivaisianē, bajarapamonaemi tēpa baja, jai Jesús pijajivijavabelia.

*Pacuenia Jesús yapētaeyaexana pijajivi pajamatabēcuene xaina palivaisi tsipaeba peubinē pelivaisicuenia yabara pelivaisi*

*(Mr 4.13-20; Lc 8.11-15)*

<sup>18</sup> Icatsia Jesús jumaitsi pijajivijavabelia:

—Xaniavaetsia panenamuxunaevere panejumeyapētaenexa pajamatabēcuene xaina palivaisi pacatsipaebatsi pabita peubinē pelivaisicuenia.

<sup>19</sup> Pamonaē jumetae ata Dioso pejumelivaisi, itsiata itsa apo jumeyapētae pejamatabēēthētota, bajarapamonaē bepiothopaexu pabi tuatuajējjava penajetarucaenamutojumata. Nexata najetaruca dovathi. Nexata bajarapamonaē tsijamatabējuvinejevatsi, dovathi vecuapitatsi bajarapalivaisimi, petsijamatabēubilivaisimitsi.

<sup>20</sup> Pacuenia pijinia itsi paxu othopa ibopananējumata, itsajota bitso ira apo aitayaē, bajara tsijamatabēcueneitsitsi itsamonae Dioso pitorobilivaisi. Bajarapamonaē jumetane Dioso pitorobilivaisi. Nexata picani bajarapalivaisi barēyaya jumecovēnēta.

21 Itsiata baitsi jane pacuenia irabereca apo atabunepepiareca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji pepacuene pejamatabëëthëtovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiapatatsi daxita petoayapëbejecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijava bajarapalivaisi bepijia copaba. Pevajënaeyabelia apo jumecovënëtavanapae.

22 Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayaijava palata pexainaenexa. Nexata pijacuata najamatabëcueneyamaxëitojoroba. Bajaraxuata Dioso pitorobilivaisi apo tovitsabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojinavanapae.

23 Pacuenia pijinia itsi paxu othopa pexani-airata, bajara tsijamatabëcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Jumeyapëtanenua. Nexata pevajënaeyabelia tsijamatabëcuenevitsabaponatsi Dioso pitorobilivaisi. Nexata pacuenia peubijava capitsapa itsabotonë cien paxutoyobeje tsaponae,

itsabotonë sesenta paxutoyobeje tsaponae, itsabotonë treinta paxutoyobeje tsaponae, bajara tsijamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

*Pacuenia peubijava tuatuajëa piabejjava juva yabara pelivaisi*

<sup>24</sup> Dioso apo pejumecovënëtsivi, pamonaenajinavanapa Dioso pejumecovënëtsivijavata, itsamatacabi Dioso naneconitsiaexanaena. Nexata jivi peyapëtaenexa bajarapamonae Dioso penaneconitsiaexanaejavanexa, Jesús comparacióncuenia livaisi tsipaeba jivi ayaibitsaëtoxanetojavabelia. Jesús jumaitsi mapacueniaje:

—Mara pacuene jëpaje Dioso pijajivi pevetsijavaje. Pabi pexainaenë, ëpexaniaviriatrigoxu uba pijapabita.

<sup>25</sup> Itsiata baitsi jane daxitajivi pemajitsijavata meravi, pabi pexainaenë pijavajabitsaënë tojunuatsi pijapabita. Nexata toubatsi trigo tuatuajëjava pibisiaviriajava, betrigobotonë pecataejava. Bajaraxuacujinae vemaxëpona baja.

<sup>26</sup> Nexata trigoxu juva. Vitsaba. Itsa baja trigobotonë namatonota, nexata matapania bajarajota nayapëtane pibisiaviriajava yajava penamatonotsijava.

<sup>27</sup> Nexata pabi pexainaenë pijajivi pata petsipaebinxatsi. Pabixainaenë pijajivi jumaitsi: “Nijapabita ubame ëpexaniaviriatrigoxu. ¿De tsaeta pacuenia pitsapa pibisiaviriauxu pibisiajava peyavajavujinexa trigojava?” jai pabixainaenë pijajivi.

<sup>28</sup> Nexata pabixainaenë jumaitsi pijajivijavabelia: “Tajavajabitsaenë raeta bajaraxua uba,” jai. Nexata pabixainaenë pijajivi jumaitsi: “¿Jitsipame tsaja bajaraxua pataxunaejava?” jai.

<sup>29</sup> Itsiata baitsi jane pabixainaenë jumaitsi pijajivijavabelia: “Jume. Tsipaji panexunaejavata payajavaxunaejitsipame trigobotonë.

<sup>30</sup> Copatsianatsi abaxë penacuaitsinexa. Nexata penotsimatacabi itorobianajë tanetonotsivi copiaya pecaetuatsinexa piabejejava. Pepacunuanë exanaena. Bajaraxuacujinae bajaraxua tajuitsiana. Bajaraxuacujinae ëtrigoxu netonotsiana taetabiabibota tanetoetsinexa,” jai pabixainaenë pijajivijavabelia, jai Jesús jivi ayaibitsaëtoxanetojavabelia.

*Pacuenia mostazaxutoyo pejuvicujinae, mostazanae bepijia vitsaba yabara pelivaisi*  
(Mr 4.30-32; Lc 13.18-19)

<sup>31</sup> Jesús livaisi tsipaeba comparacióncuenia jivi ayaibitsaëtoxanetojavabelia. Jumaitsi mapacueni-aje:

—Dioso raja pijajivi pevetsijava maitsije. Pacuenia mostazaxutoyo pejuvicujinae, bepijia vitsaba mostazanae, bajara pijinia itsane Dioso pijajivi ata. Bepijia Dioso pijajivi ayaibitsaëtoxaneto naexanaena. Pabi pexainaenë mostazaxu uba pijapabita.

<sup>32</sup> Mostazaxu raja bitso tsiquirixutoxi daxita peubixuvecua. Itsiata baitsi jane mostazanae itsa juva, bepijia vitsaba. Caevaita pinijinae naexana itsapeubinaenë matatoxenetsia. Nexata baratsui ata pata bajaraponaeta. Pematapenanë exana



bajaraponaemaxërananëjava. Bajara pijinia itsane jivi ata. Bepijia ayaibitsaëto Dioso pijajivi naexanaena, jai Jesús jivi ayaibitsaëto xanetojavabelia.

*Pacuenia pan pexanaematabënexa, levaduravënëjava fufunaeyaexana yabara pelivaisi*

*(Lc 13.20-21)*

<sup>33</sup> Jesús livaisi tsipaeba comparacióncuenia jivi ayaibitsaëto xanetojavabelia. Jumaitsi mapacueni-aje:

—Dioso raja pijajivi pevetsijava maitsije. Pacuenia pan pexanaematabënexa, levaduravënëjava yacaëjëpa daxita panmatabëjava, bajara pijinia itsi Dioso pijajivi pevetsijava. Yacaëjëpaena daxitanacuanëjava. Petiriva pan pexanaenexa, acueyabi patarroxanetobeje trigobenonë matajërëaba levaduravënëjavata. Nexata pan pexanaematabënexa, ayaimatabë ata, levaduravënëjava pijinia tsiquirijavayo ata, itsiata levaduravënëjava yacaëjëpa daxitamatabëjava. Nexata levaduravënëjava fufunaeyaexana daxita panmatabënexa. Bajara pijinia itsi Dioso pijajivi pevetsijava. Yacaëjëpa daxitanacuanëjava Dioso pijajivi pevetsicueña, jai Jesús jivi ayaibitsaëto xanetojavabelia.

*Pacuenia Jesús jivi livaisi tsipaebabiaba comparacióncuenia yabara pelivaisi*

*(Mr 4.33-34)*

<sup>34</sup> Jesús itsa tsipaeba jivijavabelia Dioso pijajivi pevetsijavanexa, livaisianë tsipaebapona ëcomparacióncuenia.

<sup>35</sup> Bajarapacuenia Jesús jivi livaisianë itsa tsipaebapona ëcomparacióncuenia, tocopiapatatsi

jane baja pacuenia Diosojumepaebinë profetanë bajayata tajëvelia yaquina Jesús petsipaebaponaejavanexa yabara. Jesús comparacióncuenia jivi livaisi petsipaebaponaejavanexa yabara, profetanë peyaquinaebaxutota jumaitsi mapacueniaje:

Jivi itsa tsipaebajë, livaisi tsipaebianajë comparacióncuenia. Tsipaebianajë pitsicueene Dioso nacua pexanaejavaveliacujinae itsajivi ata abaxë apo yapëtae,  
jai tajëvelia bajayata profetanë peyaquinaebaxutota Jesús jivi livaisi comparacióncuenia petsipaebaponaejavanexa yabara.

*Pacuenia Jesús pijajivi yapëtaeyaexana pajamatabëcuene xaina palivaisi tsipaeba trigobotonë tuatuajëa pejuvijava pelivaisicuenia yabara pelivaisi*

<sup>36</sup> Jesús naviabiaexana jivi ayaibitsaëtoxfaneto. Bajaraxuacujinae Jesús boya joneya. Bजारapabota Jesús pijajivi imoxorenatsi. Nexata Jesús pijajivi jumaitsi:

—Patajatuxanenë, panetsipaebare pajamatabëcuene xaina palivaisi tsipaebame jivi ayaibitsaëtoxfanetojavabelia. Baitsi palivaisi tsipaebame trigobotonë tuatuajëa pejuvijava pelivaisicuenia, jai Jesús pijajivi.

<sup>37</sup> Nexata Jesús jumaitsi pijajivijavabelia:

—“Ponë uba pexaniaviriatrigoxu,” itsa janë, xanë rabaja, Daxitajivi Pematapijinënë, yabara nayabarajumaitsinë.

<sup>38</sup> “Pijapabi,” itsa janë, mapanacua yabaraje jumaitsinë. “Pexaniaviriatrigoxu,” itsa janë,

Dioso pijanacuayabetsia pejonevinexa yabara jumaitsinë. “Pibisiaviriajava pejuvijava,” itsa janë, dovathi pijajivinexa yabara jumaitsinë.

<sup>39</sup> “Pijavajabitsaënë, ponë pabi pexainaenë toubatsi pibisiaviriajava pejuvinexa,” itsa janë, dovathi yabara jumaitsinë. “Penotsimatacabi,” itsa janë, mapanacua pevereverecaejavanexa yabara jumaitsinë. “Tanetonotsivi itorobianajë,” itsa janë, ángelevi yabara jumaitsinë.

<sup>40</sup> Nexata pacuenia piabejejava caetuata pexuabinexa isotojavabelia, bajara pijinia pacuenia tocopiapatsianatsi dovathi pijajivi pexuabinexatsi isotojavabelia mapanacuaje pevereverecaematacabi.

<sup>41</sup> Bजारapamatacabi xanë, Daxitajivi Pematapijinënë, itorobianajë tajaángelevi taevetsinacua tanetovecuajutsinexa daxita pamonaë pibisiacuene pexanabiabivi. Pamonaë ata itsamonaëjavabelia pibisiacuene exanaeyaexana, bajarapamonaë ata taevetsinacua netovecuajutsiana tajaángelevi.

<sup>42</sup> Bजारapamonaë xuabianatsi infiernojavabelia. Bजारajota nuena. Navonosiniana bitso penavixaetaexae.

<sup>43</sup> Pamonaë jumecovënëtsiajinavanapa Dioso pitorobicueniatsi, bajarapamonaë perabëñaitayotsiana taxa Dioso pijanacuatatsia. Pacuenia matacabipijijuameto naitayota, bajarapacuenia perabëñaitayotsiana. Pajivi jamatabëñejumeyapëtane, patacatsipaebilivaisi nenamuxunaevetsi xaniavaetsia, jai Jesús pijajivijavabelia.

*Pacuenia pebi caxitajaraba bitso penamatamotsijavanë, itsanë irata pemëthëtetsijavami, yabara pelivaisi*

<sup>44</sup> Icatsia Jesús comparacióncuenia jumaitsi pijajivijavabelia:

—Pebi irata mëthëteta bitso penamatamotsijavanë. Bjaraxuanë bitso xanepana. Nexata juya itsanë bexëajavabelia bajaraxuanë caxitajarabeta irata. Nexata abaxë bajaraponë apo jutsi bajaraxua. Abaxë saya mataacateta bajarajota. Nexata jamatabëcuenebarëyaya pona pijaboyabelia. Nexata xuacujinae bajaraponë canajeta daxita pexainaejavaximi. Nexata bajaraponë yacomuata bajarapaira. Tsipaji xua bajaraponë caxitajarabeta irata, bitso xanepana. Bitso namatamota. Nexata pacuenia bitso xanepana, bitso namatamotanua, xuanë bajaraponë bajarapaira yacomuata, bajara pijinia itsi Dioso pijajivi pevet-sijava. Bitso xanepana. Bitso namatamotanua, jai Jesús pijajivijavabelia.

*Perlavënëjava bitso penamatamotsijava yabara pelivaisi*

<sup>45</sup> Icatsia Jesús jumaitsi pijajivijavabelia:

—Pacuenia itsi bitso pexaniaviriajava perlavënëjava, bajara pijinia itsi Dioso pijajivi pevet-sijava, bitso pexaniacuene. Perlavënëjavanë pecanajetarutsinë jaitapona pexaniaviriajavanë juya pecanajetaponaenexa.

<sup>46</sup> Nexata itsa caxitajarabaxuaba pexaniaviri-aperlajava, bitso penamatamotsijava, pona

pijaboyabelia pecanajetsinexa daxita pexainaejavami. Nexata comuata bajarapaperlajava, jai Jesús pijajivijavabelia.

*Dujuai peyamatajucaejava yabara pelivaisi*

<sup>47</sup> Icatsia Jesús comparacióncuenia jumaitsi pijajivijavabelia:

—Dujuai peyamatajucaejavata, pibisiaviriadujuai itsa yamatajuta, havecuatsatapona. Bajara pijinia itsi Dioso pijajivi pevetsijava.

Dioso pijajivi vecuatsatapona apo pejume-covënëtsivitsi pexuabinexa infiernojavabelia. Dujuai peyamatajucaejava manuameneta copareca. Nexata daxitaviriadujuai yamatajuta.

<sup>48</sup> Itsa vënëca bajaraxua, nexata juta tajetabojavabelia. Bajarajota itapetapona pexaniaviriadujuai. Pexaniaviriadujuai jebapona bemapirejavabelia. Pibisiaviriadujuai pijinia xuabapona.

<sup>49</sup> Bajara pijinia itsane nacua pevereverecaematacabi. Angelevi ponaena. Nexata pibisiacuene pexanaevi saicaya tsatsianatsi pexuabinexatsi. Dioso pijinia pitorobicueniatsi pejinavanapaevi saicaya tsatsianatsi pecapanepaenexatsi.

<sup>50</sup> Nexata pibisiacuene pexanaevi xuabianatsi infiernojavabelia. Bajarajota nuena. Navonosiniana bitso penavixaetaexae, jai Jesús pijajivijavabelia.

*Bitso penamatamotsijavanë, pejanajavanë, perujujavanë ata, yabara pelivaisi*

<sup>51</sup> Jesús yanijoba pijajivijavabelia.

—¿Panejumeyapëtaneme tsabaja daxita xua yabara pacatsipaebatsi? jai Jesús.

Nexata Jesús pijajivi jumaitsi:

—Jājā, pacajumeyapëtanetsi rabaja, jai.

<sup>52</sup> Nexata Jesús jumaitsi pijajivijavabelia:

—Ponë judíovi pecujarubinë ata, itsa nejumecovënëta, bajaraponë ata tajajivitonë tsane. Nexata pacuenia bo pexainaenë pijabovecua jutapona bitso penamatamotsijavanë, pejanajavanë, perujujavanë ata, bajara pijinia jamatabëcueneitsi tsane ponë nejumecovënëtsiana, judíovi pecujarubinë ata. Tsipaji bajaraponë yapëtaena pexanialivaisianë jivijavabelia petsipaebinexa. Bajaraponë yapëtaena xanë talivaisianë, pejanalivaisianë, perujulivaisianë ata, jai Jesús pijajivijavabelia.

*Pacuenia Jesús naviata pijanacuayabelia, Nazaret tomarabelia, yabara pelivaisi*

*(Mr 6.1-6; Lc 4.16-30)*

<sup>53</sup> Jesús baja penajumeveretsicujinae jivijavabelia livaisianë petsipaebijava comparacióncuenia, pona baja icatsia itsajavabelia.

<sup>54</sup> Jesús baja naviata pevitsabinacuayabelia. Nexata Jesús pevitsabinacuata taxuxuaba livaisi petsipaebijava judíovi penacaet-uatabiabibota. Nexata pejumetaevitsi sivajamatabëcuenenabenajacatsi. Nexata bajarapamonae Jesús jamatabëcueneaebiatanetsi. Bajarapamonae Jesús yabara najumaitsi mapacueniaje:

—¿De tsaeta jota maponë nacujaruba peyapëtaenexa mapalivaisije? ¿De tsaeta pacuenia

caējēpatsi mapacuenia Dioso pesaëta pinijicue  
pexanaenexaje?

<sup>55</sup> Maponēje vaxaitsiyajuvēnēnē, carpinteronēmi pexēnato. Maponēje María pexēnato. Bajaraponē pejuyapijivi, Santiago, José, Simón, Judas.

<sup>56</sup> Papetiriavi ata vajatomarata jinavanapa, maponēje pejuyapijivi. ¿Detsa verena nexata capitsapa palivaisianē nacatsipaebapona maponēje? najai bajarapamonae Jesús yabara.

<sup>57</sup> Nacaetomarapijivixae, bajarapamonae Jesús apo jumexaniataetsi. Nexata Jesús jumaitsi bajarapamonaejavabelia:

–Bajara maitsabiabije. Diosojumepaebivi profetavi itsanacuapijivi yaiyataeyabiabatsi. Itsiata pijanacuapijivi, pijamonae ata, apo yaiyataeyabiabitsi, jai Jesús pijatomarapijivijavabelia.

<sup>58</sup> Jesús pevitsabitomarata pejinavanapaevi apo jumecovēnētsitsi. Bajaraxuata Jesús Dioso pesaëta pinijicue pexanaejava bajarapatomarata bitso apo tsitaexanae.

## 14

*Pacuenia Juanpijinē jivibautisabinēmi beyaxuabatsi yabara pelivaisi*

*(Mr 6.14-29; Lc 9.7-9)*

<sup>1</sup> Herodes, Galileanacua pevetsinē. Nexata Herodes Jesús vēnēlivaisitanetsi Dioso pesaëta pinijicue pexanaponaejava.

<sup>2</sup> Nexata Herodes pijajivijavabelia jamatabēcuenenavēxaniabiaya jumaitsi Jesús yabara:

—Juanpijinēmi raeta jivibautisabinēmi icatsia asaē petēpaecujinae. Bajaraxuata caējēpatsi Dioso pesaēta pinijicuene pexanaenexa, jai Herodes Jesús yabara.

<sup>3</sup> Bjarapacuenia Herodes jumaitsi tsipaji abaxē Juanpijinē itsa asaē, Herodes pijajivi, vajabitsaēvi, itoroba Juanpijinē pevaetabinexatsi. Nexata vajabitsaēvi Juanpijinē cobecētsiaya caponatsi penaneconitsivi pejebabiabiboyabelia. Bjarapacuenia Herodes pijajivi itoroba Herodes pijava, Herodíasva, pejamatabēcueneta. Herodíasva picani copiata pita Felipe, Herodes pejuyapijinē. Nexata Herodes pejuyapijinē pijava yacajērēta.

<sup>4</sup> Nexata Herodes pejuyapijinē pijava peyacajērētsixae, Juanpijinē abaxē itsa apo vaetabitsi, Herodes muxujioba. Juanpijinē jumaitsi Herodesjavabelia:

—Acuenebi raja nejuyapijinē pijava nepitsijava, jai Juanpijinē Herodesjavabelia.

<sup>5</sup> Bjarapacuenia Juanpijinē Herodes pemuxujiobixae, Herodes picani jamatabēbeyaxuabatsi Juanpijinē. Itsiata baitsi jane abaxē apo beyaxuabitsi. Tsipaji Herodes cjunava jivi. Daxitajivi Juanpijinē yapētanetsi Diosojumepaebinēcuenē.

<sup>6</sup> Nexata Herodes itsa najamatabēnapita penaexanaematacabi, fiesta exana. Herodes junata jivi ayaibitsaēto. Nexata bajarapafiestamatcabi pejionēyo, pijava pexēnatoyo, pijacujirucuenia caevayo yavajiba daxita Herodes pejunatsivi pitabarata. Nexata Herodes bitso barēitajitsipa peyavajibijava pejionēyo.

<sup>7</sup> Nexata Herodes najumecapanepaeya pexanaijajumeta jumaitsi pejionēyojavabelia:



—Xua jitsipame nevajëtsianame. Nexata itsa nevajëtsianame, itsacuenejava ata carajutsianatsi, jai Herodes najumecapanepaeya pejionëyojavabelia.

<sup>8</sup> Nexata bajarapovayo pena pitorobicueniatsi jumaitsi mapacueniaje Herodesjavabelia:

—Nerajure platota Juan jivibautisabinë pematabocoto, jai bajarapovayo Herodesjavabelia.

<sup>9</sup> Bajarapacuenia Herodes pejionëyo itsa jumaitsitsi, Herodes bejamatabëjiobi tsanajetsireca. Herodes nexata acuenebi: “Jume,” pejaijava. Tsipaji baja najumecapanepaeya jumaitsi pejionëyojavabelia pexaniajajumeta daxita Herodes pejunatsivi pitabarata. Nexata Herodes jejai.

<sup>10</sup> Nexata Herodes pijajivi, vajabitsaëvi, itoroba penaneconitsivi pejebabiabiboyabelia pevësiucutaxuabinexatsi Juanpijinë.

<sup>11</sup> Bajaraxuacujinae vajabitsaëvi Juanpijinë pematabocoto tocaparenatsi platota. Nexata Herodes rajutsiaexana pejionëyojavabelia. Bajarapova juya pena rajuta. Nexata baja Herodíasva yapëtane capanepaeya baja Juanpijinë pebeyaxuabijavatsi.

<sup>12</sup> Nexata Juanpijinë pijajivi parena itsajota Juanpijinë boca petëpaenë. Pitatsi petëpaenë. Nexata Juanpijinë pijajivi mëthëtatsi. Bajaraxuacujinae bajarapamonae pona Jesúsjavabelia petsipaebinexa Juanpijinë pebeyaxuabijavatsi.

*Pacuenia Jesús pexaejava rajuta cinco mil ponëbeje yabara pelivaisi*

*(Mr 6.30-44; Lc 9.10-17; Jn 6.1-14)*

<sup>13</sup> Jesús vënëlivaisitane Juanpijinë pebeyaxuabijavatsi. Nexata Jesús ëpijajivi jerata barëpona itsabelia ajibi jivi. Itsiata baitsi jane jivi ayaibitsaëtoxaneto yapëtane itsabelia Jesús pona. Nexata pijatomaranë vecuapona. Matatsënëa najetarubena pepëjajitsivitsi Jesús.

<sup>14</sup> Itsa Jesús nonotajuna jeravecua, tane jivibitsaëtoxaneto. Nexata Jesús itaxutobejioibatane bajarapamonae. Tocapatatsi piavitanevi. Nexata Jesús tojamatejemayaexana piavitanevi.

<sup>15</sup> Itsa baja caniviyo tsaponae, Jesús pijajivi cujibarenatsi. Nexata Jesús pijajivi jumaitsi:

—Caniviyo rabaja bitso. Majotaje ajibi pexaejava. Tsipaji itsajivi ata pijabo apo xainae. Itorobare baja jivi peponaenexa tomaraxijavabelia pecomuacaenexa pexaejava, jai Jesús pijajivi.

<sup>16</sup> Nexata Jesús jumaitsi pijajivijavabelia:

—Apo beponae raja abaxë. Paxamë parajure pexaejava, jai Jesús pijajivijavabelia.

<sup>17</sup> Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai.

<sup>18</sup> Nexata Jesús jumaitsi pijajivijavabelia:

—Panetocarenamëre pan maberenaje, dujuainëyobeje yajava, jai Jesús.

<sup>19</sup> Nexata Jesús itoroba daxitajivi penaenexa ponajavata. Nexata Jesús pita cinco papanbëbeje, anijanëyobeje dujuainëyobeje yajava. Athëbëa be-naëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús Diosojavabelia.

Bajaraxuacujinae Jesús pan epatsicacapona. Pijajivijavabelia rajuta bajarapapan. Nexata juya Jesús pijajivi tsicobetsana jivijavabelia.

<sup>20</sup> Daxita xaniavaetsia nabane. Bajaraxuacujinae Jesús pijajivi caetuata pan, dujuai yajava, jivi peyajuvënëcopabejebijavanë. Nexata vënëba doce xuabeje bemapirecuenia pexanaejavanë.

<sup>21</sup> Pamona pexaejava xane, ayaibitsaëtoخانeto. Cinco mil ponëbeje namataëjëtatsi xaniavaetsia. Petiriavi, pejevaxi ata, apo namataëjëtsitsi.

*Pacuenia Jesús mene itaboxoya najetaruca yabara pelivaisi*

*(Mr 6.45-52; Jn 6.16-21)*

<sup>22</sup> Jesús jivi ayaibitsaëtoخانeto pexaejava perajutsicujinae, Jesús pijajivi bepíjia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Nexata Jesús abaxë caenë nacopatanuca bajarajota.

<sup>23</sup> Itsa baja jivi napëvereta penaviabijava, Jesús junaya petsutojumabetsia caenë pevajëtsinexa Diosojavabelia. Nexata Jesús yameravibatsi bajarapatsutojumatsia.

<sup>24</sup> Bajarapaepatota Jesús pijajivi jerata epatua nabuatapona pepatsinexa puca itsapanabelia. Nexata Jesús pijajivi pevajënaeverena joviboxaneto najetaruca, malataca bitso ayai. Nexata malataca mene epabajarabapona jera ënëaberena. Nexata mera vënëcapona jera ënëaberena.

<sup>25</sup> Bajaraxuacujinae bajayacunua, ajena matabijitsia, Jesús pijajivi pecovëvelia imoxoyotana-jetaruca. Jesús najetaruca mene itaboxoya.

<sup>26</sup> Jesús pijajivi itsa tanetsi mene itaboxoya pe-najetarucajava, nabenajaca. Vavajai pecajunavi.

—¡Petëpaenë raeta pejumape najetaruca! jai Jesús pijajivi.

<sup>27</sup> Nexata Jesús jumaitsi pijajivijavabelia:

—Xanë raja. Pëtsa panecujunavame. Pajamate-jemamëre saya, jai Jesús pijajivijavabelia.

<sup>28</sup> Nexata Pedro jumaitsi Jesúsjavabelia:

—Tajatuxanenë, itsa pepacuene xamë, nex-ata nejunaremelia talianexa mene itaboxoyalia, xamëjavabelia, jai Pedro.

<sup>29</sup> Nexata Jesús jumaitsi Pedrojavabelia:

—Renamëre baitsi baja, jai Jesús.

Pedro nexata jeravecua runareca meniabereca. Lia mene itaboxoyalia pepatsinexa Jesúsjavabelia.

<sup>30</sup> Itsiata baitsi jane Pedro itsa tane jovibo pi-asaëjava, bitso cujunavataba. Nexata bubunana-jereca. Pedro ajena bubunanajereca, vavajai.

—¡Tajatuxanenë, nevaetabare! jai Pedro.

<sup>31</sup> Bepijia Jesús cobepitajaraba. Jumaitsi Pedro-javabelia:

—Tsiquirijavayo saya nejumecovënëtame tacaevetsijava. ¿Detsa xuajitsia nejumeaebi-ataneme? jai Jesús.

<sup>32</sup> Nexata baja Jesúsbeje Pedrobeje jera ënëabelia itsa nonoliabeje, joviboxanetomi baja ajibi tsaxu-abi.

<sup>33</sup> Nexata daxita jerata peponaevi pemataba-cabëta tonubena Jesús pitabarata. Jumaitsi ba-jarapamonae:

—Xaniajai rabaja. Xamë Dioso pexënatomë, jai bajarapamonae Jesúsjavabelia.

*Pacuenia Jesús jamatejemayaexana piavitanevi  
Genesaret nacuata yabara pelivaisi*

*(Mr 6.53-56)*

<sup>34</sup> Jesús, pijajivi yajava, pata puca itsapanabelia. Pata Genesaret nacuata.

<sup>35</sup> Genesaret nacuapijivi itsa yapëtanetsi Jesús cuene, nexata daxita bajarapanacuajava vajunupaebatsi pepatsijava. Nexata tocapatatsi daxita piavitanevi Jesús javaberena.

<sup>36</sup> Piavitanevi pecapatsivi pinijicuenia jumai tsabiabi Jesús javabelia:

—Pexaniacuene bitso netoexanare. Tocopatsianame maponëje pecatojayatsinexa nenaxatatsijavacopia, jai tsabiabi.

Nexata daxita pamona e Jesús penaxatatsijavacopia tojayataponatsi, jamatejema tsaponae piavitanejavaveua.

## 15

*Pacuenia Jesús tsipaeba xua jivi jamatabëcuenebijianatsi yabara pelivaisi*

*(Mr 7.1-23)*

<sup>1</sup> Fariseovi, judíovi pecujarubivi yajava, pata Jerusalén tomaraverena. Bajarapamonae Jesús imoxoyorenatsi. Nexata bajarapamonae jumaitsi Jesús javabelia:

<sup>2</sup> —Jesús, nijajivi naneconita Dioso javabelia. Tsipaji nijajivi apo jumecovënëtsiajinavanapae vajasalinaivi pijacuene. Nijajivi itsa xane pexaejava, xane anijatonë napëna nacobequiatsinejeva, jai bajarapamonae Jesús javabelia.

<sup>3</sup> Nexata Jesús jumaitsi fariseovijavabelia, judíovi pecujarubivijavabelia ata:

—Paxamë apo pajumecovënëtsimë Dioso pitorobilivaisi saicaya vajasalinaivi pijacuene panecat-sitecaenexa.

<sup>4</sup> Dioso Moiséspijinëta penajumecopatsilivaisi jumaitsi mapacueniaje: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi.

<sup>5</sup> Itsiata baitsi jane paxamë jivi pamuxubijiapenetafiabame peyaiyataeyaniva paxajivi, penajivi ata. Paxamë jivijavabelia pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejala, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia.

<sup>6</sup> Nexata caranata Dioso pejumaitisijume: “Axa yaiyataema. Ena ata yaiyataema,” pejaijume jivi pejumecovënëtsijavami paxamë pacopatsiaexanaponame. Tsipaji paxamë patsipaebaponame saicaya vajasalinaivi pijalivaisi.

<sup>7</sup> ¡Paxamë saya jivi paneyamaxëitojorobivi! Diosojumepaebinëmi profeta Isaíaspijinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitisijava paxamë yabara, profeta Isaíaspijinë peyaquinaelivaisita jumaitsi mapacueniaje:

<sup>8</sup> Bajarapamonae nejitsipaena saya pijumeta. Itsiata pepo tanejitsipaejamatabëcuene neve-

cuatajē tsane.

<sup>9</sup> Saya baitsi bajarapamonae pijajumaitsita tsane: “Pacajitsipatsi,” nejai tsane itajara. Itsiata apo xaniajai tsane. Bajarapamonae saya jivi tsi-paebaponaena pejamatabēcuenepijilivaisi. Pepo taitorobilivaisi apo tsipaebi tsane, jai tajēvelia Isaíaspijinē peyaquinaelivaisita Dioso pejumaitsijava paxamē yabara, jai Jesús fariseovijavabelia, judíovi pecujarubivijavabelia ata.

<sup>10</sup> Nexata icatsia Jesús junata jivi. Jumaitsi jivijavabelia:

—Panenamuxunaevere xaniavaetsia patanejumeyapētaenexamē patacatsipaebilivaisi.

<sup>11</sup> Xua jivi xane pecuibovojotota, pexae-vajēnaeya napēna anijatonē apo nacobequiatsi ata, apo jamatabēcuenebijianaetsi. Apo vēnananeconitsi Diosojavabelia. Baitsi rajane xua jivi pecuibota pibisiacuenia cuaicuaijai, bajara jane xua jivi bajamatabēcuenebijianatsi, jai Jesús bajarapamonaejavabelia.

<sup>12</sup> Nexata Jesús pijajivi imoxoyorenatsi. Jesús pijajivi jumaitsi:

—Patajatuxanenē, ¿yapētaneme tsabaja fariseovi pecabaraanaepanaejava itsa cajumetane bajarapacuenia nejumaitsijava? jai Jesús pijajivi.

<sup>13-14</sup> Nexata fariseovi yabara Jesús jumaitsi pijajivijavabelia:

—Panamuxujemare saya bajarapamonae. Bajarapamonae saya apo yapētae. Bajarapamonae bepitatsēcēnaevi. Nexata bepematacaponaevi pitatsēcēnaevi pijinia. Pitatsēcēnaenē itsa matacaponaejitsipa itsanē

pijinia pitatsēcēnaenē, nexata najuajopae-jitsiparecabeje mēthēxanetojavareca. Pabita piabejejava itsa juva, nexata yatabutopaya jonatsi vajaveretsinexa. Bajara pijinia pacuenia taxa, athēbētatsia peecaenē, verebiabianatsi daxita bajarapamonae, jai Jesús pijajivijavabelia fariseovi yabara.

<sup>15</sup> Pedro nexata jumaitsi Jesúsjavabelia:

—Patajatuxanenē, paneyapētaeyaexanare pajamatabēcuene xaina palivaisi tsipaebame jivijavabelia. Palivaisi baitsi jumaitsimē: “Xua jivi xane pecuibota, apo jamatabēcuenebijianaetsi,” jamē, jai Pedro Jesúsjavabelia.

<sup>16</sup> Nexata Jesús jumaitsi:

—¿Paxamē ata tsarovia abaxē apo panejumeyapētaemē?

<sup>17</sup> Daxitacuene xua jivi xane pecuibovojotota, junua pecotsorotubereca. Bajaraxuacujinae vecuapitsapatsi.

<sup>18</sup> Baitsi rajane xua jivi pecuibuatsina pitsapa pecuaicuaijainexa pacuenia najamatabēxaina pejamatabēēthētovetsina, bajara jane xua jivi jamatabēcuenebijianatsi.

<sup>19</sup> Tsipaji rabaja jivi pejamatabēēthētojavavetsina pitsapa pibisiacuene penajamatabēxainaenexa. Pitsapa jivi pebeyaxuabijamatabēcuenenexa. Pitsapa pebi pijava pevecuanamatayajitsi jamatabēcuenenexa. Pitsapa petiriavijavabelia pebi penaperabēquenetsiatae jamatabēcuenenexa. Pitsapa penacobetoxotsijamatabēcuenenexa. Pitsapa itsamonae pexanaejava yabara najumetsēnētsiaya pepaebijamatabēcuenenexa. Pitsapa itsamonae yabara najumetsēnētsiaya



pebaracuaicuajai jamatabëcuenenexa.  
Daxita bajarapajamatabëcuene pitsapa jivi  
pejamatabëëthëtojavavetsina.

<sup>20</sup> Daxita bajarapajamatabëcuene jivi  
jamatabëcuenebijianatsi. Jivi raja pexaejava xae  
ata, anijatonë napëna nacobequiatsinejeva,  
apo jamatabëcuenebijianaetsi, jai Jesús  
pijajivijavabelia.

*Pacuenia Jesús itsanacuapijiva pexënatoyo toja-  
matejemayaexana yabara pelivaisi*

*(Mr 7.24-30)*

<sup>21</sup> Jesús baja Genesaret nacuavecua pona.  
Naropota itsanacuayabelia, itsabelia eca ani-  
jatomarabeje, Tiro tomarabeje Sidón tomarabeje.  
Jesús baja pata bajarapanacuayabelia.

<sup>22</sup> Nexata bajarapanacuata ponapona  
cananeaviriava. Bajarapova apo judíova.  
Bajarapova Jesúsjavaberena pata. Pinijijumeta  
bajarapova jumaitsi Jesúsjavabelia:

—¡Petuxanenë, Davidpijinë pemomomë, nitaxu-  
totsoniataema! Taxënatovayo dovathi yajavapon-  
apona. Bitso bejiobiayaexanabiabatsi, jai bajara-  
pova Jesúsjavabelia.

<sup>23</sup> Itsiata Jesús apo jumepitsi. Nexata Jesús  
pijajivi imoxoyorenatsi. Jesús pijajivi jumaitsi  
Jesúsjavabelia:

—Patajatuxanenë, ponaeyaexanare baja mapo-  
vaje. Bitso raxua nacapëvabanajetaruca, jai Jesús  
pijajivi.

<sup>24</sup> Nexata Jesús jumaitsi bajarapovajavabelia:

—Dioso baja cajena nitoroba tayavenonaenexa  
ëjudíovi, Israel nacuapijivi, pamona Dioso tane

beoveja. Tsipaji bajarapamonae Diosovecua naxuabavanapa, jai Jesús bajarapovajavabelia.

<sup>25</sup> Itsiata bajarapova imoxoyorenatsi Jesús. Bajarapova Jesús yaiyataeya pematabacabêta nucajunua Jesús pitabarata. Nexata bajarapova jumaitsi Jesúsjavabelia:

—¡Petuxanenë, neyavenonare! jai.

<sup>26</sup> Nexata Jesús jumaitsi bajarapovajavabelia:

—Apo xanepanae copiaya xamë itsanacuapijivamë tacayavenonaenexa. Abaxë copiaya veyavenonajë tajanacuapijivi, judíovi. Xamë copiaya itsa cayavenonaejitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

<sup>27</sup> Itsiata baitsi jane bajarapova ajumesaë tsaponae. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata baxane pexainaenëtsi pexaeyecaemesa bëxëpanareca piothopaepërë. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

<sup>28</sup> Nexata icatsia Jesús jumaitsi bajarapovajavabelia:

—¡Petiriva, bitso najamatabëcuenecopatame Diosojavabelia pecayavenonaenexa! Nexata pacuenia jumaitsimë, bajarapacuenia Dioso baja cajena catoexanaena, jai Jesús.

Bajarapaepatota bajarapova pexënatovayo Jesús pejamatabëcueneta tojamatejematsi baja pijabotalia.

*Pacuenia Jesús jamatejemayaexana  
ayaibitsaëtoخانeto piavitanevi yabara pelivaisi*

<sup>29</sup> Itsa panacuata eca Tiro tomarabeje Sidón tomarabeje, Jesús baja vecuapona. Nexata Jesús najetaruca Galilea pucaxaneto muxubërëa. Nexata Jesús petsutojumabetsia junaya. Nexata petsutojumatsia Jesús ecojopa.

<sup>30</sup> Nexata jivi ayaibitsaëtoخانeto pata Jesúsjavabereña. Tocapatatsi pejayujayunaevi. Tocapatatsinua bitso pitaxutotsëcënaevi. Tocapatatsinua apo pecuaicuaijaivi. Tocapatatsinua penabejenaevi. Tocapatatsinua ayaibitsaëtoخانeto piavitanevi. Bajarapamonae tojebatsi Jesús pitabarata. Nexata Jesús jamatejemayaexana daxita bajarapamonae.

<sup>31</sup> Nexata jivi jamatabëcuenenabenajaca itsa tane pecuaicuaijajava apo pecuaicuaijivimi. Jesús xanepanaeyaexana penabejenaevimi ata. Xanepanaeyaexana pejayujayunaevimi ata. Itaxutoxanepanaeyaexana bitso pitaxutotsëcënaevimi ata. Nexata jivi itsa tane bajarapacueña, jumaitsi Diosojavabelia: “Diosomë, bitso ayaijamatabëcuenenëmë, paIsrael nacuapijivinë patajaDiosomë,” jai bajarapamonae.

*Pacuenia Jesús rajuta pexaejava beja-  
matabëcuenë cuatro mil pajivibeje yabara pelivaisi  
(Mr 8.1-10)*

<sup>32</sup> Jesús jivi ayaibitsaëtoخانeto pëñajinavanapatsi. Nexata Jesús junata pijajivi. Jumaitsi pijajivijavabelia mapacueniaje:

—Netsitabejiobi baja rovia mapamonaaje. Tsipaji baja ajena acueyabi pamatacabibeje xaina xanëjavata pejinavanapaecujinae. Pemarue baja tovereverecatsi. Pexaejava xaenejeva, apo jitsipaenë taitorobijava peponaenexa pijabonëjavabelia. Namuto epatua meta cuenabijitsipatsi piajani, jai Jesús pijajivijavabelia.

<sup>33</sup> Nexata Jesús pijajivi jumaitsi:

—¿Detsa jane pacuenia pexaejava tocaxitajara-bianatsi mapajivibitsaëtoxanetoje? Majotaje ajibi pexaejava. Tsipaji itsajivi ata pijabo apo xainae majotaje, jai Jesús pijajivi.

<sup>34</sup> Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, dujuainëxi yajava, jai.

<sup>35</sup> Nexata Jesús itoroba daxitajivi penaenexa irata.

<sup>36</sup> Nexata Jesús pita siete papanbëbeje, dujuainëxi yajava. Nexata Jesús jumaitsi Diosojavabelia:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacaponan pan, dujuainëxi yajava. Nexata Jesús pepatsicacaepan rajuta pijajivijavabelia. Nexata juya Jesús pijajivi tsicobetsana bajarapajivi bitsaëtoxanetojavabelia.

<sup>37</sup> Daxita bajarapamonaenabane xaniavaetsia. Nexata peyajuvënëcopabijavanë Jesús pijajivi caet-uata. Vënëba siete xuabeje bemapirecuenia pexanaejavanë.

<sup>38</sup> Pamonaē pexaejava xane, ayaiBITSaētoXaneto. Cuatro mil ponēbeje namataējētatsi xaniavaetsia. Petiriavi, pejevaxi ata, apo namataējētsitsi.

<sup>39</sup> Pexaecujinae pexaejava, Jesús baja navi-abiayaexana jivi. Nexata Jesús runareca jera enēabereca. Pona baja Magdala nacuyabelia.

## 16

*Pacuenia fariseovibeje saduceovibeje Jesús itorobatsi Dioso pesaēta pinijicuene pexanaejava petsitaexanaenexa picani yabara pelivaisi*

*(Mr 8.11-13; Lc 12.54-56)*

<sup>1</sup> Fariseovibeje saduceovibeje pata Jesúsjavabereca. Nexata bajarapamonaē Jesús jamatabēcuenejēbiaya itorobatsi picani pinijicuene pexanaejava Dioso pesaēta Jesús petsitaexanaenexa. Bajarapacuenia picani Jesús itorobatsi peyapētaenexatsi Dioso pepacuene athēbēvetsica pitorobinēcuenetsitsica.

<sup>2</sup> Nexata Jesús jumaitsi bajarapamonaējavabelia:

—Pamatacabi caniviyo itaboxo tsobia, paxamē pajumaitsimē tsabiabi: “Meravia pexaniamatacabi tsane. Tsipaji itaboxo tsobia,” pajamē tsabiabi.

<sup>3</sup> Pamatacabi bajayacunua nacuitaboxo itacaēnanuca, pajumaitsimē tsabiabi: “Ajena anacuayaijitsia daxita matacabi. Tsipaji nacuitaboxo itacaēnanuca,” pajamē tsabiabi. Payapētaneme picani xaniavaetsia pacuenia matacabi itsijitsia. Tsipaji itarērēbo pepitsapaexae, payapētaeyabiabame. Itsiata baitsi jane patae atamē Juan jivibautisabinēmi

peξανaponaejava, xanë ata taexanaponaejava patae atamë, itsiata apo payapëtaemë Dioso athëbëvetsica taneitorobinëcuenetsica.

<sup>4</sup> Bitso pibisiajamatabëcuene xaina pamonae copaba Dioso pejumecovënëtsijavami. Bajarapamonae picani nitoroba Dioso pesaëta pinijicuene taexanaejava tatsitaexanaenexa taneyapëtaenexa pepacuene Dioso athëbëvetsica taneitorobinëcuenetsica. Itsiata baitsi jane Dioso pesaëta pinijicuene taexanaejava, apo tsitaexanaenë tsane. Pacuenia bajayata Diosojumepaebinë profeta Jonáspijinë exanatsi, bajara ëpitsicuene taneexanaejava, tsitajëtsianajë, jai Jesús petëpaecujinae icatsia Dioso piasaëyaexanaejavanexatsi yabara.

Jesús baja nexata bajarapamonae vecuapona.

*Pacuenia Jesús pijajivi muxujioba fariseovi pet-sipaebilivaisi pejumecovënëtsiyaniva yabara peliv-aisi*

*(Mr 8.14-21)*

<sup>5</sup> Jesús pijajivi nicabilia puca itsapanabelia. Nexata nacofënëta pamarue. Apo caponae pan.

<sup>6</sup> Nexata Jesús pijajivi muxujioba pejumecovënëtsiyaniva fariseovi, saduceovi ata, itsa tsipaebatsi saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panejumetaema. Xania panayajivitaema fariseovi pijalevadura. Panayajivitaema saduceovi ata pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebaponaelivaisi, saduceovi ata petsipaebaponaelivaisi, Jesús pijajivi pejumecovënëtsiyaniva.

<sup>7</sup> Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaicuaijai bajarapacuenia Jesús pejumaitsijume yabara. Jesús pijajivi jamatabëcuenenavëxaniabiaya najumaitsi:

—Jesús nacajumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai. Baja raeta pacuenia Jesús nacajumaitsi pan apo vajacaponaxae, najai Jesús pijajivi jamatabëcuenenavëxaniabiaya.

<sup>8</sup> Jesús pijajivi jamatabëcueneyapëtane bajarapacuenia jamatabëcuenenavëxaniabiaya pejumait-sijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimë: “Baja raeta pacuenia Jesús nacajumaitsi pan apo vajacaponaxae,” panajamë? ¿Apo payapëtaemë tsipaji tanecaëjëpaejava taexanaenexa pan itsa namatavenonatsi!

<sup>9</sup> Paxamë abaxë apo panejumeyapëtaemë. ¿Apo panajamatabënapitsimë tsipaji pacuenia exanajë pamatacabi pan namatavenonatsi? Tsicobetsanajë cinco papanbëmibeje cinco mil ponëbeje pexaenexa. ¿Detsa xuabeje pavënëbame peyajuvënënacopabijavanë bemapirecuenia pexanaejavanë?

<sup>10</sup> ¿Apo panajamatabënapitsimënua tsipaji pacuenia tsicobetsanajë siete papanbëmibeje cuatro mil pajivibeje pexaenexa? ¿Detsa xuabeje bajarapamatacabi pavënëbame peyajuvënënacopabijavanë

bemapirecuenia pexanaejavanë?

<sup>11</sup> Itsa pacajumaitsitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” itsa pacajaitsi, pan yabara apo pacajumaitsitsi, jai Jesús pijajivijavabelia.

<sup>12</sup> Nexata jane baja Jesús pijajivi xaniavaet-sia jumeyapëtanetsi. Nexata Jesús pijajivi najumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai tsaena Jesús, fariseovi, saduceovi ata, itsa nacatsipaeba saicayacuenia Dioso pejumelivaisivecua vajajumecovënëtsiyaniva, najai Jesús pijajivi.

*Pacuenia Pedro jumaitsi Jesúsjavabelia: “¡Xamë raja Cristomë!” jai yabara pelivaisi (Mr 8.27-30; Lc 9.18-21)*

<sup>13</sup> Jesús, pijajivi yajava, najetaruca Cesarea de Filipovënë tomaramuxunenia. Nexata Jesús pijajivijavabelia jumaitsi mapacueniaje:

—Xanë, Daxitajivi Pematapijinënë. ¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

<sup>14</sup> Nexata Jesús pijajivi jumaitsi:

—Itsamonae xamë yabara jumai tsabiabi: “Juanpijinëmi raeta jivibautisabinëmi icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonae pijinia jumai tsabiabi: “Diosojumepaebinëmi raeta profeta Jeremíaspijinë, ponëmi bajayata ponapona,



icatsia asaë. Itsa jume, nexata meta bajayata Diosojumepaebivimi profetavimiyajuvënënë icatsia asaë,” jai tsabiabi itsamonae xamë yabara, jai Jesús pijajivi.

<sup>15</sup> Nexata Jesús jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

<sup>16</sup> Nexata Simón Pedro jumaitsi Jesúsjavabelia:

—Xamë cajena Cristomë, athëbëvetsica Dioso peccatorobinëtsica jivi necapanepaenexa. Xamë Dioso piasaëtsaponaponaenë pexënatomë, jai Pedro Jesúsjavabelia.

<sup>17</sup> Jesús nexata jumaitsi Pedrojavabelia:

—Simón, Juan pexënatomë, xamë jamatabëcuenebarëyamë. Tsipaji itsajivi ata apo cayapëtaeyaexanae xanë taneyapëtaenexamë Cristocuenenë. Biji rajane taxa, athëbëtatsia peccaenë, cayapëtaeyaexana.

<sup>18</sup> Nexata catsipaebianatsi mapacueniaje. Xamë rabaja Pedromë, beibotomë. Pacuenia ibopanaxanetojumata pexanetsibo bajayajebi ajamatabësaë tsecae, bajara pijinia itsane tajajivi tanejumecovënëtsivi Cristocuenenë. Nexata dovathi apo jamatabëcuenematatoxenetsitsi tsane.

<sup>19</sup> Pacuenia baupaevetsinë evetsiaexanatsi llavianë, bajara pijinia pacuenia caevetsiaexanaenatsi athëbënacuapijilivaisianë. Xua itavetsianame mapanacuataje, bajaraxua Dioso ata athëbënacuatatsia itaveta. Xua tocopatsianame pexanaenexa mapanacuataje, bajaraxua Dioso ata athëbënacuatatsia tocopata pexanaenexa, jai Jesús Pedrojavabelia.

20 Nexata Jesús pijajivi jumeitaveta petsipaebiyaniwa itsajivijavabelia ata: “Mara ponë Cristoje, Dioso athëbëvetsica pitorobinëtsica jivi pecapanepaenexa,” pejaiyaniva.

*Pacuenia Jesús tajëvelia navajunupaeba pebeyaxuabijavanexatsi yabara pelivaisi*  
(Mr 8.31-9.1; Lc 9.22-27)

21 Jesús pebeyaxuabijavanexatsi, tajëvelia navajunupaeba pijajivijavabelia. Jumaitsi mapacueni-aje:

—Ponaejitsianë Jerusalén tomarabelia. Nexata bajarajotalia nebejiobiaexanaena judíovi pijaancianovi, sacerdotevi penamatacaitorobivi ata, judíovi pecujarubivi ata. Bajaraxuacujinae nebeyaxuabiana. Itsiata baitsi jane tatëpaecujinae, acueyabi matakabita, icatsia asaënë tsane, jai Jesús tajëvelia pijajivijavabelia.

22 Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—¡Tajatuxanenë, Dioso caitaxutotsoniataena bajarapamonae pecaexanaeyaniva daxita pacuenia tajëvelia navajunupaebame! jai Pedro Jesúsjavabelia.

23 Nexata Jesús Pedrovecua napënëyorotaxuaba. Taenuca pijajivi penaejavabelia. Nexata Jesús napënëyorotsia jumai tsanucæ Pedrojavabelia:

—¡Dovathi, nevecuanatixire! Nejamatabëcuenejëbijitsipame. Necopare Dioso taneitorobicuenia taexanaenexa. Xamë apo jitsipaemë pacuenia Dioso jitsipa taexanaenexa.

Saya jitsipame pacuenia jivi jitsipa taexanaenexa, jai Jesús.

<sup>24</sup> Nexata Jesús jumaitsi pijajivijavabelia:

—Pajivi jitsipa tanepënaponaejava, bajarapajivi copatsi pejitsipaecuenia penajamatabëxainabiavami. Exanaponaponae taitorobicuenia. Najamatabëcueneveretsinua, bejiobiaexanaejitsia atatsi, beyaxuabijitsia atatsinua, Dioso pejumelivaisi yabara pijamatabëcuenesaë tsaponaponaenexa. Nexata jane baja xuacujinae nepënaponaena.

<sup>25</sup> Pajivi exanaponapona penatojitsipaecuenia, apo xainae tsane matacabi apo pevereverecea-java. Pajivi xanë tajamatabëcueneta copata penatojitsipaecuenia pexanaejavami, bajarapajivi xainaena matacabi apo pevereverecea-java.

<sup>26</sup> Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xinae ata, mapanacuapijicueneje, itsiata nacuerata. Tsi-paji pexainae-cuene apo capanepae tsanetsi Diosojavabelia. Tsi-paji acuenebi tsane itsajivi ata pematamotsinexa penaxuabiyaniva Diosovecua.

<sup>27</sup> Xanë, Daxitajivi Pematapijinënë, yajavapatsianicajë taxa Dioso pijapenivenivenaecotia. Yajavapatsianicajënuu tajaängelevi. Nexata matamotaponaenajë caejivi canacujitsia, tanetonacuenebivi. Naneconitsiaexanaenajë pijinia pijaneconi pexinaevi.

<sup>28</sup> Xaniajanë pacuenia pacatsipaebijitsiatsi. Daxita paxamë patëpaenejevamë, xanë, Daxitajivi Pematapijinënë, tajajivi ayaibitsaëtoxaneto naexanaena. Nexata paxamëyajuvënëvi pepuatae

tsane xanë tajajivi ayaibitsaëtoxaneto taevetsijava, tēpaena, jai Jesús pijajivijavabelia.

## 17

*Pacuenia Jesús caeepatoyo perabēnivenivenataba yabara pelivaisi*

*(Mr 9.2-13; Lc 9.28-36)*

<sup>1</sup> Jesús petēpaejavanexa tajēvelia penava-junupaebicujinae, seis pamatacabibejecujinae, Jesús pijajivi, acueyabi ponēbeje, barējunaya pinijitsutoxanetojumabetsia. Jesús barējunaya mapamatabēxēyoje: Pedro, Santiago, Juan. Bajarapamatabēxēyo Jesús barējunaya pinijitsutoxanetojumabetsia. Santiago raja pejuyapijinē Juan.

<sup>2</sup> Nexata petsutojumatatsia Jesús per-abēnivenivenareca bajarapamonae pitabarata. Pacuenia matacabipijijuameto banaitayota, bajarapacuenia Jesús itabaranaitayota. Penaxatatsijavareca, daxita nivenivenaeya niojai.

<sup>3</sup> Nexata bajarajota Jesús pijajivi tane bajayata petēpaenēmibeje, Moiséspijinēbeje Elíaspijinēbeje. Jesús barēcuaijuajaisi bajaraponēbeje.

<sup>4</sup> Nexata Pedro jumaitsi Jesúsjavabelia mapacueniaje:

—¡Patajatuxanenē, pijacuaxae panebarēponame! Itsa jitsipame, pacatoexanaenatsi acueyabi pabobērēto beje. Itsabobērēto xamēnexa tsane. Itsabobērēto Moisésnexa tsane. Itsabobērēto Elíasnexa tsane, jai Pedro Jesúsjavabelia.

<sup>5</sup> Itsa abaxë Pedro cuaicuaijai tsanucae, pe-naitayotsiitarërëbo mataacataxuabatsi daxita bajarapamonae. Nexata bajarapamonae jumetane bajarapaitarërëbojavavetsica Díoso pejumaitsijava: “Mara ponë taxënato, tasivanëje. Bitso sivajamatabëcuenebarëyanë. Pajumetaema bajaraponë,” pejaijavatsica bajarapamonae jumetane.

<sup>6</sup> Jesús pijajivi itsa jumetane bajarapacuenia Dioso pejumaitsijavatsica, irataeya othopa irata. Jesús pijajivi bitso najunaviaca.

<sup>7</sup> Nexata Jesús imoxoyolia pijajivi. Jayalia. Jumaitsi pijajivijavabelia:

—Panobapunare. Pëtsa pajunavame, jai Jesús pijajivijavabelia.

<sup>8</sup> Nexata Jesús pijajivi itsa naëcobarëcëpalia Jesúsjavabelia, ajibi baja Moisésbeje Elíasbeje. Caenë baja Jesús nuca.

<sup>9</sup> Nexata Jesús pijajivi itsa barërunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpaecujinae, nexata jane baja matapania patsipaebianame, jai Jesús pijajivijavabelia.

<sup>10</sup> Nexata Jesús pijajivi yanijoba Jesúsjavabelia. Jumaitsi:

—Patajatuxanenë, ¿detsa xuajitsia judíovi pecujarubivi jumai tsabiabi: “Bajayata ponëmi ponapona, Elíaspijinë, petëpaecujinae icatsia asaë tsane. Bajaraponë copiata patsiana. Bajaraxuacujinae patsiana Cristo, pepo vajanacacapanepaenënexa jane baja,” jai tsabiabi? jai Jesús pijajivi.

11 Nexata Jesús jumaitsi pijajivijavabelia:

—“Copiata Elíaspijinē patsiana. Nexata bajaraponē jamatabēcuenexanetsiana daxitajivi,” itsa jai, Juanpijinēmi jivibautisabinēmi yabara jumaitsi. Xaniajai rabaja pacuenia judíovi pecujarubivi jumaitsi.

12 Xaniajanē pacuenia pacatsipaebijitsiatsi. Elíaspijinē rabaja patajopa. Itsiata jivi apo yapētaetsi ponēcuenē. Nexata pacuenia jivi jitsipa pexanaenexa bajaraponējavabelia, exana baja. Beyaxuabatsi. Bajara pijinia pacuenia xanē ata, Daxitajivi Pematapijinēnē, nebejiobiaexanaena bajarapamonae, jai Jesús pijajivijavabelia.

13 Nexata Jesús pijajivi jumeyapētanetsi. Nexata Jesús pijajivi jamatabējumaitsi:

—“Elíaspijinē rabaja patajopa,” itsa jai Jesús, Juanpijinēmi jivibautisabinēmi yabara jumaitsi, jamatabējai Jesús pijajivi.

*Pacuenia Jesús jamatejemayaexana pejevaxinē,  
dovathi peyajavaponaponaenē, yabara pelivaisi  
(Mr 9.14-29; Lc 9.37-43)*

14 Jesús pijajivi, acueyabi ponēbeje, barēnaviata petsutojumavetsica. Nexata bajarapatsutoxanetotabuta vajēnaeevetatsi jivi ayaibitsaētoxoneto. Nexata pebi Jesús imoxoyorenatsi. Bajaraponē Jesús yaiyataeya pematatabacabēta nucajunua Jesús pitabarata. Bajaraponē jumaitsi Jesúsjavabelia:

15 —Jesús, netoitaxutotsoniataema taxēnatonēyo. Netodevacaiababatsi raja. Bitso bejiobi tsabiabi. Anijatonē isotuabelia natajuitabiaba. Itsajavata menialia jopabiabalia.

16 Nijajivijavaberena picani capatajē tanetojamatejemayaexanaenexa. Itsiata baitsi jane apo caējēpaetsi tanetojamatejemayaexanaenexa, jai bajaraponē Jesúsjavabelia.

17 Nexata Jesús jumaitsi pijajivijavabelia:

—¡Paxamē baja rovia apo pajumecovēnētšimē Dioso papecayavenonaejavanexa! Bajaraxuata apo pacajamatabēcuenecaējēpae pejevaxinē panevecuacapitsapaenexa dovathi. ¡Paneajamatabēcuenetajavi baja rovia! Pexaniajailivaisivecua saicayacuenia panajamatabēxainame. ¿Detsa paepatojebi abaxē paxamējavata ponaponaeñajē? ¿Detsa paepatojebi abaxē paxamējavabelia ajamatabēcuenesaēñē tsaponaponae tsane patanejumecovēnētšinexamē? Panetocarenamēre pejevaxinē, jai Jesús pijajivijavabelia.

18 Nexata Jesús itaveta dovathi pejevaxinē pevecuapitsapaenexatsi. Nexata baja pejevaxinē dovathi vecuapitsapatsi. Pejevaxinē baja jamatejema.

19 Bajaraxuacujinae Jesús pijajivi barēcuaicuaijaitšis pijaepatojavata. Jesús pijajivi jumaitsi:

—Patajatuxanenē, ¿detsa xuajitsia meta paxanē apo panecaējēpae patavecuacapitsapaenexa dovathi? jai Jesús pijajivi.

20 Nexata Jesús jumaitsi pijajivijavabelia:

—Apo pacacaējēpae pejevaxinē panevecuacapitsapaenexa dovathi. Tsipajixaniavaetsia apo pajumecovēnētšimē Dioso papecayavenonaejavanexa. Xaniajanē pacuenia pacatsipaebijitsiatsi. Paxamē tsiquirijavayo ata itsa pajumecovēnētšipame

Dioso papecayavenonaejavanexa, nexata pacacaējēpaejitsipa Dioso pesaēta pinijicuene paneexanaenexa. Nexata ita pajumaitsimē tsipae mapatsutoxanetojavabeliaje: “Vecuanatixire majotaje. Itsajavabelia ecaename,” ita pajamē, pacajumecovēnētsipa. Nexata natixitsipa. Nexata paxamē paneexanaenexa itsacuenejavayo ata, apo pacatsitaayapēbeje tsipae ita pepacuene xaniavaetsia pajumecovēnētsipame Dioso papecayavenonaejavanexa.

<sup>21</sup> Mara paviriadovathije apo jitsipae pepit-sapaejava. Matapania panexaejava apo pax-aemē tsipae pamatacabibeje asaēyata Diosojavabelia pavajētaponame dovathi pepitsapaenexa, pitsapaejitsipa, jai Jesús pijajivijavabelia.

*Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi*  
(Mr 9.30-32; Lc 9.43-45)

<sup>22</sup> Jesús abaxē pijajivi ita barēponapona Galilea nacuata, pijajivijavabelia tajēvelia navajunupaebapona pebeyaxuabijavanexatsi. Jesús pijajivijavabelia jumai tsaponae mapacueniaje:

—Xanē, Daxitajivi Pematapijinēnē, necanajetsiana itsamonae pecobeyabelia.

<sup>23</sup> Bajarapamonae nebeyaxuabiana. Itsiata baitsi jane tanebeyaxuabicujinae, acueyabi mat-acabita, icatsia asaēnē tsane,” jai tsaponae Jesús pijajivijavabelia.

Nexata Jesús pijajivi ita jumetanetsi bajarapacuenia Jesús penavajunupaebapona-aejava petēpaejavanexa, Jesús pijajivi bitso najamatabēxaina.



*Pacuenia Jesús matamota impuestomatamo yabara pelivaisi*

<sup>24</sup> Jesús, pijajivi yajava, pata Capernaum tomarata. Nexata Capernaum tomarata impuestomatamo pematamoyanijobabiabivi pona Pedrojavabelia. Nexata bajarapamonae yanijobatsi Pedro.

—Pedro, ¿xaniajai tsaja? ¿Panijatuxanenë impuestomatamo apo matamotabiabi, paimpuestomatamo judíovi matamobabiaba templobo pevetsivijavabelia? jaitsi.

<sup>25</sup> Pedro nexata jumaitsi:

—Jājā. Matamotabiaba cajena, jai.

Nexata Pedro joneya Jesús peecaeboyalia. Nexata Pedro pejonejavatalia Jesús peecaeboyalia, Jesús jumaitsi Pedrojavabelia:

—Pedro, ¿detsa xamë jamatabëcueneitsimë? Nacuaevevtsivi palata pepitsinexa, pijajivi itoroba impuestomatamo petoyanijobinexatsi. ¿Detsa nexata pamonaejavabelia nacuaevevtsivi pijajivi yanijobabiaba impuestomatamo? ¿Nacuaevevtsivi tsaja pijamonaejavabelia? Itsa jume, ¿saicayavijavabelia tsaja, nacuaevevtsivi pevetsinacuata pejinavanapaevijavabelia? jai Jesús Pedrojavabelia.

<sup>26</sup> Pedro nexata jumaitsi Jesúsjavabelia:

—Nacuaevevtsivi raja pijajivi impuestomatamo yanijobabiaba saicayavijavabelia, nacuaevevtsivi pevetsinacuata pejinavanapaevijavabelia. Apo yanijobabiabi nacuaevevtsivi pijamonaejavabelia, jai Pedro Jesúsjavabelia.

Jesús nexata jumaitsi Pedrojavabelia:

—Pacuenia nacuaeavetsivi pijamonae apo matamotsitsi impuestomatamo, bajara pijinia pacuenia xanë ata apo jitsipañe picani tamatamotsinexa impuestomatamo templobo pevetsivijavabelia taxa Dioso pijatemploboxae.

<sup>27</sup> Itsiata baitsi jane xamë matamotsianame itsajivi ata vajanacabaraanaepañaeyanivabeje. Liamëre pucaxanetojavabelia. Ejëbianame culupabota. Padujuainëyo copiaya catoxaena, jutsianame. Pecuibota caxitajarabianame palatanëyo. Bajarapapalatanëyota cajëpaena vajamatamotsinexabeje impuestomatamo xanë tamatamotsinexa, xamë ata nematamotsinexa. Nexata bajarapapalatanëyo caponaename impuestomatamo nematamotsinexa templobo pevetsivijavabelia, jai Jesús Pedrojavabelia.

## 18

*Pacuenia Jesús pijajivi jumaitsi: “¿Detsa ponë paxanëyajuvënëne panevecuaayaijamatabëcuenenë?” jai Jesúsjavabelia yabara pelivaisi (Mr 9.33-37; Lc 9.46-48)*

<sup>1</sup> Jesús baja itsa najumevereta Pedrojavabelia pecuaicuaijajava impuesto yabara, daxita Jesús pijajivi imoxoyorenatsi. Nexata Jesús pijajivi jumaitsi Jesúsjavabelia:

—Patajatuxanenë, ¿detsa ponë paxanëyajuvënëne bitso ayaijamatabëcuenenë tsane daxitavecua Dioso pijanacuatatsia? jai.

<sup>2</sup> Nexata Jesús junata pejevaxinëyo. Pijajivi tuat-uajëta nuteta pejevaxinëyo.

<sup>3</sup> Jesús nexata jumaitsi pijajivijavabelia:

—Xaniajanë pacuenia pacatsipaebijitsiatsi. Mapapejevaxinëyoje beveliajamatabëcuenenëyo nataeya najamatabëcuenecopata Diosojavabelia Dioso pevetsinexatsi. Nexata paxamë ita apo panajamatabëcuenepënëyorotsimë tsane perujamatabëcuenevecua beveliajamatabëcuenevi panenataenexa pacuenia mapapejevaxinëyo itsije, nexata apo pajonemë tsane Dioso pijanacuayabetsia.

<sup>4</sup> Nexata ponë jitsipa Dioso pijanacuatatsia ayaijamatabëcuenenë penaexanaenexa daxitavecua, bajaraponë beveliajamatabëcuenenë natae, pacuenia mapapejevaxinëyo jamatabëcueneitsije.

<sup>5</sup> Pajivi copiapita tanejumečovënëtsijiviyo, mapitsijamatabëcuenejiviyoje, bajaraxua xanë taniji tanecopiapitsijava, jai Jesús pijajivijavabelia.

*Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi*

*(Mr 9.42-48; Lc 17.1-2)*

<sup>6</sup> Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumečovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayaicuenia bajarapajivi naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumečovënëtsivijavabelia, abaxë pibisiacuene exanaeyaexanaenejeva, bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava,

bexuarecatsi pucaxaneto tuatuajëareca. Bajara-pajivi bexuarecatsi bitso penaneconitsiyaniva Diosojavabelia pibisiacuene itsa exanaeyaexana tanejumecovënëtsiviyajuvënëvi.

<sup>7</sup> ¡Dioso bitso naneconitsiaexanaenatsi mapanacuapijivi pibisiacuene pexanaevi! Pibisiacuene vajanacaexanaeyaexanae jamatabëcuenenexa, navita mapanacuataje. Bajarapajamatabëcuene tsitecaponaena pevajënaeyabelia. Nexata pajivi pejamatabëcueneta itsamonae pibisiacuene exanaeyaexana, bajara-pajivi bitso Dioso naneconitsiaexanaenatsi.

<sup>8</sup> 'Bajaraxuata panecobeta, panetaxuta ata, pibisiacuene itsa paexaname, panacobecaucure. Panataxucaucure. Tajë panavecuaxuare. Itsiata xanepana panejonenexa cobemataxucaeya, taxumataxucaeya ata, apo pevereverecaenacuajavabelia. Biji rajane apo xanepanae tsipae anijacobebeje, anijataxubeje ata yajava, panejonenexa apo pevereverecaeisotojavabelia.

<sup>9</sup> Paneitaxutota panetaejava yabara ata pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimë apo pevereverecaenacuajavabelia. Biji rajane apo xanepanae tsipae anijaitaxutobeje yajava panejonenexa infiernojavabelia, jai Jesús pijajivijavabelia.

*Pacuenia Jesús pijajivi livaisi tsipaeba oveja penaxuabinë pelivaisicuenia yabara pelivaisi (Lc 15.3-7)*

<sup>10</sup> Jesús jumaitsi pijajivijavabelia:

—Itsamonae mapanacuata bijiaya taeyabiaba mapitsipejevaxijivixi ataje, tanejume-covënëtsijivixi. Saya beveliajamatabëcuenevi taeyabiaba. Pëtsa bajarapacuenia paxamë ata bijiaya pataneme tanejumecovënëtsivi. Bijiaya pëtsa pataneme mapitsipejevaxinëyo ataje, tanejumecovënëtsijiviyo. Tsipaji bajarapamonae ángelevi yajavajinavanapa peyavenonabiabinexatsi. Bajarapaángelevi taxa Dioso, athëbëtatsia peecaenë, pitabarata jinavanapa.

<sup>11</sup> Xanë, Daxitajivi Pematapijinënë, patajopajë tacapanepaenexa daxita Diosovecua naxuabiaya pejinavanapaevimi, jai Jesús pijajivijavabelia.

<sup>12</sup> Jesús icatsia jumaitsi pijajivijavabelia:

—Pacanaëjëre mapacuenije. Pebi xinaejit-sipa cien ponëbeje oveja. Nexata itsa toya-juvënëanaxuabijitsipatsi caenë, oveja pexainaenë puenetsipa noventa y nueve ponëbeje oveja. Bajaraxuacujinae jaitsipa petonaxuabinëtsi.

<sup>13</sup> Xaniajanë pacuenia pacatsipaebijitsiatsi. Bajaraponë itsa caxitajarabijitsipa pijaoveja, petonaxuabinëmitsi, bitso barëyataejitsipa. Nexata noventa y nueve ponëbeje, apo petonaxuabiv-itsi, pesivajamatabëcuenebarëyajava, matatoxenetsia bitso sivajamatabëcuenebarëya tsipae petonaxuabinëmitsi.

<sup>14</sup> Bajara pijinia pacuenia paneaxa ata, athëbëtatsia peecaenë, apo jitsipae pevecuanaxuabinexatsi caejivi ata mapitsipejevaxijivixi ataje, tanejumecovënëtsivi, jai Jesús pijajivibelia.

*Pacuenia*

*Dioso*

*pejumecovënëtsijivi*

*bebarajamatabëcuenexanepana, itsacueniabi atatsi  
itsajivi, yabara pelivaisi*

*(Lc 17.3)*

<sup>15</sup> Icatsia Jesús jumaitsi pijajivijavabelia:

—Itsanë Dioso pejumecovënëtsinë pibisiacuene papecatoexanaejava, itsa pavënëlivaisitaename, xaniavaetsia payanijobianame caenëjavata. Nexata xaniavaetsia itsa panabarëcuaicuajamëbeje, panabarajamatabëcuene xanepanaenamebeje.

<sup>16</sup> Xaniavaetsia itsa apo pacabarëcuaicuajai tsane, nexata Dioso pejumecovënëtsinë pajunatsianame caenë, anijanëbeje ata, paneyajavaponaenexa pibisiacuene papecatoexanaenëjavabelia pemuxujiobinexatsi. Nexata bajaraponëbeje pacajumetaena xaniavaetsia panebarëcuaicuajaijava pibisiacuene papecatoexanaenëjavabelia. Bajarapacuenia itsa paexanaename, nexata pacuenia Dioso pejumelivaisibaxutota jumaitsi, paexanaename.

<sup>17</sup> Ponë pibisiacuene pacatoexana, itsa apo namuxunaevetsi tsane paneyajavaponaenëbeje ata pemuxujiobijava, nexata daxita Dioso pejumecovënëtsivi penacaetuatsijavata, payanijobianame papibisiacuene pacatoexana. Nexata ponë pibisiacuene pacatoexanaena, daxita Dioso pejumecovënëtsivi muxujiobianatsi. Bajaraponë itsa apo namuxunaevetsi tsane, muxujiobi atatsi Dioso pejumecovënëtsivi, nexata bajaraponë pataename Dioso apo pejumecovënëtsinëcuenia. Panavecuaitavetsianame pepatsiyaniva panenacaetuatsijavata, jai Jesús pijajivijavabelia.

<sup>18</sup> Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Xua jivi paitavetsianame pexanaeyaniva mapanacuataje, bajaraxua Dioso athëbënacuatatsia ata itaveta. Xua jivi patocopatsianame pexanaenexa mapanacuataje, bajaraxua Dioso ata athëbënacuatatsia tocopata pexanaenexa, jai Jesús pijajivijavabelia.

<sup>19</sup> Icatsia Jesús jumaitsi pijajivijavabelia:

—Pacatsipaebijitsiatsinua mapacueniaje. Mapanacuata paanijanëmëbeje itsa panajamatabëcuenejëpamebeje xua pavajëtsijitsiamëbeje Diosojavabelia, nexata taxa, athëbëtatsia peecaenë, pacajumecovënëtsianabeje xua pavajëtamebeje.

<sup>20</sup> Tsipaji itsajota anijajivibeje, acueyabi ata, nacaetuata, tanejumecovënëtsivi, bajarajota xanë bajarapamonae yajavaecaenajë, jai Jesús pijajivijavabelia.

<sup>21</sup> Nexata Pedro imoxoyolia Jesús. Pedro jumaitsi Jesúsjavabelia:

—Tajatuxanenë, panetsipaebame rabaja. Panejumaitsimë mapacueniaje: “Itsajivi Dioso pejumecovënëtsijivi pibisiacuene itsa pacaexanaena, pajamatabëcaevianame. Barajamatabëcuenexanepanaeya pataename. Itsa pavënëlivaisitaename pibisiacuene papecatoexanaejava, xaniavaetsia payanijobianame caenëjavata. Nexata xaniavaetsia itsa panabarëcuaicuaijamëbeje, panabarajamatabëcuene xanepanaenamebeje,” panejamë. ¿Detsa xuabeje pibisiacuene nexanae ata, pibisiacuene netoexanae atanua, jamatabëcaevianajë barajamatabëcuenexanepanaeya tataenexa

bajarapajivi? ¿Siete tsaja xuabeje ata? jai Pedro Jesúsjavabelia.

<sup>22</sup> Jesús nexata jumaitsi Pedrojavabelia:

—Siete xuabejenexa yabara apo jumaitsinë. Biji rajane siete pasetentabeje pibisiacuene pacaexanae ata, pibisiacuene pacatoexanae atanua, pajamatabëcaevare barajamatabëcuenexanepanaeya panetaenexa, baitsi cuatrocientos noventa xuabeje ata, jai Jesús Pedrojavabelia.

*Ponë apo jitsipae pebarajamatabëcuenexanepanaenexa itsanëjavabelia yabara pelivaisi*

<sup>23</sup> Jesús livaisi tsipaeba comparacióncuenia pijajivijavabelia. Jumaitsi mapacueniaje:

—Dioso pijanacuatatsia pijajivijavabelia exanaena pacuenia nacuaevetsinë pijajivijavabelia baexana. Nacuaevetsinë jitsipa piamoneyabivitsi pematamotsinexatsi xua amoneyabatsi.

<sup>24</sup> Nexata itoroba pijajivi petotsipaebapon-aenexatsi daxita pamonaë amoneyabatsi. Nexata pijajivi tobarëparenatsi ponë bitso ayaijava amoneyabatsi, baitsi millones de pesos piamoneyabinëtsi.

<sup>25</sup> Nexata bajaraponë apo xainae pematamotsijavanexatsi. Nexata nacuaevetsinë itoroba pijajivi. Jumaitsi: “Mara ponë bitso ayaijava niamoneyabaje. Nexata pacanajetaxuabianame dajubicuenia itsamonaejavabelia amoneya petonacuenebaponaenexa daxitamatacabi-javabelianexa. Daxita pexi, pijava ata, pecobecovë ata yajava, pacanajetaxuabianame.



Bajarapacuenia pitsianajë tsiquirijavayo ata taneamoneyabijavamamoto,” jai nacuaeavetsinë pijajivijavabelia.

<sup>26</sup> Nexata ponë amoneyaba, nacuaeavetsinë pitabarata pematabacabëta nucajunua. Piniijicuenia vajëta nacuaeavetsinëjavabelia. Jumaitsi: “Nejamatabëcueneevere abaxë. Camatamotsianatsi rabaja daxita xua camoneyabatsi,” jai.

<sup>27</sup> Nexata nacuaeavetsinë itaxutotsoniatane pi-amoneyabinëtsi. Nexata nacuaeavetsinë jumaitsi piamoneyabinëtsijavabelia: “Daxita rabaja tanea-moneyabijavamë, iquinajë. Nexata baja apo nematamotsimë tsane,” jai nacuaeavetsinë piamoneyabinëtsijavabelia. Bjaraxuacujinae copata baja penaviatsinexa.

<sup>28</sup> Nexata bajaraponë penaviatsinexa, ajena pitsapalia nacuaeavetsinë pijabovecua, caxitajarabaxuaba itsanë penajuanacuenebabibinëbeje nacuaeavetsinë pijajava. Bjaraponë nexata jamatabëjumaitsi: “Maponë tsiquirijavayovajëto niamoneyabi ataje, yanijobianajë tanematamotsinexa,” jamatabëjai. Nexata cuibocamisavaetaba. Cuibocuetsaca asaëyata. Jumaitsi bajaraponëjavabelia: “Nematamore taneamoneyabijavamë,” jai.

<sup>29</sup> Nexata piamoneyabinëtsi bajaraponë pitabarata pematabacabëta nucajunua. Piniijicuenia vajëta. Jumaitsi: “Nejamatabëcueneevere abaxë. Camatamotsianatsi raja itsiata daxita xua camoneyabatsi,” jai.

<sup>30</sup> Itsiata baitsi jane bajaraponë piamoneyabinëtsi apo itaxutotsoniatæ. Barëpona

baja penaneconitsivi pejebabiabibojavabelia penaneconitsiaexanaenexa. Bajarapacuenia pematamotsinexatsi daxita piamoneyabijavatsi.

<sup>31</sup> Nexata nacuaevetsinē pijajivi itsa tane bajarapacuenia pexanaejava penajua nacuenebabiabinēbejejavabelia, bajarapamonae bitso najamatabēxaina. Nexata nacuaevetsinē pijajivi ponalia petsipaebinexa bajaraxua pijatuxanenējavabelia.

<sup>32</sup> Nexata nacuaevetsinē pijajivi itsa tsipaebatsi, itoroba icatsia pijajivi petojunatsinexatsi bajaraponē. Nexata itsa tocatatsi, nacuaevetsinē jumaitsi bajaraponējavabelia: “Ni-ajamatabēcuenebejenē baja rovia. Catoiquinatsi rabaja picani taneamoneyabijavamē. Tsipaji pinijicuenia nevajētame.

<sup>33</sup> Pacuenia caitaxutotsoniatanetsi, bajara pijinia pacuenia itaxutotsoniataejitsipame pecaamoneyabinē,” jai nacuaevetsinē.

<sup>34</sup> Nexata nacuaevetsinē bitso baraanaepana millones de pesos piamoneyabinētsijavabelia. Nexata nacuaevetsinē jumaitsi pijajivijavabelia: “Bajaraponē pacaponaeremelia penaneconitsivi pejebabiabibojavabelia penaneconitsiaexanaenexatsi. Bajarajota naneconitsiaponaponaena ēpematamoveretsijavabelianexa daxita taneamoneyabijava,” jai nacuaevetsinē, jai Jesús pijajivijavabelia.

<sup>35</sup> Jesús icatsia jumaitsi pijajivijavabelia:

—Bajara pijinia pacuenia paxamē ata taxa, athēbētatsia peecaenē, pacaexanaena, itsa apo pajamatabēcaevimē tsane panebarajamatabēcuene

xanepanaenexa pamonae pacaitsacueniaba, jai Jesús pijajivijavabelia.

## 19

*Pacuenia Jesús jivi livaisi tsipaeba penacojobinē pijava pexuabiyanima yabara pelivaisi*

*(Mr 10.1-12; Lc 16.18)*

<sup>1</sup> Jesús pijajivi pemuxujobicujinae pebarajamatabëcuene xanepanaenexa itsamonae itsacueniabi atatsi, Jesús baja pona Galilea nacuavecua. Jesús nexata pata Judea nacuayabelia, Jordánmene itsapanabelia.

<sup>2</sup> Jivi ayaibitsaëtoxaneto pënaponatsi. Bajarajotalia Jesús jamatejemayaexana piavitanevi.

<sup>3</sup> Nexata fariseovi Jesús imoxoyorenatsi. Jamatabëcuenejëbiaya yanijobatsi. Jesús bijiaya itsa jumecanaviata, peneconitsinexatsi picani. Nexata fariseovi jumaitsi Jesúsjavabelia:

—¿Xanepana tsaja penacojobinē pijava pexuabinexa itsacuenejavayo ata yabara? jai fariseovi.

<sup>4</sup> Jesús nexata jumaitsi fariseovijavabelia:

—¿Apo palebimē tsipaji paneyapëtaenexa pacuenia Dioso pejumelivaisibaxutota jumaitsi? Pamatacabi Dioso taxuxuaba nacua pexanaejava, bajarapamatacabi Dioso exana pebi, pijava yajava.

<sup>5</sup> Nexata Dioso pejumelivaisibaxutota jumaitsi mapacueniaje: “Pebi itsa nacojoba pijavajavabelia, banatsata paxavecua, pena atavecua. Nexata Dioso tane anijajivimibeje becaejivi,” jai Dioso pejumelivaisibaxutota.

<sup>6</sup> Nexata Dioso apo tae beanijajivibeje. Becaejivi saya tane Dioso. Bajaraxuata itsanë ata apo bexuabi pijava. Tsipaji Dioso pejamatabëcueneta napitsiaexanatsibeje, jai Jesús fariseovijavabelia.

<sup>7</sup> Nexata icatsia fariseovi jumaitsi Jesúsjavabelia:  
—¿Detsa xuajitsia bajayata Moiséspijinë copata penacojiobinë petoyaquinaenexa cuyalatobaxuto pijava pitavetsilivaisi pexuabinexa bajarapacuenia? jai fariseovi.

<sup>8</sup> Jesús nexata jumaitsi fariseovijavabelia:  
—Paneajamatabëcuenetajaxae, Moiséspijinë pacatocopata bajarapacuenia paneexanaenexa panexuabinexa panijavajivi. Itsiata baitsi jane Dioso pexanaejivibejejavaveliacujinae, apo tocopatsi picani bajarapacuenia pexanaenexa.

<sup>9</sup> Nexata mapacuenia pacatsipaebianatsije. Ponë pijava xuaba, itsanëjavabelia bajarapova pevitota pibisiacuene apo vecuaexanae atatsi, bajaraponë naneconita Diosojavabelia pijava pexuabixae. Nexata pijava pexuabinë itsa nacojioba icatsia itsavajavabelia, bajaraponë pibisiacuene exana pevitota. Tsipaji pepo pijavavecua jaita itsava. Dioso cajena abaxë bajaraponë pexuabiva pijavacuenia totanetsi. Ponë ata itsanë pexuabiva pita, bajaraponë ata pibisiacuene exana pevitota. Tsipaji itsanë pijavami pita, pova abaxë Dioso totanetsi itsanë pijavacuenia, jai Jesús fariseovijavabelia.

<sup>10</sup> Nexata Jesús pijajivi jumaitsi Jesúsjavabelia:  
—Itsa bajarapacuenia pebi apo tocopatsitsi itaxutojema pijava pexuabinexa, nexata meta baja apo benacojiobi, jai Jesús pijajivi.

<sup>11</sup> Jesús nexata jumaitsi pijajivijavabelia:

—Daxitajivi apo nejumeyapëtae tsane xua yabara jumaitsinë. Itsiata nejumeyapëtaena pamonaē Dioso jamatabëcueneyavenonatsi.

<sup>12</sup> Apo caejamatabëcuene raja xua yabara pebijivi apo nacojiobi. Itsamonae penabejenaenë naexana. Nexata apo caējëpaetsi penacojiobijava. Itsamonae jivi pejamatabëcueneta bepenabejenaenëcuenia exanatsi. Nexata apo caējëpaetsi penacojiobijava. Itsamonae ëDioso pijacuene petonacuenebinexa, apo nacojiobi. Nexata ponë jamatabëcuenecaējëpatsi nacojiobinejeva peponaponaenexa ëDioso pijacuene petonacuenebinexa, bajaraponë nejumecovënëtsi, jai Jesús pijajivijavabelia.

*Pacuenia Jesús jumaitsi pejevaxijivijavabelia yabara pelivaisi*

*(Mr 10.13-16; Lc 18.15-17)*

<sup>13</sup> Jesúsjavaberena itsamonae pejevaxijivixi tocapataponatsi Jesús pecobeta pejayatapon-aenexa. Petovajëtsinexatsinua Diosojavabelia, tocapataponatsi. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

<sup>14</sup> Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeaebinejeva, xaniavaetsia bajumecovënëta palivaisi tsipaebatsi. Nexata pamonaē jitsipa pejonejava Dioso pijanacuayabetsia, bajara pijinia

pacuenia jumeabinejeva, xaniavaetsia bejume-covënëta Dioso pejumelivaisi, jai Jesús pijajivijavabelia.

<sup>15</sup> Jesús nexata pecobeta jayatapona pejevaxi-jivixi, caejiviyo canacujitsia. Bajaraxuacujinae Jesús baja pona bajarapanacuavecua.

*Pacuenia pevëjëato, bitso pexainaenë, cuaicuai-jai Jesúsjavabelia yabara pelivaisi  
(Mr 10.17-31; Lc 18.18-30)*

<sup>16</sup> Pevëjëato pata Jesúsjavaberena. Nexata pevëjëato jumaitsi Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene, pexaniacuene, exanaenajë taxainaenexa matababi apo pevereverecaejava? jai pevëjëato.

<sup>17</sup> Jesús nexata jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. Itsiata itsa jitsipame nexainaenexa matababi apo pevereverecaejava, jumecovënëre pacuenia Dioso pejumelivaisita itoroba jivi pejumecovënëtsinexa, jai Jesús pevëjëatojavabelia.

<sup>18</sup> Nexata pevëjëato jumaitsi Jesúsjavabelia:

—¿Detsa palivaisi nexata jumecovënëtsianajë? jai.

Nexata Jesús jumaitsi pevëjëatojavabelia:

—Dioso pejumelivaisibaxutota jumaitsi mapacueniaje: “Pëtsa beyaxuabame jivitonë. Pëtsa jaitame itsava nijavavecua. Pëtsa

nacobetoxotame. Pëtsa itsamonae pexanaejava yabara najumetsënëtsiaya paebame.

<sup>19</sup> Axa yaiyataema. Ena ata yaiyataema. Asivamëre itsajivi ata pacuenia xamë nijacuata nasi-vamë,” jai Dioso pejumelivaisibaxutota, jai Jesús pevëjëatojavabelia.

<sup>20</sup> Pevëjëato nexata jumaitsi Jesúsjavabelia:

—Daxita rabaja bajarapalivaisianë jumecovënëtajë. ¿Detsa xua netosaica abaxë taexanaenexa? jai pevëjëato.

<sup>21</sup> Nexata Jesús jumaitsi pevëjëatojavabelia:

—Itsa jitsipame pepacuene nejamatabëcuenexanepanaejava, nejamatabëcuenevitsabijavanua, nexata ponare. Canajetsianame daxita xua xainame. Bajarapamatamomi tsicobetsanaename bepejiobivi. Nexata bajarapacuenia xainaename bitso nexainaejava Dioso pijanacuatatsia. Bajaraxuacujinae nepënaponaename, jai Jesús pevëjëatojavabelia.

<sup>22</sup> Nexata pevëjëato itsa jumetane bajarapacuenia Jesús pejumaitsijava, najamatabëxainaeya baja vecuapona Jesús. Tsipaji pevëjëato daxitacuene bitso pexainaenë. Nexata pevëjëato apo jamatabëjumecovënëtsi palivaisi Jesús tsipaeba.

<sup>23</sup> Nexata pevëjëato pecovëta Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Ponë bitso daxitacuene pexainaenë, tsia-yapëbejetsi bitso penajamatabëcuenecopatsinexa Dioso javabelia pecapanepaenexatsi Dioso pijanacuayabetsia.

24 Icatsia matavējēa pacajumaitsitsi. Pacuenia camello acuenebi pejonejava palutaetoitaxutovojotualia, bajara pijinia pacuenia bitso pexainaenē acuenebi tsane pejonejava Dioso pijatomarabet-sia, jai Jesús pijajivijavabelia.

25 Jesús pijajivi itsa jumetane bajara-pacuenia Jesús pejumaitsijava, bitso jamatabēcuenenabenajaca. Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexainaevi ata itsa apo panepae tsane Diosojavabelia? jai.

26 Jesús asaēya naēcota pijajivijavabelia. Jumaitsi pijajivijavabelia:

—Jivi raja apo caējēpaetsi pijacuata penacapanepaenexa Diosojavabelia. Caenē Dioso caējēpaetsi. Dioso raja caējēpaetsi daxitacuene pexanaenexa, jai Jesús pijajivijavabelia.

27 Nexata Pedro jumaitsi Jesúsjavabelia:

—Patajatuxanenē, paxanē rabaja pacopatajē daxitacuene pataxainaejavami. Nexata baja pacapēnajanavanapatsi. ¿Detsa xua meta panerajutsiana? jai Pedro Jesúsjavabelia.

28 Nexata Jesús jumaitsi pijajivijavabelia:

—Xaniajanē pacuenia pacatsipaebijitsiatsi. Pamatacabi daxitacuene pejanajava icatsia naexanaena, xanē, Daxitajivi Pematapijinēnē, ecaenajē tronovēnējavata taevetsinexa daxitajivi. Bajarapamatacabi paxamē ata, doce paponēmēbeje patanepēnajanavanapaevimē, paenaename, pacaenēmē canacujitsia, panija-tronota vajanajuaevetsinexa xua evetsianajē. Nexata paxamē paenaename jueznēcuenia



panenaneconitsiaexanaenexa pijaneconi  
 pexainaevi. Pananeconitsiaexanaename  
 Israelpijinēmi pexi, doce ponēmibeje, pemomoxi.

<sup>29</sup> Daxita pamonaē tajamatabēcueneta pueneta  
 pijabomi, pematapijivi ata, pejuyapijivi ata, paxa  
 ata, pena ata, pijava ata, pexi ata, pijairanē  
 ata, Dioso nexata bajarapamonaē rajutsianatsi  
 ayaijava bitso pepuenetsijavanēmi matatoxenetsi.  
 Caejavayomijamatabēcuene tsaponae, rajut-  
 sianatsi cien xuabeje tsaponae pevajēnaeyabelia.  
 Rajutsianatsinua matakabi apo pevereverecea-  
 java.

<sup>30</sup> Pamonaē aeconoxae mapamatacabitaje  
 ayaijamatabēcuenevi tanetsi, bajarapamonaē  
 itsamatakabi Dioso beveliajamatabēcuenevi  
 exanaenatsi. Pamonaē pijinia mapamatacabitaje  
 beveliajamatabēcuenevi tanetsi, bajarapamonaē  
 itsamatakabi Dioso ayaijamatabēcuenevi  
 exanaenatsi, jai Jesús pijajivijavabelia.

## 20

*Pacuenia Jesús livaisi tsipaeba pabi pexinaenē  
 petonacuenebivitsi najēpaeya pematamotsijava pe-  
 livaisicuenia yabara pelivaisi*

<sup>1</sup> Icatsia Jesús jumaitsi pijajivijavabelia:

—Aeconoxae Dioso pejumelivaisi  
 comparacióncuenia pacatsipaebianatsi  
 patanejumeyapētaenexamē. Dioso pijajivi  
 pematamotsijava pijanacuatatsia, jēpa  
 mapalivaisije. Pabixaneto pexinaenē ponapona.  
 Ajena matakabi tsarucaponaē, naropota jivi

pejaitsinē petonacuenebinexatsi uvavēnējava peubipabita.

<sup>2</sup> Caxitajarabaxuaba baja nexata jivi. Junata petonacuenebinexatsi. Caematacabi matamotsi-apaeba caedenario. Jejai nexata bajarapamonae. Nexata itoroba pijapabiabelia petonacuenebinexatsi.

<sup>3</sup> Bajaraxuacujinae juameto baja tajē itsa ru-caina, a las nueve, naropota icatsia. Taenuba tomara tuatuajēta pebijivi, saya jema pejinavana-paevi.

<sup>4</sup> Nexata jumaitsi bajarapamonaejavabelia: “Paxamē ata paponaremelia tajapabiabelia. Panetonacuenebianame. Pacamatamotsianatsi raja xaniavaetsia,” jai pabixainaenē.

<sup>5</sup> Nexata bajarapamonae ata ponalia petonacuenebinexatsi. Bajaraxuacujinae, matonejeepatota, junata icatsia itsamonae. Bajarapamonae ata ponalia petonacuenebinexatsi. Bajaraxuacujinae, bejamatabēcuene a las tres, junata icatsia itsamonae. Bajarapamonae ata ponalia petonacuenebinexatsi.

<sup>6</sup> Bajaraxuacujinae, caniviyo, bejamatabēcuene a las cinco, pabixainaenē icatsia pona tomara tuatuajēareca. Caxitajarabaxuaba icatsia pebijivi, saya jema pejinavanapaevi. Nexata pabixainaenē jumaitsi bajarapamonaejavabelia: “¿Detsa xuajitsia saya daxitamatacabi pajinavanapame panacuenebinejevamē?” jai.

<sup>7</sup> Nexata bajarapamonae jumaitsi: “Tsipaji itsajivi ata apo panejunatsi pata-tonacuenebinexa,” jai. Nexata pabixainaenē jumaitsi: “Paxamē ata paponaremelia

tajapabiabelia patanetonacuenebinexamë. Pacamatamotsianatsi raja xaniavaetsia,” jai pabixainaenë. Nexata bajarapamonae jejai. Ponalia petonacuenebinexatsi.

<sup>8</sup> Nexata baja juameto itsa tabujuniya, pabixainaenë jumaitsi pijajivitonëjavabelia: “Junare baja tanetonacuenebivi. Matamobare baja. Copiaya matamobare pamonaepapacotocaevi pejonevi. Pamonaepapacopiaya pejonevi coto-caevi matamobianame,” jai pabixainaenë pijajivitonëjavabelia.

<sup>9</sup> Nexata pamonaepapacotocaevi junua a las cinco penacuenebinexa, parena pematamobinexatsi. Nexata caenë canacujitsia matamobatsi caedenario.

<sup>10</sup> Nexata daxita pamonaebajayacunua pepacopiaya junua penacuenebinexa, pepacotocaevi juya parena pematamobinexatsi. Nexata bajarapamonae jamatabëjumaitsi: “Caedenario meta pematatsënëa vaxaitsi nacamatamobiana. Tsipajicopiaya vaxaitsi junuatsi vajanacuenebinexa,” jamatabëjai bajarapamonae. Itsiata bailsi jane bajarapamonae ata, caenë canacujitsia, matamobatsi caedenario tsaponae.

<sup>11</sup> Nexata bajarapamonae penacuenebimatamo baja itsa nota, baraanaepana pabixainaenëjavabelia.

<sup>12</sup> Jumaitsi bajarapamonae: “Mapamonae coto-caevi pepatsivi, nacueneba saya caehora. Paxanë baja rovia ayaicuenia panacuenebajë. Icotia dexitamatacabi panetsajava. Itsiata mapamonae matamobame pacuenia panematamobame,” jai bajarapamonae.

13 Itsiata baitsi jane pabixainaenë jumaitsi bajara pamonaeyajuvënënëjavabelia: “Itsacuenejavayo ata pibisiacuene apo pacaexanaetsi. Patacajunatsijavata patanetonacuenebinexamë, caedenario pacatsipaebatsi patacamatamotsinexa patanetonacuenebimatamomë. Nexata baja bajarapacuenia pacarajutatsi.

14 Panijamatamo baja papitame. Paponare baja panijabonëjavabelia. Pamona cotocaevi junua tanetonacuenebinexa, bajarapamonaeta matamobajë pacuenia pacamatamobatsi. Bajara-pacuenia matamobajë pacuenia xanë jitsipajë.

15 Tajapalataxae, netoxanepana pacuenia jitsipajë tarajutsinexa. ¿Pacobecaëbame tsaja bajarapamonaeta ayaijava tarajutsixae? jai pabixainaenë petonacuenebivitsi yajuvënënëjavabelia.

16 Bajara pijinia pacuenia Dioso ata, pacuenia jitsipa, exanaena pijajivijavabelia. Pamonaeta mapanacuata ayaijamatabëcuenevi tanetsi, bajarapamonaeta itsamatacabi Dioso beveliajamatabëcuenevi exanaenatsi. Pamonaeta pijinia mapanacuata beveliajamatabëcuenevi tanetsi, bajarapamonaeta itsamatacabi Dioso ayaijamatabëcuenevi exanaenatsi. Bajarapacuenia Dioso exanaeta tsipaji picani jivi ayaiBITSaëtoXaneto Dioso junata. Itsiata bajarapamonaeyajuvënëvi, caejiviyobeje saya, Dioso jumecovënëta, jai Jesús pijajivijavabelia.

*Pacuenia icatsia Jesús tajëvelia navajunupaeba  
pebeyaxuabijavanexatsi yabara pelivaisi  
(Mr 10.32-34; Lc 18.31-34)*

17 Jesús pona Jerusalén tomarabelia. Nexata Jesús, pijajivi ayaibitsaëto yajava, najetaruca namutua, itsamonae yajava. Nexata bajarapamonaevecua ëpijajivi, doce ponëbeje, Jesús junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

18 —Panejumetaema. Mara Jerusalén tomarabelia ponatsije. Bajarajotalia xanë, Daxitajivi Pematapijinënë, tanevaetabinexa necanajetsiana sacerdotevi penamatacaitorobivi pecobeyabelia. Necanajetsiana judíovi pecujarubivi pecobeyabelia ata. Nexata xanë neneconitsiana tanebeyaxuabinexa.

19 Bajaraxuacujinae icatsia necanajetsiana itsanacuaverena pepatsivi pecobeyabelia. Bajarapamonae necanecaponaena. Nejumatitibabena penaneconitsivi pejumaconitabiabimacata. Bajaraxuacujinae cruzajavabelia necobematabiabarutsiana tatëpaenexa. Itsiata baitsi jane tanebeyaxuabicujinae, acueyabi matabita, icatsia asaënë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

*Pacuenia Santiagobeje Juanbeje pena vajëta Jesúsjavabelia pexaniacuene petoexanaenexatsi yabara pelivaisi  
(Mr 10.35-45)*

20 Santiagobeje Juanbeje paxa pevënë Zebedeo. Nexata bajaraponëbeje pena barëliatsibeje

Jesúsjavabelia. Bजारapova pematatabacabëta nucajunua Jesús pitabarata. Vajëta pexaniacuene petoexanaenexatsi.

<sup>21</sup> Nexata Jesús jumaitsi bajarapovajavabelia:

—¿Detsa pitsicuene jitsipame tacatoexanaenexa? jai Jesús.

Nexata bajarapova jumaitsi Jesúsjavabelia:

—Pamatacabi daxitacuene evetsianame, tocopatsianame taxënatobeje nemuxuneneta penaecaenexabeje panenajuaevetsinexa. Itsanë tocopatsianame necujanenia peecaenexa. Itsanë tocopatsianame netsavenonenia peecaenexa, jai bajarapova Jesúsjavabelia.

<sup>22</sup> Nexata Jesús jumaitsi Santiagobeje Juanbejejavabelia:

—Paxamëbeje apo payapëtaemëbeje xua pavajëcaeyaexanamebeje ena xanëjavaberena. ¿Pacacajëpabeje tsaja panenacaevetsinexabeje papecabeyiobiaexanaenexabeje pacuenia xanë nacaevetsianajë tanebejiobiaexanaenexa? ¿Pacacajëpabejenua tsaja panenacaevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús Santiagobeje Juanbejejavabelia.

Nexata Santiagobeje Juanbeje jumaitsibeje:

—Jãjã, panecaëjëpabeje cajena, jaiibeje.

<sup>23</sup> Nexata icatsia Jesús jumaitsi Santiagobeje Juanbejejavabelia:

—Paxaniajamëbeje rabaja. Paxamëbeje pacabeyiobiaexanaenabeje pacuenia xanë nebejiobiaexanaena. Pacabeyaxuabianabejenua pacuenia xanë nebeyaxuabiana. Itsiata baitsi jane xua panevajëtamebeje panenaecaenexabeje,

itsanë tacujanenia, itsanë tatsavenonenia, bajaraxua Dioso apo netocopatsi patacatocopatsinexabeje. Tsipaji raja taxa Dioso ëpitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

<sup>24</sup> Nexata diez ponëbeje Jesús pijajivi vënëtane pepëya bajaraxua Santiagobeje Juanbeje Jesúsjavabelia pevajëcaejavabeje. Nexata bajarapamonae jamatabëcuenebaraanaepana Santiagobeje Juanbejejavabelia.

<sup>25</sup> Nexata Jesús daxita pijajivi junata. Jesús jumaitsi pijajivijavabelia:

—Payapëtaneme rabaja pacuenia nacuaevetsivi exana. Eveta caenacua canacujitsia. Nexata nacuaevetsivi pijajivicuenia eveta pamonaë jinavanapa pevetsinacuanëjava. Nexata bajarapanacuanë pevetsivi ayaijamatabëcuenevi nataeyabiaba. Xua jamatabëitoroba pevetsinacuanëjava pejinavanapaëvi petoexanaenexatsi, ajumesaëya itorobabiaba petoexanaenexatsi.

<sup>26</sup> Pëtsa paxamë bajarapamonae cuenejëpaëya bajarapacuenia paexaname itsamonaëjavabelia. Biji rajane ponë paxamëyajuvënënë jitsipa ayaijamatabëcuenenë penaexanaenexa daxita paxamëvecua, bajaraponë daxita paxamë bepanijajivitonëcuenia bepacayavenonabiaba.

<sup>27</sup> Ponë paxamëyajuvënënë jitsipa penaexanaenexa papecanamatacaitorobinënexa, bajaraponë daxita paxamë bepanijajivitonëcuenia bepacayavenonabiaba.

<sup>28</sup> Tsipaji rabaja xanë ata, Daxitajivi Pematapijinë atanë, apo patajopaenë jivi taneyavenonaenexa. Biji rajane xanë patajopajë

tayavenonaenexa daxitajivi. Patajopajë tasi-  
vatëpaenexa jivi ayaibitsaëtoxfaneto pibisiacue  
pexanaeconomics taneconimatamotsinexa, jai  
Jesús pijajivijavabelia.

*Pacuenia Jesús itaxutoxanepanaeyaexana bitso  
pitaxutotsëcënaenëbeje, apo petaenëbeje, yabara peli-  
vaisi*

*(Mr 10.46-52; Lc 18.35-43)*

<sup>29</sup> Jesús, pijajivi yajava, pitsapa Jericó tomarave-  
cua. Nexata jivi ayaibitsaëto pënaponatsi.

<sup>30</sup> Panamutojava Jesús najetaruca, bajarapana-  
mutojavata ecabeje bitso pitaxutotsëcënaenëbeje,  
apo petaenëbeje. Nexata bajaraponëbeje itsa  
jumetanebeje bajarapanamutua imoxoyo Jesús  
penajetarucaejava, vavajaibeje tsecae.

—¡Jesús, Davidpijinë pemomomë, paneitax-  
utotsoniataemabeje! jaibeje tsecae pitaxu-  
totsëcënaenëbeje.

<sup>31</sup> Jivi picani jumeitavetatsibeje pemoyanex-  
abeje tsecae. Itsiata biji bitsoyo orijibia vava-  
jaibeje tsecae.

—¡Jesús, Davidpijinë pemomomë, paneitaxut-  
otsoniataemabeje! jaibeje tsecae Jesúsjavabelia.

<sup>32</sup> Nexata Jesús muxunanucojopa. Junata  
pitaxutotsëcënaenëbeje. Jesús jumaitsi  
bajaraponëbejavabelia:

—¿Detsa xua pajitsipamebeje patacaexanaenex-  
abeje? jai.

<sup>33</sup> Nexata bajaraponëbeje jumaitsiibeje  
Jesúsjavabelia:

—Jesús, pajitsipajëbeje pataitaxutoxanepanae-  
javabeje, jaibeje tsecae.



<sup>34</sup> Nexata Jesús itaxutotsoniatane bajaraponëbeje. Jesús itaxutojayata bajaraponëbeje. Bajarajota caecuenia bajaraponëbeje itaxutoxanepanabeje baja. Nexata bajaraponëbeje Jesús pepëta naponabeje.

## 21

*Pacuenia Jesús pata Jerusalén tomarata yabara pelivaisi*

*(Mr 11.1-11; Lc 19.28-40; Jn 12.12-19)*

<sup>1</sup> Jesús baja pijajivi barëimoxoyotanajetaruca Jerusaléntomara. Barëpata baja Betfagé tomarata. Patsutojumata nubena olivonaenë, bajarapatsutoyenepanata eca Betfagétomara. Nexata Betfagé tomarata Jesús jumaitsi pijajivitonëbejejavabelia mapacueniaje:

<sup>2</sup> —Paponarebeje mapatomarayo ecaliajejavabelia. Bajarajotalia, ajena papatsiaremeliabeje, pataenutsianamebeje burro pecëtanutsinëtsi, pexënatonëyo yajava. Paisinaenamebeje bajarapaburrobeje. Payamaëyacarenamëbeje tsane.

<sup>3</sup> “¿Detsa xuajitsia burrobeje paisinamebeje?” itsa pacajaibeje tsane itsajivi, nexata pajumaitsimëbeje tsane: “Vajatuxanenë raja namatavenona. Aeconoxae raja icatsia canaviatsiarena,” pajamëbeje tsane, jai Jesús pijajivitonëbejejavabelia.

<sup>4</sup> Bajarapacuenia Jesús itsa jumaitsi, tocopia-patatsi jane baja pacuenia Diosojumepaebinëmi profetanë bajayata tajëvelia yaquina Jesús pepat-sijavanexa yabara Jerusalén tomarata. Jerusalén

tomarata Jesús pepatsijavanexa yabara, profetanëmi bajayata peyaquinaelivaisita jumaitsi macuenuiaje:

<sup>5</sup> Pajumaitsimë tsane Jerusalén tomarapijivijavabelia: “Pataename pepo paneevetsinë paxamëjavaberena penajetarucajava. Beveliajamatabëcuenenëcuenia najetarucaena. Pejanaburroyota yapatanajetarucaena,” pajamë tsane Jerusalén tomarapijivijavabelia,

jai bajayata tajëvelia profetanëmi peyaquinaelivaisita Jerusalén tomarata Jesús pepatsijavanexa yabara.

<sup>6</sup> Nexata Jesús pijajivitonëbeje liabeje. Jume-covënëtabeje pacuenia Jesús itorobatsibeje.

<sup>7</sup> Yamaëya carenabeje burro, pexënatonëyo yajava. Nexata bajarapaburrobeje Jesús pijajivi tsijumajeba pijacama,” pajamë tsane Jerusalén tomarapijivijavabelia, jai bajayata tajëvelia profetanëmi peyaisajumavelia penaxatabijavanë. Jesús yanajetaruca burrota.

<sup>8</sup> Panamutuarena Jesús najetaruca, bajarapana-mutuarena jivi ayaibitsaëtöxaneto, pijacamisajumavelia penaxatabijavanë, Jesús pevajënaeya namutua yerequejebapona. Itsamonae naemaxërananë, pebaxu yajava, ucubaba. Nexata namutua Jesús tsivajënaeitabëtsiaya jebaponatsi yayataeya pecopiapitsinexatsi.

<sup>9</sup> Jesús penajetarucaejavata jivi ayaibitsaëtöxaneto Jesús pevajënaeya namataxainaeya najetarubena. Itsabitsaëtöxaneto Jesús pecovëya cotocaevanaje-

tarubena. Daxita bajarapamonae vavajai tsanajetarubena. Jumaitsi tsanajetarubena:

—¡Dioso yavenonaenatsi maponëje, pepo nacuaevetsinëmi Davidpijinë pemomo! ¡Dioso yavenonaenatsi maponë najetarucaje nacua pevetsinënexa Dioso pejamatabëcueneta! Nexata vaxaitsi pexaniajamatabëcuene rajutatsi Diosojavabelia, jai tsanajetarubena bajarapamonae.

<sup>10</sup> Nexata Jesús itsa pata Jerusalén tomarata, daxita Jerusalén tomarapijivi jamatabëcuenenabenajaca. Nexata nayanijoba.

—¿Detsa meta maponë najetarucaje? najai bajarapamonae.

<sup>11</sup> Nexata jivi jumaitsi:

—Jesús ra manajetarucaje, Diosojumepaebinë profetanë. Galilea nacuata pecaetomara, Nazaret tomarapijinë, jai bajarapamonae.

*Pacuenia Jesús Jerusalén tomarata templobovecua pitsapaeyaexana pecanajetabiabivi, pecomucabiabivinua, yabara pelivaisi*

*(Mr 11.15-19; Lc 19.45-48; Jn 2.13-22)*

<sup>12</sup> Jesús itsa pata Jerusalén tomarata, joneya temploboyalia. Nexata templobota Jesús tane pecanajetabiabivi, pecomuacaevinua. Nexata daxitaitsi:

—Jesús ra manajetarucaje, Diosojumepaebinë profetanë. Galilea nacuata pecaetomara, Nazaret tom bajarapamonae Jesús pitsapaeyaexana templobovecua. Palata pecambiababiabivi ata pijamesanëmi Jesús topënëyorobajaraba. Ucucu

pecanajetabiabivi ata penabiabijavanëminua topënëyorobajaraba.

<sup>13</sup> Jesús jumaitsi bajarapamonaejavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja jivi xanëjavaberena penavajëcaebo tsane,” jai Dioso pejumaitisijava Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

<sup>14</sup> Bajarajota templobota Jesús imoxoyorenatsi pitaxutotsëcënaevi, pejayujayunaevinua. Nexata Jesús bajarapamonae xanepanaeyaexana.

<sup>15</sup> Templobota nubena sacerdotevi. Nubena judíovi pecujarubivinu. Bajarapamonae taenubena Jesús pitaxutoxanepanaeyaexanaejava pitaxutotsëcënaevi. Taenubenanua Jesús pexanepanaeyaexanaejava pejayujayunaevi. Jumetaenubenanua pejevaxi templobota pevavajaijavata pejumaitisijava Jesús yabara: “¡Dioso yavenonaenatsi maponëje, pepo nacuaeavetsinëmi Davidpijinë pemomo!” pejaijava Jesús yabara. Bajaraxuata sacerdotevi baraanaepanatsi Jesús. Judíovi pecujarubivi ata baraanaepanatsi Jesús.

<sup>16</sup> Nexata bajarapamonae jumaitsi Jesúsjavabelia:

—¿Tsipaji apo jumetaemë mapapejevaxi xamë yabara pejumaitisaponaejavaje? ¿Apo necajumeitavetsi? jai.

Nexata Jesús jumaitsi bajarapamonaejavabelia:

—Jǎǎ. Jumetaniĵi picani. Itsiata apo jumeĵtavetsinē. ¿Paxamē tsipaji Dioso pejumeĵlivaĵibaxuto apo palebimē paneyapētaenexa pacuenia tajēvelia jumaitsi xanē yabara bajarapapejevaxi pevavajaiĵavanexa? Dioso pejumaitsiĵava xanēĵavaberena, tajēvelia Dioso pejumelivaĵibaxutota jumaitsi mapacueniaĵe:

Pejevaxi, mitoapaenacuetoxi ata,  
 naxēanaeyaexanaename penaxēanaejavata  
 xamēĵavaberena pecajumaitsinexa:  
 “Ayaiĵamatabēcuenenēmē bitso,”  
 pecajainexa,

ĵai Dioso pejumelivaĵibaxutota xanēĵavaberena Dioso pejumaitsiĵava. Bajaraxuata mapapejevaxiĵe jumaitsi bajarapacuenia, ĵai Jesús sacerdoteviĵavabelia, ĵudĵiovi pecuĵarubiviĵavabelia ata.

<sup>17</sup> Nexata baja Jesús bajarapamonaevēcua pona. Jerusalén tomaravecua pitsapa. Navialia Betania tomarayoĵavabelia. Nexata Jesús Betania tomarayota majita.

*Pacuenia Jesús bijataenuta higuerae piacuaiĵibixae yabara pelivaĵi*

*(Mr 11.12-14, 20-26)*

<sup>18</sup> Jesús piĵajivi Betania tomarata pebarēmajitsicujinae, meravia pitsiĵavata, bajayacunua, Jesús piĵajivi barēlia icatsia Jerusalén tomarabelia. Jesús nexata namutua penajetarucēĵavata, piĵajani.

<sup>19</sup> Jesús nexata taenuta higuerae namuto muxuneneta. Nexata Jesús imoxoyolia higuerae, pecuai itsa xaina, pexaenexa. Pecuai itsiata apo xainae higuerae. Ĕpebaxu saya tsanucāe.

Bajaraxuata nexata Jesús jumaitsi higuerañe javabelia:

—¡Xamë baja apo nacuaitsimë tsane! jai Jesús.

Bajarapacuenia Jesús pejumaitсийavata, bepijia higuerañe tēpanajereca yatabutopaya.

<sup>20</sup> Nexata Jesús pijajivi itsa tane bajaraxua, jamatabēcuenenabenajaca. Nexata Jesús pijajivi nayanijoba.

—¿Detsa pacuenia maponaē bepijia tēpanajerecaje? najai.

<sup>21</sup> Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Itsa pajamatabējumaitsimë tsipae Dioso yabara: “Dioso nejumecovēñetsiana xua vajētsianajē Diosojavabelia,” itsa pajamatabējamë tsipae, nexata paxamë ata pacacāējēpaejitsipa paneexanaenexa pacuenia exanajē mapahiguerañe javabeliaje. Itsiata ēbajarapacuenē paneexanaenexa, apo pacacāējēpae tsipae. Pematatsēñēa itsacuenē javanēnua paneexanaenexa, pacacāējēpaejitsipa. Nexata itsa pajumaitsimë tsipae mapatsutojavabelia ataje: “Natixire majotavecuaje. Pucaxanetojavabelia jopare,” itsa pajamë tsipae, pacajumecovēñetsipa. Nexata mapatsuto ataje paneitorobicuenia pacajumecovēñetsipa.

<sup>22</sup> Nexata daxitacuene xua pavajētsianame Diosojavabelia, pasivajamatabējumaitsimë tsane mapacueniaje: “Xua vajētajē Diosojavabelia, pepacuenē Dioso nejumecovēñetsiana,” pasivajamatabējamë tsane. Nexata xua pavajētsianame Diosojavabelia, Dioso pacajumecovēñetsiana, jai Jesús pijajivijavabelia.

*Pacuenia Jesús caējēpatsi daxitacuene  
pexanaenexa yabara pelivaisi*

*(Mr 11.27-33; Lc 20.1-8)*

<sup>23</sup> Jesús junua temploboyalia. Nexata templobota Jesús jivi livaisi tsipaeba. Nexata templobota Jesús imoxoyorenatsi sacerdotevi, judíovi pijaancianovi yajava. Nexata bajarapamonae jumaitsi Jesúsjavabelia:

—¿Jipatsa pejamatabēcueneta pecanajetabiabivi, pecomuacaevinua, capitsapame mapatemplobopanabovecuaje? jai bajarapamonae Jesúsjavabelia.

<sup>24</sup> Nexata Jesús jumaitsi bajarapamonaejavabelia:

—Xanē copiaya caejumeyo pacayanijobianatsi. Itsa paxamē panejumecanaviatsianame, nexata xanē juya pacatsipaebianatsi ponē nitoroba taexanaenexa bajarapacuene.

<sup>25</sup> ¿Jipatsa jane pejamatabēcueneta Juanpijinē jivi bautisabaponapona? ¿Dioso tsaja pejamatabēcueneta? Itsa jume, ¿jivi tsaja pejamatabēcueneta? jai Jesús bajarapamonaejavabelia.

Nexata epamonae nabarēcuaicuajiai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabēcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovēnētsimē Juanpijinē pepaebilivaisi?” nacajai tsipae.

<sup>26</sup> “Jivi raja saya pejamatabēcueneta Juanpijinē jivi bautisabaponapona,” itsa jai tsipaetsi, nexata jivi belia nacabeyejebijitsipa. Bajarapacue-

nia nacabeyejebijitsipa tsipaji raja Juanpijinē yabara daxitajivi sivajamatabējumaitsi: “Juanpijinē raja pepacuene Diosojumepaebinēmi,” siva-jamatabējai, najai sacerdotevi, judíovi pijaancianovi yajava.

<sup>27</sup> Nexata saya bajarapamonae jumaitsi Jesúsjavabelia:

—Apo payapētaenē ponē Juanpijinē itorobatsi jivi pēbautisabaponaenexa, jai.

Nexata Jesús jumaitsi bajarapamonaejavabelia:

—Nexata xanē ata apo pacatsipaebi tsanetsi ponē nitoroba taexanaenexa bajarapacuene, jai Jesús.

*Pacuenia Jesús jivi livaisi tsipaeba anijanēbeje pexēnatobeje pexainaenē pelivaisicuenia yabara pelivaisi*

<sup>28</sup> Jesús icatsia jumaitsi sacerdotevijavabelia, judíovi pijaancianovijavabelia ata:

—Panejumecanaējētsianame palivaisi aeconoxae pacatsipaebijitsiatsi. Pēbi xaina anijanēbeje pexēnatobeje. Nexata pexēnatojavabelia jumaitsi: “Taxēnato, ajena netonacuenebianame tajauvacabota,” jai pexēnatojavabelia.

<sup>29</sup> Nexata bajaraponē paxajavabelia jumaitsi: “¡Jume! ¡Apo jitsipaenē tanacuenebijava! jai. Itsiata xuacujinae bajaraponē icatsia najamatabēxaina. Nexata jamatabējumaitsi: “Xanē baja rovia pibisiajamatabēcuene najamatabēxainajē. Nexata baja ponajē taxa tatonacuenebinexa,” jamatabējai. Naropota baja penacuenebinē.



<sup>30</sup> Bajaraxuacujinae pexēnatobeje pexainaenē pona icatsia itsanē pexēnatojavabelia. Bajaraponējavabelia ata jumaitsi: “Taxēnato, ajena netonacuenebianame tajauvabacabota,” jai pexēnatojavabelia. Nexata jejai itajara pexēnato. Itsiata apo ponaē.

<sup>31</sup> ¿Detsa ponē bajaraponēbejeyajuvēnēnē paxa jumecovēnēta? jai Jesús bajarapamonaējavabelia.

Nexata bajarapamonaē jumaitsi Jesúsjavabelia:

—Copiata ponē paxa itorobatsi, apo jejai ata, itsiata paxa tonacueneba, bajaraponē paxa jumecovēnēta, jai.

Nexata Jesús jumaitsi bajarapamonaējavabelia:

—Xaniajanē pacuenia pacatsipaebijitsiatsi. Bajara pijinia itsane pamonaē copabiana pibisiacuene pexanabiabijavami, pamonaē najamatabēcuenepēnēyorotsiana Diosojavabelia. Impuestomatamo gobierno pejamatabēcuene petomatamoyanijobabiabivimi ata jonena Dioso pijanacuayabetsia itsa najamatabēcuenepēnēyorota Diosojavabelia. Petiriavi palata pepitsinexa pevitota pibisiacuene pexanabiabivimi ata jonena Dioso pijanacuayabetsia itsa najamatabēcuenepēnēyorota Diosojavabelia pibisiacuene pexanabiabijavamivecua. Itsiata baitsi jane paxamē apo pajonemē tsane.

<sup>32</sup> Juanpijinē jivibautisabinē patajopa Dioso pejumelivaisi papecatsipaebinexa panenajamatabēcuene pēnēyorotsinexa pibisiacuene paneexanabiabijavavecua. Itsiata paxamē apo pajumecovēnētsimē bajarapalivaisi. Itsiata bajarapalivaisi jumecovēnēta impuestomatamo

gobierno pejamatabëcuene pematamoyani-jobabiabivi. Petiriavi palata pepitsinexa pevitota pibisiacuene pexanabiabivimi ata jumecovënëta bajarapalivaisi. Paxamë patae atamë bajarapamonae pejumecovënëtsijava, itsiata apo panajamatabëcuenepënëyorotsimë panejumecovënëtsinexa Dioso, jai Jesús bajarapamonaejavabelia.

*Pacuenia exana piagamatabëcuenebejevi, itsanë pijauvabacabo petoevetsivi, yabara pelivaisi (Mr 12.1-12; Lc 20.9-19)*

<sup>33</sup> Icatsia Jesús jumaitsi sacerdotevijavabelia, judíovi pijaancianovijavabelia ata:

—Xaniavaetsia panemuxunaevere mapalivaisije. Pijaira pexainaenë pijairata uba ayaibacaboxaneto uvavënëjava. Bajaraxuacujinae pijaira matatoyorotsia, ibopanaxanetonë mataropotsia pefaratsijavata, yacaranata. Bajarapayacaranatsijava athëbëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvacuaibarëmene pecayujucabiabijavanexa. Bajaraxuacujinae pijauvabacabo tuatuajëta exananuta piapiabotsia, penacuaitsimatacabi itsa tonaveretatsi, athëbëyo pevetabiabeacaenexa pijauvabacabo.

’Nexata bajaraponë itsamonae evetsiaexana pijauvabacabo. Uvabacabo pexainaenë jumaitsi petoevetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonë itorobiarenajë xua panetotsatsianame

tanetopitsinexa,” jai uvabacabo pexainaenë petoevetsivitsijavabelia. Nexata uvabacabo pexainaenë tajë nacuayabelia pona.

<sup>34</sup> Itsa baja uvabacabo pexainaenë yapëtane pecopiapatsijava uvacuai penaveretsimatacabi penotsinexa, nexata uvabacabo pexainaenë itoroba pijajivi. Itoroba petoevetsivitsijavabelia petsicobetsatsinexatsi.

<sup>35</sup> Nexata uvabacabo pexainaenë pijajivi uvabacabo petoevetsivitsi totaocatsi. Caenë bajarapamonaeyajuvënënë toconibabiatsi. Itsanë pepacuenē tobeyaxuabatsi. Itsanë ibotonëta totseconatsi.

<sup>36</sup> Nexata uvabacabo pexainaenë icatsia itsabit-saëto pijajivi itorobalia. Bajara icatsia pacuenia exana uvabacabo pevetsivi.

<sup>37</sup> Nexata uvabacabo pexainaenë itoroba icatsia pexënato jane baja. Uvabacabo pexainaenë jamatabëjumaitsi: “Netoyaiyataena meta taxënato,” jamatabëjai.

<sup>38</sup> Itsiata baitsi jane uvabacabo petoevetsivitsi uvabacabo pexainaenë pexënato ata apo toyaiy-ataetsi. Itsa tane uvabacabo pexainaenë pexënato, bajarapamonaē najumaitsi: “Mara ponëje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi.

<sup>39</sup> Nexata icatsia uvabacabo pexainaenë pexënato ata tovaetabatsi. Caponaliatsi bajarapauvabacabo pënëyabelia. Nexata uvabacabo pexainaenë pexënato ata bajarapacuenia icatsia tobeyaxuabatsi, jai Jesús.

40 Nexata bajarapalivaisi yabara Jesús yanijoba sacerdotevijavabelia, judíovi pijaancianovijavabelia ata. Jesús jumaitsi:

—Uvabacabo pexainaenë itsa patsiarena, ¿de tsaeta xua exanaena uvabacabo petoevetsivitsijavabelia? jai Jesús bajarapamonaejavabelia.

41 Nexata bajarapamonae jumaitsi Jesúsjavabelia:

—Pijauvabacabo raeta pexainaenë apo itaxutotsoniatae tsane. Nexata verebiabiana bajarapamonae pibisiacuene pexanaevi. Nexata icatsia itsamonae evetsiaexanaena bajarapauvabacabo. Nexata uvacuai penaveretsimatacabi bajarapamonae itsa nota, tsicobetsatsianatsi pacuenia baja tocaējētatsi uvabacabo pexainaenë perajutsinexatsi, jai bajarapamonae.

42 Nexata Jesús jumaitsi bajarapamonaejavabelia:

—Payapētaneme rabaja pacuenia Dioso pejumelivaisibaxutota tajēvelia jumaitsi xanë yabara. Iboto pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia nayaētsiana botabu daxita itsaibo matatoxenetsia. Vajatuxanenë Dioso raja exanaena bajarapacuene. Nexata bitso nacatsita pexaniacuene tsane bajarapacuene, jai tajēvelia Dioso pejumelivaisibaxutota xanë yabara.

'Bजारapacuenia tajëvelia Dioso pejume-  
livaisibaxutota itsa jumaitsi, paxamë apo  
patanejumecovënëtsijavanexamë yabara  
jumaitsi. Dioso taneitapetsijava daxitajivi  
tacapanepaenexa yabara ata jumaitsi.

<sup>43</sup> Nexata pacuenia uvabacabo pexainaenë icat-  
sia itsamonae evetsiaexanaena, bajara pijinia  
pacuenia Dioso exanaena paxamëjavabelia. Xua  
picani Dioso pacaevetsiaexana, copiarucaena.  
Nexata juya itsamonae Dioso evetsiaexanaena  
bajaraxua, pamonaе xaniavaetsia jumecovënëta  
Dioso pitorobicueniatsi.

<sup>44</sup> Pamonaе apo nejumecovënëtsi Dioso  
pexënatocuenenë, bajarapamonaе bitso  
bejamatabëjioji tsane apo tanejumecovënëtsixae.  
Pacuenia ibotojumata pefirapecaejivi, itsa  
tsapatecatsi, pevixae bitso yanabejiojita, bajara  
itsane. Pamonaе naneconitsiaexanaenajë,  
bajarapamonaе pepacuene naxuabiana  
daxitamatacabijavabelianexa. Pacuenia iboto  
pematacënëbinëtsi apo asaë, bajara itsane, jai  
Jesús bajarapamonaеjavabelia.

<sup>45</sup> Sacerdotevi penamatacaitorobivi, fariseovi  
yajava, itsa jumetane bajarapacuenia Jesús pe-  
jumaitsijava, bajarapamonaе jamatabëjumai tse-  
nae: “Vaxaitsi yabara raeta jumaitsi,” jamatabëjai  
tsenaе bajarapamonaе.

<sup>46</sup> Nexata picani bajarapamonaе Jesús  
jamatabëvaetabatsi. Itsiata bajarapamonaе  
jamatabëjumaitsi: “Bajaraponë jivi tanetsi  
Diosojumepaëbinëcuene. Nexata nacaitsacueni-  
abijitsipa vaxaitsi itsa vaetabijitsipatsi maponëje,”  
jamatabëjai tsenaе bajarapamonaе. Bajaraxuata

Jesús apo vaetabitsi.

## 22

*Pacuenia Jesús jivi livaisi tsipaeba penacasabifiesta pexanaenë pelivaisicuenia yabara pelivaisi (Lc 14.15-24)*

<sup>1-2</sup> Jesús icatsia livaisi tsipaeba sacerdotevijavabelia, judíovi pijaancianovijavabelia ata. Bajarapacuenia Jesús tsipaeba bajarapamonae peyapëtaenexa pacuenia itsamatacabi itsijitsia, pamatacabi Díoso pijajivi evetsiana. Jesús jumaitsi mapacueniaje:

–Pepo nacuaevetsinë fiesta exana pexënato petonacasabifiestanexatsi.

<sup>3</sup> Nexata nacuaevetsinë jumaitsi pijajivijavabelia: “Pamonae baja tajëvelia junatajê, patsipaebare baja tanetopatsinexarena fiestanexa jane baja,” jai nacuaevetsinë pijajivijavabelia. Pijajivi baja nexata pona petsipaebinexa. Itsiata pejunatsivi apo jitsipae peponaejava. Nexata nacuaevetsinë pijajivi naviabarena petsipaebinexa pijatuxanenëjavabelia.

<sup>4</sup> Nexata nacuaevetsinë itsamonae icatsia pijajivi itorobalia pesivaponaenexalia. Nacuaevetsinë jumaitsi pijajivijavabelia: “Pajumaitsimë tsane tajunatsivijavabelia: ‘Veretejeba rabaja panexaejavanexa. Beyaexana rabaja baca penasitsivi, becerro yajava. Daxita rabaja veretejeba panenabaninexa. Naxanitsia. Daxita pina paponeremelia,’ pajamë tsane tajunatsivijavabelia,” jai nacuaevetsinë pijajivijavabelia.

<sup>5</sup> Itsiata baitsi jane bajarapamonae icatsia sivaponae atalia, nacuaevecsine pejunatsivi apo jejai. Pejunatsiviyajuvēnēnē itsanē pona pijapabianējavabelia. Itsanē pijinia pona penavijatsinexa.

<sup>6</sup> Itsamonae nacuaevecsine pijajivi taicatsi. Bejiobiaexanatsi pibisiacuenia. Beyejebatsi baja belia.

<sup>7</sup> Bajaraxuata nexata nacuaevecsine bitso baraanaepana pejunatsivimijavabelia. Nexata nacuaevecsine itorobalia vajabitsaēvi pebenexa pamonae tobeyejebatsi pijajivi. Itorobanua pijatomaranēmi ata petotajuitsinexa.

<sup>8</sup> Bajaraxuacujinae nacuaevecsine icatsia pijajivijavabelia jumaitsi: “Daxitacuene baja picani veretejebiaexanajē taxēnato penacasabifiestanexa. Itsiata baitsi jane tajunatsivimi apo nepatsirena.

<sup>9</sup> Paponaremelia pinijcallexanetonējavabelia. Nexata daxita pamonae pacaxitajarabaponae name bajarapacallexanetonējava, pajunataponae name taxēnato penacasabifiestajavaberena pepatsinexa,” jai nacuaevecsine pijajivijavabelia.

<sup>10</sup> Nexata nacuaevecsine pijajivi ponalia. Njetarubena callexanetonējava. Junatapona daxita pamonae caxitajarabapona. Junatapona pijamatabēcuenebejevi, pejamatabēcuenexanepanaevi ata. Nexata bajarapamonae barēpona fiesta pexanaebojavabelia. Nexata pabota fiesta exana, vēnēca jivi.

<sup>11</sup> Nexata nacuaevecsine jonena bajarapaboyarena petaenexa petopatsivitsi. Daxita pamonae topatatsi, jumapata xua banaxataba itsa pona

penacasabifiestajavabelia. Nexata nacuaevetsinë taenuta bajarajota itsanë, saicayaviriajava penaxatatsinë. Apo naxatatsi xua naxataba daxita.

<sup>12</sup> Nexata nacuaevetsinë jumaitsi bajaraponëjavabelia: “¿Detsa xuajitsia najunuame apo nenaxatatsinë pacuenia daxita naxataba penacasabifiestajavaberena penajonevi?” jai nacuaevetsinë. Nexata bajaraponë moya nuca.

<sup>13</sup> Nexata nacuaevetsinë jumaitsi mesa pevet-sivijavabelia: “Maponë pataxucëreje. Pacobecëre yajava. Paxuaremelia bopënëyabelia, pitaquirijavabelia. Bajarajotalia nuena. Navonosiniana bitso penavixaetaexae,” jai nacuaevetsinë.

<sup>14</sup> Pacuenia fiesta pexanaenë ayaibitsaëtoxaneto junatsi ata, caejiviyobeje saya topatatsi, bajara pijinia itsi Dioso pejunatsivi ata. Dioso picani ayaibitsaëtoxaneto junata pijajivinexa. Itsiata saya caejiviyobeje jumecovënëtatsi, jai Jesús sacerdotevijavabelia, judíovi pijaancianovijavabelia ata.

*Pacuenia Jesús jamatabëcuenejëbiaya  
yanijobatsi impuestomatamo pematamotsijava  
yabara pelivaisi*

*(Mr 12.13-17; Lc 20.20-26)*

<sup>15</sup> Fariseovi nacaetuata penabarëcuaicuaijainexa. Bajarapamonae najamatabëcuenejëpa Jesúsjavabelia jamatabëcuenejëbiaya peyani-jobinexa. Nexata Jesús bijiaya itsa jumecanaviata, Jesús picani peneconitsinexatsi nacuaevetsinëjavabelia.

<sup>16</sup> Nexata fariseovi itoroba pijajivi, Herodes pijajivi yajava, Jesúsjavabelia jamatacuenejëbiaya



livaisi peyanijobinexa. Nexata fariseovi pija-jivi, Herodes pijajivi yajava, Jesúsjavabelia jamatabëcueneëjëbiaya jumaitsi:

—Jesús, payapëtaniji cajena nexaniajaicuene, xua yabara tsipaebabiabame livaisianë. Pexaniajaicuene tsipaebabiabame pacuenia Dioso jitsipa jivi petojinavanapaenexatsi. Petuxanevi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame.

<sup>17</sup> Panetsipaebare pacuenia najamatabëxainame mapacuene yabaraje. ¿Xanepana tsaja vajamatomotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneëjëbiaya Jesúsjavabelia.

<sup>18</sup> Itsiata baitsi jane Jesús jamatabëcuenyapëtane bajarapamonae jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—Paneyamaxëitojorobivi, ¿detsa xuaajitsia jamatabëcueneëjëbiaya paneyanijobame?

<sup>19</sup> Panetsitajëre pitsipalatanëyota pamatamotabiabame impuestomatamo, jai Jesús bajarapamonaejavabelia.

Nexata bajarapamonae Jesús tocaponarenatsi palatanëyo.

<sup>20</sup> Jesús itsa tane bajarapapalatanëyo, nexata jumaitsi bajarapamonaejavabelia:

—¿Jipatsa mapitabaraje, pevënënu, ruca mapapalatanëyojumataje? jai Jesús.

<sup>21</sup> Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënëna, jai.

Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

<sup>22</sup> Nexata Jesús xaniavaetsia itsa jumecanaviata, bajarapamonae jamatabëcuenenabenajaca bajarapacuenia Jesús pejumaitsijavata. Nexata baja copatatsi Jesús jamatabëcuenejëbiaya peyanijobijavatsi. Naviaba baja bajarapamonae.

*Pacuenia Jesús tsipaeba jivi petëpaecujinae icatsia piasaëjavanexa yabara pelivaisi*

*(Mr 12.18-27; Lc 20.27-40)*

<sup>23</sup> Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi Jesúsjavabelia jumaitsi mapacueniaje:

<sup>24</sup> —Jesús, Moiséspijinë bajayata vajanacatoyaquinaelivaisi, jumaitsi mapacueniaje: “Ponë pematapijinë pepua penacojobinë baja, totëpatsi pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi.

25 Nexata jinavanapa ënacaemonae siete ponëbeje paxanëjavata. Pepo matapijinë copiaya nacojioba. Nexata bajaraponë pijava vecuatëpa pexi xainaenejeva. Nexata pematapijinëmi pepënarucaenë pita pematapijinëmi pijavami.

26 Nexata icatsia bajaraponë ata tëpa pexi xainaenejeva bajarapovajavabelia. Nexata icatsia itsanë tuatuajëmatapijinë pita bajarapova. Bajara icatsia ponë ata tëpa pexi xainaenejeva bajarapovajavabelia. Bajarapacuenia tëpa daxita siete ponëmibeje nacaemonaemi, bajarapova pepitaponaevi. Itsiata itsanë ata pexi apo xinae bajarapovajavabelia.

27 Bajaraxuacujinae bajarapova ata tëpa baja.

28 “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë bajarapamonaeyajuvënëne pijava tsane bajarapova bajarapamatacabi? Daxita pamona siete ponëmibeje nacaemonae pitapona picani bajarapovami, jai saduceovi Jesúsjavabelia.

29 Nexata Jesús jumaitsi saduceovijavabelia:

—Paxamë saya pajamatëbëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaitsi. Apo payapëtaemëna pacuenia Dioso caëjëpatsi daxitacuene pexanaenexa. Bajaraxuata jamatabëcuenenavëxaniabiaya paneyanijobame: “¿Detsa ponë pitsiana bajarapova?” panejamë.

30 Pamatacabi raja petëpaevimi Dioso icatsia asaëyaexanaenatsi, apo nacojiobi baja tsane. Bajarapamatacabita itsajivi ata pexënatoyo apo canajetsi tsane pebijavabelia petonacojobinexatsi. Bajarapamona

nacojobinejeva, jinavanapaena athëbëtatsia pacuenia ángelevi jinavanapa.

<sup>31</sup> Itsa pepacuene paxamë xaniavaetsia paneyanijobame paneyapëtaenexa Dioso icatsia piasaëyaexanaejavanexatsi petëpaevimi, nexata pacatsipaebianatsi. Paxamë rabaja payapëtaneme pacuenia bajayata Dioso jumaitsi. Abraham baja pepuatëpae, Isaac ata baja pepuatëpae, Santiago ata baja pepuatëpae, bajarapamonae yabara bajayata Dioso jumaitsi Moiséspijinëjavabelia mapacueniaje:

<sup>32</sup> “Xanë rabaja abaxë Abraham pijaDiosonë. Isaac ata pijaDiosonë. Jacob ata pijaDiosonë,” jai baja cajena Dioso bajayata petëpaevimi yabara. Bajarapacuenia Dioso pejumaitsixae, nayapëtane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athëbëtatsia, jai Jesús saduceovijavabelia.

<sup>33</sup> Jivi ayaibitsaëtoxaneto itsa jumetane bajarapacuenia Jesús pejumaitzijava saduceovijavabelia, jivi bitso jamatabëcuenenabenajaca Jesús petsipaebilivaisi yabara.

*Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia yabara pelivaisi*

*(Mr 12.28-34)*

<sup>34</sup> Saduceovi Jesús peyanijobijumetsi, xaniavaetsia Jesús jumecanaviata. Nexata baja moya saduceovi. Nexata fariseovi itsa vënëtane saduceovijavabelia Jesús xaniavaetsia pejumecanaviatsijava, nexata fariseovi

nacaetuata penabarëcuaicuajainexa. Nexata fariseovi najumejaita pacuenia yanijobijitsia Jesúsjavabelia.

<sup>35</sup> Nexata fariseoviyajuvënënë, judíovi pecujarubinë, Jesúsjavabelia jamatabëcueneējëbiaya yanijoba. Jumaitsi Jesúsjavabelia mapacueniaje:

<sup>36</sup> —Jesús, ¿detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

<sup>37-38</sup> Jesús nexata jumaitsi judíovi pecujarubinëjavabelia:

—Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia, jumaitsi mapacueniaje: “Pasivamëre panijatuxanenë panijaDioso daxita panejamatabëëthëtojavavetsina, daxita panejamatabëcueneta ata, daxita panenajamatabëxainaesaëta ata,” jai. Bajarapalivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia.

<sup>39</sup> Bajaraxuacujinae pecotocaevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panasivamë,” jai. Bajarapalivaisi ata jivi bitso bejumecovënëta.

<sup>40</sup> Pajivi jumecovënëta bajarapalivaisibeje, Dioso baja tanetsi pejumecovënëtsijivicuene daxita Dioso pitorobilivaisianë. Nexata palivaisi ata bajayata Dioso Moiséspijinëta najumecopata, bajarapalivaisi ata pejumecovënëtsijivicuene Dioso tanetsi. Diosojumepaebivimi profetavi ata palivaisianë bajayata tsipaeba, bajarapalivaisi

ata pejumecovënëtsijivicuene Dioso tanetsi, jai Jesús judíovi pecujarubinëjavabelia.

*Pacuenia Jesucristo yabara Davidpijinë bajayata tajëvelia: “Tajatuxanenë,” jai, yabara pelivaisi (Mr 12.35-37; Lc 20.41-44)*

<sup>41</sup> Fariseovi penacaetuatsijavata, fariseovijavabelia Jesús pijacuata nayabarajumaitsi mapacueniaje:

<sup>42</sup> —¿Detsa pacuenia pasivanajamatabëxainaname Cristo itsa patsianica? ¿Jipatsa pexënato tsane? nayabarajai Jesús pijacuata fariseovijavabelia.

Nexata fariseovi jumaitsi Jesúsjavabelia:

—Davidpijinë pemomo tsane, jai.

<sup>43</sup> Nexata Jesús jumaitsi fariseovijavabelia:

—Pajamatabëcuenenavëxaniabame raja. Cristo raja Dioso pexënato. Bajayata Dioso pejumaitsi-  
java Cristo yabara, Davidpijinë Espíritu Santo pe-  
jamatabëcueneta tajëvelia jumaitsi mapacueniaje:

<sup>44</sup> Dioso jumaitsi tajatuxanenëjavabelia:

“Ecare abaxë tacujuanenia. Vecatsivajënae jume-  
covënëtsiaexanaenatsi abaxë copiaya nijava-  
jabitsaë nitorobicuenianexa,” jai Dioso ta-  
jatuxanenëjavabelia,

jai bajayata tajëvelia Davidpijinë mapacueniaje  
Cristo yabara.

<sup>45</sup> Nexata Davidpijinë bajayata Cristo yabara:  
“Tajatuxanenë,” itsa jai, nexata Cristo, Davidpi-  
jinë apo pemomo. Tsipaji baja cajena saicaya  
Cristo Dioso pexënato, nayabarajai Jesús pijacu-  
ata fariseovijavabelia fariseovi pecanaëjëtsinexa  
Cristo Dioso pexënatocuene.

46 Nexata itsanë ata fariseoviyajuvënënë Jesús apo jumepitsitsi caejumeyo ata. Bajaraxu-acujinae fariseovi, saduceovi ata, cujunava Jesúsjavabelia baja jamatabëcuenejëbiaya livaisi peyanijobijava.

## 23

*Pacuenia Jesús tsipaeba fariseovijavabelia, judíovi pecujarubivijavabelia ata, bajarapamonae penaneconitsijava Diosojavabelia yabara pelivaisi (Mr 12.38-40; Lc 11.37-54; 20.45-47)*

<sup>1</sup> Jesús jumaitsi jivi ayaibitsaëtojavabelia, pijajivijavabelia ata:

<sup>2</sup> —Judíovi pecujarubivi, fariseovi ata, Dioso tocopatatsi jivi xaniavaetsia peyapëtaeyaexanaponaenexa pajamatabëcuenelivaisi xaina Dioso Moiséspijinëta penajumecopatsilivaisimi.

<sup>3</sup> Nexata pajumecovënëtsianame daxita pacuenia bajarapamonae pacatsipaebapona. Itsiata baitsi jane pëtsa paexaname pacuenia bajarapamonae exanavanapa. Tsipaji xua bajarapamonae pacaitaveta paxamë paneexanaeyaniva, bajaraxua itsiata bajarapamonae exanabiaba.

<sup>4</sup> Palivaisianë ayapëbeje itsajivi ata pejumecovënëtsinexa, bajarapalivaisianë pacatsipaebabiaba panejumecovënëtsinexa. Pamonaе bajarapacuenia pacatsipaeba, itsanë ata bajarapamonae yajuvënënë apo jamatabënajinae pexanaenexa bajarapacuenia.

<sup>5</sup> Daxita xua bajarapamonae exana, exanabiaba saya jivi petaenexatsi. Bajarapamonae jamatabëjumai tsabiabi: “Bajaraxua itsa

exanaenatsi, jivi nacayaiyataena,” jamatabējai tsabiabi. Bajarapamonae pitapata, pecofiata ata, becajonixicuenia pexanaejavaxita yacajonia cēbarubejebabiaba Diosojumelivaisi peyaquinaebaxutoxi. Bajarapamonae itsamonae matatoxenetsia piajumanavaitabēnexa, piapiafleco pijanavatabuyalia cēbarubabiaba. Bajarapacuenia bitso jitsipabiaba pexanabiabinexa.

<sup>6</sup> Bajarapamonae itsa najunatatsi fiestajavabelia penanabaninexa, nexata jitsipabiaba penaenexa pexaniaviriajavanēta. Nexata natsiitapetabiaba penaenexa peyaiyataevitsi penaenexa petsinubijavanēta. Bajarapamonae itsa najoneyabiaba judíovi penacaetuatabiabi-bota, jitsipabiaba penaenexa peyaiyataevitsi penaenexa petsinubijavanēta.

<sup>7</sup> Bajarapamonae bitso jitsipabiaba jivi pebajacobinexatsi yaiyataeya callejava ata. “Patanecujarubinē,” pejajjavatsi ata, bitso jitsipabiaba, jai Jesús mapacueniaje fariseovi yabara, judíovi pecujarubivi ata yabara.

<sup>8</sup> Icatsia Jesús jumaitsi jivi ayaibit-saētoxfanetjavabelia, pijajivijavabelia ata:

—Pētsa paxamē pajitsipame jivi papecajumaitsinexa paxamējavabelia: “Patanecujarubinē,” papecajainexa. Tsipaji daxita paxamē bepanacaemonaemē Dioso panejume-covēnētsivixae. Xanē, caenēnē Cristonē, athēbēvetsica Dioso taneitorobinētsica jivi tacapanepaenexa, panexainame patacacujarubinēnexa.

<sup>9</sup> Itsanē itsa pacacujaruba, “Axa,” pajamē pētsa bajaraponējavabelia. Tsipaji caenē paneaxa pax-



ainame, ponë eca athëbëtatsia.

<sup>10</sup> Pëtsa pajitsipame itsamonae papecaju-maitsinexa: “Jivi pevetsinë,” papecajainexa. Tsipaji xanë, caenënë Cristonë, patacaevetsinë.

<sup>11</sup> Ponë paxamëyajuvënë pacavecuayaijamatabëcuenenë, bajaraponë pacayavenonabiaba padaxitamë.

<sup>12</sup> Pajivi daxitajivi matatoxenetsia pijacuata ayaijamatabëcuenejivi natane, bajarapajivi itsamatacabi daxitajivivecua beveliajamatabëcuenejivi Dioso exanaenatsi. Pajivi pijinia daxitajivivecua pijacuata beveliajamatabëcuenejivi natane, bajarapajivi itsamatacabi daxitajivi matatoxenetsia ayaijamatabëcuenejivi Dioso exanaenatsi, jai Jesús jivi ayaibitsaëtojanetojavabelia, pijajivijavabelia ata.

<sup>13</sup> Jesús icatsia jumaitsi fariseovijavabelia, judíovi pecujarubivijavabelia ata:

—¡Paxamë saya jivi paneyamaxëitojorobivi!  
¡Paxamë judíovi panecujarubivi, pa-fariseovimënu, ayaineconi panatsixainame Diosojavabelia! Pacuenia bo babaupaxatata jivi pejoneyaniva, bajara bepacuenia paxamë paexaname. Itsamonae jitsipae ata pejonenexa Dioso pijanacuayabetsia, apo pacopatsimë pejonenexa saicayalivaisi panecujarubixae. Paxamë ata apo pajitsipaemë panejonenexa Dioso pijanacuayabetsia.

<sup>14</sup> ¡Paxamë saya jivi paneyamaxëitojorobivi!  
¡Paxamë judíovi panecujarubivi, pa-fariseovimënu, ayaineconi panatsixainame

Diosojavabelia! Yamaxëitojorobiaya pavecuantotabiabame pamonajivi pevecuatëpaevanëtsi pecobecovëjavaximi. Bajaraxuacujinae pini-jicuenia itajara Diosojavabelia pavajëcabiabame. Itsiata pepo panexaniajaijamatabëcueneta apo pavajëcabiabimë Diosojavabelia. Bajarapacuenia pavajëcabiabame saya jivi papecataenexa Dioso itajara bitso bepanejumecovënëtsivi. Bajaraxuata bitso ayaicuenia Dioso pacananeconitsiaexanaena pamatacabi Dioso naneconitsiaexanaena daxita pamonae Dioso apo pejumecovënëtsivi.

15 'iPaxamë saya jivi paneyamaxëitojorobivi! iPaxamë judíovi panecujarubivi, pafariseovimënuua, ayaineconi panatsixainame Diosojavabelia! Palivaisi pacajinavanapame, caejivi ata panejumecovënëtsiaexanaenexa, papecacuenejëpaenexanua, ayaicuenia daxitajava jivi patsipaebarutame. Nexata pajivi pacajumecovënëta, bajarapajivi pevajënaeyabelia bitso naneconitapona Diosojavabelia. Nexata paxamë panejamatabëcueneta bajarapajivi paxamë matatoxenetsia bitso Dioso naneconitsiaexanaenatsi pexuabinexatsi infiernojavabelia.

16 'iPaxamë apo payapëtae atamë, Dioso pejumelivaisi jamatabëcuenenavëxaniabiaya pacujarubabiabame itsamonae! Nexata paxamë panecujarubijamatabëcueneta bajarapamonae pananeconitsiaexaname Diosojavabelia. iBajaraxuata ayaineconi panatsixainame Diosojavabelia! Paxamë jivijavabelia jamatabëcuenenavëxaniabiaya pajumaitsimë tsabiabi: "Pajivi itsanëjavabelia najumecapanepaeya jumaitsi pejumexani-

ataenexatsi: ‘Catoexanaenatsi pepacuene. Cajumaitsitsi cajena templobo pevënëta,’ jai, apo itsacuene. Bajarapajivi pejumaitsicovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi rajane itsanëjavabelia jumaitsi pejumexaniataenexatsi: ‘Catoexanaenatsi pepacuene. Cajumaitsitsi cajena templobopijiorojavanë pevënëta,’ jai, bajara jane xua abeje. Nexata bajarapajivi exanae pejumaitsicovëya penaneconitsiyaniva Diosojavabelia,” pajamë tsabiabi jivijavabelia.

<sup>17</sup> Pajamatabëcuenenavëxaniabame raja saya bajarapacuenia itsa pajumaitsimë. Biji rajane templobo beyaiyatanetsi bajarapatemplobopijiorojavanë matatoxenetsia. Bajarapaorojavanë ata yayatanetsi. Tsipaji bajarapaorojavanë templobopijiorojavanë.

<sup>18</sup> Jamatabëcuenenavëxaniabiaya pajumaitsimë tsabiabinua: “Pajivi itsanëjavabelia najumecapanepaeya jumaitsi pejumexaniataenexatsi: ‘Catoexanaenatsi pepacuene. Cajumaitsitsi altarvënëjava pevënëta,’ jai, apo itsacuene. Bajarapajivi pejumaitsicovëya apo exanae ata, itsiata apo naneconitsi Diosojavabelia,” pajamë tsabiabi. “Pajivi rajane pejumexaniataenexatsi itsanëjavabelia jumaitsi: ‘Catoexanaenatsi pepacuene. Cajumaitsitsi altarvënëjavajumata pebuatsiofrenda pevënëta,’ jai, bajara jane xua abeje. Nexata bajarapajivi pepacuene exanae pejumaitsicovëya penaneconitsiyaniva Diosojavabelia,” pajamë tsabiabinua jivijavabelia.

<sup>19</sup> Paneamatabocotajavi, bepanei-

tatsēcēnavanapaevinua panejamatabēēthētota. Biji rajane beyaiyatanetsi altarpvēnējāva, bajarapaaltarpvēnējāvajumata pebuatsiofrenda matatoxenetsia. Bajarapaofrenda ata yaiyatanetsi. Tsipaji altarpvēnējāvajumata boca.

<sup>20</sup> Pajivi jumaitsi: “Cajumaitsitsi altarpvēnējāva pevēnēta,” jai, caecuenia yajavavēnējona bajarapaaltarpvēnējāvajumata pebocaeofrenda.

<sup>21</sup> Pajivi pijinia najumecapanepaeya jumaitsi pejumexaniataenexatsi: “Cajumaitsitsi templobo pevēnēta,” jai, caecuenia yajavavēnējona bajarapateplobota peponaponaenē Dioso.

<sup>22</sup> Pajivi pijinia najumecapanepaeya jumaitsi pejumexaniataenexatsi: “Cajumaitsitsi athēbētatsia panacua pevēnēta,” jai, caecuenia yajavavēnējona Dioso pijatrono. Caecuenia yajavavēnējonanua Dioso, ponē ecabiaba bajarapatronota pitorobabiabinexa pijajivi.

<sup>23</sup> ¡Paxamē jivi paneyamaxēitojorobivi! ¡Paxamē judíovi panecujarubivi, pafariseovimēnua, ayaineconi panatsixainame Diosojavabelia! Panenacanabijava diez xuabejeyajuvēnējāva, caejavayo, parajutabiabame ofrendacuenia Diosojavabelia. Daxitaviria paneubijavaxi ata, diez xuabejeyajuvēnējāva, caejavayo, parajutabiabame ofrendacuenia Diosojavabelia. Bajarapacuenia parajutabiabi atamē, apo pajumecovēnētsimē itsalivaisianē, Dioso papecatonajumecopatsilivaisianē, palivaisianē picani bitso Dioso pacatojitsipa panejumecovēnētsinexa. Bajarapalivaisianē picani pacaitoroba itsamonaejavabelia pexaniacuene panetoexanabiabinexa. Pacaitorobanua picani

paneitaxutotsoniataeyabiabinexa itsamonae  
ata. Pacaitorobanua picani xaniavaetsia  
panenajamatabëcuenecopatsinexa Diosojavabelia.  
Bajarapacuenia picani bepaexanavanapame  
pacopatsinejevamë bajaraxua, ofrendacuenia  
panerajutabiabijava Diosojavabelia.

<sup>24</sup> ¡Paxamë apo payapëtae atamë Dioso  
pejumelivaisi, jamatabëcuenenavëxaniabiaya  
pacujarubabiabame itsamonae! Palivaisianë  
Dioso najumecopata panejumecovënëtsinexa,  
bajarapalivaisianë yajuvënëlivaisixi, saya  
beveliajamatabëcuenelivaisixi, pacaasaëmë  
tsavanapae. Palivaisianë picani Dioso bitso  
pacatojitsipa panejumecovënëtsinexa, caranata  
panamuxujematame. Nexata panecujarubivi  
panecujarubicuenia pexanavanapaexae, panecu-  
jarubivi ata naneconita Diosojavabelia pacuenia  
paxamë pananeconitame Diosojavabelia.

<sup>25</sup> ¡Paxamë jivi paneyamaxëtojobivi! ¡Paxamë  
judíovi panecujarubivi, pafariseovimënu,  
ayaineconi panatsixainame Diosojavabelia!  
“Najamatabëcuenebijianaejitsipajë Diosojavabelia,”  
panejamatabëjait sabiabixae, panecaxaevajënae  
panecaxaenëanë, taza ata, naniavelia paquiatabi-  
abame xaniavaetsia panijasalinaicuenia.  
Tsipaji jamatabëcuenenavëxaniabiaya paja-  
matabëjumaitsimë tsabiabi: “Itsa caxaejitsipajë  
xaniavaetsia quiatsinejevanë, Diosojavabelia  
naneconitsipajë,” pajamatabëjamë tsabiabi.  
Itsiata baitsi jane panejamatabëëthëtota bëpënëa  
panajamatabëxainabiabame pibisiacuene. Pana-  
jamatabëxainabiabame itsanë pecobecovë paney-  
acajërëtsinexa. Panajamatabëxainabiabamenua

panexainaenexa ayaijava ëpaxamënexa.

<sup>26</sup> Paxamë pafariseovimë, bepaneitaxu-totsëcënaevi panejamatabëëthëtota. Pajivi quiata pecaxaenë, taza yajava, piaxuirajibinexa, copiaya xaniavaetsia quiata pënëvelia. Bjaraxuacujinae xaniavaetsia quiata pejumavelia. Bajara pijinia pacuenia paxamë ata copiaya Dioso pacajamatabëcuenequiatsi panejamatabëcuenexuirajibinexa. Nexata bjaraxuacujinae pacajamatabëcuenecaëjëpaena paneexanaenexa ëpexaniacuene pacuenia Dioso pacaitoroba.

<sup>27</sup> 'iPaxamë saya jivi paneyamaxëitojorobivi! iPaxamë judíovi panecujarubivi, pafariseovimënuua, ayaineconi panatsixainame Diosojavabelia! Itsajota jivimëthëanë bobena, jivimëthëanëjumavereca itsamonae caiquina peniojairata bjarapacuenia pitabëtsinexa. Itsiata baitsi jane bëpënëareca petëpaevimi petsabanaejava, pesi yajava, abeje. Bjaraxua apo jitsipaetsi vajajayatsinexa. Bajara pijinia paxamë ata Dioso patsitajamatabëcueneitsimë.

<sup>28</sup> Itsamonae naniavelia itsa pacatane, pacatane bepapexaniajamatabëcuenevimë itajara. Itsiata baitsi jane panejamatabëëthëtota bëpënëa panajamatabëxainabiabame jivi paneyamaxëitojorobinexa. Itsajava ata pematatsënëa pibisiacuene paneexanaenexa, panajamatabëxainabiabame.

<sup>29</sup> 'iPaxamë saya jivi paneyamaxëitojorobivi! iPaxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Bajayata panijasalinaivi Diosojumepaebivimi profetavi beyejeba.

Nexata mëthëca. Nexata mapamatacabitaje bajarapaprofetavimi pemëthëanëjumavereca bo paexanabiabame itabëtsiaya, jivi itsa tane, penajamatabënapitabiabinexa bajarapaprofetavimi. Pamonaemi ata bajayata tëpa, pamonae aneconijibia pejinavanapaevimi Dioso pitabarata, pemëthëanëjumavereca aeconoxae mapamatacabitaje itabëtsiaya parubabiabame itsacuenejavaxi.

<sup>30</sup> Bajarapacuenia itabëtsiaya paneexanaecujinae, jivijavabelia pajumaitsimë tsabiabi mapacueniaje: “Vajasalinaivimi bajayata pibisiacuene exana. Beyaxuababiaba profetavimi. Paxanë bajarapamatacabi pajinavanapae atanë tsipae, apo payavenonaenë tsipae bajarapamonaemi pebeyabiabijava profetavimi,” pajamë tsabiabi.

<sup>31</sup> “Vajasalinaivimi beyaxuababiaba profetavimi,” panejaixae, panavajunupaebame papemomoxicuenemë bajayata pamonaemi beyaxuababiaba profetavimi. Bajarapamonaemi papemomoxixaemë, pacuenia bajarapamonaemi jamatabëcueneitsi, bajara paxamë ata pajamatabëcueneitsimë.

<sup>32</sup> Paxamë ata papibisiajamatabëcuenevixaemë, xanë ata jamatabëpanebeyaxuabame. ¡Panebeyaxuare paneveretsinexa xua panijasalinaivimi taxuxuaba!

<sup>33</sup> ¡Paxamë bitso pibisiacuene paneexanaevi! Pacuenia jomo rëcëpeca itsa tane petajuenajetarucaejava isoto, bajara paitsimë. Itsiata apo papanepaemë tsane infiernovecua panijaneconi yabara.

34 Paxamë picani pacatoitorobianatsi Diosojumepaebivi profetavi. Pacatoitorobianatsinua picani bitso Dioso pijacuene peyapëtaeyaexanaevitsi. Pacatoitorobianatsinua picani xanë talivaisi papecatsipaebivinexa. Itsiata baitsi jane bajarapamonaeyajuvënëvi itsamonae pabeyaxuabaponaename. Itsamonae cruzajavabelia pacobematabiaxuababiabianame. Itsamonae pajumatitibabeyabiabianame penaneconitsivi panejumaconitabiabimacata judíovi penacaetuatabiabibonëjava. Itsamonae pabaraponabiabianame itsa tomaranëjavabelia ata panebejiobiaexanaenexa.

35 Bajarapacuenia nexata paxamë ayaineconi panatsixainaename Diosojavabelia. Daxita pamonae aneconijibia pejinavanapaevimi Dioso pitabarata, bajayata panijasalinaivimi beyaxuababiaba. Nexata bajarapaneconimi yajava paxamë pacatsijumajopaena. Dioso pitabarata aneconijibia pejinavanapaevimi, panijasalinaivimi pebeyaxuabaponaejava, taxuxuaba Abelpijinëta. Bajaraxuacujinae icatsia pevajënaeyabelia beyaxuabapona itsamonae ata, Dioso pitabarata aneconijibia pejinavanapaevimi. Nexata bexëjavaberena ata Berequíaspjinë pexënatomi, Zacaríaspjinë, panijasalinaivi beyaxuaba. Zacaríaspjinëmi panijasalinaivimi beyaxuaba templobopanabota, templobobeje altarvënëjavabeje tuatujëta.

36 Xaniajanë pacuenia pacatsipaebijitsiatsi. Daxita pamonaemi Dioso pitabarata aneconijibia pejinavanapaevimi, panijasalinaivimi beyaxuababiaba. Bajarapaneconimi yajava, paxamë



aeconoxae panejinavanapaevi, pacatsijuma-  
jopaena Dioso papecananeconitsiaexanaenexa,  
jai Jesús judíovi pecujarubivijavabelia,  
fariseovijavabelianua.

*Pacuenia Jesús najamatabëxainaeya sivanua  
Jerusalén tomarapijivi yabara pelivaisi  
(Lc 13.34-35)*

<sup>37</sup> Jesús najamatabëxainaeya sivanua Jerusalén  
tomarapijivi. Jumaitsi pesivanuejavata mapacue-  
niaje:

—¡PaJerusalén tomarapijivimë, pabeyabiabame  
Diosojumepaebivimi profetavi! ¡Ibotonëta ata  
patseconabiabame bajarapacuenia panebeyaxu-  
ababiabinexa Diosojumelivaisi pecaponaevi pax-  
amëjavaberena! ¡Pacuenia vacara banacoxicaetuata  
pecorofetobëxëpanaberena, bajara pijinia pacue-  
nia xanë ata picani bitso jitsipabiabajë patacae-  
tuatsinexa, patacacapanepaenexa picani pani-  
janeconivecua! ¡Itsiata baitsi jane paxamë apo  
pajejamë cajena!

<sup>38</sup> Panejumetaema. Dioso rabaja pacacopata  
papecaevetabiabijavami. Nexata baja panijatem-  
plobota Dioso apo ponaponaë.

<sup>39</sup> Xaniajanë pacuenia pacatsipaebijitsiatsi.  
Paxamë rabaja apo panetaemë tsane  
matavëjëa. Matapania itsa panejume-  
covënëtsianame Cristonëcuenenë, Dioso  
taneitorobinëtsica, icatsia panetaename. Itsa  
panesivajamatabëjumaitsimënua tsane: “Dioso,  
bitso yavenonare maponë najetarucaje,  
nejamatabëcueneta penajetarucaenë,” itsa  
panesivajamatabëjamë tsane xanë yabara, nexata

jane baja icatsia panetaename itsa patsianicajë, jai Jesús mapacueniaje najamatabëxainaeaya pesivanuejavata Jerusalén tomarapijivi.

## 24

*Pacuenia Jesús pijajivi tajëvelia tsipaeba itsamat-acabi itsanacuapijivi templobo pexuabijavanexatsica yabara pelivaisi*

*(Mr 13.1-2; Lc 21.5-6)*

<sup>1</sup> Jesús pitsaparena temploboverena. Itsa baja Jesús vecuaponaejitsia templobo, pijajivi imoxorenatsi. Nexata Jesús pijajivi jumaitsi:

—Patajatuxanenë, templobo nataema pemuxuneneta penaeboxanetonë ata, jai.

<sup>2</sup> Nexata Jesús tajëvelia vajunupaeba itsamat-acabi itsanacuapijivi bajarapoboxanetonëmi pepenetsijavanexatsica. Jesús jumaitsi pijajivijavabelia mapacueniaje:

—Xaniajanë pacuenia pacatsipaebijitsiatsi. Daxita raja paboxanetonë pataneme, bajarapoboxanetonëmi itsamatacabi itsanacuapijivi penetsianica irabetsica. Nexata paibotonë catsanaruba mapaboxanetonëtaje, itsaiboto ata pejumavereca apo boca tsane, jai Jesús tajëvelia pijajivijavabelia.

*Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi*

*(Mr 13.3-23; Lc 21.7-24; Lc 17.22-24)*

<sup>3</sup> Jesús eca petsutojumata, patsutojumata olivonaenë apaaxayo. Jesús itsa eca petsutojumata, nexata pijajivi pijaepatojavata

imoxoyorenatsi peyanijobinexatsi. Nexata Jesús pijajivi jumaitsi:

—Patajatuxanenë, pajitsipajë patanetsi-paebinexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë icatsia itsa patsijitsiamëtsica? ¿Detsa peneta pitsicuene pataenajë mapanacua ata itsa vereverecaejitsiaje? jai Jesús pijajivi.

<sup>4</sup> Nexata Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa.

<sup>5</sup> Tsipaji raja peyamaxëitojorobivinexa, ayaibitsaëto patsiana hexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. Bajarapamonae jivi ayaibitsaëto yamaxëitojorobiana.

<sup>6</sup> Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Bajara peneta itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuaje abaxë apo vereverecajuni tsane.

<sup>7</sup> Mapanacuaje pevereverecaevajënaeje peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. Ayaijaniboxaneto najetarucaena itsanacuanëjava. Vitane cuene ata najetarucaena itsanacuanëjava. Ira najëabiana ayaicuenia itsanacuanëjava.

<sup>8</sup> Daxita bajarapacuenene itsa pataename, saya abaxë taxuxuabaponaena piayaicuene, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>9</sup> Icatsia Jesús taxëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamë pacacaponaena nacuaeetsivijavabelia papecabebiobixanaenexa. Nexata pacabeyejebiana. Daxitanacuanëpijivi pacaitoya tsabiabi tsane patajajivixaemë.

<sup>10</sup> Nexata bajarapamatacabita jivi ayaibitsaëto navecuacopabiana tanejumeconvënëtsijava. Namataenetsia naitoya tsane. Namataenetsia nacanajetsiana nacuaeetsivi pecobeyabelia.

<sup>11</sup> Nexata ayaibitsaëto najetarubenaena jivi petsipaebaponaevinexa saicayalivaisi Dioso pejumelivaisivecua. BeDiosojumelivaisipae-bivicuenia tsipaebaponaena. Bajarapamonae yamaxëitojorobiana jivi ayaibitsaëtoxaneto.

<sup>12</sup> Jivi pibisiacuene pexanavanapaevi, pevajënaeyabelia ayaibitsaëtoxaneto tsaponae tsane. Nexata ayaibitsaëto Dioso pejumeconvënëtsivi, namataenetsia penaasivajava vereverecaponaena.

<sup>13</sup> Itsiata pajivi ajamatabëcuenesaë tsane Dioso pejumeconvënëtsijava petëpaejavabelianexa, bajarapajivi Dioso capanepaenatsi.

<sup>14</sup> Itsamonae daxita nacuanëjjava tsipaebiana jivi peyapëtaenexa imoxoyo baja pevajënae Dioso pijajivi pecapanepaejavanexa. Bajaraxuacujinae jane baja mapanacua vereverecaenaje, jai

Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>15-16</sup> Icatsia Jesús tajëvelia vajunupaeba papiayaicuene itsamatacabi copiapatsijitsia Jerusalén tomarata. Jesús jumaitsi pijajivijavabelia mapacueniaje:

—Diosojumepaebinëmi profeta Danielpijinë piayaicuene tajëvelia pevajunupaebilivaisi bajayata yaquina. Xua panijatamaranëmi vereverecaeyaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicuene vajunupaeba mapalivaisitaje.) Nexata paxamë ita pataename bajarapapiayaicuene penucaejava templobota, nexata Judea nacuata pejinavanapaevi pëtsa nubena. Naxanitsiayo rëcëpecaena petsutonëjavabelia.

<sup>17</sup> Pajivi pijabojumata athëbëyo ecaya, ita vënëlivaisitaena bajarapapiayaicuene penucaejava templobota, bajarapajivi perunaecujinaetsica, bepïjia najetabajiraviana. Pëtsa joneya pijaboyalia pejutsinexa pecobecovë.

<sup>18</sup> Pajivi pijinia nacuenebaponapona pijapabita, ita vënëlivaisitaena bajarapapiayaicuene penucaejava templobota, bepïjia najetabajiraviana. Pëtsa naviata pijaboyabelia pejutsinexa penaxatabijava.

<sup>19</sup> ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejiobitsiaya jinavanapaena! ¡Papetiriavi ata mitoapae-nacuetoxi isajinavanapa, bitso bejiobi tsane bajarapamatacabi!

20 Bajaraxuata tajëvelia Diosojavabelia pavajëcare piayapëbejematacabita papecatocopiapatsiyaniva bajarapapiayaicuene. Nexata pamatacabi parëcëpecaename, pexaniamatacabi Dioso pacatocopatsiana bitso nabejobitsiaya paneponaeyaniva. Pavajëcarenu penacueraevetsimatacabita bajarapapiayaicuene papecatocopiapatsiyaniva, nexata papecatoayapëbejeyaniva.

21 Tsipaji raja bajarapamatacabi bitso jivi bejiobi tsane. Pabejobicuene abaxë jivi caeto ata apo tae Dioso nacua pexanaecujinae, bajara-pabejobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane.

22 Dioso epatua yatuucutsiana jivi bitso nabejobitsiaya pejinavanapaematacabianëminexa bitso jivi nabejobitsia pejinavanapaeyaniva. Dioso epatua itsa apo yatuucutsi tsipae bitso jivi nabejobitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejobitsiaya pejinavanapaematacabianëminexa, jai Jesús pijajivijavabelia tajëvelia pevajunupaebijavata papiayaicuene itsamatacabi copiapatsijitsia mapanacuataje.

23 Icatsia Jesús tajëvelia navajunupaeba icatsia pepatsijavanexatsica. Jesús jumaitsi pijajivijavabelia mapacueniaje:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nucaje,”

itsa pacajai tsane, pëtsa pajumecovënètame. Itsa pacajumaitsinua tsane: “Bajarajota nuca Cristo,” itsa pacajai tsane, pëtsa pajumecovënètame.

<sup>24</sup> Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicue ne pexanaejavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonaepapacuenia Dioso pijajivi, Dioso pitapetsivitsi, bajarapamonae apo yamaxëitojorobi tsanetsi.

<sup>25</sup> Tajëvelia rabaja maje pacatsipaebatsije.

<sup>26</sup> Nexata itsamonae itsa pacajumai tsane: “Cristo raja ponapona petusato nacuatalia. Naxanitsia. Panataename,” itsa pacajai tsane, pëtsa paponaremelia. Itsa pacajumaitsinua tsane: “Cristo raja ponapona mapaënëyatuucutsibotaje. Naxanitsia. Panataename,” itsa pacajai tsane, pëtsa pajumecovënètame.

<sup>27</sup> Payapëtaneme rabaja mapacueneje. Yamaxë itsa nivejai tsajuni athëbëvetsica, caecuenia jivi bacotiatane daxitajava. Bajara pijinia peneta pacuenia daxitanacuanëpijivi caecuenia netaena pamatacabi patsianicajë xanë, Daxitajivi Pematapijinënë.

<sup>28</sup> Payapëtaneme rabaja mapacuene ataje. Quequeremonae bepijia bayapëtane itsajota petuxutsaebinë boca. Nexata bajarajota bepijia banacaetuaana. Bajara pijinia pacuenia daxitanacuanëpijivi tajajivi bepijia yapëtaena tapatsijavatsica. Nexata bepijia nacaetuaana xanëjavaberena, jai Jesús

pijajivijavabelia tajëvelia penavajunupaebijavata icatsia pepatsijavanexatsica.

*Pacuenia Jesús tajëvelia navajunupaeba icatsia pepatsijavanexatsica petëpaecujinae yabara peliv-  
aisi*

*(Mr 13.24-37; Lc 21.25-33; 17.26-30, 34-36)*

<sup>29</sup> Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica jivi taena pecujunavicuene. Jivi nabejiobitsiaya jinavanapaena. Nexata jivi nabejiobitsiaya pejinavanapaematacabicujinae, matacabipijjuameto aitaquiri tsane. Meravipijjuameto ata aitaquiri tsane. Tulupu ata othopaenica irabetsica. Daxitacuene, xua rubena athëbëtatsia, najëabiana. Xaniavaetsia apo rubenae tsane.

<sup>30</sup> Bajaraxuacujinae jane baja xanë athëbëvetsica najetarucaenajë, Daxitajivi Pematapijinënë. Nexata daxitaviriavi mapanacuapijivi natsinuena pecajunavi pijaneconi yabara. Nexata bajarapaepatota, xanë, Daxitajivi Pematapijinënë, jivi netaena athëbëvetsica itarërëbota tanajetarucaejava. Patsianicajë daxitacuene taevetsinexa. Tanivenivenaecotia yajavapatsianicajë.

<sup>31</sup> Bajaraxuacujinae trompeta itsa najumetsiana ayaijumeta, itorobianajë tajaängelevi. Angelevi daxitanacuanëjavaverena xanëjavaberena netocaetuatsiana tajajivi, pamona Dioso pitapetsivitsi, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.



<sup>32</sup> Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjère pacuenia itsi higuerae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonenexa.

<sup>33</sup> Bajara pijinia pacuenia peneta itsa pataename pecopiapatsijava xua tajëvelia vajunupaebajë, nexata payapëtaename imoxoyo baja tavajënae tsane tapatsijavanexatsica.

<sup>34</sup> Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëjavabelia ata, apo vereverecae tsane. Matapania xua tajëvelia vajunupaebajë itsa baja copiapatsiana, bajarapamonae jane baja vereverecaena.

<sup>35</sup> “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua tajëvelia vajunupaebajë, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

<sup>36</sup> Icatsia Jesús jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua tajëvelia vajunupaebajë. Athëbëpijivi ata, ángelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús

pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

<sup>37</sup> Jesús icatsia tajëvelia navajunupaeba itsamat-acabi icatsia pepatsijavanexatsica. Jesús jumaitsi pijajivijavabelia mapacueniaje:

—Pacuenia bajayata jemata itsi pamatacabi Noépijinë ponapona, bajara icatsia jemata itsane pamatacabi xanë, Daxitajivi Pematapijinënë, patsianicajë.

<sup>38</sup> Pamatacabi Noépijinë ponapona ira pebubutsivajënaeya, jivi picani xaniavaetsia jamatejema pexaejava xaevanapa. Apaevanapanua. Nacojobapona itsamonae. Itsamonae pexënatoyonë pebijavabelia canajetapona petonacojobinexatsi. Bajarapamonae jamatejema saya jinavanapa. Nexata bajarapamatacabi Noépijinë ëpijamonae pinijibarcoxanetojavabelia barëjunua.

<sup>39</sup> Daxitajivi abaxë itsiata apo yapëtae paepatota tocopiapatsijitsiatsi peyabubutsijavanexatsi. Nexata itsajivi ata yapëtaenejeva jemata ayaiemaxaneto itsa jopa ira pebubutsinexa, yapëtane jane baja. Bajarapamatacabi bubuna daxitajivi. Bajara pijinia pacuenia itsajivi ata yapëtaenejeva xanë, Daxitajivi Pematapijinënë, tapatsijavanexatsica, jemata patsianicajë.

<sup>40</sup> Nexata bajarapamatacabita anijanëbeje najuanacuenebanucaenabeje pabita. Itsanë tanejume-covënëtsinë tsane. Itsanë apo tanejume-covënëtsinë tsane. Nexata tanejume-covënëtsinë pitsianatsi ángelnë. Apo tanejume-covënëtsinë copatanutsianatsi.

<sup>41</sup> Bajara pijinia itsane petirivabeje ata. Najuacuabanucaenabeje caejavata. Nexata tane-

jumecovënëtsiva pitsianatsi ángelnë. Apo tane-  
jumecovënëtsiva copatanutsianatsi.

42 Nexata nejamatabëcueneevetsiaya  
panecopiaevetavanapaename. Tsipaji raja apo  
panevajënaeyapëtaemë tsane paepatota xanë  
panijatuxanenënë icatsia patsijitsianëtsica.

43 Pacanaëjëre mapacuneje. Bo pex-  
ainaenë itsa yapëtaejitsipa paepatota meravi  
pijaboyaberena patsijitsia pecobcovë  
petonacobetoxotsinënexatsi, nexata naëcotsiaya  
vajënaeevetsipa. Apo copatsi tsipae pijaboyaber-  
ena petojoneyanivatsi penacobetoxotsinënexa.

44 Bajara pijinia pacuenia paxamë ata  
njamatabëcuenexaniavaetsiaya panecopiaeve-  
tavanapaename. Tsipaji xanë, Daxitajivi  
Pematapijinënë, paepatota apo paneja-  
matabënajinaemë tapatsijavanexatsica, jemata  
icatsia patsianicajë, jai Jesús pijajivijavabelia  
tajëvelia penavajunupaebijavata itsamatacabi  
icatsia pepatsijavanexatsica.

*Pacuenia Jesús pijajivijavabelia livaisi tsipaeba  
petuxanenë pijajivitonëbeje pelivaisicuenia yabara  
pelivaisi*

*(Lc 12.41-48)*

45 Jesús livaisi tsipaeba pijajivijavabelia petux-  
anenë pijajivitonëbeje pelivaisicuenia. Bajara-  
pacuenia pijajivijavabelia tsipaeba copiaevetsi-  
aya petonacuenebavanapaenexatsi icatsia pepat-  
simatacabitsicajavabelianexa. Jesús jumaitsi ma-  
pacueniaje:

—Petuxanenē pijajivitonē, ponē xaniavaetsia pijatuxanenē pecovēta tonacuenebaponaponaena, majamatabēcueneitsi tsaneje. Bajaraponē itsajamatabēcuene xainaenejeva, copiaevetaponaponaena pijatuxanenē pepatsijavabelianexa. Bajaraponē pijatuxanenē pijajivi pecovēta tovetaponaponaena piabatabiabinexa pexaejava caematacabi canacujitsia pacuenia pijatuxanenē itorobatsi.

<sup>46</sup> Bajaraponē bitso barēya tsane pamatacabi pijatuxanenē patsiana, xaniavaetsia pijajivi peto-evetaponaponaexae pecovēta.

<sup>47</sup> Xaniajanē pacuenia pacatsipaebijitsiatsi. Ponē xaniavaetsia tonacuenebianā pijatuxanenē pecovēta, bajaraponē evetsiaexanaenatsi daxita xua xaina pijatuxanenē.

<sup>48</sup> Itsa bajaraponē piajamatabēcuenebejenē tsipae, nexata pijatuxanenē pecovēta jamatabējumaitsi tsipae: “Tajatuxanenē ajibi tsarucāe tsane bajayajebi,” jamatabējai tsipae.

<sup>49</sup> Nexata toconibabeyabiabijitsipa pijatuxanenē pijajivi. Ayaijava xaeyabiabijitsipa. Naapaeyabiabijitsipanua piatajibivita.

<sup>50</sup> Nexata itsajota apo jamatabēnajinae tsipae pijatuxanenē pepatsijavanexa, patsipa pijatuxanenē.

<sup>51</sup> Nexata bajaraponē ayaicuenia naneconitsiaexanaejitsipatsi pijatuxanenē. Pacuenia jivi peyamaxēitojorobabiabivi, Dioso ayaicuenia naneconitsiaexanaenatsi, bajarapacuenia pijatuxanenē naneconitsiaexanaejitsipatsi. Nexata natsinuejitsipa. Navonosinijitsipanua bitso penavixaetaexae, jai Jesús pijajivijavabelia

petuxanenë pijajivitonëbeje pelivaisicuenia petsipaebijavata.

Bजारapacuenia Jesús tsipaeba pijajivi xaniavaetsia pecopiaevetavanapaenexatsi Jesús icatsia pepatsimatacabitsicajavabelianexa.

## 25

*Pacuenia Jesús pijajivi livaisi tsipaeba diez papejanavabeje pijalámparabëxi pecaponaevi pelivaisicuenia yabara pelivaisi*

<sup>1</sup> Jesús icatsia jumaitsi pijajivijavabelia:

—Pamatacabi icatsia patsianicajë, tajajivi peyapëtaexae tapatsijavanexatsica, jamatabëcueneaitavaya necopiaevetavanapaena. Itsamonae tajajivi yapëtae ata tapatsijavanexatsica, itsiata jamatabëcueneaitavaya apo necopiaevetavanapae tsane. Bजारapacuenie yabara pacatsipaebianatsi mapalivaisije. Diez papejanavabeje yapëtane itsava pejanava penacasabijavanexa. Nexata diez papejanavabeje pijalámparabëxi, caeva canacujitsia, xaniavaeta penaponaenexa. Nexata capona pijalámparabëxi pabojavabelia eca penacasabivanexa. Bजारajota vajënaeevetsijitsia pepatsijava penacasabinënexa. Nexata itsa ponabeje penacasabijivibejenexa, bजारapapejanavi penaponaenexa bजारapajivibeje pepëta penacasabifiestajavabelia.

<sup>2-4</sup> Bजारapamonaeyajuvënëvi, cinco povabeje, yapëtae ata picani petsicaponaejavanexa aceiteranë pijalámparabëxinexa, itsiata apo tsicapona

itsa tovereverecatsi aceitera peepatsinexa icatsia pijalámparabëxijavabelia. Cinco pijinia povabeje peyapëtaexae petsicaponaejavanexa aceiteranë pijalámparabëxinexa, tsicapona.

<sup>5</sup> Nexata bajarapapetiriavi itayotena pijalámparabëxita. Bajayajebi picani vajënaeevetena penacasabinënexa pepatsijava. Nexata pijalámparabëxita paaceiteranë capona, tovereverecaponatsi baja. Tsipaji penacasabinënexa abaxë cuenenajemata pepatsinexa. Nexata baja daxita bajarapapetiriavi belia itamajitsipana. Nexata baja majita.

<sup>6</sup> Bajaraxuacujinae ayaimeravi tuatuajëta jumetane pevavajaijava. “¡Najetaruca rajane baja penacasabinënexa! ¡Papitsaparemena jane baja panecopiapitsinexa!” pejaijava jumetane.

<sup>7</sup> Nexata daxita bajarapapetiriavi nonobapuna pecopiapitsinexa jane baja. Papetiriavi aceiteranë tsicapona, epaca pijalámparabëxijavabelia. Caeva canacujitsia pijalámparabëxi ayaicotia exana.

<sup>8</sup> Nexata papetiriavi apo tsicaponae aceiteranë, jumaitsi aceiteranë petsicaponaevijavabelia mapacueniaje: “Panenarajure tsiquirijavaxi aceiteraxi. Tsipaji patajalámparabëxi panetoitacaëcaënazona,” jai bajarapamonae.

<sup>9</sup> Itsiata aceiteranë petsicaponaevi jumaitsi: “Jume. Apo caëjëpae. Paxanë ata meta apo panetocaëjëpae tsipae. Paponaremelia. Panijacuata pacomuare itsajotalia canajetabiaba aceiteranë,” jai aceiteranë petsicaponaevi pijalámparabëxinexa.

<sup>10</sup> Nexata papetiriavi aceiteranë apo tsicaponae pijalámparabëxinexa, ponalia aceiteranë peco-

muacaenexa. Nexata pecovëta penacasabinënexa patanajetaruca. Nexata papetiriavi aceiteranë tsicapona pijalámparabëxinexa, napona baja penacasabifiestanexa pexanaebojavabelia. Pejonecujinaelia baupaxatata.

<sup>11</sup> Bajaraxuacujinae aceiteranë pijalámparabëxi petsicomuacaevi pata. Nexata bajarapapetiriavi jumaitsi penacasabinënexajavabelia: “¡Panetobau- pare! ¡Panetobaupare! jai tsanubenae bojumavelia.

<sup>12</sup> Nexata penacasabinënexa jumaitsi: “Xaniajanë pacuenia pacatsipaebijitsiatsi. Apo pacayapëtaetsi cajena paxamë,” jai bajara- papetiriavijavabelia, jai Jesús mapalivaisije pijajivijavabelia.

<sup>13</sup> Jesús icatsia jumaitsi pijajivijavabelia:

—Pacuenia cinco povabeje peyapëtaexae, aceiteranë tsicapona pijalámparabëxinexa, bajara pijinia pacuenia paxamë ata paneyapëtaexae, jamatabëcueneaitavaya panecopiaevetavana- paename. Tsipaji apo payapëtaemë tsane pamatacabita, paepatota ata, xanë, Daxitajivi Pematapijinënë, icatsia patsijitsianëtsica, jai Jesús pijajivijavabelia.

*Pacuenia Jesús pijajivi livaisi tsipaeba pi-  
japalata pijajivi pevetsiaexanaenë pelivaisicuenia  
yabara pelivaisi*

*(Lc 19.11-27)*

<sup>14</sup> Jesús icatsia jumaitsi pijajivijavabelia:

—Tacovëta patajajivimë, itsamonae ata, pamonae tajajivi, panetonacuenebianame. Nexata pamatacabita icatsia patsianicajë, pacuenia pacasivanajamatabëxainaejitsiatsi, aeconoxae

pacatsipaebianatsi. Pacatsipaebianatsi comparacióncuenia mapacueniaje. Petuxanenē itsa ponaejitsia tajēnacuyabelia, junata pijajivi. Evetsiaexana pijapalata petoevetsinexatsi pecovēta.

<sup>15</sup> Caenē canacujitsia evetsiaexanapona peto-canacuenebinexatsi pecovēta pacuenia bajarapamonae caējēpatsi. Nexata petuxanenē pijinia evetsiaexana cinco mil ponēbeje pepovi, bitso penamatamotsivi. Itsanē pijinia evetsiaexana dos mil ponēbeje. Itsanē pijinia evetsiaexana mil ponēbeje. Bajaraxuacujinae petuxanenē pona tajēnacuyabelia.

<sup>16</sup> Nexata jane baja ponē evetsiaexana cinco mil ponēbeje, canacueneba jane baja pecovēta bajarapapalata. Nexata pematatsēnēa topitsapatsi icatsia itsacincio mil ponēbeje. Nexata baja daxitata diez mil ponēbeje caejavata.

<sup>17</sup> Bajara pijinia pacuenia itsanē canacueneba dos mil ponēbeje. Nexata pematatsēnēa topitsapatsi icatsia itsados mil ponēbeje.

<sup>18</sup> Itsiata baitsi jane ponē toeveta mil ponēbeje, pona pematayatsinexa pijatuxanenē pijapalata. Matayatsia mēthēteta irata.

<sup>19</sup> Bexēa nexata najetaruca petuxanenē. Junata pijajivi peyapētaenexa pacuenia toevetatsi pecovēta pijapalata.

<sup>20</sup> Copiaya pata ponē cinco mil ponēbeje evetsiaexanatsi. Nexata bajaraponē tocanaviata pijatuxanenējavabelia diez mil ponēbeje. Jumaitsi bajaraponē pijatuxanenējavabelia: “Nevetsiaexaname cinco mil ponēbeje tacatoevetsinexa. Bajara macatocanaviatatsi bajarapapalataje. Cato-



canaviatatsi yajava icatsia itsacinco mil ponëbeje, xua nacanabajë bajarapapalatata,” jai bajara-ponë pijatuxanenëjavabelia.

<sup>21</sup> Nexata petuxanenë jumaitsi: “Xanepana rabaja. Xaniavaetsia netoevetaponaponame. Itsajamatabëcuene apo najamatabëxainaemë. Tsiquirijavayo ata xaniavaetsia netoevetame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena barëyaya neponaponaenexa xanëjavata,” jai petuxanenë pijajivitonëjavabelia.

<sup>22</sup> Bajaraxuacujinae pata ponë dos mil ponëbeje evetsiaexanatsi. Nexata bajaraponë jumaitsi pijatuxanenëjavabelia: “Nevetsiaexaname dos mil ponëbeje tacatoevetsinexa. Bajara macatocanaviatatsi bajarapapalataje. Catocanaviatatsi yajava icatsia itsados mil ponëbeje, xua nacanabajë bajarapapalatata,” jai bajaraponë pijatuxanenëjavabelia.

<sup>23</sup> Nexata petuxanenë jumaitsi: “Xanepana rabaja. Xaniavaetsia netoevetaponaponame. Itsajamatabëcuene apo najamatabëxainaemë. Tsiquirijavayo ata xaniavaetsia netoevetame. Nexata aeconoxae caevetsiaexanaenatsi pematatsënëa ayaijava. Jonemena xanëjavaberena barëyaya neponaponaenexa xanëjavata,” jai petuxanenë pijajivitonëjavabelia.

<sup>24</sup> Icatsia pata ponë evetsiaexana mil ponëbeje. Bajaraponë jumaitsi pijatuxanenëjavabelia: “Cacueneyapëtanetsi. Xamë nijajivi apo itaxutobejiobiataeyabiabimë. Xamë nijajivi ubiaexanabiabame neubiaexanabiabijava nexata bajarapamonae pejamatabëcueneta

ayaijava palata pecatopitsapaenexa. Bajara pijinia pacuenia xanë ata nevecuapitsipame xua nacanabijitsipajë nijapalatata ita canacuenebijitsipajë.

<sup>25</sup> Bajaraxuata junavajë. Ponajë irata tamatayatsiamëthëtetsinexa nijapalata. Bajara manijapalata catocanaviatatsije,” jai bajaraponë pijatuxanenëjavabelia.

<sup>26</sup> Nexata petuxanenë jumaitsi: “Tajajivitonë atamë, itsiata ajamatabëcuenebejemë. Afaetabimënu. Xamë baja cajena yapëtaneme tajajivi taubiaexanabiabijava, taubiaexanabiabijava nexata bajarapamonae pejamatabëcueneta ayaijava palata tanetopitsapaenexa.

<sup>27</sup> Bajaraxuata xanepanaejitsipa ita netocanacuenibiaexanaejitsipame tajapalata banco pevetsivijavabelia. Nexata aeconoxae banco pevetsivi tajapalata pecacovaetsijamatabëcuene netocanaviatsipa tajapalata pematatsënëa,” jai petuxanenë pijajivitonëjavabelia.

<sup>28</sup> Nexata petuxanenë jumaitsi bajarajota penubenaevijavabelia: “Pavecuapire bajarapamil ponëbeje. Nexata juya parajure ponëjavabelia xaina diez mil ponëbeje. Tsipaji bajaraponë cajëpatsi tanetoevetsinexa pematatsënëa.

<sup>29</sup> Tsipaji pajivi ayaijava baja xaina, pematatsënëa icatsia itsajava rajutsianatsi. Nexata xainaena ayaijava. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi.

<sup>30</sup> Maponë tajajivitonëje, itsacuenejavayonexa ata, apo netoxanepanae. Paxuabaremelia

pitaquirijavabelia. Bajarajota natsinuena. Navonosiniananua bitso penavixaetaexae,” jai petuxanenë, jai Jesús comparacióncuenia pijajivijavabelia.

Bjarapacuenia Jesús jumaitsi pamonaë pijaneconi pexainaevi Jesús penaneconitsiaexanaenexa pamatacabi icatsia patsianica.

*Pacuenia Dioso naneconitsiaexanaena pijaneconi pexainaevi yabara pelivaisi*

<sup>31</sup> Jesús tajëvelia navajunupaeba pacuenia it-samatacabi exanaejitsia mapanacuataje. Jesús jumaitsi pijajivijavabelia mapacueniaje:

—Xanë, Daxitajivi Pematapijinënë, icatsia itsa najetarucaenajë daxitanacua taevetsinexa, ángelevi nematatoyoronaeya yajavanajetarucaenajë. Nexata ecaenajë tajapenivenivenaetronovënëjavata.

<sup>32-33</sup> Nexata daxitanacuanëpijivi caetuatsianatsi taitabarata. Tsataponaenajë bajarapamonaë. Oveja pevetsinë ovejavecua chivo saicaya tsatapona. Nexata oveja pevetsinë petsavenone-nia chivo nubenaeyaexana. Pecujuanenia pijinia oveja nubenaeyaexana. Bajara pijinia pacuenia xanë tsataponaenajë Dioso apo pejumecovënëtsivi, Dioso pejumecovënëtsivivecua. Dioso apo pejumecovënëtsivi tatsavenonenia nubenaeyaexanaenajë. Dioso pijinia pejumecovënëtsivi tacujuanenia nubenaeyaexanaenajë.

<sup>34</sup> Nexata jumaitsinë tsane tacujuanenia penubenaevijavabelia, Dioso pejumecovënëtsivi: “Naxanitsia. Paxamë taxa papecaitaxutot-soniataevi. Payajavajinavanapaename taxa

pijanacuatsia, itsajotatsia pacatoxaniavaeta tajëvelia. Dioso pacatoxaniavaeta nacua pexanaejavaveliacujinae.

<sup>35</sup> Itsa tajani, paxamë taxaejava panerajutame. Itsa mera jitsipajë, panerajutame mera. Itsanacuaverena itsa patajë, panecopiapitame xaniavaetsia.

<sup>36</sup> Itsa ajibi bitso tanaxatatsijava, panerajutame tanaxatatsijavanexa. Itsa avitanenë, papatame patanevetsinexamë. Itsa neeta penaneconitsivi pejebabiabibota, papatame patanetaenexamë,” janë tsane tacujuanenia penubenaevijavabelia.

<sup>37</sup> Nexata bajarapamonae nejumai tsane: “Tajatuxanenë, ¿detsa pacujinae nijanijavata patajacarajutsi nexaejava?” nejai tsane. ¿Detsa pacujinae mera nejitsipaejavata patajacarajutsi mera? nejai tsane.

<sup>38</sup> Itsa jume, nejumai tsane: “¿Detsa pacujinae itsanacuaverena nepatsinë patajacacopiapitsi xaniavaetsia?” nejai tsane. Itsa jume, nejumai tsane: “¿Detsa pacujinae piajibijavata bitso nenaxatatsijava patajacarajutsi nenaxatatsijavanexa?” nejai tsane.

<sup>39</sup> Itsa jume, nejumai tsane: “¿Detsa pacujinae niavitanejavata patajaponae patacaevetsinexa?” nejai tsane. Itsa jume, nejumai tsane: “¿Detsa pacujinae pecaetsijavata penaneconitsivi pejebabiabibota patajaponae patacataenexa?” nejai tsane.

<sup>40</sup> Nexata xanë jumaitsinë tsane bajarapamonaejavabelia: “Xaniajanë pacuenia pacatsipaebijitsiatsi. Daxita xua patoexaname paneyavenonaenexa tajajiviyajuvënëjivi,

beveliajamatabëcuenevi petaevitsijavabelia, bajaraxua xanë taniji xanëjavaberena bepatanetoexanaejavamë,” janë tsane.

<sup>41</sup> 'Nexata tatsavenonenia penubenaevi, Dioso apo pejumecovënëtsivijavabelia, jumaitsinë tsane: “Pánevecuanatsare panijaneconi paneyajavajinavanapaevi. Paponaremelia apo peverevereceaesotojavabelia. Bajarapaisoto Dioso tajëvelia toxaniavaeta dovathinexa, dovathi pijajivinexa ata.

<sup>42</sup> Xanë itsa tajani, paxamë apo panerajutsimë taxaejava. Itsa mera jitsipajë, apo panerajutsimë mera.

<sup>43</sup> Itsanacuaverena itsa patajë, apo panecopi-apitsimë xaniavaetsia. Itsa ajibi bitso tanaxatatsijava, apo panerajutsimë tanaxatatsijavanexa. Itsa avitanenë, apo papatsimë patanevetsinexamë. Itsa neeta penaneconitsivi pejebabiabibota, apo papatsimë patanetaenexamë,” janë tsane tatsavenonenia penubenaevijavabelia.

<sup>44</sup> Nexata bajarapamonae pijaneconi peyajavajinavanapaevi nejumai tsane: “Tajatuxanenë, ¿detsa pacujinae niajanijavata apo pacarajutsitsi nexaejava?” nejai tsane. Itsa jume, nejumai tsane: “¿Detsa pacujinae mera nejitsipaejavata mera apo pacarajutsitsi?” nejai tsane. Itsa jume, nejumai tsane: “¿Detsa pacujinae itsanacuaverena nepatsinë, apo pacacopiapitsitsi xaniavaetsia?” nejai tsane. Itsa jume, nejumai tsane: “¿Detsa pacujinae bitso pecatoajibijavata nenaxatatsijava, apo pacarajutsitsi nenaxatatsijavanexa?” nejai tsane. Itsa jume, nejumai tsane: “¿Detsa pacujinae niavitanejavata, apo paponanë

patacaevetsinexa?” nejai tsane. Itsa jume, ne-jumai tsane: “¿Detsa pacujinae penaneconitsivi pejebabiabibota pecaetsijavata, apo paponaeñe patacataenexa?” nejai tsane bajarapamonae.

<sup>45</sup> Nexata xanë jumaitsinë tsane bajarapamon-aejavabelia: “Xaniajanë pacuenia pacatsipaebi-jitsiatsi. Bajarapacuenia itsa apo patoexanaemë paneyavenonaenexa tajajiviyajuvënëjivijavabelia, nexata bajaraxua xanë taniji xanëjavaberena apo patanetoexanaejavamë,” janë tsane pijaneconi peyavajavinavanapaevijavabelia.

<sup>46</sup> Bajaraxuacujinae bajarapamonae ponaena penaneconitsiajinavanapaenexa daxitamatacabijavabelianexa. Pamonae Dioso pejumecovënëtsivi, bajarapamonae Dioso rajutsianatsi matacabi apo pev-ereverecaevaja, jai Jesús pijajivijavabelia tajëvelia penavajunupaebijavata itsamatacabi penaneconitsiaexanaejavanexa pijaneconi pexainaevi, pamatacabi icatsia patsianica.

## 26

*Pacuenia picani Jesús pijavajabitsaë jamatabëvaetabatsi yabara pelivaisi (Mr 14.1-2; Lc 22.1-2; Jn 11.45-53)*

<sup>1</sup> Itsa baja Jesús najumevereta pijajivijavabelia livaisi petsipaebijava, Jesús icatsia tajëvelia navajunupaeba itsamonae cruzajavabelia pecobematabiabarutsijavanexatsi. Jesús jumaitsi pijajivijavabelia mapacueniaje:

<sup>2</sup> —Payapëtaneme rabaja anijamatacabibeje pesajinaejava pejonenexa baja pascuavënëfiesta.

Nexata xanë, Daxitajivi Pematapijinënë,  
necanajetsiana itsamonae pecobeyabelia  
tanecobematabiabarutsinexa cruzajav-  
abelia, jai Jesús pijajivijavabelia tajëvelia  
penavajunupaebijavata cruzajavabelia  
pecobematabiabarutsijavanexatsi.

<sup>3</sup> Nexata bajarapaepatota nacaetuata  
sacerdotevi penamatacaitorobivi. Nacaetuata  
judíovi pecujarubivinua. Nacaetuata judíovi  
pijaancianovinua. Daxita bajarapamonae  
nacaetuata Caifásvënënë pijaboxanetota.  
Bajaraponë Caifás, sacerdotevi pepo penamat-  
acaitorobinë. <sup>4</sup> Bajarajota daxita bajarapamonae  
najumejaita. Penajumetsënëtsilivaisita picani  
Jesús jamatabëvaetabatsi pebeyaxuabinexatsi.

<sup>5</sup> Itsiata bajarapamonae najumaitsi:

—Fiestajavata meta abaxë apo vaetabi tsanetsi  
jivi vajanacaitsacueniabiyaniva, najai daxita ba-  
jarapamonae.

*Pacuenia Jesús petiriva tsimataepanatsi petuxu-  
juviaceitera yabara pelivaisi*  
(Mr 14.3-9; Jn 12.1-8)

<sup>6</sup> Jesús ponapona Betania tomarata,  
Simón pijabota. Simón bajayajebi bitso  
peperabëtsabanaenëmi.

<sup>7</sup> Nexata Jesús petiriva cobenaimoxoyorenatsi  
petuxujuviaceitera, alabastrobotellabëta pejea-  
ceitera. Bajarapora bitso penamatamotsira. Nex-  
ata Jesús penabanecaejavata mesata, bajarapova  
tsimataepanaicatsi bajarapaaceitera.

<sup>8</sup> Nexata Jesús pijajivi itsa taeyena Jesús  
petsimataepanaejavatsitsica bajarapaaceitera,

Jesús pijajivi jamatabëcueneanaepanareca. Nexata ëpamonae najumai tsenae:

—¿Detsa xuajitsia saya xuaba bajarapacuenia maporaje?

<sup>9</sup> Canajetsipa rajane. Nexata matamopitsipa ayaimatamo. Bजारapapalata rajutsipa bepejiobivi bajarapacuenia peyavenonaenexa, najai tse-nae Jesús pijajivi.

<sup>10</sup> Nexata Jesús jumentane bajarapacuenia pijajivi pejumaitsijava. Nexata Jesús jumaitsi pijajivi-javabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje.

<sup>11</sup> Daxitamatacabi raja bepejiobivi jinavanapa itsaxuayo pajinavanapame. Itsiata baitsi jane xanë daxitamatacabi apo ponaponaenë tsane paxamëjavata.

<sup>12</sup> Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tëpae atanë. Nexata baja bajarapova neperabëxaniavaeta itsamonae tanemëthëtsivajënae.

<sup>13</sup> Xaniajanë pacuenia pacatsipaebijitsiatsi. Daxitanacuanëjava tajajivi itsa pæbanajetarubenaena pexanialivaisi jivi tacapanepaelivaisinexa, vajunupaebabiananua pacuenia exana xanëjavaberena mapapetirivaje, jai Jesús pijajivijavabelia tajëvelia penavajunupaebijavata pebeyaxuabijavanexatsi.



*Pacuenia Judas Jesús yajumejailia pijavajabit-saë pecobeyabelia pecanajetsinexa yabara pelivaisi (Mr 14.10-11; Lc 22.3-6)*

<sup>14</sup> Jesús pijajivi, doce ponëbejeyajuvënënë, pevënë Judas Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi.

<sup>15</sup> Nexata Judas jumaitsi sacerdotevi penamatacaitorobivijavabelia:

—¿Detsa pacuenia panerajutsipame panecobeyabelia itsa canajetsipajë Jesús? jai Judas.

Nexata bajarapamonae Judas matamotatsi treinta ponëbeje pepo palatanëanë, bitso penamatamotsinëanë.

<sup>16</sup> Nexata bajaraxuacujinae Judas Jesús naitaxutocaevetsia ponapona. Nexata paepatota Judas toyapëxanepanatsi, perajutsinexa jane baja Jesús bajarapamonae pecobeyabelia.

*Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi*

*(Mr 14.12-25; Lc 22.7-23; Jn 13.21-30; 1 Co 11.23-26)*

<sup>17</sup> Junua jane baja fiesta, pafiestajava judíovi baxane levadurata matajërëabinejeva pexanaepan. Nexata Jesús pijajivi imoxoyorenatsi. Yanijobatsi pijajivi.

—¿Detsa belia paponanajë patacamitsaexanaenexa, xua jivi baxane pascua fiestamatacabi, nexaenexa? jai Jesús pijajivi.

<sup>18</sup> Nexata Jesús jumaitsi pijajivijavabelia:

—Paponare tomarabelia. Pacatsipaebianatsi ponë pijabota papatsijitsiamë. Pajumaitsimë tsane bo pexainaenëjavabelia mapacueniaje: “Vajanacacujarubinë raja jumaitsi: ‘Imoxoyo rabaja tavajënae tanebeyaxuabinexa. Nexata bajaraponë pijabo netsicopatsiana patacabarëxaenexa xua jivi baxane pascua fiestamatacabi,’ jai raja vajanacacujarubinë,” pajamë tsane bo pexainaenëjavabelia, jai Jesús pijajivijavabelia.

<sup>19</sup> Nexata baja Jesús pijajivi pona pacuenia Jesús jumaitsi. Nexata xua jivi baxane pascua fiestamatacabi daxita Jesús pijajivi pebarëxaenexa, Jesús pijajivi exana jane baja.

<sup>20</sup> Nexata baja ajena meraviyotsia, Jesús pijajivi, doce ponëbeje, barëeca mesa muxuneneta.

<sup>21</sup> Nexata pexaeyenaevavata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia Judas yabara.

<sup>22</sup> Nexata Jesús pijajivi bejamatabëjjobireca. Nexata Jesús pijajivi, caenë canacujitsia, Jesúsjavabelia yanijobapona.

—Tajatuxanenë, ¿xanë tsaja tsane? jai tsaponae Jesús pijajivi.

<sup>23</sup> Nexata Jesús jumaitsi pijajivijavabelia:

—Ponëbeje peneta caecuenia panajuacajabut-sianajëbeje panbë platojavabelia, bajaraponë necanajetsiana tajavajabitsaë pecobeyabelia.

24 Xanë, Daxitajivi Pematapijinënë, tēpaenajē pacuenia baja cajena xanë yabara Dioso pejumelivaisibaxutota tajēvelia jumaitsi. Itsiata ponē tajavajabitsaē pecobeyabelia necanajetsiana, bajaraponē bitso bejiobi tsane pinijicuenia. Itsa meta bajaraponē apo naexanae tsipae, bajarapacuenia apo necanajetsi tsipae. Nexata xanepanaejitsipa bajaraponē itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia Judas yabara.

25 Nexata Judas, ponē jane baja canajetsijitsiatsi Jesús pijavajabitsaē pecobeyabelia, jumaitsi:

—Petuxanenē, ¿xanë tsaja tsane? jai.

Nexata Jesús jumaitsi:

—Jājā, xamē rabaja tsane, jai.

26 Pexaeyenaejavata Jesús pita panbē. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae Jesús epatsēnēquejeba bajarapapanbē. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

27 Bajaraxuacujinae icatsia Jesús copavēnējavata yapita piapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Jumaitsi pijajivijavabelia:

—Papaema padaxitamē maporaje.

28 Tsipaji tajana othopaena jivi ayaibitsaētoxaneto pibisiacuene pexanaeneconi

pevecuaajibiaexanaenexatsi. Nexata tatëpaejava pejamatabëcueneta, jivi yapëtaena pepacuenexaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi.

<sup>29</sup> Xaniajanë pacuenia pacatsipaebijitsiatsi. Xanë rabaja mapanacuataje matavëjëa apo apaenë tsane uvacuaira, matapania icatsia pejanauvacuaira pacayajavaapaenatsi taxa pijanacuatatsia, jai Jesús pijajivijavabelia penavajunupaebijavata pebeyaxuabijavanexatsi.

*Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaname taja-jivitonëcuenemë,” jai yabara pelivaisi*

*(Mr 14.26-31; Lc 22.31-34; Jn 13.36-38)*

<sup>30</sup> Jesús pijajivi barënaaxëana Diosojumevajianë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona.

<sup>31</sup> Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename.

<sup>32</sup> Itsiata baitsi jane tatëpaecujinae, icatsia asaënë tsane. Nexata paxamë panevajënaeyabelia, copiata ponaenajë Galilea nacuayabelia, jai Jesús pijajivijavabelia.

<sup>33</sup> Nexata Pedro jumaitsi Jesúsjavabelia:

—Daxita mapamonaeye caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

<sup>34</sup> Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, naniaanaevëpata, vacara pefiabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

<sup>35</sup> Itsiata Pedro jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nija-jivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

*Pacuenia Jesús vajëta Diosojavabelia  
Getsemanívenëjavata yabara pelivaisi*

*(Mr 14.32-42; Lc 22.39-46)*

<sup>36</sup> Jesús pijajivi pecunuameravita yajavapata Getsemanívenëjavata. Bajarajota Jesús jumaitsi pijajivijavabelia:

—Paneevetenare abaxë majotaje. Abaxë raja imoxoyo majotaliaje vajëtsijitsianë Diosojavabelia, jai Jesús pijajivijavabelia.

<sup>37</sup> Nexata Jesús barëpona acueyabi ponëbeje pijajivi. Jesús pijajivi barëpona pesaicaeyojavabelia

mapamatabëxëyoje. Pedro, Santiago, Juan, bajaramatabëxëyo. Santiagobeje Juanbeje Zebedeo pexënatobeje. Bajaraxuacujinae Jesús bitso najamatabëxaina. Nexata bejamatabëjireca.

<sup>38</sup> Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata bitso tanajamatabëxainaejava, jamatabëyatëpajë. Paxamë abaxë majotaje panacopabare. Paitavamë tsane. Pëtsa abaxë pamajitame, jai Jesús pijajivi acueyabi ponëbejejavabelia.

<sup>39</sup> Nexata Jesús caenë pevajënaeyabelia icatsia tsiquirijavayo ponataba. Nexata Jesús irataeya bocajunua pevajëtsinexa Diosojavabelia. Jumaitsi Diosojavabelia:

—Taxa Diosomë, netocopatame picani tanebeyaxuabinexa betajibicueneta. Daxitacuene raja cacaëjëpa nexanaenexa. Nexata necapanepare bajarapabejibicuenenevecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús Diosojavabelia pevajëtsijavata pebeyaxuabijavanexatsi.

<sup>40</sup> Bajaraxuacujinae Jesús naviarena acueyabi ponëbeje pijajivijavaberena. Caxitajaraba Jesús pijajivi pemajitanubenaevi. Nexata Jesús jumaitsi Pedrojavabelia:

—¿Apo pacacaëjëpae tsabaja rovia caeepatoyo ata paneaitavatsenaenexa?

<sup>41</sup> Pëtsa pamajitame. Paitavamëre. Pavajëre Diosojavabelia papecayavenonaenexa pibisiacuene paneexanaeyaniva. Tsipaji raja

dovathi pacajamatabëcueneējëbiana. Paxamë picani panejamatabëcueneta pexaniacuene jamatabëpaexanabiabame. Itsiata baitsi jane apo pajamatabëcuenesaëmë pexaniacuene paneexanaenexa, jai Jesús Pedrojavabelia.

<sup>42</sup> Nexata icatsia Jesús pona pecovëyabelia pevajëtsinexa icatsia Diosojavabelia. Vajëta Diosojavabelia mapacueniaje.

—Axa, itsa apo jitsipaemë tanevecuatsatsinexamë betajibicueneta tatëpaejavanexa, nexata pacuenia jitsipame, netocopatsianame, jai Jesús Diosojavabelia.

<sup>43</sup> Bajaraxuacujinae Jesús icatsia naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana.

<sup>44</sup> Nexata abaxë bajarapamonae pemajitanubenaejavata, Jesús icatsia pona pecovëyabelia pevajëtsinexa icatsia Diosojavabelia. Nexata icatsia vajëta Diosojavabelia pacuenia vajëta copiaya xubeje vajëta.

<sup>45</sup> Bajaraxuacujinae icatsia Jesús naviarena pijajivijavaberena. Jumaitsi Jesús pijajivijavabelia:

—¿Abaxë tsarovia tsiteca pamajitanubename? Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia.

<sup>46</sup> Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

*Pacuenia Jesús vaetabatsi pijavajabitsaë yabara pelivaisi*

*(Mr 14.43-50; Lc 22.47-53; Jn 18.2-11)*

<sup>47</sup> Jesús pijavajabitsaë pevaetabijavatanexatsi, cuaicuaijai tsanucæ pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënënëmi. Judas pënanajetarubenatsi jivi ayaibitsaëtoxaneto. Bajaramonaeyajuvënëvi itsamonæ canajetarubena espadanë. Itsamonæ canajetarubena naebonë yajava. Bajarapamonæ itorobatsi sacerdotevi penamatacaitorobivi, judíovi pijaancianovinua.

<sup>48</sup> Judas pebarërenavajënae bajarapamonæ, copiaya baja cajena Judas tsipaeba pacuenia bajarapamonæ yapëtaejitsia Jesúscuene. Judas jumaitsi mapacueniaje:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajaraponë pavaetabianame. Pacobecëtsiana xaniavaetsia, jai baja cajena Judas pematacanajetarucaevi-javabelia pebarërenavajënae.

<sup>49</sup> Nexata jane baja Judas itsa patanajetaruca, exana pacuenia jumaitsi pematacanajetarucaevi-javabelia. Judas Jesús itabaratsutsuniaya bajacobatsi Judas jane baja pematacanajetarucaevi peyapëtaenexa Jesúscuene.

<sup>50</sup> Jesús nexata jumaitsi Judasjavabelia:

—Judas, ¿detsa xua yabara patame? jai.

Nexata jane baja Jesús petsimaxëponaevitsi, cujibarëcëpaliatsi. Vaetabatsi. Cobecëtatsi xaniavaetsia pecaponaenexatsi.



<sup>51</sup> Bajarajota Jesús pijajiviyajuvënënë pijaespada navemarajonotaxuabina. Muxuyropaebi-axuaba sacerdotevi pepo penamatacaitorobinë pijajivitonë.

<sup>52</sup> Nexata Jesús jumaitsi pijajivitonëjavabelia:

—Nijaespada baja xataremeca pevënojojavareca. Tsipaji pamonaë namaxëvanita espadata, daxita bajarapamonaë juya espadata babiatsi, jai Jesús.

<sup>53</sup> Icatsia Jesús jumaitsi:

—Itsa vajëtsipajë taxa Diosojavabelia taneyavenonaevinexa tanetoitorobinexatsica, nexata tavajëtsiepatota netoitorobijitsipaica bitso ayaibitsaëtoxanetonë ángelevi.

<sup>54</sup> Itsa vajëtsipajë taxa Diosojavabelia tanetoitorobinexatsica taneyavenonaevinexa, nexata baja apo netocopiapatsi tsipae pacuenia Dioso pejumelivaisibaxutota tajëvelia nevajunupaeba pacuenia nevaetabijitsia tanebeyaxuabinexa, jai Jesús pijajivitonëjavabelia.

<sup>55</sup> Nexata Jesús bajarajota jumaitsi petsimaxëponaevitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naëbonë yajava, patanevaetabinexamë pacuenia pavaetababiabame penacobetoxotsinë. Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë.

<sup>56</sup> Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajëvelia nevajunupaeba, jai Jesús pevaetabivitsijavabelia.

Nexata jane baja Jesús pijavajabitsaë pevaetabijavatatsi, daxita Jesús pijajivi xuabarëcëpecatsi pacuenia baja cajena Jesús tajëvelia jumaitsi pijajivijavabelia.

*Pacuenia Jesús nutatsi judíovi penamatacaitorobivi pitabarata yabara pelivaisi*

*(Mr 14.53-65; Lc 22.54-55, 63-71; Jn 18.12-14, 19-24)*

<sup>57</sup> Jesús pevaetabivitsi caponaliatsi Caifás pijaboyabelia. Bajaraponë Caifás sacerdotevi pepo penamatacaitorobinë. Nexata Caifás pijabota nacaetuana judíovi pecujarubivi, judíovi pijaancianovi yajava.

<sup>58</sup> Itsa baja Jesús caponaliatsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinë pijabopanabota, Pedro naeca templobopijipolicíavita. Bajarajota Pedro naeca petaenexa pacuenia Jesús pijavajabitsaë exanatsi.

<sup>59</sup> Nexata bajarapabo ënëtuatuajëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuaijai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata, Jesús pijaneconi. Najumetsënëtsiaya picani peneconitsilivaisinexa, jaita penajumetsënëtsilivaisita picani Jesús pebeyaxuabinexatsi.

<sup>60</sup> Ayaibitsaëto pata penajumetsënëtsilivaisi pepaebinexa Jesús yabara. Itsiata caelivaisi ata najumejëpaeya apo paebi bajarapamonae. Nexata bajarapamonae apo caxitajarabi paneconi yabara Jesús naneconitsiaexanaejitsiatsi pebeyaxuabiaexanaenexatsi. Bajaraxuacujinae belia anijanëbeje caelivaisi najumejëpaeya neconitatsibeje.

<sup>61</sup> Jumaitsibeje bajaraponëbeje Jesús yabara:

—Maponë jumaitsije: “Xanë necaëjëpa taxuabinexatsica Dioso pijatemplobo. Necaëjëpanua acueyabi matababita icatsia taveretetsinexa itsabo,” jai maponëje, jaiibeje bajaraponëbeje Jesús yabara.

<sup>62</sup> Nexata jane baja sacerdotevi pepo penamatacaitorobinë nonotapuna bajarapamonae pitabarata. Nexata jumaitsi Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuenia maponëbeje caneconitsiajumaitsibeje? jai sacerdotevi pepo penamatacaitorobinë.

<sup>63</sup> Jesús itsiata moya. Nexata bajaraponë icatsia jumaitsi Jesúsjavabelia:

—Caitorobatsi caecuenia tanenavajunupaebinexamë nexaniajaijumeta. Itsajume, Diosojavabelia naneconitsianame. Panenavajunupaebare xaniavetsia itsa xamë Cristomë, athëbëvetsica

Dioso pecaitorobinëtsica jivi necapanepaenexa. ¿Xamë tsaja Dioso pexënatomë? jai.

<sup>64</sup> Nexata Jesús jumaitsi:

—Jājā, xanë rabaja pacuenia nejumaitsimë. Nexata icatsia pacajumaitsi. Paxamë raja panetaename xanë, Daxitajivi Pematapijinënë, taecaejava Dioso pecujanenia, daxitajamatabëcuene pecaëjëpaenëtsi. Panetaenamenua tanajetarucaejava athëbëvetsica itarërëbota, jai Jesús.

<sup>65</sup> Bajarapacuenia Jesús pejumaitsijava itsa jumetane, sacerdotevi pepo penamatacaitorobinë penaxatatsijava anaeya titinaxuaba. Bajarapacuenia titinaxuaba pianaepanaexae Jesús pejumaitsijava yabara. Nexata sacerdotevi pepo penamatacaitorobinë jumaitsi daxita penacaetuatsivijavabelia:

—Mara ponë Dioso apo pejitsipaecuenia cuaicuaijaije. Dioso bepexë nato nataeya cuaicuaijai. Pijacuata rabaja naneconita bajarapacuenia pecuaicuaijaixae. Pematatsënëa baja apo namatavenonaetsi itsamonae vajanacatsipaebinexa paneconi yabara maponëje naneconitsiaexanaejitsiatsi. Paxamë rabaja pajumetaneme maponëje Dioso apo pejitsipaecuenia pecuaicuaijaijava.

<sup>66</sup> ¿Detsa nexata paxamë pajamatabëitsimë? jai sacerdotevi pepo penamatacaitorobinë daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

<sup>67</sup> Nexata bajarapamonae Jesús itabarasuabatsi. Bajaraxuacujinae papaëbërëpanata itaxutocëtatsi. Pitaxutocëtsicujinaetsi itabaratsaquibabeponatsi pecobethaitonëta. Itsamonae itabarapacabiauxu-ababiabatsi.

<sup>68</sup> Nexata bajarapamonae jumai tsaponae Jesúsjavabelia:

—¡Xamë raja itsa Cristomë, athëbëvetsica Dioso itsa pecaitorobinëtsica jivi necapanepaenexa, nexata vënëjonare ponë caitabarapacabiauxuaba! jai tsaponae bajarapamonae.

*Pacuenia Pedro nayavajunuaxaina Jesús pija-jivitonëcuene yabara pelivaisi*

*(Mr 14.66-72; Lc 22.56-62; Jn 18.15-18, 25-27)*

<sup>69</sup> Itsa abaxë Jesús sacerdotevi pepo penamata-caitorobinë pijabo ënëtuatuajëalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarapabota penacuenebiva Pedro kujirenatsi. Bajarapova jumaitsi Pedrojavabelia:

—Xamë ata rabaja naponaponame Jesúsata, Galilea nacuapijinëta, jai.

<sup>70</sup> Nexata Pedro itsiata nayavajunuaxaina Jesús pijajivitonëcuene. Daxita bajarajota penubenaevi pitabarata Pedro jumaitsi:

—Xanë cajena apo yapëtaenë pacuene yabara nejumaitsimë, jai.

<sup>71</sup> Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupajavabelia Pedro natixilia. Nuca bajarapabaupa

muxuneneta. Bajarajota icatsia itsava, bajarapabota penacuenebiva, Pedro taenutatsi. Nexata bajarapova ata Pedro yabara icatsia jumaitsi bajarajota penubenaevijavabelia:

—Mara ponë ata naponapona Jesústaje, Nazaret tomarapijinëta, jai bajarapova.

<sup>72</sup> Nexata icatsia Pedro nayavajunuaxaina Jesús pijajivitonëcuene. Pedro jumaitsi:

—Xaniajanë. Dioso pitabarata cajumaitsitsi. Apo yapëtaenë cajena bajaraponë, jai.

<sup>73</sup> Bajaraxuacujinae icatsia, caepatoyocujinae, bajarajota penubenaevi cujibarëcëpaliatsi Pedro. Jumaitsi bajarapamonae:

—Xaniajai raeta baja cajena. Xamë Jesús pijajiviyajuvënënëmë. Tsipaji rabaja Galilea nacuapijivi penatsipaebicuenia natsipaebame, jai bajarapamonae Pedrojavabelia.

<sup>74</sup> Nexata Pedro jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena bajaraponë, jai Pedro.

Itsa baja Pedro najumevereta bajarapacuenia pejumaitsijava, vacara fiaba.

<sup>75</sup> Nexata bajarajota Pedro najamatabënapitajaraba Pedrojavabelia Jesús pejumaitsijava mapacueniaje: “Ajena rabaja, pameravi, vacara pefiabivajënaeya, nayavajunuaxainaename tajajivitonëcuenëmë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijava Jesús Pedrojavabelia, Pedro najamatabënapitajaraba. Nexata baja Pedro pitsapalia bo matatoyorotsia

peyacaranatsijava pënëyabelia. Piniijicuenia Pedro nua.

## 27

*Pacuenia Jesús caponaliatsi Pilatojavabelia yabara pelivaisi*

(Mr 15.1; Lc 23.1-2; Jn 18.28-32)

<sup>1</sup> Ajena baja matacabi tsarucaponae, sacerdotevi penamatacaitorobivi, judíovi pijaancianovi yajava, najamatabëjêpa pacuenia exanaejitsia Jesús pebeyaxuabiaexanaenexatsi.

<sup>2</sup> Nexata Jesús cobecëtsiaya caponaliatsi nacuaevetsinë Poncio Pilatojavabelia.

*Pacuenia Judas nabeyaxuaba yabara pelivaisi*

<sup>3</sup> Judas canajetaxuabatsi Jesús pijavajabitsaë pecobeyabelia. Bajaraponë itsa tane Jesús penaneconitsijava pebeyaxuabinexatsi, nexata bitso najamatabëxaina. Nexata pona petocanaviatsinexa perajutsipalatamitsi, treinta ponëbeje pepo palatanëanë, bitso penamatamotsinëanë. Tocanaviatsijitsia sacerdotevi penamatacaitorobivijavabelia, judíovi pijaancianovijavabelia ata.

<sup>4</sup> Judas jumaitsi bajarapamonaejavabelia:

—Pibisiacuene baja rovia exanajë. Bajaraponë itsacuenejavayo ata apo exanaenejeva, panecobeyabelia baja canajetaxuabajë, jai Judas.

Nexata bajarapamonae jumaitsi Judasjavabelia:

—¡Paxanë raja patajamatabëcueneta apo naneconitsimë tsane! ¡Xamë raja nijacuata naneconitame! jai bajarapamonae Judasjavabelia.

5 Nexata Judas templobota othotajarabeta perajutsipalatanëanëmitsi. Bajaraxuacujinae pitsapalia. Pona baja. Nexata pijacuata nabeyaxuaba. Pepuanavësicëtsi athëbëvetsica perucaemaëtoxanetota, athëbëvetsica jirevica irabetsica penacuibosi catarërëtajarabaxuabinexa. Bajarapacuenia pijacuata Judas nabeyaxuaba.

6 Nexata sacerdotevi penamatacaitorobivi caetuata Judas piothotajarabetsipalatanëanë. Najumaitsi bajarapamonae:

—Acuenebi mapapalataje vajabuatsinexa ofrenda vajajebabiabicajónita. Tsipaji bajarapapalata pejamatabëcueneta jivitonë beyaxuabijitsiatsi, najai bajarapamonae.

7 Nexata bajarapamonae najamatabëjëpa bajarapapalatanëanëta pecomuatsinexa ira. Nexata bajarapamonae bajarapapalatanëanëta comuata canalitonë pefaratabiabinë pijairami. Bajarapamonae comuata bajarapaira, itsanacuaverena pepatsivi itsa tëpa Jerusalén tomarata, bajarapairata pemëthëtabiabinexa.

8 Bajaraxuata mapamatacabijavaberena ataje vënëruba bajarapaira mapejumaitsivënëje: “Papalata pejamatabëcueneta jivitonë beyaxuabatsi, bajarapapalatata pecomuatsiira,” pejaivënë vënëruba.

9 Bajarapacuenia itsa comuata bajarapaira, copiapata jane baja pacuenia Diosojumepabinëmi profeta Jeremíaspijinë bajayata tajëvelia vajunupaeba bajarapapalata. Profeta Jeremíaspijinë baja cajena bajarapapalata yabara tajëvelia jumaitsi mapacueniaje: “Israelnagua pevetsivi rajutsiana jivitonë pecanajetsinëjavabelia treinta



ponëbeje, pepo platananitota pexanaenëanë. Bajarapapalatanëanë icatsia bajarapamonae pitsiana.

<sup>10</sup> Nexata bajarapapalatanëanëta bajarapamonae comuatsiana canalitonë pefaratabiabinë pijairami, pacuenia Dioso tajëvelia nejumaitsi,” jai bajayata profeta Jeremíaspijinë tajëvelia pevajunupaebijavata Jesús pematamopitsipalatanexatsi.

*Pacuenia Jesús nutatsi Pilato pitabarata yabara pelivaisi*

*(Mr 15.2-5; Lc 23.3-5; Jn 18.33-38)*

<sup>11</sup> Jesús nutatsi nacuaevecsine Pilato pitabarata. Nexata Pilato jumaitsi Jesúsjavabelia:

—¿Xamë tsaja judíovi pepo nevetsinë? jai Pilato.

Nexata Jesús jumaitsi Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

<sup>12</sup> Sacerdotevi penamatacaitorobivi, judíovi pi-jaancianovi yajava, Jesús neconitaponae atatsi, apo jumepitsi.

<sup>13</sup> Nexata Pilato jumaitsi Jesúsjavabelia:

—¿Apo jumetaemë tsaja pacuenia mapamonae caneconitaponaje? jai.

<sup>14</sup> Jesús neconitsi atatsi, itsiata apo jumepitsi. Bajaraxuata Pilato jamatabëcuenenabenajaca. Apo yapëtae pacuenia Pilato exanaejitsia Jesúsjavabelia.

*Pacuenia baja Pilato tocopata Jesús pebeyaxu-abinexatsi yabara pelivaisi*

*(Mr 15.6-20; Lc 23.13-25; Jn 18.38-19.16)*

15 Nacuaeavetsinē Pilato xaina pijacujirucue. Caevai canacujitsia, pascua fiestamatacabi, Pilato copatabiaba caenē penaneconitsinē pepit-sapaenexa penaneconitsivi pejebabiabibovecua. Pajivi yabara jivi vajētabiaba Pilatojavabelia, bajarapajivi Pilato copatabiaba pascua fiestamatacabi. Bajarapacuenia Pilato caenē copatabiaba jivi pesivajamatabēcuene xanepanaenexatsi.

16 Pamatacabi Jesús naneconitsiaexanatsi, bajarapamatacabi penaneconitsivi pejebabiabibota naneconitsiaaponapona jivibenē, Barrabásvënënë. Bajaraponē bitso piacujirubejenēcuene yapētanetsi daxitajivi.

17 Nexata daxita Jerusalén tomarapijivi penacaeuatsijavata Pilato jumaitsi:

—¿Detsa ponē pajitsipame patacatocapit-sapaenexa penaneconitsivi pejebabiabibovecua pepitsapaenexa? ¿Barrabás tsaja? Itsa jume, ¿Jesús tsaja, ponē yabara jivi jumaitsi: “Cristo raja athēbēvetsica Dioso pitorobinētsitsica jivi pecapanepaenexa,” jaitsi? jai Pilato bajarapamonaejavabelia.

18 Pilato jamatabējumaitsi:

—Xua Jesús exanapona, sacerdotevi penamatacatorobivi cueneitoyatsi. Bajaraxuata netocaparena, jamatabējai.

19 Pilato abaxē eca itsajota ecabiaba penaneconitsivi penaneconitsiaexanaenexa. Nexata Pilato pijava tonajumeitorobarenatsi. Pilato pijava Jesús yabara jumaitsirena mapacueniaje: “Copare bajaraponē, ponē itsacueneneconiyo ata apo penaneconitsinē. Ajena raja, meravi, amajitsinaebejenē

bajaraponë yabara,” jaitsirena Pilato pijava. Nexata picani Pilato jamatabëcopata Jesús.

<sup>20</sup> Itsiata baitsi jane bajarapaepatota sacerdotevi penamatacaitorobivi, judíovi pijaancianovi yajava, jivijavabelia muxubijiapenetsia jumai tsaponae:

—Pavajëtsianame Barrabás pecapitsapaenexatsi. Pavajëtsianame Jesús pebeyaxuabinexatsi, jai tsaponae bajarapamonae.

<sup>21</sup> Nexata nacuaevetsinë Pilato icatsia yanijoba jivijavabelia:

—¿Detsa ponë nexata pajitsipame patacatocapitsapaenexa? jai Pilato.

Nexata bajarapamonae jumaitsi:

—Panetocapitsapare Barrabás, jai.

<sup>22</sup> Pilato nexata jumaitsi bajarapamonaejavabelia:

—¿Detsa nexata xua exanaenajë Jesúsjavabelia, ponë yabara: “Cristo, ponë Dioso athëbëvetsica itorobatsi jivi pecapanepaenexa,” jaitsi? jai Pilato bajarapamonaejavabelia.

Nexata daxita bajarapamonae jumaitsi Pilatojavabelia:

—¡Cruzajavabelia cobematabiabarutsiaexanare! jai bajarapamonae.

<sup>23</sup> Nexata Pilato jumaitsi bajarapamonaejavabelia:

—¿Detsa pitsineconi yabara cobematabiabarutsiaexanaejitsipajë cruzajavabelia? jai Pilato Jesús yabara.

Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare!  
jai tsaponae.

24 Pilato tane piajumesaëjava bajarapamonae.  
Muxujiobi ata, apo jumecovënëtsitsi.  
Bitsoyo biji caranata bajarapamonae  
jamatabënanaecajematapona bajarapatomarata.  
Nexata Pilato penacobequiatsinexa,  
pijajivi itoroba petocarenanexatsi mera.  
Pilato nacobequiata daxitajivi pitabarata  
bajarapamonae peyapëtaenexa Jesús apo  
penaneconitsiaexanaecuene. Pilato jumaitsi  
bajarapamonaejavabelia:

—Xanë raja tajamatabëcueneta apo beyaxuabi-  
aexanaenë tsane maponëje, planeconijibinë. Pax-  
amë panejamatabëcueneta pabeyaxuabiaexanae-  
name, jai Pilato.

25 Nexata daxita bajarapamonae jumaitsi:

—¡Itsa bajaraponë planeconijibinë Diosojav-  
abelia, nexata bajaraponë patabeyaxuabineconi  
jema panetsijumajopaena, pataxi yajava! jai  
bajarapamonae Pilatojavabelia.

26 Nexata baja Pilato tocopata Barrabás  
pepitsapaenexa penaneconitsivi pejebabiabi-  
bovecua. Itorobanua vajabitsaëvi ayaicuenia  
Jesús pejumatitibabenexatsi penaneconitsivi  
pejumaconitabiabimacata. Bajaraxuacujinae  
Pilato tocopata baja Jesús vajabitsaëvi  
pecobematabiabarutsinexatsi cruzajavabelia.

27 Nexata baja Pilato pijajivi, vajabitsaëvi, Jesús  
caponaliatsi nacuaevetsinë Pilato pijaboxaneto-  
javabelia. Nexata bajarajota Jesús matatoyorotsia  
nacaetuatatsi daxita vajabitsaëvi.

28 Jesús penaxatatsijava vajabitsaëvi vejumajonotatsi saicayajava pexatatsinexatsi. Nexata jane baja vajabitsaëvi Jesús quenetsiataeya xatatatsi petsobiajava benacuaevetsinëcuenia petaenexatsi.

29 Becoronacuenia pemataxatatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi. Tsioberutatsinua naebo pecujuanenia benacuaevetsinëcuenia petaenexatsi. Nexata bepeyaiyataecueniatsi bajarapamonae pematabacabëta tonubenatsi Jesús pitabarata. Quenetsiataeya jumai tsaponaetsi:

—¡Bajaco, judíovi pepo pevetsinë! jai tsaponaetsi bajarapamonae.

30 Suabaponatsi. Vecuapitatsi naebo. Bajara-panaebota mataconitajarababiabatsi.

31 Bajarapacuenia quenetsiataeya pecapocaponaecujinaetsi, vejumajonotatsi baja pexatatsijavatsi. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

*Pacuenia jane baja Jesús cruzajavabelia cobematabiabarutatsiyabara pelivaisi*

*(Mr 15.21-32; Lc 23.26-43; Jn 19.17-27)*

32 Vajabitsaëvi Jesús itsa caponaliatsi tomaravecua, namutota caxitajaraba Simónvënënë, Cirene tomarapijinë. Nexata vajabitsaëvi Simón itorobatsi, pacruzajavabelia Jesús cobematabiabarut-sijitsiatsi, peyavenonaeyacaponaenexa.

<sup>33</sup> Jesús caponaliatsi Gólgotavënë tsutojavabelia, bajarapatsutojumata pecobematabiabarutsinexatsi cruzajavabelia. “Gólgota,” itsa jai hebreojumeta, mapajumetaje pejumaitsijume: “Jivimatasipatsuto,” pejaijume.

<sup>34</sup> Bajarajota picani Jesús rajutatsi vinora, pe-matajërëabira piatsaxarata. Jesús picani rajutatsi bitso penavixaetaeyaniva pecobematabiabarutsijavatatsi cruzajavabelia. Jesús pajane bajarapora. Itsiata apo apae.

<sup>35</sup> Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami. Bajarapacuenia vajabitsaë itsa natsicobetsana Jesús penaxatatsijavami, tocopiapatatsi jane baja pacuenia Diosojumepaebinëmi profetanë bajayata tajëvelia vajunupaeba Jesús penaxatatsijava. Jesús penaxatatsijava yabara, profetanëmi bajayata tajëvelia jumaitsi mapacueniaje: “Natsicobetsanaena penaxatatsijava. Canamuxusitsiana beibotoxi peyapëtaenexa ponë pitaponaejitsia,” jai profetanëmi.

<sup>36</sup> Bajaraxuacujinae vajabitsaëvi bajarajota evetena penaitaxutocaevetsinexatsi Jesús.

<sup>37</sup> Bajarajota Jesús pematobocoto matatsënëyo cruzajavata, yaquinaruta tablapayota itsamonae ata peyapëtaenexa pajamatabëcuene yabara

naneconitsiaexanatsi Jesús. Jumai tsarutsi peyaquinaeitane cruzajavata mapacueniaje: “Mara ponë Jesúsje, judíovi pepo pevetsinë,” jai tsarutsi Jesús yabara.

<sup>38</sup> Anijanëbeje penacobetoxotsinëbeje Jesús yajacobematabiabarutatsi. Caenë canacujitsia pi-jacruzata rubatsi. Bajaraponëbeje Jesús pemux-uneneta rutatsibeje. Itsanë Jesús pecujuanenia rutatsi. Itsanë Jesús petsavenonenia rutatsi.

<sup>39</sup> Jesús pecobematabiabarutsijavatatsi cruzajavelia, bajaraxuayo penajetarubenaevi Jesús itaropitsiaya bijataeyabiabatsi.

<sup>40</sup> Jumai tsabiabi bajarapamonae:

—Xamë raja imata jumaitsimë: “Xuabianicajë templobo. Acueyabi matabita icatsia veretetsianajë itsabo,” jamë. Nacapanepare jane baja nijacuata. Itsa xaniajai Dioso pexënatomë, nexata cruzajavavetsica runaimica, jai tsabiabi Jesúsjavavelia bajaraxuayo penajetarubenaevi.

<sup>41</sup> Bajara pijinia pacuenia sacerdotevi penamat-acaitorobivi capocaponatsi Jesús. Judíovi pecu-jarubivi ata capocaponatsi. Fariseovi ata capocaponatsi. Judíovi pijaancianovi ata capocaponatsi Jesús. Ēpamonae najumaitsi:

<sup>42</sup> —Maponëje itsamonae yabara jumai tsabiabi: “Capanepaenajë jivi,” jai tsabiabi. Caranata pi-jacuata penacapanepaenexa apo caëjëpaetsi. Itsa xaniajai Israel nacuapijivi pepo pevetsinë, nexata aeconoxae cruzajavavetsica runaenica vajataenexa. Nexata jane baja jumecovënëtsianatsi Cristonëcuene.

<sup>43</sup> Bajaraponë pina najamatabëcuenecopata Diosojavavelia peyavenonaenexatsi. “Xanë

raja Dioso pexēnatonē,” jai tsabiabinua. Nexata taenatsi aeconoxae Dioso pecapanepaejavatsi, najai bajarapamonae capocaponaeya Jesús yabara.

<sup>44</sup> Ponēbeje penacobetoxotsinēbeje Jesús yajavacobematabiabarutatsi, bajaraponēbeje ata Jesús bijataerucatsibeje bajarapacuenia.

*Pacuenia baja Jesús tēpa yabara pelivaisi  
(Mr 15.33-41; Lc 23.44-49; Jn 19.28-30)*

<sup>45</sup> Jesús baja itsa tēpaejitsia, ajena matonejejit-sia, daxita nacuanējava aitaquiri tsajuni. Matapania caniviyojavabelia, bejamatabēcuene a las tres, nacua napebeta icatsia.

<sup>46</sup> Nexata paepatota icatsia nacua napebeta, bajarapaepatota pinijicuenia Jesús aējai. Jumaitsi:  
—Eli, Eli, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsijume: “TajaDioso, tajaDioso, ¿detsa xuajitsia baja tajaepato necopatame?” pejaijume.

<sup>47</sup> Nexata itsamonae bajarajota penubenaevi bijiaya jumetane bajarapacuenia Jesús pejumait-sijava. Nexata saya jamatabēcuenenavēxaniabiaya jumaitsi bajarapamonae:

—Mara ponē junata profeta Elíaspijinēmi, Diosojumepaebinēmi, jai bajarapamonae.

<sup>48</sup> Nexata bajarapamonaejavuvēnēnē bepijia cujinaelia pecarenanexa esponjavēnējava. Nexata esponjavēnējava jabutaba piajatuvinorayalia. Bajaraxuacujinae esponjavēnējava naeboupita cētaruta. Toyotsiatsi Jesús petsutsuninexa picani bajaraxua.



49 Itsiata itsamonae jumaitsi:

—Copare abaxë. Taenatsi Elíaspijinë itsa najetaruca pecapanepaenexatsi, jai bajarapamonae capocaponaëya.

50 Icatsia Jesús pinijicuenia aëjai. Bajaraxuacujinae jane baja Jesús tēpanajereca.

51 Paepatota Jesús tēpanajereca, bajarapaepatota templobo enētuaatuaejëalia peyatuucutarutsipana, ayaipapaëbërëpanaxaneto, titititica tuatuaejëareca, athëbëvetsicacujinae irabereca. Ira najëaba. Ibotoxanetonë ata sarapajunujunua.

52-53 Ayaibitsaëto Dioso pepua pejume-covënëtsivi petëpaevimi pemëthëanë ata napananubena. Nexata Jesús acueyabi maticabita icatsia itsa asaë petëpaeujinae, pamonae pemëthëanë napananubena, bajarapamonae ata cotocaevi asaë. Nexata pitsapa mëthëvetsina. Nexata bajarapamonae pona Jerusalén tomarabelia. Bajarajotalia naitajëbapona jivi ayaibitsaëtojavabelia.

54 Jesús cruzata petëpaejavata vajabitsaëvi pijacapitán, pijajivi yajava, nuca. Taenubena Jesús petëpaejava. Jesús petëpaejavata ira najëaba. Nexata bajarapamonae itsa tane ira penajëabijava, itsajavanë ata itsa taepona, bajarapamonae bitso junava. Jumaitsi:

—Matsaena ponë tēpaje, pepacuene baja rovia Dioso pexënato, jai bajarapamonae.

55 Bajarajota petiriavibitsaëtoxaneto tajiyoverena taenubena Jesús petëpaejava. Bajarapape-tiriavi Jesús pepëta napona Galilea nacuaverena, Jesús peyavenonaevimitsi.

<sup>56</sup> Bajara papetiriavibitsaëtoxaneto tuatuajëta nanubena mapamatabëxëyoje. Itsava Mariävënëva, Magdala tomarapijiva. Itsava icatsia Mariävënëva. Bजारapova Santiagobeje Josébeje pena. Itsava pijinia Salomévänevëva. Bजारapova pijinia Santiagobeje Juanbeje pena. Bजारapova Salomévänevëva, Zebedeo pijava.

*Pacuenia Jesús petëpaenë mëthëtatsi yabara pelivaisi*

*(Mr 15.42-47; Lc 23.50-56; Jn 19.38-42)*

<sup>57</sup> Itsa baja caniviyotsia, José, Arimatea tomara-pijinë, pona nacuaevetsinë Pilatojavabelia. Bजारaponë José bitso pexainaenë pexainaejava. José jumecovënëtaponapona Jesús Cristocuene.

<sup>58</sup> Nexata José itsa pata nacuaevetsinë Pilatojavabelia, vajëta petocopatsinexatsi pemëthëtsinexa Jesús petëpaenë. Nexata Pilato itoroba pijajivi petocopatsinexatsi.

<sup>59</sup> Nexata José cruzajavavetsica pitsica Jesús petëpaenë. Mataquionaeya daxitanëreca matacacëba pexaniaviria piapiasábanapanata, piaxuirajibipanata.

<sup>60</sup> Bजारaponë José, pamatacabi tëpa pemëthëtsinexatsi picani, iboitapajanitojavata pinijiibovaju toexanabuatatsi cajena. Nexata bajarapaibovajulia José buata Jesús petëpaenë. Nexata bajaraxuacujinae pinijiibopanaxaneto José tixirena. Yavajuvëpaacatabuata. Nexata baja José naviata pijaboyabelia.

<sup>61</sup> Bजारajota ibovaju itapajavata eecabeje anijavabeje ëMariävënëvabeje. Itsava María, Magdala tomarapijiva.

*Pacuenia vajabitsaëvi Jesús pemëthë  
evetavanapa yabara pelivaisi*

<sup>62</sup> Pascua fiesta pejonematacabinexa pevajënaeya pamatacabi, judíovi baja banacuenevereta penacuenebijava. Nexata baja pamatacabi judíovi banacuenevereta penacuenebijava, bitso baja itsa caniviyotsia, sacerdotevi penamatacaitorobivi, fariseovi ata, ponalia Pilatojavabelia.

<sup>63</sup> Nexata bajarapamonae jumaitsi Pilatojavabelia Jesús yabara:

—Pamatacabi abaxë bajaraponë asaë tsaponaponae bitso najumetsënëtabiaba. Jumai tsabiabi: “Tatëpaecujinae, acueyabi matacabita, icatsia asaënë tsane,” jai tsabiabi. Bajarapejumaitisijava paxanë apo panacofënëtsinë.

<sup>64</sup> Nexata nijajivi itorobare bajaraponë pemëthë xaniavaetsia pevetsinexa. Nexata nijajivi bajaraponë pemëthë xaniavaetsia evetsiana acueyabi matacabijavabelia, bajaraponë pecapaebimatacabijavabelia. Nexata acuenebi tsane pijajivi meravipejutsinexatsi mëthëvecua. “Namatacota rabaja Jesús,” pejajjava ata jivijavabelia, acuenebi tsane. Itsa bajarapacuenia pijajivi jumai tsipae, nexata najumetsënëtsipa copiaya Jesús penajumetsënëtsijava matatoxenetsia. Nexata bajarapacuenia yamaxëitorobijitsipa jivi ayaibitsaëtoxaneto, jai bajarapamonae Pilatojavabelia.

<sup>65</sup> Pilato nexata jumaitsi bajarapamonaejavabelia:

—Mapamonae tajajivi, vajabitsaëvije,  
 payjavaponare. Nexata paitorobare  
 bajarapamonae Jesús pemëthë pevetsinexa  
 xaniavaetsia, jai.

<sup>66</sup> Nexata bajarapamonae vajabitsaevi  
 barëponalia Jesús pemëthëjavabelia. Bajarapa-  
 monae pemaëtoupi catsataruta Jesús pebuatsiibo-  
 vajutsi pevëpaacatsiibopanajumata. Itsaupi pijinia  
 catsata iboitapajanitojavabelia. Bajarapacuenia  
 exana peyapëtaenexa petixitsijava muetsia  
 Jesús peyavajuvëpa acatabuatsiibopanatsi.  
 Bajaraxuacujinae itoroba vajabitsaëvi Jesús  
 pemëthëvëpa pevetavanapaenexa.

## 28

*Pacuenia Jesús petëpaecujinae icatsia asaëyabara  
 pelivaisi*

*(Mr 16.1-8; Lc 24.1-12; Jn 20.1-10)*

<sup>1</sup> Judíovi baja penacueraevetsimatacabi ita  
 verevereca, meravia pitsijavata, bajayacunua,  
 ajena matacabi tsarucaponae, María, Magdala  
 tomarapijiva, itaMaría yajava, taeyojopaliabeje  
 Jesús pebuatsiibovajutsijavabelia.

<sup>2</sup> Jemata ira najëaba. Tsipaji Dioso pijaánel  
 runaica athëbëvetsica. Angel ita pata Jesús pe-  
 buatsiibovajutsijavata, tixita Jesús peyavajuvëpa  
 acatsiibopanaxanetomi. Bajaraxuacujinae ánel  
 eca bajarapaibopanajumata.

<sup>3</sup> Bajaraponë ánel naitayota. Pacuenia ya-  
 maxëcotia itsi, bajara cotiaitsi ánel. Penaxatatsi-  
 java niojai daxita peniojaijava matatoxenetsia.

<sup>4</sup> Vajabitsaë, pamonaë evetanubena Jesús pebuatsiibovajutsivëpa, itsa tane ángel, neconecojai pecajunavi. Bobenajunua bepetëpaevi.

<sup>5</sup> Nexata ángel jumaitsi petirivabejejavabelia:

—Pëtsa pajunavamebeje. Yapëtaniji xua yabara paponamebeje. Jesús pecobematabiabarutsinëmitsi cruzajavabelia, pajaitamebeje.

<sup>6</sup> Ajibi raja tsarucæ majotaje. Asaë rabaja icatsia pacuenia baja cajena tajëvelia jumaitsi. Paremërebeje panetaenexabeje itsajota picani butatsi.

<sup>7</sup> Bajaraxuacujinaë paliamëbeje tsane bepíjia. Pijajivijavabelia patsipaebianamebeje mapacueniaje: “Petëpaenëmi rabaja icatsia asaë. Panevajënaeyabelia pina pona Galilea nacuayabelia. Baja pina jotalia pacaxitajarabianame,” pajamëbeje tsane pijajivijavabelia. Bajarapalivaisiyo xainajë patacatsipaebinexabeje, jai ángel bajarapovabejejavabelia.

<sup>8</sup> Nexata bajarapovabeje naviatabajiravabeje Jesús pebuatsiibovajutsivecua. Junavabeje picani. Itsiata barëyabeje bitso. Cujinaetabajiravabeje petsipaebinexabeje Jesús pijajivijavabelia.

<sup>9</sup> Bajarapovabeje namutualia pecujinaejinaenajetarucæjavatabeje, Jesús jemata tsitanaitajëtatsibeje. Nexata bajarapovabeje cujitabaliabeje Jesúsjavabelia. Bajacobatsibeje. Nexata pematabacabëta nucajunuabeje. Sitaicaliabeje yaiyataeya Jesús pecopiapitsinexabeje bajarapacuenia.

<sup>10</sup> Jesús nexata jumaitsi bajarapovabejejavabelia:

—Pëtsa pajunavamebeje. Paliämërebeje taja-jivijavabelia. Pajumaitsimëbeje tsane tajajivijavabelia: “Jesús raja jumaitsi. Paponæremelia pina Galilea nacuayabelia. Baja pina jotalia pacacaxitajarabiana Jesús,” pajamëbeje tsane tajajivijavabelia, jai Jesús.

*Pacuenia vajabitsaëvi navajunupaeba yabara pelivaisi*

<sup>11</sup> Paepatota ëMaríavënevabeje naviatabeje Jesús pebuatsiibovajutsijavavelia, vajabitsaëvi, Jesús pemëthë pevetsiviyajuvënevë, pona tomarabelia. Bajarapamonæ tsipaeba sacerdotevi penamatacaitorobivijavabelia pacuenia tane bajarapamonæ.

<sup>12</sup> Nexata sacerdotevi penamatacaitorobivi pona judíovi pijaancianovijavabelia penabarëcuaiçuajainexa penajamatabëjëpaenexa pacuenia exanaejitsia. Nexata jane baja bajarapamonæ najamatabëcuenejëpa. Nexata bajarapamonæ rajuta ayajava palata vajabitsaëvijavabelia.

<sup>13</sup> Bajarapamonæ jumaitsi vajabitsaëvijavabelia: —Jivijavabelia pajumaitsimë tsane: “Meravi pataitamajitsita, Jesús pijajivi pata. Nexata bajarapamonæ juta Jesús petëpaenë,” pajamë tsane.

<sup>14</sup> Nexata nacuaevetsinë Pilato itsa jumetaena mapajumeje, paxanë itsiata pacayavenonaenatsi itsacuene papecaexanaeyaniva, jai bajarapamonæ vajabitsaëvijavabelia.

<sup>15</sup> Nexata vajabitsaëvi jejai. Nota bajarapapalata. Nexata jane baja vajabitsaëvi pona najumetsënëtsiaya jivijavabelia pejumaitsinexa

pacuenia itorobatsi. Nexata vajabitsaevi najumetsënëtsiaya jumai tsaponae jivijavabelia:

—Meravi pataitamajitsita, Jesús pijajivi pata. Nexata Jesús pijajivi petëpaenë jutatsi, jai tsaponae jivijavabelia.

Bajarapacuenia vajabitsaevi pepaebixae, judíovi juya bajarapacuenia natsipaebapona. Nexata mapamatacabijavaberena ataje judíovi jumai tsabiabi:

—Jesús pijajivi petëpaenë jutatsi, jai tsabiabi.

*Pacuenia Jesús petëpaecujinae icatsia itsa asaë, pijajivi itoroba pejumelivaisi jivi petotsipaebanaje tarubenaenexatsi daxitanacuanëjava yabara pelivaisi*

*(Mr 16.14-18; Lc 24.36-49; Jn 20.19-23)*

<sup>16</sup> Jesús pijajivi once ponëbeje pona Galilea nacuayabelia. Jesús pijajivi pona petsutojumabelia, patsutojumatalia Jesús caxitajarabiapae-batsi.

<sup>17</sup> Nexata bajarapatsutojumata Jesús pijajivi itsa taenuta Jesús, yaiyataeya pitabarata pematabacabëta tonubena. Itsiata itsamonae Jesús pijajiviyajuvënëvi jamatabëcuenenavëxaniabiaya jamatabëjumaitsi:

—Apo Jesús meta, jamatabëjai.

<sup>18</sup> Nexata Jesús pijajivi kujirena. Jumaitsi pijajivijavabelia:

—Dioso baja cajena nevetsiaexana daxitacuenae athëbëtatsia, daxita mapanacuajava ataje, taevetsinexa.

<sup>19</sup> Nexata pacaitorobatsi. Paponare daxitanacuanëjava daxitanacuanëpijivi tajumelivaisi patanetotsipaebinexamë tanejumecovënëtsinexa.

Bajarapamonae pabautisabaponaename taxa pevenëta, xanë ata pexënatonë tavënëta, Espiritu Santo ata pevenëta.

<sup>20</sup> Bajarapamonae patsipaebaponaename pejumecovënëtavanapaenexa daxita pacuenia pacaitorobatsi. Pëtsa panacofënëtame daxitamatacabi patacayajavaponaponaejava. Nacua pevereverecaejavabelianexa ata pacaya-javaponaponaenatsi, jai Jesús pijajivijavabelia.



**Dios pejumelivaisibaxuto  
pejanalivaisibaxuto  
New Testament in Guahibo**

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Guahibo

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

ccl

2014-08-06

---

PDF generated using Haiola and XeLaTeX on 18 Apr 2025 from source files  
dated 29 Jan 2022

bc03f416-faf8-5000-bfb5-5ca8a3fa98cf